

全宋词

第七部

丁无悔

满庭芳

道格天渊，令行海岳，凛然名德尊崇。云烟千里，分付笑谈中。川后波神效职，潮声细、一鉴涵空。风樯便，蛮珠贾舶，累译更遥通。

雍容。廊庙手，蓍龟先见，日月精忠。自丛机初解，眷渥尤隆。共道奇庞福艾，袞衣到，宁久居东。谯门晓，高牙大纛，辉映醉颜红。

满庭芳

偃屋霜清，棱层烟碧，玲珑移在人间。山光林色，常伴主人闲。元有仙风道骨，无心趁、玉笋朝班。归来赋，不因五斗，谈笑挂衣冠。

尤难。谁不羨，商山橘乐，渭水渔竿。引相君王子，助发幽欢。满泛寿觞多祝，南溟共、北海波澜。君知否，庙堂有意，相与问寒岩。

杨再可

喜迁莺

腊天初晓，庆五色瑞云，华轩呈绕。紫府真人，丹台仙伯，合降民间荣耀。彩笔素题，篇翰未减，家声词藻。秀眉宇，俊丰标闳阔，声名都好。

富贵长欢笑。此际锦堂，移下蓬莱岛。妙舞蹁跹，清歌宛转，两行翠娥燕赵。劝饮百千钟酒，岁岁朱颜不老。春近也，看香红又怕，小桃开了。

刘仲讷

水调歌头

昨夜乘秋兴，长啸驭清风。飘然玉宇虚廊，忽到广寒宫。
解后姮娥相见，为问中秋诞节，奇特世难同。底事长庚梦，独
占此宵中。

呼金兔，寻玉策，检前踪。自从盘古有月，便有此山仙翁。
公向人间游戏，月在天衢来往，清气每相通。明月既无尽，公
寿亦无穷。

蒋思恭

水调歌头（寿张运使）

紫府制金钥，银汉夜乘槎。老仙暂驻幢节，来佐玉皇家。翠发朱颜好在，肘后有方医国，宝鼎养丹砂。谈笑功名了，身退饭胡麻。

游物外，聚紫脑，练青芽。星垣寓直有子，曾步八砖花。来岁称觞寿宴，袞绣彩衣交映，重荐枣如瓜。俯首拾瑶草，长啸卧烟霞。

水调歌头

风流九霞客，名在五云乡。十年出入华禁，簪橐奉君王。黄伞西清日转，宝月红鸾影里，长近赭袍光。彩笔赓歌处，殿阁有余凉。

跨秋风，凌宝鼎，笑芝房。人间争识奇贵，妙贴焕名章。莫羨碧幢金印，换取玉堂清琐，翰墨看淋浪。岁岁宫壶酒，雨露带天香。

张成可

洞仙歌

薰风池阁，八叶蓂初展。紫府当年侍香案。见蟠桃频着子，偷荐瑶觞，贪醉寐，谪向人间未满。

青禽传近信，催赴仙班，怪我尘缘未能断。爱吴中山色好，抹月批风，蓑共笠，纵有金章不换。待驾鹤邀访蓬壶，问海水从来，几番增减。

水龙吟（春寿太守）

碧霄彩旆垂铃，应南极星躔光灿。巍巍名阀，芳传汉相，貂蝉炳焕。德莹冰壶，量包沧海，神钟岩电。向宝储内阁，英才华，声猷著膺宸眷。

荐领名都屏翰，更循良、歌腾畿甸。峻专剧郡，荣登法从，光生尧殿。密勿论思，雍容启沃，才华独冠。愿年年长见，兰芽玉喷，柳梢金嫩。

张时甫

玉楼春（寿平江陈守）

姑苏台上春光发。菊老寒轻香未歇。人言太守是龚黄，
天为吾君生稷契。

月良庆会俱良月。万岁千秋同瑞节。明朝仙领趣提鳌，
十万人家齐卧辙。

玉楼春

蟠桃十月惊春早。春到玉梅枝上小。和羹人物应时生，
天上骑鲸生凤沼。万家宝篆祥烟晓。竞祝史君长不老。夜来南极
照元台，见说沙堤新筑了。

李朝卿

玉楼春

谪仙暂下金銮殿。开燕瑶池春未晚。飞琼献舞锦靴寒，弄玉吹箫银字暖。

寿觞阿母年年劝，犹道碧桃香尚浅。花开更待几东风，应见年华千岁换。

玉楼春

炉烟不断腾金兽。香雾入帘波影皱。秋堂锦席艳君仙，不惜绮罗萦舞袖。

昼弦素管春风手，娇妙如花轻似柳。劝君须尽眼中欢，绿酒十分千秋寿。

玉楼春

厌玉为浆麟作。玉树琼葩长不谢。翠帘绣暖燕归来，宝鸭花香蜂上下。

沙堤佩马催公驾，月白风清天不夜。重来赫赫照岩廊，不动堂堂凝泰华。

小重山

春正浓时月正圆。华堂初燕喜，雨真仙。霞衣相对旧貂蝉。人间少，福寿子孙贤。

佳非烟。花光羞粉艳，敢争妍。笑歌声里捧金觥。深深愿，松柏永同坚。

鹧鸪天

万里霜空爽气高。翩翩天雁薄云霄。佳祥已协当年梦，岂但非熊可珥貂。

金笏带，紫花袍。朱衣双引玉宸朝。百年富贵须平步，仍有功名信史褒。

西江月

盛德须知异禀，天教占尽秋光。一轮明月照华堂。荐寿笙歌嘹亮。

座上簪缨并列，庭前兰玉成行。只应难老胜松篁。五福人间供仰。

踏莎行

月挂琼钩，日添绣线。骑花翻浪重帘卷。风传环佩晓珊珊，
画堂羯鼓催开燕。

翠缕香凝，玉膏酒滟。仙翁莫诉玻璃满。凤衔丹诏下云电。
千秋长在黄金殿。

鹧鸪天

九凤箫低彩雾高。鸾车鹤驭下层霄。天教来辅长生帝，宝
殿千秋侍赭袍。

飞急召，促归朝。沙路稳为马蹄娇。功成并画兰台上，奎
画重看御赞褒。

谈元范

清玉案

虾须帘上银钩小。筵内轻寒绕。红叶征香侵语笑。金钗珠履，凤箫龟鼓，疑是蓬莱岛。

萱堂日日春生貌。嫩绿休然鬓边好。赋得修龄应不少。年年长见，画梁双燕，楼外青袍草。

倪翼周

青玉案

烟浓水淡荷香浅。近翠幕、闻弦管。逸气棱层冲碧汉。绝无风骨，炼成铅鼎，未许童颜换。

长门深锁文君院。前度蛮笺泪痕满。为问乘槎人不远。只消丹桂，一枝分付，早早随伊愿。

青玉案

四时令节惟重九。况此日、逢佳偶。金菊已花杯有酒。瑶池宴罢，一枝斜插，好作渊朋友。

翠眉淡淡匀宫柳。比似年时更清瘦。双绾带儿新结就。长情恩爱，随家俭约，素与君同寿。

青玉案

薰风解尽吾民愠。正蓬渚芳遍。昨夜商周生伊旦。从来仁者，仲尼称寿，更捧金杯劝。

我有诗词三百卷。等留取、频频献。且看明年秋欲半。紫薇花下，绿槐阴外，天语颁新宴。

青玉案

熙春堂下花无数。红紫映、桃溪路。蝶往蜂来知几许。翠筠亭外，绿阳堤畔，时听娇莺语。

绮筵罗列开樽俎。况总是、神仙侣。竞举笙歌持玉醑。介公眉寿，年年此日，常与花为主。

段 倚

醉蓬莱

正星杓首舍，月律开祥，嗣兴芳序。梦协长庚，诞清朝仪羽。运继姬周，庆流嵩岳，认再生申甫。职尹京华，功宣国计，声猷兼著。

子建文章，懿侯宗范，叔度襟怀，紫芝眉宇。燕启佳辰，满东风兰雾。脆管繁弦，绣茵檀板，会饭中仙侣。世仰真贤，朝尊大老，长亲尧主。

贺 及

新荷叶

莲萼飘香，金风乍扇轻凉。郁郁葱葱，瑞烟萦绕华堂。星辰孕秀，良霄梦、吉协熊祥。紫芝眉宇，莹然如峙圭璋。

忠孝传芳，集庆门、奕世簪裳。他日岩廊，致君直上虞唐。百千椿算，争期并、鹤老龟长。年年今日，会拚一醉觥觞。

傅伯达

沁园春

白帝司权，炎宫回驭，一叶报秋。正银河高泻，金风乍扇，冰轮将满，火伞初收。吴越传芳，斗牛钟秀，间世生贤谁与俦。那堪更负，过人才气，济世谋猷。

风流花县优游，有善政廉名达郡侯。鶚书朝荐，泥封暮召，荣登桂籍，平步瀛洲。歌驻行云，舞翔回雪，寿酒深倾碧玉瓯。从今愿，愿龄齐鼻祖，名在丹丘。

郑达可

满庭芳

肥绽梅红，嫩翻荷绿，微凉时起青苹。人间福艾，都属老人星。累建高牙大纛，循良治、是处彬彬。棠阴里，丰碑纪德，仁爱浹生民。

纶巾。风物里，一筇徒倚，傲睨寰瀛。况清朝黄发，尤急谘询。第恐商山芝客，岂容便、蝉蜕功名。他时看，腰横玉带，朱紫列云仍。

念奴娇

嫩凉如水，正一天风露，秋容如沐。明日中秋今夜月，千里清辉光足。周室姬公，唐家元轨，来享人间福。老人星瑞，光芒南照檐曲。

行看裂土分茅，朱颜青鬓，好称腰横玉。便挽银河斟北斗，倾作千钟醺醑。子舍荣华，孙枝赫奕，茂盛同松竹。尊前欢笑，竞将椿算为祝。

臧余庆

南歌子

橘里风烟好，壶中日月长。松身鹤发自安强。应有老人呈瑞、动光芒。

酒饮无边酒，香烧不断香。从今乞与醉为乡。更醉百年三万、六千场。

鹧鸪天

天与君王管晏才。尚书两曳履声来。今朝望着楼头看，已有台星照斗魁。

金蹀躞，玉崔嵬。天香满袖早朝回。中书尚享无穷考，长揖南风醉寿杯。

鹧鸪天

寿菊才开三四葩。秋光着意主人家。清香未许人间识，先借重阳醉紫霞。

儿绿绶，母金花。斑衣庭下乐无涯。要知他日中书考，细数沙堤堤上沙。

感皇恩

消息近春来，东风还又。先代椒盘劝金斗。坐间和气，压尽一番梅柳。掖庭频寓直，君恩厚。

天佑两宫，南山齐寿。况有仙丹在公手。论功医国，合在药王之右。不妨千岁饮，长生酒。

感皇恩

南岳有真仙，人间祥瑞。酒量诗豪世无比。晚年林下，做个清闲活计。谄如千岁鹤，巢云际。

此日大家，广排筵会。酒劝千钟莫辞醉。昔时彭祖，寿年八百余岁。十分才一分，那里暨。

感皇恩

交广出沉香，路遥难致。何况卑人更不易。寿星香帕，我又几曾识置。有般祝寿底，忒忒戏。

剪下一张，池州表纸。捻得轻圆更滑腻。五双纸捻，管打十个喷嚏。儿，一百岁。

胡 于

鹧鸪天寿

去日清霜菊满丛。归来高柳絮缠空。长驱万里山收瘴，径度层波海不风。

阴德遍，岭西东。天教慈母寿无穷。遥知今夕称觞处，衣彩还将衣绣同。

鹧鸪天寿

阿母蟠桃下记春。长沙星里寿星明。金花罗纸新裁诏，具叶傍行别绶经。

同龙子，祝龟龄。天教二老鬓长青。明年今日称觞处，更有孙枝满谢庭。

鹧鸪天寿

楚楚吾家千里驹。老人心事正开渠。风流不减庭前玉，爱惜真如掌上珠。

纡绿绶，荐方壶。老人沉醉弟兄扶。问将何物为儿寿，付与家传万卷书。

鹧鸪天寿

袅袅薰风响佩环。广寒仙子跨清鸾。谁教瑞世仪周间，自赋多才继《小山》。

铃阁静，画堂闲。袞衣象服镇团栾。年年此日称觞处，留待萸萸驻玉颜。

中国章

鹧鸪天

载地分符衣绣衣。棠阴处处浙东西。政成已可书银笔，词鹿仍堪付雪儿。

春未半，日方迟。御沟金袅柳如丝。凤池留得梅花住，欲与先竹荐寿卮。

陈日章

鹧鸪天

内乐清虚息万缘。逍遥真是地行仙。徒他玉带金鱼贵，听我纶巾羽扇便。

倾九酝，祝长年。休辞潋滟十分觥。来年此日称觞处，定有重孙戏膝前。

李景良

鹧鸪天

清晓祥云绕碧天。老人星忽下南躔。庭兰共酌长生酒，持上华堂彩侍前。

开绮席，舞朱颜。轻红莲叶荐金盘。沉香小院浑先暑，更有杯传数百年。

张思济

鹧鸪天

衣润红绡梅欲黄。几年欢意属华堂。红颜阿母逢占虺，班
鬓儿童尽举觞。

麟作脯，玉为浆。从今三万六千场。桑麻休说桑田变，自
是经门日月长。

李夫人

减字木兰花

幕天席地。瑞脑香浓笙歌沸。白纻衣轻。鸂鶒发霜髯照座明。
轻簪小珥。却是人间真富贵。好着丹青。画与人间作寿星。

蝶恋花

急鼓疏钟声报晓。楼上今朝，卷起重帘早。环佩珊珊香裊裊。
尘埃不到如蓬岛。何用珠玑相映照。韵胜形清，自有天然好。莫向尊前辞醉倒。
松枝鹤骨偏宜老。

瑞鹧鸪

新晴庭院暑风轻。瑞气朝来特地清。霞帔羽衣筠竹杖，萱堂真有寿星明。
自来忠孝传家世，所以芝兰满户庭。簪笏成行称寿处，老

来皆已鬓星星。

张 藻

望海潮

露零金井，尘清玉宇，双萸呈瑞新秋。佳气郁葱，祥烟缭绕，玉门初诞风流。宾客竞回眸。庆虎头食肉，燕颌封侯。骨相非凡，便宜谈笑上瀛洲。

青衫莫欢淹留。有儿孙兰玉，不负箕裘。莲幕向来，花城今日，不妨小试良筹。名姓在金瓯。看佩珂鸣玉，促侍宸旒。直待功成名遂，归作赤松游。

胡文卿

虞美人

枢庭喜庆生辰到。仙伯离蓬岛。鲁台云物正呈祥。线绣工夫从此、日添长。

满斟绿醕深深劝。岁岁长相见。蟠桃结子几番红。笑赏清歌声调、叶黄钟。

虞美人

香烟绕遍兰堂宴。香鸭珠帘卷。香风转后送韶音。香酝佳筵今日、庆佳辰。

香山烧尽离飞放。香袖佳人唱。香醪满满十分斟。香信传时延寿、保千春。

虞美人

寿香烟篆金炉细。寿酒邀宾至。寿筵两畔列红妆。寿曲仙音一品、舞霓裳。

寿星高挂生祥瑞。寿祝长生意。寿杯满劝庆遐龄。寿比南山松柏、永长春。

虞美人

香云佳气交盘结。又庆生申节。满堂簪绂奉霞觞。瑞应台躔南极、见光芒。

心田积累阴功足。来受人天福。从今几度见河清。知傲壶中日月、镇长春。

虞美人

昨霄南极星光现。今日开华宴。朱颜翠鬓占春多。且向博山香袅、卷金荷。

龟游鹤舞千年寿。更酌千钟酒。满庭佳客捧殷勤。此日蒲菊新绿、瓮头春。

阮郎归

良辰佳景列华筵。笙歌奏管弦。位居荣显子孙贤。功名事双全。

庆祝寿，拜尊前。重重福禄坚。愿如彭祖寿齐年。金杯劝寿仙。

阮郎归

谢娘诗礼有家风。吹窗清昼同。笑言偕老与梁鸿。闺门喜气融。

来月殿，下珠宫。人间春意浓。一尊仙酝祝芳丛。蟠桃千岁红。

杨道居

蝶恋花

气禀五行天与秀。瑞见枢延，况是黄钟奏。日影量来添午昼。柳梅消息年时候。

红粉吹香帘幕透。深院笙歌，劝饮金钟酒。乐事赏心千岁有。黑头人做三公有。

史佐尧

苏幕遮

柳垂金，梅褪玉。昴宿呈祥，符应生公族。盖世功名夸九牧。黼袞褒扬，庆阀辉南北。

赐宫醪，分笃耨。天与长生，谩把仙椿祝。好继平阳腾茂躅。富贵千秋，饮听瑶池曲。

徐去非

满庭芳

凤历书元，龟图画泰，瑞萸两两初开。舞风仙子，飞雪拥春来。平荡人间险秽，端为你没点尘埃。清明世，冰辉太洁，鸥鹭莫惊猜。

儿孙，同劝寿，桃添西阆，兰绕南陔。看琼玉妆成，万瓦楼台。飘洒风流酥满盏，浑疑醉，月影蓬莱。从今去，诗高未老，点化尽多才。

锦被堆

一种两容仪，红共白、交映南枝。紫霞仙指冰翁语，花如醉玉，香同臭雪，别样风姿。

相守岁寒期。春造化、密与天知。羞将脂粉隈桃李，独先结实，还同戴胜，归宴瑶池。

贾少卿

临江仙

月寺星毡尘梦断，如今平地仙人。烟霞卷起旧精神。焚香金鸂鶒，书奏玉麒麟。

闻道枫宸求侍从，看庆命重新。且将风月剩酬身。樽中常有酒，花下不辜春。

陆汉广

江城子

绿莺庭院燕莺啼。绣帘垂。瑞烟霏。一片笙箫，声过彩云低。疑是蕊宫仙子降，翻玉袖，舞瑶姬。
冰姿玉质自清奇。看孙枝。列班衣。画鼓新歌，喜映两疏眉。袖里蟠桃花露湿，应不惜，醉金卮。

王阜民

临江仙

家法从来师静治，赵张高掩前踪。清才八斗继宗风。年年正月尾，桃李满城中。已把长江成九酝，请将太白浮公。更移春槛向房栊。有花虽解语，莫负锦薰笼。

霍安人

感皇恩

十月小春天，梅飘香细。九叶尧蓂已呈瑞。寿阳仙子，暂降羽衣环珮。林间风味，别人难比。

齐眉共庆，劝声鼎沸。有子知书继家世。兼金五福，行被君恩宠贲。愿祈龟鹤算，千千岁。

醉蓬莱

正朱明时候，院宇清和，庆逢佳节。梦应熊罴，尧蓂翻三叶。罗绮如云，寿杯争劝，竞起歌新阕。瑞气氤氲，祥云缭绕，玉炉频爇。

溪室封功，几多勋业，首冠今朝，一时英杰。得配侯门，岂不惭疏拙。彩凤和鸣，早膺荣擢。增盛斑衣列。福禄无穷，年过卫武，辉光阀阅。

满庭芳

桐叶霜乾，芦花风软，晓来一色新秋。碧光无际，良夜月明楼。瑞应长庚入梦，钟奇秀、特产贤侯。堪夸处，雄姿英发，连箭射双雕。

回头。思往事，皂囊三进，豪气冲牛。记前回凤诏，空下南洲。冷笑浮云坠甌，鲈鱼美、归老扁舟。祝君寿，青山不尽，绿水自悠悠。

希 叟

瑞鹤仙

燕堂秋未老。正木犀香散，芙蓉红小。门阑瑞烟绕。望银河月暗，寿星偏照。碧霞道要。有真人、亲传最妙。况桃源旧约，重寻鬓发，胜如年少。

缥缈。六铢衣降，九转丹成，五云齐到。十洲三岛。神仙路，终须到。对芝兰玉树，宝杯交劝，何惜玉山醉倒。看乘鸾跨鹤，归来洞天未晓。

沈元实

水调歌头

金关五云里，玉座太微间。凌虚新就燕间，宣唤侍臣班。
丹宸坐移前席，禁漏声传高阁，喜气满龙颜。天语眷畴昔，政
路稳跻攀。

酒如渑，香袅穗，寿南山。橙黄橘绿，樽前辉映菊花团。
清晓凉风凝露，晴昼秋光满院，岁岁奉君。待看云台画，荣观
侈人寰。

游子蒙

满江红

春玉苍山，屏星暖、佳辰难得。看柳眼梅金，全似海沂春色。和气欢声俄尔许，祥烟瑞霭今何夕。是风流、儒雅黑头公，悬弧日。

福不尽，贵无敌。愿岁岁，见华席。捧霞觞称寿，寿如南极。见说蟠桃花正发，柔风暖日瑶池碧。待他年、结子欲成时，留君摘。

满江红

雪坞霜林，一夜报、春归消息。看是处、春回柳眼，粉匀梅额。和气已欣回北陆，寿星更喜明南极。问四井、节物奉谁欢，辽东客。

熊梦旦，非常日。珠履闹，金钗密。指双溪千顷，共斟琼液。不用殷勤千岁祝，姓名已上神仙籍。但时从、王母借蟠桃，躬亲摘。

贾 逋

清平乐

薰梅染柳。借得东君手。柳色梅香到樽前，攄写才华八斗。
当年占梦佳辰。今年乐事尤新。日侍玉皇香案，钧天日月常春。

吴文若

蝶恋花

玉宇生凉秋恰半。月到今宵，分外清光满。兔魄呈祥冰彩烂。广寒仙子生华旦。

聪慧风流天与擅，淑质冰姿，本是飞琼伴。领彩衣椿祝劝。蟠桃待熟瑶池宴。

去 非

满庭芳

龙角辉春，蛾春惊晓，梦阑金翠屏开。异芬薰室，风送蕊仙来。玉女擎香沐浴，人间世、洗彻凡埃。梅开后，留花酝染，清味俗难猜。

东君，尤雅爱，传香芳畹，香发庭陔。宁馨满尊前，喜奏瑶台。便好纽为佩玉，瀛洲路、同赏蓬莱。蟠桃宴，从今曼倩，三骋奇材。

潘熊飞

南乡子

十日后重阳。甘菊阶前满意黄。生日无钱留贺客，何妨。
尚有儿曹理寿觞。

双鬓已沧浪。休问金门与玉堂。二仲相期三径在，徜徉。
何用功成似子房。

黄庭佐

水调歌头

露着桂枝晓，霜护菊篱秋。无尘玉宇南极，一点瑞光浮。
崧岳精英瑞世，河洛图书寓直，琳馆奉宸游。独袖功名手，谁
与复神州。

带垂金，头尚黑，紫绮裘。年年今日，灵寿扶出富民侯。
应为娉婷一笑，烂醉葡萄新熟，明月满西楼。西北雨峰峙，端
与寿山侔。

龚日升

柳梢青（范系尉美任）

二十年前。君家桃李，种满螺川。凛凛英风，真如小范，不数梅仙。

薰风吹送朝天。指何物、装添去船。千首新诗，一轮明月，两字清廉。

陈若水

沁园春（寿游侍郎）

某恭审某官受天异稟，间世笃生。光辅三朝，伟甚忠清之节；退发一壑，粹然恬淡之风。帝眷耆英，神绥福祉。某不量寸朽，切庇万间。心之所祈，姑寄沁园春之赋；仁者必寿，愿同庄椿岁之多。俯伏露忱，仰祈电盼。

拂袖归来，懒踏前回，京华欢麈。算宦游虽好，何如生处，急流勇退，赢得闲人。身羡仙翁，萧然野服，笑永东溪溪上亭。头犹黑、甚丰姿鹤瘦，标致梅清。

今年转觉精神。便次第平头八十人。肯又抛渭钓，似周尚父，且来洛社，作宋耆英。报答明恩，一时分付，贤子贤孙事业新。丹心在，尚瓣香岁岁，遥祝尧龄。

胡翼龙

案清都

梦雨随春远。征衫薄、短篷犹逗寒浅。裁芳付叶，书愁沁壁，水窗竹院。别来被篝梅润，暗麝积、旧题纨扇。许多时，间了阑干，放得藓痕青满。谁念。杜若还生，苹花又绿，不堪重重。山程水记，茶经砚谱，共谁间展。湖山旧会游偏。不怪得、近番心懒。恰今朝、水落洲平，江上楚帆风转。

徵招

苹花又绿江南岸，宾鸿带将寒去。几许落梅愁，渺暗香何处。一春长是雨。剩费却、翠篝沈炷。冷隔帘旌，润销窗纸，有人吟苦。燕垒渍芹香，画堂永、关心去年情绪。愁压曲屏深，更小山无数。溅裙前事误。、。朱阑，不了销凝，移损秦筝柱。

八声甘州

甚年年、心事占秋多，芳洲乱芜生。正小山已桂，东篱又菊，秋为人清。肠断洞庭叶下，倚西风、谁可寄芳蘅。袅袅愁予处，欲醉还醒。

为问素娥饮否，自谪仙去后，知与谁明。耿盈盈如此，分影落瑶觥。步高台、夜深人静，有飞仙、同跨海山鲸。归来也，远游歌罢，失却秋声。

洞仙歌

半栏花雨。是夜来凭处。梦过溪桥逢柳住。乱莺声残酒醒，正是关情，山枕上、吟就回纹锦句。

归鸿应别浦。绿涨弥茫，早近湖阴唤船路。览芳菲，歌窈窕，独立落根，剩一掬、间情凄楚。欲待折、微馨寄相思，又生怕相思，带将春去。

满庭芳

秋彻檐花，吟苦砚海，日长多费茶烟，怀芳心苦，持此过年年。雨外飞红何许，应流到、采绿洲边。销凝处，别离情绪，正是海棠天。

吹花题叶事，如今梦里，记得依然。料归来、莺居春后，燕占人先。谁念文园倦客，琴空在、懒向人弹。愁何极，楚天老月，偏是到窗前。

鹧鸪天

六曲银屏梦隔云。半分莺影匣生尘。别来可是春愁觉，试著轻衫不贴身。

风月夜，短长亭。也须闻得子规声。归时莫看花梢上，但看芳洲绿浅深。

少年游

晓莺声脆雨花乾。倦枕梦初残。衣渍香留，窗深纸暗，把镜近檐看。断云压损溪桥柳，花迳雪阑斑。深倚屏根，间敲诗字，酒醒倍春寒。

霓裳中序第一

江郊雨正歇。燕子飞来人忆别。未了残梅怨结。渺野色波光，春与天接。相思辽阔。怕柳风、吹老吟发。关情处，满汀芳草，遮莫是鶗鴂。

时节。一饷愁绝。谩料理、新翻几阕。山尊堪共谁设。梦到断桥，飞絮仍雪。岁华休省阅。早霍地、小园花发。已办著、海棠开后，独立半廊月。

夜飞鹊

星桥度情处，地久天长。尘世无此匆忙。纤云淡荡凉蟾小，家家瓜果钱唐。愁人独无那，欢紫箫易断，青罢难将。返魂何在，漫空留、荀令余香。

忍记穿针儿女，篝尘想都暗，垒损衣裳。谁念才情未灭，老来何逊，少日虑郎。柳风荷露，黯销凝、罗扇练囊。更银河曲曲，玉签点点，都是凄凉。

西江月

水霁芹香燕觜，林深风暖莺吭。一春心事锦机傍。忘却寻芳模样。

柳絮池塘书午，梨花院落昏黄。阑干曲曲是回肠。倚到西厢月上。

踏莎行

合数冰莲，注情金叶。臂痕犹记嗔时迹。小楼几个月黄昏，荷香柳影都知得。问字灯深，学书窗黑。衣襟诗卷留残墨。相思不抵藕丝长，梦云断处吴山碧。

南歌子

山枕莺声晓，羽觞花片飞。昨朝犹道未成归。不记春衫襟上、旧题诗。

愁眼垂杨见，苦心红烛知。翻成怕见别离时。只寄一声将
息、当相思。

长相思（题甘楼）

南山钟。北山钟。一声钟声百念空。古今昏晓中。
望秋风。数秋风。等得秋来等过鸿。灯前书一封。

刘子才

兰陵王（赋胡伯雨别业）

此何夕。天水空明一碧。商量赋、如此江山，几个斜阳了今昔。荒台步晚色。沙鸟依稀曾识。啼外，人远未归，江阔晴虹卧千尺。

残碑藓痕积。记当日清游，夫君题墨。碧瑶仙去苍云隔。飞一镜秋冷，列屏天远，鸡声人语半郊邑。寄情又江国。愁寂。怕闻笛。正怨苦溪猿，飞倦汀翼。阴阴翳迷津驿。慨世事尘化，吾心形役。清吟孤往，渺醉影，夜翠泾。

玲珑四犯

几垒云山，隔不断阑干，天外凝眺。秋与愁并，梧迳雨痕先表。娇梦半握芙蓉，奈曲曲、翠屏深窈。问愁根，当年谁种，漠漠淡烟衰草。

鸳鸯懒拂苹花影，记眉妩、萦情多少。辘轳玉虎牵丝转，听尽秋红晓。算谁念、卧云衣冷，香压金蟾小。写新词、先寄江鸿归去，且教知道。

声声慢（王日）

湘云纤玉，楚葛篝香，澡兰帘幕风静。怨抑难招，沈魄当年独醒。莫唱江南古调，念天涯、深情谁省。时暗换，最秦楼惆望，归期无定。曾是榴裙误写，怕照眼枝头，绛绡花并。巧篆盘丝，午镜绿窗闹影。香蒲也应细剪，但年年、断云愁冷。迎醉面，看银蟾、飞浴露井。

贺新郎（忆鹤）

苍藓黏溪路。帐山君、翛然羽化，梦魂何许。曾约秋云萦客袖，舞傍吟皋砚坞。矫清唳、裂穿云宇。江碧空濛无处问，问孤山、梅底人知否。烟夜永，耿心语。

瑶华一去成幽阻。倚修篁、抱琴愁绝，天寒日暮。城郭悲歌华表恨，此事销凝千古。有招隐、小山能赋。蕙帐空兮谁夜怨，算课骚、读易俱凄楚。步深窈，堕松露。

菩萨蛮

题花曾蘸花心露。当初误结丁香树。往事小蛮窗。新愁桃叶江。

缓歌留薄醉。急登人千里。梅瘦月阑干。断云春梦寒。

解连环

晚云黏湿。正吴峰惨澹，雨迷烟接。早陡顿、秋事分携，
甚连苑暮墙，菊荒苔匝。空阔愁乡，更天外、怨鸿声点。怕吟
肩易瘦，料理篝衣，细认香折。银缸半明半灭。念花营柳阵，
何日消歇。可是、凝黯兰成，为情润才松，丽赋多愜。洛浦
溟濛，漫伫想、明珰钩袜。告梧桐、夜深略住，梦时一霎。

萧汉杰

卖花声（春雨）

湿逗晚香残。春浅春寒，洒窗填户著幽兰。惨惨凄凄仍滴滴，做出多般。

和霰撒珠盘。枕上更阑。芭蕉怨曲带愁弹。绿遍阶前苔一片，晓起谁看。

菩萨蛮（春雨）

春愁一段来无影。著人似醉昏难醒。烟雨湿阑干。杏花惊蛰寒。唾壶敲欲破。绝叫凭谁和。今夜欠添衣。那人知不知。

蝶恋花（春燕和韵）

一缕春情风里絮。海阔天高，那更云无数。娇颤画梁非为雨。怜伊只合和伊去。欲话因缘愁日暮。细认帘旌，几度来还去。万一这回航可渡。共渠活处寻条路。

浪淘沙（中秋雨）

愁似晚天云。醉亦无凭。秋光此夕属何人。贫得今年无月看，留滞江城。夜起候檐声。似雨还晴。旧家谁信此时情。惟有桂香时入梦，勾引诗成。

罗 椅

清平乐

明虹收雨。两桨能吴语。人在江南荷叶浦。采得苹花无数。
梦中舞燕栖鸾。起来烟渚风湾。一点愁眉天末，凭谁划却春山。

入声甘州（孤山寒食）

甚匆匆岁月，又人家、插柳记清明。正南北高峰，山传笑响，水泛箫声。吹散楼台烟雨，莺语碎春晴。何地无芳草，惟此青青。
谁管孤山山下，任种梅竹冷，荐菊泉清。看人情如此，沈醉不须醒。问何时、樊川归去，叹故乡、七十五长亭。君知否，洞云溪竹，笑我飘零。

柳梢青

萼绿华身，小桃花扇，安石榴裙。子野闻歌，周郎顾曲，曾恼夫君。悠悠羁旅愁人。似飘零、青天断云。何处销魂，初

三夜月，第四桥春。

更漏子

晚潮生，凉月细。一抹远山无蒂。收越棹，起吴樯。人间何限忙。石头城，西北角。杳杳天低鹞落。浑不似，此波光。清歌催夕阳。

徐 霖

长相思

听莺声。惜莺声。客里鸟声最有情。家山何处青。
问归程。数归程。行尽长亭又短亭。征衫脱未成。

朱 堦

点绛唇

绣被鸳鸯，宝香熏透蔷薇水。枕边一纸。明月人千里。
宿酒初醒，全不忺梳洗。抬织指。微签玉齿。百色思量起。

画堂春

绿窗睡起小妆残。玉钗低堕云鬟。回纹枉寄见伊难。心绪
阑珊。
翠袖两行珠泪，画楼十二阑干。销磨今古霎时间。恨杀青
山。

南乡子

花柳隔重扃。送过秋千笑语声。檐鹊也嗔人起晚，天晴。
孤负东风趁踏青。细细研红绡。小字相思写不成。心上可人云
样远，寒盟。史恐恩情薄似云。

张绍文

酹江月（淮城感兴）

举杯呼月，问神京何在，淮山隐隐。抚剑频看勋业事，惟有孤忠挺挺。宫阙腥膻，衣冠沦没，天地凭谁整。一枰棋坏，救时著数宜紧。

虽是幕府文书，玉关烽火，暂送平安信。满地干戈犹未戢，毕竟中原谁定。便欲凌空，飘然直上，拂拭山河影。倚风长啸，夜深霜露凄冷。

水龙吟（春晚）

日迟风软花香，因人天气情怀懒。牡丹谢了，酴醾开后，红稀绿暗。慵下妆楼，倦吟鸾镜，粉轻脂淡。叹韶华迤逦，将春归去，沈思处、空肠断。

长是愁蛾不展。话春心、只凭双燕。良辰美景，可堪虚负，登临心眼。雁杳鱼沈，信音难托，水遥山远。但无言，倚遍阑干十二，对芳天晚。

壶中天（为兄风云水月主人寿）

丹台仙伯，记踪迹当年、琼楼金阙。底事来游人世界，为爱风云水月。结屋南园，境随人胜，不是溪山别。今朝初度，碧莲千顷齐发。

况是鸳侣新偕，凤雏才长，占人间欢悦，且尽壶天终夕醉，听取妙歌千阕。待得西风，鸂书飞上，更复青毡物。功成名遂，赤松还伴高洁。

沁园春（为叔父云溪主人寿）

数遍时贤，谁似云溪，未老得闲。自抽身州县，归体旧隐，灰心名利，跳出尘寰。卸却朝衣，笑拈拄杖，日在花阴竹径间。身轻健，任高眼晏起，渴饮饥餐。

垂弧猛省当年。且约住春风开寿筵。况园亭池馆，新奇佳丽，弟兄子侄，歌笑团栾。绿鬓朱颜，纶巾羽扇，做个人间长寿仙。霞觞举，愿年年今日，长对南山。

杨 缵

八六子（牡丹次白云韵）

怨残红。夜来无赖，雨催春去匆匆。但暗水、新流芳恨，蝶凄蜂惨，千林嫩绿迷空。那知国色还逢。柔弱华清扶倦，轻盈洛浦临风。细认得凝妆，点脂匀粉，露蝉耸翠，蕊金团玉成丛。几许愁随笑解，一声歌转春融。眼朦胧。凭阑干、半醒醉中。

一枝春（除夕）

竹爆惊春，竞喧填、夜起千门箫鼓。流苏帐暖，翠鼎缓腾香雾。停杯未举。奈刚要、送年新句。应自有、歌字清圆，未夸上林莺语。

从他岁穷日暮。纵闲愁、怎减刘郎风度。屠苏办了，迤迤柳欺梅妒。宫壶未晓，早骄马、绣车盈路。还又把、月夜花朝，自今细数。

被花恼（自度腔）

疏疏宿雨酿寒轻，帘幕静垂清晓。宝鸭微温瑞烟少。檐声不动，春禽对话，梦怯频惊觉。欹珀枕，倚银床，半窗花影明东照。

惆怅夜来风，生怕娇香混瑶草。披衣便起，小径回廊，处处多行到。正千红万紫竞芳妍，又还似、年时被花恼。蓦忽地，省得而今双鬓老。

史 铸

瑞鹧鸪（咏桃花菊）

底事秋英色厌黄。喜行春令借红妆。谢天分付千年品，特地搀先九日香。陶令骇观须把酒，崔生瞥见误成章。蜂情蝶思兼迷了，采蕊还如媚景忙。

林 洪

恋绣衾

冰肌生怕雪未禁。翠屏前、短瓶满簪。真个是、疏枝瘦，
认花儿、不要浪吟。

等闲蜂蝶都体惹，暗香来、时借水沈。既得个、厮偎伴，
任风霜、尽自放心。

吴大有

点绛唇（送李琴泉）

江上旗亭，送君还是逢君处。酒阑呼渡。云压沙鸥暮。
漠漠萧萧，香冻梨花雨。添愁绪。断肠柔橹。相逐寒潮去。

金淑柔

浪淘沙（丰城道中）

雨溜和风铃。滴滴丁丁。酿成一枕别离情。可惜当年陶学士，孤负邮亭。边雁带秋声。音信难凭。花须偷数卜归程。料得到家秋正晚，菊满寒城。

毛 珣

浣溪纱（桂）

绿玉枝头一粟黄。碧纱帐里梦魂香。晓风和月步新凉。
吟倚画栏怀李贺，笑持玉斧恨吴刚。素娥不嫁为谁妆。

踏莎行（题草窗词卷）

顾曲多情，寻芳未老。一庭风月知音少。梦随蝶去恨墙高，
醉听莺语嫌笼小。红烛呼卢，黄金买笑。弹丝蹴踘长安道。彩
笺拈起锦囊花，绿窗留得罗裙草。

张 矩

摸鱼儿（重过西湖）

又吴尘、暗斑吟袖，西湖深处能浣。晴云片片平波影，飞趁棹歌声远。回首唤。仿佛记、春风共载斜阳岸。轻携分短。怅柳密藏桥，烟浓断径，隔水语音换。

思量偏。前度高阳酒伴。离踪悲事何限。双峰塔露书空颖，情共暮鸦盘转。归兴懒。悄不似、留眠水国莲香畔。灯帘晕满。正蠹帙逢迎，沈煤半冷，风雨闭宵馆。

应天长（苏堤春晓）

曙林带暝，晴霭弄霏，莺花未认游客。草色旧迎雕辇，蒙茸暗香陌。秋千架，闲晓索。正露洗、绣鸳痕窄。费人省，隔夜浓欢，醒处先觉。

重过涌金楼，画舫红旗，催向段桥泊。又怕晚天无准，东风妒芳约。垂杨岸，今胜昨。水院近、占先春酌。恁时候，不道归来，香断灯落。

应天长（平湖秋月）

候蛩探暝，书雁寄寒，西风暗剪绡纤。报道凤城催钥，笙歌散无迹。冰轮驾，天纬逼。渐款引、素娥游历。夜妆靓，独展菱花，淡绚秋色。

人在涌金楼，漏迥绳低，光重袖香滴。笑谏又惊凄鹄，南飞傍林阒。孤山影，波共碧。向此际、隐逋如识。梦仙游，倚遍霓裳，何处闻笛。

应天长（断桥残雪）

髻渐亸晓，篙水涨漪，孤山渐卷云簇。又见岸容舒腊，菱花照新沐。横斜树，香未北。倩点缀、数梢疏玉。断肠处，日影轻消，休怨霜竹。

帘上涌金楼，酒滟酥融，金缕试春曲。最好半残鵲，登临快心目。瑶台梦，春未足。更看取、洒窗填屋。灞桥外，柳下吟鞭，归趁游烛。

应天长（雷峰夕照）

磬圆树杪，舟乱柳津，斜阳又满东角。可是暮情堪剪，平分付烟郭。西风影，吹易薄。认满眼、脆红先落。算惟有，塔起金轮，千载如昨。谁信涌金楼，此际凭阑，人共楚天约。准拟换樽陪月，缙空卷尘幕。飞鸿倦，低未泊。斗倒指、数来还错。笑声里，立尽黄昏，刚道秋恶。

应天长（曲院荷风）

换桥度舫，添柳护堤，坡仙题欠今续。四面水窗如染，香波酿春麴。田田处，成暗绿。正万羽、背风斜矗。乱鸥去，不信双鸳，午睡犹熟。

还记涌金楼，共抚雕阑，低度浣沙曲。自与故人轻别，荣枯换凉燠。亭亭影，惊艳目。忍到手、又成轻触。悄无语，独捻花须，心事曾卜。

应天长（花港观鱼）

岸容浣锦，波影堕红，纤鳞巧避鳬唼。禹浪未成头角，吞舟胆犹怯。湖山外，江海匝。怕自有、暗泉流接。楚天远，尺素无期，枉误停楫。

四望涌金楼，带草帘烟，缥缈际城堞。渐见暮榔敲月，轻舫乱如叶。濠梁兴，归未惬。记旧伴、袖携留折。指鱼水，总是心期，体怨三叠。

应天长（南屏晚钟）

翠屏对晚，鸟榜占堤，钟声又敛春色。几度半空敲月，山南应山北。欢娱地，空浪迹。谩记省、五更闻得。洞天晓，夹柳桥疏，稳纵香勒。前度涌金楼，笑傲东风，鸥鹭半相识。暗

数院僧归尽，长虹卧深碧。花间恨，犹记忆。正素手、暗携轻拆。夜深後，不道人来，灯细窗隙。

应天长（柳浪闻莺）

翠迷倦舞，红驻老妆，流莺怕与春别。过了禁烟寒食，东风颤钗铁。游人恨，柔带结。更唤醒、羽喉宫舌。画桥远，不认绵蛮，晚棹空歇。

争似涌金楼，燕燕归来，钩转暮帘揭。对语画梁消息，香泥砌花屑。昆明事，休更说。费梦绕、建章宫阙。晓啼处，稳击金狨，双灯笼月。

应天长（三潭印月）

桂轮逼采，菱沼漾金，潜虬暗动蛟室。水路乍疑霜雪，明眸洗春色。年时事，还记忆。对万顷、葑痕龟坼。旧游处，不认三潭，此际曾识。今度涌金楼，素练萦窗，频照庚侯席。自与影娥人约，移舟弄空碧。宵风悄，签漏滴。早未许、睡魂相觅。有时眼，月被云妨，天也拚得。

应天长（两峰插云）

暮屏翠冷，秋树赭疏，双峰对起南北。好与霁天相接，浮图现西极。岩峣处，云共碧。漫费尽、少年游屐。故乡近，一

望空遥，水断烟隔。

闲凭涌金楼，潋滟波心，如洗梦淹笔。唤醒睡龙苍角，盘空壮商翼。西湖路，成倦客。待倩写、素缣千尺。便归去，酒底花边，犹自看得。

梅子黄时雨

去宿江楼，爱留人夜语，频断灯炷。奈倦情如醉，黑甜清午。谩道迎薰何曾是，簟纺成浪衣成雨。茶瓯注。新期竹院，残梦连渚。

应误。重帘凄伫。记井刀剪翠，秋扇留句。信那回轻道，而今归否。十二曲阑随意凭，楚天不放斜阳暮。沈吟处。池草暗喧蛙鼓。

吴 申

七娘子（贺人子晬）

君家诸子燕山盛。去年两见门弧庆。银蜡烧花，宝香熏烬。
晬盘珠玉还相映。

耳边好语凭君听。此儿不与群儿并。右执金戈，左持金印。
功名当似王文正。

姚 勉

沁园春（太学补试归涂作）

锦水双龙，鞭风驾霆，来游璧池。有一龙跃出，精神电掣，一龙战退，鳞甲天飞。一样轩拏，殊途升蛰，造化真同戏小儿。时人眼，总羡他腾踏，笑我卑栖。

促装且恁西归。信自古功名各有时。但而今莫问，谁强谁弱，只争些时节，来速来迟。无地楼台，有官鼎鼐，命到亨通事事宜。三年里，看龙头独露，雁塔同题。

贺新郎（京学类申时作）

剑吼蛟龙怒。问苍天、功名两字，几时分付。生个英雄为世用，须早青云得路。却底事、知音未遇。两度入天飞折翼，谩教人、欲叹儒冠误。竟不晓，是何故。

休休天也无凭据。有如椽健笔，蟾宫须还高步。若使长材终困蹶，社稷谁教扶助。信浅水、留龙不住。万顷洪流通大海，向波涛、阔处兴云务。须信道，这回做。

贺新郎（京学类中後作）

长啸山中卧。叹从前、二十年来，因循空过。自是惺惺并了了，奈这五行尚左。遇好事、许多磨挫。浩荡醉乡狂莫检，算傍人、笑得唇焦破。谁信道，只恁么。

从今牢把江湖柁。要做些勋业，归来则个。不见彭余朱李辈，总是白身人作。震耀得、声名许大。万一老天青眼顾，又何难、印佩黄金颗。时来到，也还我。

霜天晓角（湖上泛月归）

秋怀轩豁。痛饮天机发。世界只如掌大，算只有、醉乡阔。烟抹。山态活。雨睛波面滑。艇子慢摇归去，莫搅碎、一湖月。

沁园春（送友人补太学）

一部周官，学间渊源，山齐得来。最雄姿直气，不涂脂粉，仙风道骨，不浣尘埃。万里青云，相期阔步，底事向天门折翼回。君知否，这白衣御史，卿相胚胎。

时人休用惊猜。机会到功名节节催。看蒲质易凋，何如松茂，菊花已老，须是梅开。万事何难，时来得做，且信天工次第排。从今去，愿径游璧水，直上兰台。

贺新郎（及第作）

尝不喜旧词所谓‘宴罢琼林，醉游花市，此时方显男儿志。’以为男儿之志，岂止在醉游花市而已哉，此说殊未然也，必志於致君泽民而後可，尝欲作数语易之而未暇。癸丑叨忝误恩，方圆前话，以为他日魁天下者之劝，非敢自炫也。夫以天子之所亲擢，苍生之所属望，当如之何而後可以无负之哉。友人潘月崖首求某书之，是其志亦不在彼而在於此矣，故书不敢辞。是年一阳来复之日，姚某书。

月转宫墙曲。六更残、钥鱼声亮，粉粉袍鹄。黼坐临轩清蹕奏，天仗缀行森肃。望五色、云浮黄屋。三策忠嘉亲赐擢，动龙颜、人立班头玉。胪首唱，众心服。

殿头赐宴宫花簇。写新诗、金笺竞进，绣床争蹙。御渥新沾催进谢，一点恩袍先绿。归袖若、天香芬馥。玉勒金鞚迎夹路，九街人、尽道苍生福。争拥入，状元局。

沁园春（寿同年陈探花）

忆昔东坡，秀夺眉山，生丙子年。盖内离子坎，四方中气，宜当此岁，间出英贤。河岳重灵，星辰再孕，来自赤城中洞天。新秋霁，萃一襟爽气，风露澄鲜。玉阶同听胪传。伴宝骊如龙丝袅鞭。正椿庭未老，同跻荣路，萼楼争耀，相照魁躔。即似坡公，金莲夜对，身作玉堂云雾仙。怜同岁，但乞如梦得，分买山钱。

贺新郎（送杨帅参之任）

唱彻阳关调。伴行人、梅拂征鞍，晓霜寒峭。金甲雕戈开玉帐，尊俎风流谈笑。看策马、从容江表。自是药阶苔砌客，卷经纶、且泛芙蓉沼。襟量阔，江面小。

允文事业从容了。要岷峨人物，後先相照。见说君王曾有间，似此人才多少。便咫尺、云霄清要。四世三公毡复旧，况蜀珍、先已登廊庙。但侧耳，听新诏。

念奴娇（和尹司门与蔡侯咏雪）

雕裘夜冷，怪地炉煨酒，经时难热。晓起盘风天舞絮，拍手儿童欢悦。客里新吟，天葩翦巧，思与梅争发。使君属和，雪花同是三绝。

未说赋就梁园，阳春拍调，压倒唐元白。早晚联镳花底去，共看朝霞银阙。朝退归来，清虚堂里，醉洒漓墨。而今且对，聚星堂上宾客。

沁园春（寿婺州陈可齐九月九日）

四海中间，第一清流，惟有可齐。看平生践履，真如冰玉，雄文光焰，不涴尘埃。无佑诸贤，纷纷台省，惟有景仁招不来。狂澜倒，独中流砥柱，屹立崔嵬。

挂冠有请高哉。但清庙正需梁栋材。便撑舟野水，出航巨海，有官鼎鼐，无地楼台。制菊龄高，看萸人健，万顷秋江入寿杯。经纶了，却驭风骑气，阆苑蓬莱。

满江红（寿邓法，六月八日生）

仙苑蟠桃，恰则是、而今初熟。王母遣、飞琼捧献，绛金红玉。笑把九霄鸾凤翥，满斟七宝蒲萄醑。为长庚、此日自天来，殷勤祝。

仙子唱，长生曲。仙客献，长生策。活千人邓禹，阴功俱足。五鄂即齐公府刻，万羊自有中书禄。更从头、安享八千年，人间福。

沁园春（寿张府判夫人）

梅笑东风，只两日间，又新岁华。有玉龟阿母，献三蟠实，蕊宫仙子，飞七香车。春满虾帘，雪晴鸳瓦，窗户非烟笼翠纱。萱堂上，看衣翻戏采，觞捧流霞。

君家。元是仙家。几度看菖蒲九节花。来剑池丹井，平分风月，一溪流水，犹泛胡麻。寿庆千秋，荣封两国，绿鬓犹深杨柳鸦。长生药，在蓬莱顶上，不必丹砂。

水调歌头（寿赵宰）

桃李河阳县，春又到花枝。先庚三日，鳌山晴雪放灯时。金宿争华玉婺，来入仙闺清梦，光动绣湖西。人物东都令，句法晚唐诗。两年春，三种异，十般奇。朝天近也，紫泥催起鹄

鳧飞。总羡童颜绿发，荣绶金鱼玉带，日侍赭黄衣。来岁传柑宴，人在赏花池。

水调歌头（寿赵倅）

微雪弄新霁，寒月上初弦。长庚入梦，间生采石锦袍仙。分得天孙云纤，制断麒麟金锁，来自玉皇前。丹井凭泥轼，风月兴无边。

诏书来，催人观，占春先。柳边花底，细骑犂路骤鸣鞭。荣侍金銮殿上，更向沈香亭北，半醉拂华笺。来岁今朝里，人在八花砖。

满江红（送郡守美任）

万里西风，吹送到、五云鸾纸。催促、文章太守，入朝花底。清节高横秋一片，仁风散作春千里。漾恩波、溶泳锦江中，深如水。

难卧辙，留行李。但侧听，星辰履。看麒麟案侧，即催荣侍。红药香中翻诏草，紫薇影畔裁诗绮。更宸旒、已自覆公名，金瓯里。

沁园春（送权倅许张干）

万里清风，吹送锦帆，入南浦云。看拂天旌旆，攀留不住，

迷津舸舰，歌舞相迎。二许家声，三洪地望，今代风流第一人。蜚英早，合词林视草，书阁翻芸。

飞乌远饷三军。特借作红莲入幕宾。把西山暮雨，暂时收卷，荷山明月，小试平分。苏醒枯鱼，剔除深蠹，个是间有脚春。难淹久，看诏催入侍，香案麒麟。

水龙吟

（癸丑五月致政生日在京作）

芰荷香雨初收，竹风槐日凉清晓。年年祝寿，今年不比，常年时候。教子收功，五云金殿，初承亲诏。早胪传三日，寿称千岁，多应是、如公少。

遥想寿椿堂上，饮霞觞、捧孙微笑。已见儿荣，更看孙贵，茅分蒲召。上第归来，采衣挂绿，兰阶生耀。九霄中、一点光明，寿星高照。

沁园春（七月朔寿卢守）

一叶新凉，又是西风，吹转素商。揽玉壶英气，钟为人物，银河精采，融作文章。司巧天公，揆先七夕，分付天孙云锦裳。骑龙凤，自九霄飞至，万丈光芒。

早年奏赋长杨。饱挹尽瀛洲风露香。间石渠天禄，借将班马，荷山锦水，暂作龚黄。药省春风，薇垣夜月，合佩仙花侍玉皇。明年里，饮寿椒何处，宣劝持觞。

沁园春（寿陶守）

鹤发鸦髻，欢捧霞觞，酌丹井泉。庆湘山峰顶，飞来古佛，剑池洞里，活底神仙。春雨慳时，千金斗粟，民仰使君为食天。公知否，只活人阴德，合寿千年。宝猊香喷沈烟。环艳翠明红拥寿筵。最一般奇特，凤雏新贵，斑衣绿绶，光彩相鲜。帝命师臣，钦哉有子，飞诏看看又月边。黄封酒，到明年今日，中使传宣。

沁园春（寿王高安，七月二十八日）

超逸天才，文如三松，诗如卢溪。自白莲赋就，已高声价，梅花句出，远见襟期。玉尘精神，瑶林风韵，雪里神仙小氅衣。缙山夕，已再经旬浹，戏鹤重归。

花间鳧舄轻飞。便一似元规报十奇。最风流膝上，双亲未老，三槐手种，分付佳儿。人想夷吾，帝思王某，钧轴舍人知未迟。长生药，在玉盘麟脯，琼苑蟠芝。

沁园春（寿杨师参十月生，次日子之官）

摘玉蕊梅，泛金叶蕉，祝公寿龄。算今年比似，常年更别，翠烟红雾，香霭门屏。凤诏云霄，龙光牛斗，辉射南州孺子亭。看看是，伴元戎小队，花柳郊垌。

传家有子明经。浑不要黄金遗满籝。向月中传与，一枝仙

桂，斓斑衣上，更著袍青。明日瓜期，今朝椿寿，好醉芝兰玉树庭。公知否，老人星一点，映泰阶星。

贺新郎（送易子炎运干之任）

冷眼三边处。喜舍人、水滨跃马，上京西路。三国英雄千载矣，开胜依然如故。这勋业、向谁分付。袖里翰林风月手，也何妨、戮力风寒护。谈笑暇，诗吟虏。

岷山几载无人顾。幸如今、翦除荆棘，扫清飙雾。换得东南新局面，政欠十分著数。算人物、须还羊杜。玉帐筹边机会好，把规模、赶出中原去。天下事，书生做。

沁园春（寿程丞相）

崧岳降神，昴宿宣精，挺生伟人。整淳佑乾坤，浸如嘉佑，太平事业，了却端平。扶日中天，拱辰北极，一洒某霖埃雾清。春寰海，听农歌载路，边析沈声。

旗常万世勋铭。便与国无穷垂令名。似青山流水，涑川贤相，黄花晚节，魏国元臣。五纬芒寒，六符色正，辉映老人南极星。苍生福，开八荒寿域，一气洪钧。

沁园春（寿贾丞相）

章武中兴，淮蔡欲平，晋公已生。信天生英杰，正为国计，

擎天著柱，要自支撑。万里长江，古称天险，去岁里风涛忽震惊。公谈笑，把云腥霓翳，一日都清。

归来奠枕于京。有辉焕明堂前一星。称衮衣廊庙，枫宸眷宠，彩衣公府，萱砌春荣。著片公心，辨双明眼，长与群贤扶太平。无它愿，植万年宗社，万古功名。

沁园春（寿陈中书）

湖海元龙，逸气飘然，可百尺楼。受文光万丈，星辰绚彩，爽襟一掬，风露澄秋。衔字冰清，班心玉立，海内而今第一流。翻书子，紫薇花浸月，夜揽词头。

著身已是瀛洲。问更有长生别药不。是生来已带，神仙道骨，毫端自有，富贵封侯。拜赐黄封，承恩青琐，见说香名又覆瓿。从今去，了福公事业，从赤松游。

沁园春（寿赵倅）

道骨仙风，海上骑鲸，端是後身。把银河天巧，钟为文采，剑津宝气，融作精神。壶玉储冰，掌金擎露，胸次全无一点尘。年年里，早花朝六日，长庆生申。

簪篸濯锦江滨。人尽道如公清最真。合沈香亭北，金笺奏曲，恩披兽锦，醉拭龙巾。泥紫颁来，渠黄飞去，自是八花砖上人。从後看，大钧播物，万象皆春。

沁园春（钱张倅）

明月扁舟，轻逐江鸥，翩然赋归。任颠风掀舞，涛山浪屋，少顷平定，一碧琉璃。柳絮浮云，有无根蒂，到底不磨真是非。呵呵笑，笑人情似纸，世事如棋。

宜堂事事皆宜。把杯酒论文更有谁。记风云满席，吟情浩荡，咙蛇满壁，醉墨淋漓。别後相思，有书寄否，春在梅花第一枝。重相见，约柳堤撑舫，竹阁寻诗。

沁园春（送友人归蜀）

拂剑整装，光射紫霄，斗牛色寒。大丈夫不作，儿曹离别，何须更唱，三叠阳关锦还乡，油幢佐幕，谁道青天行路难。从今去，听声名焰焰，飞动岷山。

征途少饮加餐。要做取功名久远看。卷长风吹醒，剑关云气，更须砥柱，三峡惊湍。闻道槐庭，已登安石，此去须弹贡禹冠。明年里，踏梅花有分，相见长安。

声声慢（和徐同年梅）

江涵石瘦，雪压桥低，森森万木寒僵。不是争魁，百花谁敢先芳。冰姿皎然玉立，笑儿曹、粉面何郎。调羹鼎，只此花余事。说甚宫妆。

松竹岁寒三友，恨竹于晋士，松浣秦皇。雪魄冰魂，回首世上无香。西湖有人觅句，但知渠、清浅错黄。奇绝处，五

更初、横月带霜。

柳梢青（忆西湖）

长记西湖，水光山色，浓淡相宜。丰乐楼前，涌金门外，买个船儿。而今又是春时。清梦只、孤山赋诗。绿盖芙蓉，青丝杨柳，好在苏堤。

贺新郎（忆别）

薄晚收残暑。叹西风、暗换流年，又还如许。鸦背斜阳初敛影，云淡新凉天宇。人袖手、阑干凝伫。邻笛唤将乡思维动，听秋声、又入梧桐雨。秋到也，尚羁旅。故人只在江南渚。想应嫌、久恋东华，软红尘土。寄远裁衣知念否。新月家家砧杵。魂梦想、鹅黄金数。雁影不来天更远，写书成、欲寄凭谁与。知客恨，两蛩语。

贺新凉

窗月梅花白。夜堂深、烛摇红影，绣帘垂额。半醉金钗娇应坐，寒处也留春色。深意在、四弦轻摘。香坞花行听啄木，翠微边、细落仙人屐。星盼转，趁娇拍。

人间此手真难得。向尊前、相逢有分，底须相识。愁浅恩深千万意，惆怅故人云隔。怕立损、弓鞋红窄。换取明珠知肯

否，绿窗深、长共春怜惜。休恼乱，坐中客。妓唤惜善琵琶，
程秋千席上作。

瑞鹤仙

燕归帘半卷。正漏约琼斗，笙调玉琯。蛾眉画来浅。甚春衫懒试，夜灯慵翦。香温梦暖。诉芳心、芭蕉未展。渺双波、望极江空，二十四桥凭偏。

葱茜。银屏彩凤，雾帐金蝉，旧家坊院。烟花弄晚。芳草恨，断魂远。对东风无语，绿阴深处，时见飞红数片，算多情、尚有黄鹂，向人睂眈。

垂杨

银屏梦觉。渐浅黄嫩绿，一声莺小。细雨轻尘，建章初闭东风悄。依然千树长安道。翠云锁、玉窗深窈。断桥人、空倚斜阳，带旧愁多少。

还是清明过了。任烟缕露条，碧纤青袅。恨隔天涯，几回惆怅苏堤晓。飞花满地谁为扫。甚薄幸、随波缥缈。纵啼鹃、不唤春归，人自老。

胡仲弓

谒金门

蛾黛浅。只为晚寒妆懒。润逼镜鸾红雾满。额花留半面。
渐次梅花开偏。花外行人已远。欲寄一枝嫌梦短。湿云和恨翦。

施 岳

水龙吟

翠鳌涌出沧溟，影横栈壁迷烟墅。楼台对起，阑干重凭，山川自古。梁苑平芜，汴堤疏柳，几番晴雨。看天低四远，江空万里，登临处、分吴楚。

两岸花飞絮舞。度春风、满城箫鼓。英雄暗老，昏潮晓汐，归帆过牖。淮水东流，塞云北渡，夕阳西去。正凄凉望极，中原路杳，月来南浦。

解语花

云容沍雪，暮色添寒，楼台共临眺。翠丛深窈。无人处、数蕊弄春犹小。幽姿谩好。遥相望、含情一笑。花解语，因甚无言，心事应难表。

莫待墙阴暗老。称琴边月夜，笛里霜晓。护香须早。东风度、咫尺画阑琼沼。归来梦绕。歌云坠、依然惊觉。想恁时，小几银屏冷未了。

曲游春（清明湖上）

画舸西泠路，占柳阴花影，芳意如织。小楫冲波，度麴尘扇底，粉香帘隙。岸转斜阳隔。又过尽、别船箫笛。傍断桥、翠绕红围，相对半篙晴色。

顷刻。千山暮碧。向沽酒楼前，犹击金勒。乘月归来，正梨花夜缟，海棠烟幂。院宇明寒食。醉乍醒、一庭春寂。任满身、露湿东风，欲眠未得。

兰陵王

柳花白。飞入青烟巷陌。凭高处，愁锁断桥，十里东风正无力。西湖路咫尺。犹阻仙源信息。伤心事，还似去年，中酒恹恹度寒食。

闲窗掩春寂。但粉指留红，茸唾凝碧。歌尘不散蒙香泽。念鸾孤金镜，雁空瑶瑟。芳时凉夜尽怨忆。梦魂省难觅。鳞鸿，渺踪迹。纵罗帕亲题，锦字谁织。缄情欲寄重城隔。又流水斜照，倦箫残笛。楼台相望，对暮色，恨无极。

步月（茉莉）

玉宇薰风，宝阶明月，翠丛万点晴雪。炼霜不就，散广寒霏屑。采珠蓓、绿萼露滋，喷银艳、小莲冰洁。花痕在，纤指嫩痕，素英重结。

枝头香未绝。还是过中秋，丹桂时节。醉乡冷境，怕翻成

悄歇。玩芳味、春焙旋熏，贮农韵、水沈频爇。堪怜处，输与夜凉睡蝶。

薛梦桂

醉落魄

单衣乍著。滞寒更傍东风作。珠帘压定银钩索。雨弄新晴，轻旋玉尘落。

花唇巧借妆红约。娇羞才放三分萼。樽前不用多评泊。春浅春深，都向杏梢觉。

眼儿媚（绿笺）

碧筒新展绿蕉芽。黄露洒榴花。蘸烟染就，和云卷起，秋水人家。

只因一朵芙蓉月，生怕黛帘遮。燕衔不去，雁飞不到，愁满天涯。

三姝媚

蔷薇花谢去，更无情、连夜送春风雨。燕子呢喃，似念人憔悴，往来朱户。涨绿烟深，早零落、点池萍絮。暗忆年华，

罗帐分钗，又惊春暮。芳草凄迷征路。待去也，还将画轮留住。纵使重来，怕粉容销腻，却羞郎观。细数盟言犹在，怅青楼何处。绾尽垂杨，争似相思寸缕。

浣溪纱

柳映疏帘花映林。春光一半几销魂。新诗未了枕先温。燕子说将千万恨，海棠开到二三分。小窗银烛又黄昏。

潘希白

大有（九日）

戏马台前，采花篱下，问岁华、还是重九。恰归来、南山翠色依旧。帘栊昨夜听风雨，都不似、登临时候。一片宋玉情怀，十分卫郎清瘦。

红萸佩、空对酒。砧杵动微寒，暗欺罗袖。秋已无多，早是败荷衰柳。强整帽檐欹侧，曾经向、天涯搔首。几回忆，故国莼鲈，霜前雁後。

文及翁

贺新郎（西湖）

一勺西湖水。渡江来、百年歌舞，百年酣醉。回首洛阳花世界，烟渺黍离之地。更不复、新亭堕泪。簇乐红妆摇画艇，问中流、击楫谁人是。千古恨，几时洗。

余生自负澄清志。更有谁、翻溪未遇，传岩未起。国事如今谁倚仗，衣带一江而已。便都道、江神堪恃。借问孤山林处士，但掉头、笑指梅花蕊。天下事，可知矣。

李 珣

击梧桐（别西湖社友）

枫叶浓於染。秋正老、江上征衫寒浅。又是秦鸿过，霁烟外，写出离愁几点。年来岁去，朝生暮落，人似吴潮展转。怕听阳关曲，奈短笛唤起，天涯清远。

双屐行春，扁舟啸晚。忆昔鸥湖莺苑。鹤帐梅花屋，霜月後、记把山扉牢掩。惆怅明朝何处，故人相望，但碧云半敛。定苏堤、重来时候，芳草如翦。

木兰花慢（寄豫章故人）

故人知健否，又过了、一番秋。记十载心期，苍苔茅屋，杜若芳洲。天涯梦飞不到，但滔滔、岁月水东流。南浦春波旧别，西山暮雨新愁。

吴钩。光透黑貂裘。客思晚悠悠。更何处相逢，残更听雁，落日呼鸥。沧江白云无数，约他年、携物上扁舟。鸦阵不知人意，黄昏飞向城头。

钟 过

步蟾宫

东风又送酴醾信。早吹得、愁成潘鬓。花开犹似十年前，人不似、十年前俊。

水边珠翠香成阵。也消得、燕窥莺认。归来沈醉月朦胧，觉花气、满襟犹润。

谭方平

水调歌头

富贵在何许，五十已平头。人生得失且笑，体遣两眉愁。
管甚轮云世变，管甚风波世态，沙渚且盟鸥。止即尽教止，流
即尽教流。

田可秫，山可簌，又何求。问天只觅穷健，游戏八千秋。
好对梅花如粉，细剪烛花如豆，不改旧时游。翠袖更能舞，骑
鹤上扬州。

马迁鸾

水调歌头（隐括楚词答朱实甫）

把酒对湘浦，独吊大夫醒。当年皇览初度，饮露更餐英。服以高冠长佩，扈以江蓠薜芷，御气独乘清。谁意椒兰辈，从与武关盟。

哭东门，哀郢路，悄无宁。人世纷纷起灭，遗臭与留馨。一笑远游轻举，三叹道长世短，晦朔自秋春。洗眼看物变，朝菌共灵椿。

齐天乐（和张龙山寿词）

老夫耄矣，怪新年顿尔，衰俱现。排闷篇诗，浇愁盏酒，自读离骚自劝。长安日远。怅旧国禾宫，故侯瓜畹。风景不殊，江涛如此世绿浅。莫莫休休，乾坤毁，幽怀无限。弱羽填波，轻装浮海，其奈沧溟滟。年花婉婉。况六十平头，底须顽健。戏唱高词，作还丹九转。

沁园春（为洁堂寿）

杨柳依依，我生之辰，与公共之。叹袅娜章台，歌翻轻吹，飘零灞岸，影弄斜晖。花萼楼深，灵和殿古，人自凄凉柳自垂。相逢处，记吾侬堕地，嘉定明时。

何须梦得君知。便稳道人生七十稀。笑桓大将军，枝条如此，陶潜处士，门巷归兮。几阵花飞，一池萍碎，又向先生把寿卮。年年好，祝东风万缕，老翠云齐。

水调歌头（和洁堂韵）

老子早知退，鸥鹭未盟寒。痴顽谪六望七，宁以寿为欢。风有黍离伤咽，雅有蓼莪憔悴，使我不能餐。更把南陔读，泪落广陵澜。

踏峨眉，腾华顶，卧王官。青山与汝卒岁，紫茹可登盘。乞得白翁归处，莫学缁郎更误，危梦倚栏干。多谢长生曲，颜面怕人看。

李仁本

桂殿秋（题洞霄）

飞翠盖，走篮舆。乱山千叠为先驱。洞天迎目深且窈，满耳天风吹步虚。

桂殿秋

巘兽石，错虬松。黛岚终日下天风。杖藜携我恣遥望，缥缈霓裳飞碧空。

桂殿秋

金带重，紫袍宽。到头不似羽衣闲。君王若许供香火，神武门前早挂冠。

谢枋得

沁园春（寒食鄂州道中）

十五年来，逢寒食节，皆在天涯。叹雨濡露润，还思宰柏，风柔日媚，羞看飞花。麦饭纸钱，只鸡斗酒，几误林间噪喜鸦。天笑道，此不由乎我，也不由他。

鼎中炼熟丹砂。把紫府清都作一家。想前人鹤驭，常游绛阙，浮生蝉蜕，岂恋黄沙。帝命守坟，王令修墓，男子正当如是邪。又何必，待过家上冢，书锦荣华。

莫起炎

满江红

法在先天，玄妙处、无言可说。其要在、守乎是正，灵台莹彻。太极神居黄谷内，先天炁在玄关穴。寂然不动感而通，凭刚烈。

运风雷，祈雨雪。役鬼神，驱妖孽。只此是、非咒非符非罡诀。寂定神归元谷府，功成行满仙班列。玩太虚、稳稳驾祥云，朝金阙。

徐 理

瑞鹤仙

暮霞红映沼。恨柳枝疏瘦，不禁风搅。投林数归鸟。更枯
茎敲荻，糝红堆蓼。江寒浪小。雁来多、音书苦少。试看尽，
水边红叶，不见有诗流到。

烦恼。凭阑人去，枕水亭空，路遥天杳。情深恨渺。无计
诉与伊道。漏声催，门外霜清风细，月色今宵最好。怎割舍，
美景良时，等闲睡了。

吴季子

醉蓬莱（寿友人母）

正淡烟疏雨，梅子黄时，清和天气。阿母当年，暂辍瑶池会。霞帔星冠，霓旌羽纛，下碧霄云际。恰与瞿昙，同时共日，降人间世。

褫寝开祥，斑衣祝寿，一种灵椿，两枝仙桂。满引玻璃，且向今宵醉。待看阶庭，蓝袍交映，奉板舆游戏。到得蟠桃，熟时归去，已三千岁。

念奴娇（寿朋友）

雪罗初试，过赐衣时节，才三四日。记得延陵公子宅，麟角当年新绂。半刺名家，一经奥学，是青云人物。如何华发，蒲轮未聘遗逸。

问讯怨鹤惊猿，不妨俱隐，且逍遥丈室。有子传家经可教，况有东皋种秫。醉里乾坤，间中日月，便是长生术。瑶池宴後，剩看几度桃实。

念奴娇（再用韵伤春）

花落风初定。倚危阑、衷情欲诉，踌躇不忍。把酒问春无语，吹落游尘怎任。待泪雨、红妆蔫尽。不道燕衔春将去，误啼鹃、唤起年年恨。芳草路，人愁甚。

浮生一梦黄粱枕。且不妨、狂歌醉舞，尘谈挥柄。金谷平泉俱尘土，谁是当年豪胜。但五柳、依然陶令。千古兴亡东流水，望孤鸿、没处残阳影。无限意，伤春兴。

大江东去（自寿）

半生习气，被风霜、销尽头颅如许。七十年来都铸错，回首邯郸何处。杜曲桑麻，柴桑松菊，归计成迟暮。一樽自寿，不妨沈醉狂舞。

休问沧海桑田，看朱颜白发，转次全故。乌兔相催天也老，千古英雄坏土。汾水悲歌，雍江苦调，堕泪真儿女。兴亡一梦，大江依旧东注。

玉漏迟（自寿）

青衫华发，对风霜、倚遍危楼孤啸。恶浪平波，看尽世间多少。忘却金闺故步，都付与、野花啼鸟。只自笑。悠悠心事，无人知道。

扰扰世路红尘，看销尽英雄，青山亦老。宇宙无穷，事业到头谁了。高楼一声书角，把千古、梦中吹觉。天欲晓。起看

蕊梅春小。

玉漏迟（和）

自怜翠袖，向天寒、独倚孤篴吟啸。半世虚名，孤负白云多少。欲问梅翁旧约，怕误我、沙头鸥鸟。时一笑。行行且止，人间蜀道。休怪岁月无情，叹尘世浮生，闲忙闲老。待趁黑头，万里封侯都了。今古勋名一梦，听未彻、钧天还觉。羌管晓。楼角曙星稀小。

水龙吟（和邵清溪咏梅见寿）

分知白首天寒，千林摇落寻真隐。天工付与，冰肌雪骨，暗香寒凝。自许贞心，肯教色界，软红尘近。怅绿衣舞断，参横梦觉，依稀旧家犹认。

不为角声吹落，向花前、为伊悲恨。玉堂茅舍，风流随处，年年孤另。不是人间，肝肠铁石，相逢休问。算知心、只许东风，漏泄一分春信。

八声甘州（送吕总管）

恨公来较晚，早归朝、骢马去难留。是朱轮华毂，联珪叠组，家世公侯。今在玉堂深处，借重护偏州。好把青毡拂，奕世勋猷。

明日东津归路，正梅花霜暖，春上枝头。看连旗列鼓，送客下江楼。对云山、千年不老，向楼前、阅尽几行舟。留名在，严陵滩下，日夜东流。

传言玉女（寿何逢原母夫人九十一）

阿母今朝，飞下琼楼金阙。先教玉女，为传言细说。蟠桃手种，尚记此春时节。三千春後，开花初结。

宴罢瑶池，洗娥眉、已半雪。九旬偷度，笑韶光一映。仙翁日月，算与人间全别。从今一岁，年年三月。

最高楼（寿南山弟七旬）

南山老，还记少陵诗。七十古来稀。清池拥出红蕖坠，西风吹上碧梧枝。趁今朝，斟寿酒，记生时。也不羡、鲲鹏飞击水。也不羡、蛟龙行得雨。人世事，总危机。扶床正好看孙戏，舞衫不要笑儿痴。更埧箴，三老子，鬓如丝。

赵必岷

摸鱼子

倚西风、招鸿送燕，年华今已如客。青奴一饷贪凉梦，昨夜酒红无力。愁似织。听鸣叶寒蝉，话到情无极。舞衣春入。叹带眼偷移，琴心不断，襟袖旧时窄。

红尘陌。谁寄佳人消息。任他珠网瑶瑟。金钗两鬓霓裳曲，总是浪歌闲拍。长夜笛。且慢析轻匀，留醉酒垆侧。烟青雾白。望残照关河，晴云楼阁，何处是秋色。

林自然

西江月

二十余年看访道，经游万水千山。明师未遇肯安闲。几度拈香一瓣。

幸遇至人说破，虚无妙用循环。工夫只在片时间。遍体神光灿烂。

酹江月（金丹合潮候图）

凿开混沌，见钱塘南控、长江凝碧。今古词人图此景，谁解推原端的。岁去年来，日庚月申，因甚无差忒。如今说破，要知天地来历。

道散有一强名，五行颠倒，互列乾坤历。坎水逆流朝丙户，随月盈亏消息。气到中秋，金能生水，倍涌千重雪。神仙妙用，与潮没个差别。赋此酹江月词，默合周天之数，故录潮候於右，以示同志。

奚 洙

念奴娇（四圣观凉堂）

踏破秋痕，向虚堂、细问新凉踪迹。野客从来无管领，独鹤自还空碧。红日重开，翠华曾到，应恨湖光窄。游龙别後，两山依旧南北。

无语野草闲花，似嗔人问。万事今非昔。古木苍烟无限意，只有吟魂知得。歌舞百年，是非一醉，未必西风识。浩歌归去，满船风雨凄恻。

长相思慢

日折霜檐，寒欺雾幕，晴枝浅弄开华。惊回绮梦，独拥绫衾，腮痕微印朝霞。倦起心情，念风移霜换，依旧天涯。雁影水云斜。算相思、一点愁赊。

问橘楚橙吴，旧香犹在，别後襟袖输他。琴心知未许，想钿钗、流落谁家。怕上高楼，归思远、斜阳暮鸦。几多年、江湖浪识，知心只许梅花。

声声慢

秋声淅沥，楚棹吴鞭，相逢易老颜色。桐竹鸣骚音韵，水云空觅。炎凉自今自古，信浮生、有谁禁得。漫回首，问黄花还念，故人犹客。

莫管红香狼藉。兰蕙冷，偏他露知霜识。木落山空心事，对秋明白。征衣暗尘易染，算江湖、随人宽窄。正无据，看寒蟾、飞上暮碧。

解连环（姑苏怀古）

霁鬟新掠。正风回浪影，时摇城脚。叹天涯、春草无伦，似凝伫当时，柳颦花弱。步锦珠沈，谩一眸、千年如昨。信龙楼凤阁，无奈都由，笑歌休却。斜阳柳边自落。听幽禽两两，沙际亭泊。道世间、多少闲愁，总输与扁舟，五湖游乐。便买蓑衣，又生怕、鱼龙风恶。把从前、万事对酒，且休问著。

醉蓬莱（会稽蓬莱阁怀古）

又扁舟东下，水树青圆，雨榴红薄。燕子愁多，在重重帘幕。杖屨山阴，而今休更问，月尖眉约。双杏盟寒，七香珠堕，歌尘飘泊。

莫倚危阑，怨深黄竹，一鹤归来，乱峰飞落。笑色凌波，任雾抽烟邈。飘渺生香池冷，湘水外，片云如削。昨夜离人，游仙梦远，天风吹觉。

永遇乐

一雁斜阳，乱蛩衰草，天净秋远。独立西风，星星鬓影，疑被萋霜染。蹇修何处，秋深湘水，隐约数峰青浅。想而今，亭亭皓月，共谁倚阑凄惋。

瑶箱翠裘，玉奁芸剪，暗里泪花偷溅。一日思量，十年瘦削，春色回眸减。雕鸾好在，文箫重许，叠酒试香庭苑。正销魂，余霞散碧，暮鸦数点。

宴瑶池（神仙词）

紫鸾飞舞，又东华宴罢，归步凝碧。缥缈天风吹送睡，冷冷佩声清逸。表童两两，争笑捻、琪花半折。羽衣寒露香披，翠幢珠辂去云疾。

西真还又传帝敕。霞城检校，问学仙消息。玉府高寒，有不老丹容，自然琼液。人间尘梦，应误认、烟痕雾迹。洞云依约开时，丹华飞素白。

齐天乐（寿贾秋壑）

金飙吹净人间暑。连朝弄凉新雨。万宝功成，无人解得，秋入天机深处。闲中自数。几心酌乾坤，手斟霜露。护了山河，共看元影在银兔。

而今神仙正好，向青空觅个，冲澹襟字。帝念群生，如何便肯，从我乘风归去。夷游洞府。把月杼云机，教他儿女。水逸山明，此情天付与。

芳草（南屏晚钟）

笑湖山、纷纷歌舞，花边如梦如薰。响烟惊落日，长桥芳草外，客愁醒。天风送远，向两山、唤醒痴云。犹自有、迷林去鸟，不信黄昏。

销凝。油车归後，一眉新月，独印湖心。蕊宫相答处，空岩虚谷应，猿语香林。正酣红紫梦，便市朝、有耳谁听。怪玉兔、金乌不换，只换愁人。

华胥引（中秋紫霞席上）

澄空无际，一幅轻绡，素秋弄色。翦翦天风，飞飞万里，吹净遥碧。想玉杵芒寒，听佩环无迹。圆缺何心，有心偏向歌席。

多少情怀，甚年年、共怜今夕。蕊宫珠殿，还吟飘香秀笔。隐约霓裳声度，认紫霞楼笛。独鹤归来，更无清梦成觅。

赵闻礼

玉漏迟

絮花寒食路。晴丝罥日，绿阴吹雾。客帽欺风，愁满画船烟浦。彩柱秋千散後，恨尘锁、燕帘莺户。从间阻。梦云无准，鬓霜如许。

夜永绣阁藏娇，记掩扇传歌。剪灯留语。月约星期，细把花须频数。弹指一襟幽恨，谩空倩、啼鹃声诉。深院宇。黄昏杏花微雨。

法曲献仙音

花匣么弦，象奩双陆，旧日留欢情意。梦别银屏，恨裁兰烛，香篝夜闲鸳被。料燕子重来地，桐阴琐窗绮。

倦梳洗。晕芳钿、自羞鸳镜，罗袖冷，烟柳画阑半倚。浅雨压茶臼，指东风、芳事余几。院落黄昏，怕春莺、惊笑憔悴。倩柔红约定，唤取玉箫同醉。

瑞鹤仙

客边情味恶。花漏远、春静风鸣凤铎。空梁燕泥落。映柔红微冱，海棠帘箔。愁钟恨角。怕催人、黄昏索寞。拥吟袍、凭暖阑干，醉怯冷香罗薄。

阿鹊。幽芳月淡，紫曲云昏，有人说著。名缰易缚。归鞭杳，误期约。记金泥卜昼，银屏娱夜，弹指匆匆恨错。为情多、搀尽芳春，带围瘦觉。

瑞鹤仙（立春）

冻痕消梦草。又招得春发，旧家池沼。园扉掩寒悄。倩谁将花信，偏传深窈。追游趁早。便裁却、春衫短帽。任残梅、飞满溪桥，和月醉眠清晓。

年少。青丝纤手，彩胜娇鬟，赋情谁表。南楼信杳。江云重，雁归少。记冲香嘶为，流红回岸，几度绿杨残照。想暗黄、依旧东风，灞陵古道。

好事近

人去绿屏闲，逗晓柳丝风急。帘外杏花微雨，冱春红愁湿。单衣催赐麝尘罗，中酒病无力。应是绣床慵困，倚秋千斜立。

好事近

小枕梦催闲，飞雨时鸣高屋。挂起西窗人静，听春禽声续。
鸭塘溪绿涨轻痕，烟柳媚新绿。谁伴瘦筇尊酒，弄岩泉飞瀑。

鱼游春水

青楼临远水。楼上东风飞燕子。玉钩珠箔，密密锁红藏翠。
剪胜裁幡春日戏。簇柳簪梅元夜醉。闲忆旧欢，暗弹新泪。

罗帕啼痕未洗。愁见同心双凤翅。长安十日轻寒，春衫未试。
过尽征鸿知几许，不寄萧娘书一纸。愁肠断也，那人知未。

千秋岁

莺啼晴昼，南国春如绣。飞絮眼，凭阑袖。日长花片落，
睡起眉山斗。无个事，沈烟一缕腾金兽。

千里空回首。两地厌厌瘦。春去也，归来否。五更楼外月，
双燕门前柳。人不见，秋千院落清明后。

风入松

麝尘风雨乱春晴。花重寒轻。珠帘卷上还重下，怕东风、
吹散歌声。棋倦杯频昼永，粉香花艳清明。

十分无处著闲情。来觅娉婷。蔷薇误冒寻春袖，倩柔荑、

为补香痕。苦恨啼鹃惊梦，何时翦烛重盟。

水龙吟（水仙花）

几年埋玉蓝田，绿云翠水烘春暖。衣薰麝馥，袜罗尘沁，凌波步浅。钿碧搔头，腻黄冰脑，参差难翦。乍声沈素瑟，天风佩冷，蹁跹舞、霓裳遍。

湘浦盈盈月满。抱相思、夜寒肠断。含香有恨，招魂无路，瑶琴写怨。幽韵凄凉，暮江空渺，数峰清远。粲迎风一笑，持花酹酒，结南枝伴。

隔浦莲近

愁红飞眩醉眼。日淡芭蕉卷。帐掩屏香润，杨花扑、春云暖。啼鸟惊梦远。芳心乱。照影收春晚。

画眉懒。微醒带困，离情中酒相半。裙腰粉瘦，怕按六么歌板。帘卷层楼探旧燕。肠断。花枝和闷重捻。

贺新郎

池馆收新雨。耿幽丛、流光几点，半侵疏户。入夜凉风吹不灭，冷焰微茫暗度。碎影落、仙盘秋露。漏断长门空照泪，袖纱寒、映竹无心顾。孤枕掩，残灯炷。

练囊不照诗人苦。夜沈沈、拍手相亲，驂儿痴女。栏外扑

来罗扇小，谁在风廊笑语。竞戏踏、金钗双股。故苑荒凉悲旧赏，怅寒芜、衰草隋宫路。同磷火。偏秋圃。

谒金门

人病酒。生怕日高催绣。昨夜新翻花样瘦。旋描双蝶凑。
慵凭绣床呵手。却说新愁还又。门外东风吹绽柳。海棠花厮勾。

踏莎行

照眼菱花，剪情菰叶。梦云吹散无踪迹。听郎言语识郎心，当时一点谁消得。

柳暗花明，萤飞月黑。临窗滴泪研残墨。合欢带上旧题诗，如今化作相思碧。

叶 闾

摸鱼儿

倚薰风、画阑亭午。采莲柔舸如语。红裙溅水鸳鸯湿，几度云朝雨暮。游冶处。最好是、小桥芳树寻幽趣。绣帘低护。任凉入霜纨，月侵冰簟，长夏等闲度。

都如梦，怅望游仙旧侣。遗踪今在何许。愁予渺渺潇湘浦。槛竹空敲朱户。黯无绪。念多情文园，会草长门赋。酒酣自舞。笑满袖缁尘，数茎霜鬓，羞杀照溪鹭。

杜良臣

三姝媚

花浮深岸树。迎新曦窗影，细触游尘。映叶青梅，记共折南枝，又及尝新。驻屐危亭，烟墅杳、风物撩人。虹外斜阳留晚，莺边落絮催春。

心事应辜桃叶，但自把新诗，偏写修筠。恨满芳洲，倩晚风吹梦，暗逐江云。慢捻轻拢，幽思切、清音谁闻。谩有鸳鸯结带，双垂绣巾。

曹桀

齐天乐（和翁时可悼故姬）

翠箫声断青鸾翼，心期破钗谁表。夜烛银屏，春风粉袖，犹记琵琶斜抱。瑶池路杳。恨巫女回云，月娥沈照。谩说蓬莱，玉环花貌梦难到。

岩花亭院乍冷，更蛩吟风碎，鸿飞烟渺。绿玉弹棋，红牙按拍，乐事欢情终少。刘郎未老。要鬓翼堆玄，腕酥凝皓。莫忘香荐，绿罗裙带草。

瑞鹤仙

炉烟销篆碧。对院落秋千，昼永人寂。浓春透花骨。正长红小白，晕香涂色。铜驼巷陌。想游丝、飞絮无力。念绣窗、深锁红鸾，虚度禁烟寒食。

空忆。象床沈水，凤枕屏山，殢欢尤惜。粉香狼藉。海棠下、东风急。自秦台箫咽，汉皋佩冷，断雨零云难觅。但杏梁、双燕归来，似曾旧识。

兰陵王（雨中登龟谿乾元寺阁赋）

杏花坼。烟柳藏鸦翠陌。苏堤上、人正踏青，嫩草茸茸衬罗袜。游丝挂晴塔。十里酣红艳白。秋千外，娇靥笑春，一片笙箫绮霞碧。

阿香妒倾国。把镜日深奩，丝雨愁织。崇桃积李无颜色。但蝶粉香渍，燕泥芹冷，紫钱芳晕翳宝瑟。怅还近寒食。

岑寂。恨无极。更酒驿孤烟，棋院长日。梨花满地春狼藉。望凤阙波渺，燕楼云隔。凭阑干晚，吟袖湿，但笑拍。

玲珑四犯（被召赋荼縻）

一架幽芳，自过了梅花，独点清绝。露叶檀心，香满万条晴雪。肌素净洗铅华，似弄玉、乍离瑶阙。看翠蛟、白凤飞舞，不管暮烟啼鴂。

酒中风格天然别。记唐宫、赐樽芳冽。玉蕤唤得余春住，犹醉迷飞蝶。天气乍雨乍晴，长是伴、牡丹时节。夜散琼楼宴，金铺深掩，一庭竿月。

惜余妍（被如赋二色木香）

同根异色，看镂玉雕檀，芳艳如簇。秀叶玲珑，嫩条下垂修绿。禁华深锁清妍，香满架、风梳露浴。轻盈，便似觉、酴醾格调粗俗。

蜂黄间涂蝶粉，疑旧日二乔，各样妆束。春工，斗合靓芳

农馥。翠华临槛清赏，飞凤罽、休辞醉玉。晴昼，镇贮春、瑶台金屋。

宴山亭（被召赋玉绣球）

香月玲珑，柔风镂刻，嫩绿枝头圆腻。绯桃院宇，絮柳池塘，独立万红尘外。戏舞千团，讶粉羽、留连春媚。非是。看滚雪抛琼，镜鸾相倚。

唐昌仙观风流，有霞洞藏花，绀鬟玉蕊。雕阑占赏，禁苑承恩，难比太平瑶卉。遍插金瓶，更移近、宝猊烟翠。堪爱。只少个、鸳鸯绣带。

郑雪岩

水调歌头（甲辰皖山寄治中秋招客）

甫营亭子小，花柳斩新栽。衰翁余暇，何妨领客少徘徊。
堪叹人生离合，恰似燕莺来往，光景暗中催。芦荻晚风起，明日满沙堆。

去年秋，如此夜，有谁陪。欲挽天河无路，满眼总尘埃。
未了痴儿官事，行止从来难定，又趣到苏台。不作别离句，共醉十分杯。

赵汝茆

清平乐

锦屏香褪。寒隐轻衫嫩。燕子护泥飞不稳。庭掩百花难认。
双双绣带微风。海棠此夜帘栊。愁损一番寒食，小窗淡月
残红。

恋绣衾

柳丝空有千万条。系不住、溪桡。想今宵、也对新月，过
轻寒、何处小桥。

玉箫榭春多少，溜啼红、脸霞未消。怪别来、胭脂慵傅，
被东风、偷在杏梢。

浣溪沙

笑摘青梅傍疏。数枝花影漾前除。太湖石畔看金鱼。
笋指晓寒慵出袖，翠鬟春懒不成梳。为君缝狭绣罗襦。

梅花引

对花时节不曾忺。见花残。任花残。小约帘栊，一面受春寒。题破玉笺双喜鹊，香烬冷，绕银屏，浑是山。

待眠。未眠。事万千。也问天。也恨天。髻儿半偏。绣裙儿、宽了还宽。自取红毡，重坐暖金船。惟有月知君去处，今夜月，照秦楼，第几间。

摘红英

东风冽。红梅拆。画帘几片飞来雪。银屏悄。罗裙小。一点相思，满塘春草。

空愁切。何年彻。不归也合分明说。长安道。箫声闹。去时骢马，谁家系了。

梦江南

帘不卷，细雨熟樱桃。数点霏霞山又晚，一痕凉月酒初消。风紧絮花高。闲处少，磨尽少年豪。昨梦醉来骑白鹿，满湖春水段家桥。濯发听吹箫。

谒金门

羞说起。嚼破白桃花蕊。人在夕阳深巷里。燕见来也未。
一样半红紫。双凤同心结子。分在郎边郎不记。为郎今拆
碎。

如梦令

小研红绡笺纸。一字一行春泪。封了更亲题，题了又还坼
起。归未。归未。好个瘦人天气。

汉宫春

著破荷衣，笑西风吹我，又落西湖。湖间旧时饮者，今与
谁俱。山山映带，似携来、画卷重舒。三十里、芙蓉步障，依
然红翠相扶。

一目清无留处，任屋浮天上，身集空虚。残烧夕阳过雁，
点点疏疏。故人老大，好襟怀、消减全无。慢赢得、秋声两耳，
冷泉亭下骑驴。

玲珑四犯（重过南楼月白石体赋）

碧黯塞榆，黄销堤柳，危栏谁料重抚。才情犹未减，指点
惊如许。当时共伊东顾。为辞家、怕吟鹦鹉。袞袞波光，悠悠
云气，陶写几今古。

生尘每怜微步。渺江空岁晚，知在何处。土花封玉树。恨

极山阳赋。吹芰扇底余欢断，怎忘得、阴移庭午。离别苦。那堪听、敲窗冻雨。

鸣梭（自度）

织绡机上度鸣梭。年光容易过。萦萦情绪，似水烟山雾两相和。谩道当时何事，流盼动层波。巫影嵯峨。翠屏牵薜萝。

不须微醉自颜酡。如今难怎么。烛花销艳，但替人、垂泪满铜荷。赋罢西城残梦，犹问夜如何。星耿斜河。候虫声更多。

江城子

嫩黄初染绿初描。倚春娇。索春饶。燕外莺边，想见万丝摇。便作无情终软美，天赋与，眼眉腰。

短长亭外短长桥。驻金镳。系兰桡。可爱风流，年纪可怜宵。办得重来攀折後，烟雨暗，不辞遥。

渔家傲

深意缠绵歌宛转。横波停眼灯前见。最忆来时门半掩。春不暖。梨花落尽成秋苑。叠鼓收声帆影乱。燕飞又趁东风软。目力漫长心力短。消息断。青山一点和烟远。

薛 燧

南乡子

柳色锁重楼。楼上轻寒不满钩。堆径落约深半指，悠悠。
飞絮帘栊几许愁。

逐日望归舟。暖藕全宽玉臂鞦。待得君来春去也，休休。
未老鸳鸯早白头。

杨韶父

伊州三台令

水村月淡云低。为爱寒香晚吹。瘦马立多时。是谁家、茅舍竹篱。

三三两两芳蕤。未放琼铺雪堆。只这一些儿。胜东凤、千枝万枝。

如梦令

凉月薄阴犹殢。红豆一枝秋思。门外几重山，山外行人千里。归未。归未。又是菊花天气。

长相思

溪水清。溪水浑。溪上人家数亩园。垂杨深闭门。
青罗裙。白罗裙。采尽青蘩到白苹。江南三月春。

史 深

玉漏迟

绿树深庭院。侵帘暝草，沿砌幽藓。问讯余芳，糝迳碎红千点。暗有芹香堕几，认杏栋、营巢新燕。晴思软。春光几放，费人裁翦。

梅阴地湿无尘，但密袖薰虬，静看诗卷。半掬羁心，似翠蕉难展。花事因循过了，渐愁人、薰风团扇。屏画掩。屏上数峰青远。

木兰花慢

画楼帘半卷，倩谁觅、凤箫音。记待月梅边，笼香酒後，私语屏阴。匆匆佩珠暗解，断归鸿、消息两沈沈。前度刘郎易老，旧时飞燕难寻。

罗襟。薄有泪痕侵。钗股暗黄金。向宝奁密看，绡笺小字，长是惊心。登临漫劳眺远，但青山、杳隔暮云深。曾傍湾击马，紫骝嘶度平林。

花心动（泊舟四圣观）

肌雪浮香，见梅花清姿，漫劳凝伫。淡粉最娇，羞把春，
长记寿阳眉妩。绿苔深迳寻幽地，谁相伴、凌波微步。翠鸳冷，
芳尘路杳，旧游何处。

不信重城间阻。终没个因由，寄声传语。宝炬凝珠，彩笔
呵冰，密写断肠新句。月寒烟暝孤山下，羞吟、断桥边去。
遮愁绪。丹青怎生画取。

丁 默

齐天乐（重游番阳）

两株烟柳荒城外，依依暮帆曾驻。小扇障尘，轻舆贴岸，谁料重行吟处。流光暗度。怅兰溆春移，苇汀秋聚。可奈清愁，快呼艇子载将去。

中年怀抱易感，甚风花水叶，犹似孤旅。伴鹤幽期，随莺乐事，还是情乘意负。衣尘帽土。但镜堪羞，贺囊偏 。待报山灵，莫教云壑妒。

华胥引

论交眉语，惜别心啼，费情不少。蕙渺溱期，苹深汜经轻误了。几度金铸相思，又燕紧鸿杳。谁料如今，被莺闲占春早。

频把愁勾，惜鸦云、娇红犹绕。浑拚如梦，争奈枕醒屏晓。欲寄芙蓉香半握，怕不禁秋恼。重是亲逢，片帆双度天杪。

齐天乐（庚戈元夕都下遇赵立之）

倦去休雨风还作，交相醒花苏柳。字满吟灰，痕添坐席，赢得新愁痴守。归期未有。负小院移兰，故园尝韭。谩道春来，沈腰惟觉似秋瘦。

烧灯时候是也，楚津留野艇，曾趁芳友。问月赊晴，凭春买夜，明月添香解酒。知别久。怅帝陌论心，客尘侵首。戏鼓声中，旧情犹在否。

曾 栋

浣溪沙

落日蒸红山欲烧。短筇行药过山腰。松声隐隐晚来潮。
短树依岩无败叶，梅花当路少全梢。水村时有短长桥。

过秦楼

曙色开晴，轻颺敷暖，日影才经檐角。倦来芳径，且倚阑干，触地新愁粘著。长日如年，可堪恨雨丝丝，梦去漠漠见鸣禽递响，乳莺梳翅，痴愁方觉。

凝望处，初绿呈新，陈柯拆旧，忘了一春归却。不伤花老，只怕花开，解使朱须销铄。宝扇轻摇，乱抛花片教飞，迎风低掠。忍重携素手，骤觉一分瘦落。

江 开

玉楼春

风前帘幕沾飞絮。家在垂杨深处住。倚楼无语忆郎时，恰是去年今日去。

帝城箫鼓青春暮。应有多情游冶处。争知日日小阑干，望断斜阳芳草路。

菩萨蛮（商妇怨）

春时江上帘纤雨。张帆打鼓开船去。秋晚恰归来。看看船又开。

嫁郎如未嫁。长是凄凉夜。情少利心多。郎如年少何。

浣溪沙

手捻花枝忆小苹。绿窗空锁旧时春。满楼飞絮一筝尘。素约未传双燕语，离愁还入卖花声。十分春事倩行云。

杏花天

谢娘庭院通芳径。四无人、花梢转影。几番心事无凭准。
等得青春过尽。

秋千下、佳期又近。算毕竟、沈吟未稳。不成又是教人恨。
待倩杨花去问。

王 某

汉宫春（九日登丰乐楼）

手捻黄花，对西风无语，双鬓萧萧。韶华暗中过眼，零落心交。登临把酒，更谁伴、破橘持螯。惟只有，湖边鸥鹭，飞来如受人招。

往事不禁重省，料绡罗分钿，翠减香销。空向画桥古树，犹系轻桡。西兴渡口，误归帆、几信寒潮。伤情处，淡烟残照，倚阑人共秋高。

程 武

念奴娇（题马嵬图）

蜀江城远，想连云危栈，接天穷处。惆怅烟尘回首地，双阙觚棱犹故。龙扈星联，羽林风肃，未放鸾骖去。不堪掩面，泪沾宸袖如雨。

底事当日昭阳，吹羌鸣羯，湮却霓裳舞。三十六宫春满眼，曾把色嗔香妒。芳草埋情，飞花陨怨，翻被蛾眉误。画图惊见，黯然魂断今古。

清平乐

曳云摇玉。裙蹙秋绡幅。学得琵琶依约熟。贪按雁沙新曲。曲终满院春闲。清颦移上眉山。心事怕人猜破，折花背插云鬟。

小重山

香减鲛绡添泪痕。彩云长是恨，等间心。玉笙犹记夜深闻。

湘水杳，寂寞隔巫云。

翠被冷重熏。做成归梦了销魂。重杨浓处著朱门。依然是，
风雨掩黄昏。

王月山

齐天乐

夜来疏雨鸣金井，一叶舞空红浅。莲渚收香，兰皋浮爽，凉思顿欺班扇。秋光苒苒。任老却芦花，西风不管。清兴难磨，几回有句到诗卷。

长安故人别後，料征鸿声里，画阑凭偏。横竹吹商，疏砧点月，好梦又随云远。间愁似线。甚击损柔肠，不堪裁剪。听著鸣蛩，一声声是怨。

王万之

踏莎行

柳外寒轻，水边亭小。昨朝燕子归来了。天涯无数旧愁根，
东风种得成芳草。

亭畔秋千，当时欢笑。香肌不满和衣抱。那堪别後更思量，
春来瘦得知多少。

钱一孙

踏莎行

征雁云深，乱蛩寒浅。惊心怕见年华晚。萧疏堤柳不禁霜，
江梅瘦影清相伴。舞暗香茵，歌阑团扇。月明梦绕天涯远。断
肠人在画楼中，东风不放珠帘卷。

陈 璧

踏莎行

江阔天低，楼高思迥。春烟蘸淡如秋景。今年芳草去年愁，
分明又报明年信。燕子还来，归期未定。可堪醉梦红尘境。世
间万事尽消磨，水流不尽青山影。

赵时奚

多丽（西湖）

敛吴云，翠奁推上红晴。渺澄流、鳞光寒碎，远峰螺绀低凝。杏香引、画船影湿，柳阴趁、骄马蹄轻。桥限宽平，堤横南北，去来人入绣围行。渐际晚，梅妆游困，十里曳歌声。苍烟润，飞鸦妒春，一梦催醒。

认名园、当时宴幸，缆痕犹在危亭。露花浓、静迎直砌，雾藓冷、淡护飞甍。几对东风，留连丽景，年 老越山青。夜深月、照人依旧，何处最关情。欢娱地，星移世换，客恨还盈。

汉宫春

霜皎千林，正石桥人静，春满横塘。寒花自开自落，晓色昏黄。明沙暗草，对东风，深锁闲堂。金漏短，江南路远，梦回云冷潇湘。

重到旧时花下，按玉笙歌彻，月正西廊。亭亭爱伊素影，粉薄新妆。经所瘦损，漫谁知、心事凄凉。休更听，城头画角，一声声断人肠。

恋绣衾

迢迢江路日又曛。为春迟、长是怨春。小立马、千林下，
寄寒香、归赠故人。

相逢细说经年恨，早匆匆、吹散霁去。算惆怅、芳菲事，
粉蝶知、应自断魂。

恋绣衾

江南烟水几万重。记玉人、花底旧容。待欲寄、飞鸿信，
望前山、夕照冷红。

塞笳月下声凄楚，怨百花、春事梦空。倩谁共、东君说，
把阳和、分付朔风。

向希尹

祝英台近

晓帘栊，晴院宇，空鸭冷水。翠被欺寒，娇困未忺起。厌厌两点眉峰，一痕酒晕，正人在、温柔乡里。

甚情味。羞对钗燕筝鸿，胭脂暗弹泪。欲写吴笺，无处问双鲤。倩他轻薄杨花，与愁结伴，直吹到、那人根底。

浪淘沙

结客去登楼。谁击兰舟。半篙清涨雨初收。把酒留春春不住，柳暗江头。

老去怕闲愁。莫莫休休。晚来风恶下帘钩。试问落花随水去，还解西流。

萧元之

渡江云（和清真）

流苏垂翠幙，高低一色，红紫等泥少。香山居士老，柳枝桃叶，飞梗属谁家。好音过耳，任啼鸟、怨入芳华。心情懒，笔床吟卷，醉墨戏翻鸦。

堪嗟。雕弓快马，敕勒追踪，向夕阳坡下。休更忆，青丝络辔，红袖裁纱。司空见惯浑如梦，笑几回、索苇吹葭。山中乐，从渠恣赏莺花。

菩萨蛮

断红流水香难觅。行云一去无踪迹。杨柳漫遮阑。闲愁付远山。

玉笋弹未了。倚柱人空老。青子摘来酸。酸心有几般。

水龙吟（答沈壮可）

人生何必求名，身闲便是名商处。卧云衣袂，何因自染，

修涂尘土。世路羊肠，人情狙赋，翻云覆雨。把从前旧梦，倚
阑重省，体更错、添笺注。

况是吾庐江上，也抵得、封侯千户。高眠闲听。邻舟渔唱，
倚阑农语。休望当年，溪边俱载，隆中三顾。怕群鸥微觉，见
人欲起，背人飞去。

陈成之

小重山

恨入眉尖熨不开。日高犹未肯，傍妆台。玉郎嘶骑不归来。
梁间燕，犹自及时回。

粉泪污香腮。纤腰成瘦损，有人猜。一春那识下香阶。春
又去，花落满苍苔。

王师锡

如梦令

竹上一楼岚翠。竹下一渠春水。中有隐人居，破屋数间而已。无事。无事。静夜月明千里。

赵时行

望江南

霜月湿，人睡矮篷秋。惊觉夜深儿女梦，渔歌风起白苹洲。
别岸又潮头。

郭 某

菩萨蛮

卖饧天气箫声软。午院水沈烟未断。睡起补残眉。红绵入镜迟。

霎时开笑靥。花上看双蝶。新月上帘钩。相思不断头。

王大简

浣溪沙

拂面凉生酒半醒。廉纤小雨晚初晴。过云无定月亏盈。
庭户不关春悄悄，阑干倚遍夜深深。几回风竹误人听。

更漏子

梦期疏，书约误。肠断夜窗风雨。灯晕冷，漏声遥。酒消
愁未消。

想天涯，芳草碧。人与芳春俱客。凭杜宇，向江城。好啼
三两声。

刘菊房

蓦山溪

醉魂离梦，捻合难成片。恶味怕黄昏，更西风，梧桐深院。
蝉松翠妩，记那日相逢，情缱绻，语玲珑，人静凌波见。

香云曾约，念阻题红怨。应是绿窗寒，也思郎、云衣谁换。
郎今销黯，步楚竹江空，云缥缈，水弥茫，不抵相思半。

杜龙沙

谒金门

阶露重。浥透寻花双凤。天色清明风不动。薄衫金络缝。
午枕高云斜纵。一觉风流春梦。起看翻翻帘影弄。夕阳归燕共。

踏莎行

波暖芹汀，风香兰圃。清尘几点茸茸雨。画船丝竹载梁州，
彩旗绳板欢游女。

修禊初三，禁烟百五。年华恰到风流处。一生只当百回春，
一回春到休轻负。

斗鸡回（夹钟商）

莺啼人起，花露真珠洒。白苎衫，青骢马。绣陌相将，斗
鸡寒食下。

回廊暝色恹恹，应是待、归来也。月渐高，门犹亚。闷剔

银缸，漏声初入夜。

雨淋铃

窗影珑璁，画楼平晓，翳柳啼鸦。门巷渐有新烟，东风定、人扫桐花。峭寒斗减，看旅雁、争起蒹葭。溯断云，多少悲鸣，数行又下远行沙。

应是故园桃李谢。送清江、一曲阑干下。染翰为春羈，嗟双鬓、客舍成华。绣鞭绮陌，强携酒、来觅吴娃。听扇底、凄惋新声，醉里翻念家。

王 苍

诉衷情

补成团扇绣残工。并蒂瑞芙蓉。花心欲就针折，赭玉唾残
茸。

寻断绪，怨西风。寂寥中。两般时候，旧月新霜，晓角昏
钟。

宋德广

阮郎归

好风吹月过楼西。楼前人影稀。杜鹃啼断绿杨枝。行人知不知。

红叶字，断肠诗。从今懒再题。後园零淡胭脂。似君初去时。

李好古

谒金门

花过雨。又是一番红素。燕子归来愁不语。旧巢无觅处。
谁在玉关劳苦。谁在玉楼歌舞。若使胡尘吹得去。东风侯万户。

黄廷琬

解连环

乍寒帘幕。愁灯花正结，又还轻落。弄瘦影、瓶里梅梢，为谁缀陇头，向来新萼。万古千今。算惟有、别情难托。把潘郎鬓绿，尽付雁声，几度寥寞。扁辰暮江旧泊。记携觞就折，烟翠犹弱。温过却、歌夕吟朝，问天道何时，素纤重握。想得文姬，近更苦、云衣香薄。待更阑、试寻梦境，梦回更恶。

忆旧游

乍梅黄雨过，偏倚层楼，时舞垂杨。暗绿知谁换，似烟浓雾薄，望眼偏妨。昔人画鹢无数，相引入横塘。纵细切香蒲，重开绛蕊，懒向清觞。

凄凉。旧游地，谩赋减兰成，才退周郎。总把芳辰误，念纱窗深静，冰簟流光。凤笺试写新句，青羽碧天长。又隐隐城头，随风断角斜照黄。

宴清都

坠叶窥檐语。风帘薄，递来幽恨无数。牙签倦展，银缸细剔，悄然归旅。声传漏阁偏长，更奈向、潇潇乱雨。想近日，舞袖翻云，吟笺度雪谁顾。

当时翠缕吹花，东城绣陌，双燕何许。香罗唾碧，晴纱印粉，甚缘重睹。蓝桥镇隔芳梦，念骑省、悲秋漫赋。待倚阑，或遇宾鸿，殷勤寄与。

兰陵王

絮花弱。吹满斜阳院落。秋千外，无数小舟，绿水溶溶带城郭。流光漫暗觉。辜却。莺呼燕诺。欢游地，都在梦中，双蝶翩翩度帘幕。

凭谁问康乐。又粉过新梢，红褪残萼。阑干休倚东风恶。怜瑟韵空在，鉴容偷改，青青洲渚偏杜若。故交半寥寞。漂泊。镇如昨。念玉指频弹，珠泪还阁。孤灯隐隐巫云薄。奈别遽无语，恨深谁托。明朝何处，夜渐短，听画角。

琐窗寒

驻马林塘，还寻旧迹，雨收秋晚。残蕉映牖，强把碧心偷展。记相逢、画堂宴开，乱花影入帘初卷。正小池涨绿，丝纶曾试，事随鸿远。

凄断。情何限。料素扇尘深，怨娥碧浅。清宫丽羽，漫有苔笺题满。问低墙、双柳尚存，几时艳烛亲共剪。但凝眸，数

点遥峰，春色青如染。

齐天乐

十年汉上东风梦，依然淡烟莺晓。击马桥空，维舟岸易，谁识当时苏小。筹花斗草。任波浴斜阳，絮迷芳岛。笑底歌边，黛娥娇聚怕归早。

京尘衣袂易染，旧游随雾散，新恨难表。燕子朱扉，梨英翠箔，留得春光多少。晴丝漫绕。料带角香销，扇阴讲杳。细倚秋千，片云天共渺。

陈坦之

塞翁吟

远碧秋痕瘦，楚玉恨赋凄凉。荷雨碎，泣残妆。击愁在垂杨。秋衣拂叠仙栀露，裁云刀尺犹香。诗锦字，献明榼。肯容易相忘。

思量。空掩抑，分宵缓枕，终不敌、凉谯漏长。自解珮、兰皋去後，渐消灭、香梅酝藉，小杜疏狂。年华驶水，鬓影西风，都付清觞。

沁园春

睡起闻莺，卷帘微雨，黄昏递愁。正青翰音断，离怀几折，碧云暮合，千里双眸。思发花前，人归雁後，误记归帆天际舟。浑无据，但余香绕梦，频到西楼。

风流。翻是花仇。谩长遣眉山翠不流。想哀筝绕指，鸿移凤咽，残灯背泣，玉沁春柔。夜月精神，朝阳微艳，何处瑶台轻驻留。愁无际，被东风吹去，绿黯芳洲。

柳梢青

绿弱红臞。暖云沁雨，乍有还无。破晓幽禽，平渠流水，春响庭除。

梅酸初著花跗。似滴滴、新愁未舒。几信花风，一痕青烧，万里秦吴。

谒金门

归未卜。频倒金驱纤玉。明月绡窗停剪烛。搦愁题蠹绿。

秋水娟娟鱼目。腰素几分销缩。接得云笺无意读。雕鞍何处宿。

张 艾

夜飞鹊（荷花）

霓裳按歌地，凉影参差。还是佩解江湄。沧波正洗袜尘恨，流霞空沁铢衣。盈盈半输笑，向朱阑凝伫，欲诉心期。碧筒唤酒，恐娇娥、来下瑶池。

未许西风吹断，环步障千重，镇护金猊。落晚文禽点镜，分香窃翠，却念幽羁。彩云惊散，暗伤情、不似芳时。待清歌招些，怜心问的，水杳舟移。

解语花

轻雷殷殷，小枕惊回，帘影摇庭户。嫩凉遥度。江云堕、结作西窗暗雨。闲阶静伫。叹疏袂、愁宽一缕。凭画栏，润叶鸣条，总是安秋处。

因唤扁舟晚渡。渐闻歌招得，采菱俦侣。临平归路。花无数、应认汀洲倦旅。飞红怨暮。长趁得、断鸿南浦。闲枕衾，谁更无聊，应最怜纨素。

绕佛阁

渚云弄湿，烟缕际晚，江国遥碧。鸿过无迹。怕闻野寺孤钟动凄恻。小桥路窄。疏袖暗拂衰草，愁听蛩语还寂。可堪过了，龟纱负瑶席。

荏苒露华白。一夜秋窗惊晓色。柳影孤危，残蝉空抱叶。想摇落关情，归梦频折。物华消歇。尽倒断寒塘，幽香先灭。怨红供、拒霜啼颊。

徐 某

真珠帘

落红几阵清明雨。忆花期、半被晴慳寒阻。新柳著春浓，早翠池波妒。粉雨香去消息远，温旧日、秋千庭宇。凝伫。正春醒帘外，一声莺语。

尘锁宝箏弦柱。自眉峰惹恨。六么慵舞。深院不成妆，有泪弹谁与。记得踏青归去後，细共说、花阴深处。心恁。怕当时飞燕，知人分付。

施翠岩

桂枝香

西凤满目。渐院落悄清，愁近银烛。多少虫书堕翠，又随波殢。姮娥半露扶疏影，向虚檐、似知幽独。浦鸿声断，枝乌漏永，芳梦难续。

记旧日、离亭细嘱。早归趁香边，频泛酝酝。谁遣而今，对景黛娥双蹙。玉鞭但共秋光远，漫空怜、如许金粟。露零襟冷，萧萧更兼，数竿修竹。

沁园春（夜登白鹭亭）

披紫萸裘，上白鹭亭，看吹洞箫。望长庚鲸过，江横素练，回仙鹤度，月在青霄。依约淮山，清淮冷风露，如到瀛洲听海涛。浮图近，更玉铃金铎，初奏琅璈。

人间梦境寥寥。部故国繁华能几朝。有千年枯井，龙沈凤怨，数邱黄壤，兔走猿噪。莫问荣华，不如归去，短棹孤篷乘夜潮。翠岩下，耕白云二顷，胜种仙苗。

续雪谷

念奴娇

砌红慵扫，问东风、应念西园寥落。帘卷垂杨莺啭巧，才见还因飞却。捻指光阴，关心节序，总在秋千索。翻翻双蝶，傍人争趁行乐。

曾记步月归来，秦筝弹偏，共倚阑干角。别後池亭谁斗草，多少芳游担阁。世事升沈，人生聚散，俯仰空如昨。余香犹在，绣帏清晓寒薄。

南歌子

眼媚双波溜，腰柔一搦纤。问伊何事放珠帘。笑道篆香销尽、要重添。

数日宽金钏、梳云拂翠鬟。梅妆依旧落虚檐。题起一春心事、两眉尖。

长相思

心悠悠。恨悠悠。谁剪青山两点愁。笙寒燕子楼。
晓星稀。暮云飞。纤就回文不下机。花飞人未归。

荣樵仲

水调歌头

既难求富贵，何处没溪山。不成天也、不容我去乐清闲。
短褐宽裁疏葛，柱杖横拖瘦玉，著个竹皮冠。弄影碧霞里，长
啸翠微间。

醉时歌，狂时舞，困时眠。翛然自得，了无一点俗相干。
拟把清风明月，剪作长篇短阕，留与世人看。待倩月边女，归
去借青鸾。

陆象泽

贺新凉（送灵山冯可久通守浔阳）

笛唤春风起。向湖边、腊前折柳，问君何意。孤负梅花立晴昼，一舸凄凉雪底，但小阁、琴棋而已。佳客清明留不住，为匡庐、只在家窗里。湓浦去，两程耳。

草堂旧日谈经地。更从容、南山北水，庾楼重倚。万卷心胸几千古，仰首骎骎紫气。正江上、风寒如此。且趁霜天鲈鱼好，把貂裘、换酒长安市。明夜去，月千里。

鞠华翁

桂枝香（过溧水感羊角哀左伯桃遗事）

丁丁起处。在纵牧九京，经烧残树。时见鸟鸢饥噪，鸱鸢妖呼。数间老屋团荒堵。算何人、瓣香来注。淡烟斜照，闲花野棠，杳杳年度。

世事几、番云覆雨，独此道嫌人，抛弃尘土。眼里长青，谁也解如山否。三三五五骑牛伴，望前村、吹笛归去。柳青梨白，春浓月淡，蹋歌椎鼓。

绮寮怨（月下残棋）

又见花阴如水，两心犹未平。正坐久、主客成三，空无语、影落楸枰。千年人间事业，垂成处、一著容易倾。便解围、小住何妨，机锋在，瞬息天又明。

甚似汉吴对营。纷纷不了，孤光照彻连城。又似残星，向零落，有余情。姮娥笑人迟暮，念才力，底须争。从亏又成。何人正听隔壁声。

曾 颜

贺新郎（贺耐轩周府尹·己卯）

富贵人间有。就如今、秤量阴德，还公最厚。一郡鹖仑全似旧，春满霜畴稻亩。近帐外、干将夜吼。直指禾川弄霆雷，纵山阴、鹿健那能走。都算计，怎担负。

单车曲曲穿岩窦。向迷途、分明一呼，散渠回首。夹路香花迎拜了，见说家家举酒。道公是、再生父母。活一口还添一岁，这一回、活几千千口。只此事，是公寿。

好事近（以梅为寿）

昨夜探寒梅，先报消息。天遣花神妆点，衬贤侯清白。

试将玉蕊比修龄，算枝头千百。更有不凡风味，付调羹仙客。

朱子厚

谒金门

风动竹。清偏一窗梅溽。闻道小乔乘凤玉。仙裳飘雾縠。
来嫁吾门公瑾叔。天上人间愿足。浓缣水沈燃宝烛。鬓长
相对绿。

谒金门（用李後主韵二首）

梅梢腊尽春归了。毕竟春寒少。乱山残烛雪和风。犹胜阴
山海上、窖群中。

年光老去才情在。惟有华风改。醉中幸自不曾愁。谁唱春
花秋叶、泪偷流。

谒金门

情知是梦无凭了。好梦依然少。单于吹尽五更风。谁见梅
花如泪、不言中。

儿童问我今何在。烟雨楼台改。江山画出古今愁。人与落

花何处、水空流。

谒金门（春晓）

轻衫倚望春晴稳。雨压青梅损。皱绡池影泛红蕖。看取断云来去、似炉烟。

悉春来暮仍愁暮。受却寒无数。年来无地买花栽。向道明年信、莫须来。

谒金门（花品）

娟娟二入清明了。犹说淮阳早。钱欧陆谱偏花光。红到寿阳、也不说淮阳。

此花地望元非薄。回首伤流落。洛阳闲岁断春风。怎不当时道是、洛阳红。

谒金门（李府尹美在）

待借留、几曾留得，来鸿空怨秋老。至今父老依依恨，犹说李将军好。东门草。早不为东风，遮却长安道。余民如稿。愿金印重来，洪都开府，定复几时到。

秋江鹭，尤记当年潦倒。沧洲无复华皓。朝饥堕泪荒田雨，洗忆窝蜂败扫。天能报。看凤烛亭亭，玉树宽人抱。风霜善保。但逢驿寄书，无书寄语，要说趋朝早。

金缕曲（送五峰归九江）

世事如何说。似举鞍、回头笑问，并州儿葛。手障尘埃黄花路，千里龙沙如雪。著破帽、萧萧余发。行过故人柴桑里，抚长松、老倒山间月。聊共舞，命湘瑟。

春风五老多年别。看使君、神交意气，依然晚合。袖有玉龙提携去，满眼黄金台骨。说不尽、古人痴绝。我醉看天天看我，听秋凤、史动檐间铁。长啸起，两山裂。

意难忘（元宵雨）

角动寒谯。看雨中灯市，雪意潇潇。星球明戏马，歌管杂鸣刁。泥没膝，舞停腰。焰蜡任风销。更可怜、红啼桃槛，绿黯杨桥。

当年乐事朝朝。曾锦鞍呼妓，金屋藏娇。围香春斗酒，坐月夜吹箫。今老矣，倦歌谣。嫌杀杜家乔。漫三杯、踞炉觅句，断送春宵。

大酺（春寒）

任琐窗深、重帘闭，春寒知有人处。常年笑花信，问东风情性，是娇是妒。冰柳成须，吹桃欲削，知更海棠堪否。相将燕归又，看香泥半雪，欲归还误。温低回芳草，依稀寒食，朱

门封絮。

少年惯羁旅。乱山断，欹树唤船渡。正暗想、鸡声落月，梅影孤屏，更梦衾、千重似雾。相如倦游去。掩四壁、凄其春暮。休回首、都门路。几番行晓，个个阿娇深贮。而今断烟细雨。

谒金门（惜春）

风又雨。春事自无多许。欲待柳花团作絮。柳花冰未吐。翠袖不禁春误。沈却绿烟红雾。将谓花寒留得住，一晴春又暮。

临江仙

过眼纷纷遥集，来归往往 儿。草间塞口袴间啼。提携都不是，何似未生时。

城上胡笳自怨，楼头画角休吹。谁人不动故乡思。江南秋尚可，塞外草先衰。

水调歌头（游洞岩，夜大风雨，彭明叔索赋，醉墨颠倒）

坐久语寂寞，泉响忽翻空。不知龙者为雨，雨者为成龙。看取交流万壑，不数飞来千丈，高屋总淙淙。是事等恶剧，裂石敢争雄。

敲铎匳，扞滑仄，藉蒙茸。苍浪向来半掩，厚意复谁容。
欲说正元旧事，未必玄都千树，得似洞中红。檐语亦颠倒，洗
尔不平胸。

绮寮怨（青山和前韵忆旧时学馆，因复感慨同赋）

漫道十年前事，闷怀天又阴。何须恨、典了西湖，更笑君、
宴罢琼林。闲时数声啼鸟，凄然似、上阳宫女心。记断桥、急
管危弦，歌声远，玉树金楼沈。

看万年枝上禽。徊徨落月，断肠理绝弦琴。魂梦追寻。挥
泪赋白头吟。当年未知行乐，无日夜、望乡音。何期至今。绿
杨外、芳草庭院深。

颜 奎

醉太平（寿须溪）

茶边水经。琴边鹤经。小窗甲子初晴。报梅花小春。
小冠晋人。小车洛人。醉扶儿子门生。指黄河解清。

清平乐（留静得）

留君少住。且待晴时去。夜深水鹤云间语。明日棠梨花雨。
尊前不尽余情。都上鸣弦细声。二十四番风後，绿阴芳草
长亭。

归平遥

春 拂拂。檐花双燕入。少年湖上风日。问天何处觅。
湖山画屏晴碧。梦华知夙昔。东风忘了前迹。上青无半壁。

浣溪沙

梦泊游丝画影移。水沈香宛紫烟微。玉笙才过画楼西。
天上人间花事苦，镜中翠压四山低。又成春据莺啼。

菩萨蛮

燕姬越女初相见。鬓云翻覆风转。日日转如云。朝朝白发新。
江南古佳丽。只绾年时髻，信手绾将成。从来懒学人。

忆秦娥

水云幽。怕黄霜竹生新愁生新愁。生新愁如今何处，倚月明楼。
龙吟杳杳天悠悠。腾蛟起舞鸣空篴。鸣篴篴。听吹短气，江上无秋。

大酺（和须溪春寒）

唱古茶臼，新荷叶，谁向重帘深处。东风三十六，向园林都过，余寒犹妒。公子狐裘，佳人翠袖，怎见此时情否。天上知音杳，怪参差律吕，世间多误。记画扇题诗，单衣试酒，梦归泥絮。

嗟春如逆旅。送无路、远涉前无渡。回首住、凌波亭馆，

待月楼台，满身花气凝香雾。度入南薰去。留燕伴、不教迟暮。
但一点、芳心苦。生怕摇落，分付荷房收贮。晚妆又随过雨。

摸鱼儿（尘梅）

对琴台、不堪尘涴，春风微露纤指。峥嵘鹤膝翘空势，取
次著花安蕊。偏有意。把竹外一枝，飞洒轻烟里。月良如洗。
又底事丹青，何须水墨，虚白阍清泚。

华堂暮，珍重休弹尘尾。静中留此佳致。桥西几度香浮处，
回首都随流水。闲徙倚。叹汨没黄埃，变幻皆如此。蜚廉莫起。
待别有神人，风斤一运，和影上窗纸。

尹济翁

木兰花慢（寄朱子西）

渺渺怀芳意，苦对景、可怜生。记燕外莺边，柳深竹嫩，度密穿青。如今淡烟细雨，正午窗半梦酒初醒。乐事怎堪重省，起来一饷愁萦。

悠然又把酒壶倾。摆不动离情。想闲却春游，绿阴深院，芳草长亭。乾愁有谁解得，傍晚来，风起碎池萍。坐待晴云四卷，依然月上疏棂。

玉蝴蝶（和刘清安）

几许暮春清思，未知芍药，先拟荼蘼。老却东风，春去不与人期。似情多、何曾荀倩，便梦断、不为崔徽。且衔杯。暖风袭袭，淡日晖晖。

怎知，怀芳心在，树花露泣，叶竹烟啼。满目清红，新悉成阵恨成围。画帘空、龙媒独倚，午阴静、燕子双飞。任春归。寻人柳下，梦句堂西。

声声慢（禁酿）

雕鞍芳径，翠管长亭，春醒不负妍华。几丈闲愁，寄风吹落天涯。深深小帘朱户，是何人、重整香车。愁未醒，记竹西歌吹，柳下人家。眉锁何曾舒展，看行人都是，醉眼横斜。寄语高阳，从今休唤流霞。残春又能几许，但相从、评水观茶。清梦远，怕东风、犹在杏花。

风入松（癸巳寿须溪）

曾闻几度说京华。愁压帽檐斜。朝衣熨贴天香在，如今但、弹指兰阁。不是柴桑心远，等闲过了元嘉。

长生休说枣如瓜。壶日自无涯。河倾南纪明奎壁，长教见、寿珪成霞。但得重携溪上，年年人共梅花。

一萼红（和玉霄感旧）

玉搔头。是何人敲折，应为节奏讴。槌几朱弦，剪灯雪藕，几回数尽更筹。草草又、一番春梦，梦觉了、风雨楚江秋。却恨闲身，不如鸿雁，飞过妆楼。

又是山枯水瘦，叹回肠难贮，万斛新愁。懒复能歌，那堪对酒，物华冉冉都休。江上柳、千丝万缕、恼乱人、更忍凝眸。犹怕月来弄影，莫上帘钩。

郑 楷

诉衷情

酒旗摇曳柳花天。莺语软於棉。碎绿未盈芳沼，倒影蘸秋
千。

奁玉燕，套金蝉。负华年。试问归期，是酴醾后，是牡丹
前。

赵 淇

谒金门

吟望直。春在阑干咫尺。山插玉壶花倒立。雪明天混碧。
晓露丝琼滴。虚揭一帘云湿。犹有残梅黄半壁。香随流水
急。

张 磐

绮罗香（渔浦有感）

浦月窥檐，松泉漱枕，屏里吴山何处。暗粉疏红，依旧为谁匀注。都负了、燕约莺期，更闲却、柳烟花雨。纵十分、春到邮亭，赋怀应是断肠句。

青青原上荠麦，还被东风无赖，翻成离绪。望极天西，惟有陇云江树。斜照带、一缕新愁，尽分付、暮潮归去。步闲阶、待卜心期，落花空细数。

浣溪沙

习习轻风破海棠。秋千移影上回廊。画长蝴蝶为谁忙。
度柳早莺分暖绿，过花小燕带春香。满庭芳草又斜阳。

张 林

唐多令

金勒鞚花骢。故山云雾中。翠苹洲、先有西风。可惜嫩凉时枕簟，都付与、旧山翁。

双翠合眉峰。泪华分脸红。向尊前、何太匆匆。才是别离情便苦，都莫问、淡和浓。

柳梢青（灯花）

白玉枝头，忽看蓓蕾，金粟珠垂。半颗安榴，一枝秣杏，五色蔷薇。

何须羯鼓声催。银缸里、春工四时。却笑灯蛾，学他蝴蝶，照影频飞。

曹良史

江城子

夜香烧了夜寒生。掩银屏。理银筝。一曲春风，都是断肠声。杜宇欲啼杨柳外，愁似海，思如云。

背灯暗卸乳鹅裙。酒初醒。梦初醒。兰炷香篝，谁为暖罗衾。二十四帘人悄悄，花影碎，月痕深。

赵与仁

柳梢青（落桂）

露冷仙梯。霓裳散舞，记曲人归。月度层霄，雨连深夜，谁管花飞。

金铺满地苔衣。似一片、斜阳未移。生怕清香，又随凉信，吹过东篱。

琴调相思引

冰箔纱帘小院清。晴尘不动地花平。昨宵风雨，凉到木樨屏。

香月照妆秋粉薄，水云飞佩藕丝轻。好天良夜，闲理玉靴笙。

西江月

夜半河痕依约，雨余天气冥濛。起行微月偏池东。水影浮花、花影动帘栊。

量减难追醉白，恨长莫尽题红。雁声能到画楼中。也要玉人、知道有秋风。

清平乐

柳丝摇露。不绾兰舟住。人宿溪桥知那处。一夜风声千树。
晓楼望断天涯。过鸿影落寒沙。可惜些儿秋意，等闲过了黄花。

好事近

春色醉荼蘼，昼永篆烟初绝。临水杨花千树，尽一时飞雪。
穿帘度竹弄轻盈，东风老犹劣。睡起凭阑无绪，听几声啼鵲。

陈逢辰

乌夜啼

月痕未到朱扉。送郎时。暗里一汪儿泪、没人知。
搵不住。收不聚。被风吹。吹作一天愁雨、损花枝。

西江月

杨柳雪融滞雨，酴醾玉软欺风。飞英簌簌扣雕栊。残蝶归来粉重。

罨画扇题尘掩，绣花沙带寒笼。送春先自费啼红。更结疏云秋梦。

史介翁

菩萨蛮

柳丝轻飏黄金楼。织成一片纱窗雨。斗合做春愁。因慵熏
玉篝。

暮寒罗袖薄。社雨催花落。先自为诗忙。蔷薇一阵香。

何光大

谒金门

天似水。池上藕花风起。隔岸垂杨青到地。乱萤飞又止。
露湿玉阑闲倚。人静自生凉意。泛碧沈朱供晚醉。月斜才去睡。

应法孙

霓裳中序第一

愁云翠万叠。露柳残蝉空抱叶。帘卷流苏宝结。乍庭户嫩凉，阑干微月。玉纤胜雪。委素纨、尘锁香篋。思前事、莺期燕约，寂寞向谁说。

悲切。漏签声咽。渐寒飈、兰缸未灭。良宵长是闲别。恨酒凝红绡，纷沲瑶玦。镜盟鸾影缺。吹笛西风数阕。无言久，和衣成梦，睡损缕金蝶。

贺新郎

宿雾楼台湿。晓清初、花明柳润，燕飞莺集。旧约重来歌舞地，留得艳香娇色。又梦草、东风吹碧。午因腾腾春欲醉，对文楸、玉子无心拾。看蝶舞，傍花立。

酒痕未醒愁先入。记年时，翠楼寒浅，宝笙慵吸。想驻马河桥分别，恨轻竹风飘烟笠。早尘暗、华堂帘隙。倚尽黄昏人独自，望江南回雁归云急。凭付与，锦笺墨。

王亿之

高阳台

双桨敲冰，低篷护冷，扁舟晓渡西冷。回首吴山，微茫遥带重城。堤边几树垂杨柳，早嫩黄、摇动春情。问孤鸿，何处飞来，共唤飘零。

轻帆初落沙洲暝，渐潮痕雨渍，面色风皴。旅思羁愁，偏能老大行人。姮娥不管征途苦，甚夜深、尽照孤衾。想玉楼，犹凭阑干，为我销凝。

王茂孙

高阳台（春梦）

迟日烘晴，轻烟缕昼，琐窗雕户慵开。人独春闲，金猊暖透兰煤。山屏缓倚珊瑚畔，任翠阴、移过瑶阶。悄无声，彩翅翩翩，何处飞来。

片时千里江南路，被东风误引，还近阳台。膩雨娇云，多情恰喜徘徊。无端枝上啼鸠唤，便等闲、孤枕惊回。恶情怀，一院杨花、一径苍苔。

点绛唇（莲房）

折断烟痕，翠蓬初离鸳浦。玉纤相妒。翻被寻专房误。
乍说青衣，犹著轻罗护。多情处。芳心一缕。都为相思苦。

朱（日/所）孙

真珠帘

春云做冷春知未。春愁在、碎雨敲花声里。海燕已寻踪，
到画溪沙际。院落秋千杨柳外。待天气、十分晴霁。春市。又
青。又青帘巷陌，红芳歌吹。

须信处处东风，又何妨对此，笼香觅醉。曲尽索余情，奈
夜航催离。梦满冰衾身似寄。算几度、吴乡烟水。无寐。试明
朝说与，西园桃李。

郑斗焕

新荷叶

乳鸭池塘，晴波漾绿鳞鳞。宿藕根香，夏来生意还新。蚨钱小、钿花贴翠，相间萍星。一番雨过，一番暗展圆青。

鱼戏龟游，看来犹未胜情。因忆年时，垂钓曾约轻盈。玉人何处，关情是、半卷芳心。帘风一棹，鸳鸯催起歌声。

周 容

小重山

谢了梅花恨不禁。小楼羞独倚，暮云平。夕阳微放柳梢明。
东风冷，眉岫翠寒生。

无限远山青。重重遮不断，旧离情。伤春还上去年心，怎
禁得，时节又烧灯。

张 湜

祝英台近

一番风，连夜雨。收拾做春暮。艳冷香销，莺燕惨无语。
晓来绿水桥边，青门陌上，不忍见、落红无数。

怎分付。独倚红药栏边，伤春甚情绪。若取留春，欲去去何处。
也知春亦多情，依依欲住。子规道、不如归去。

祝英台近（花港观鱼）

六桥春浪暖，涨桃雨、鳊初肥。正短棹轻蓑，牵筒苎带，
萦莼丝。依稀。岸红溯远，漾仙舟、误入武陵溪。何处金刀脍
玉，画船傍柳频催。

芳堤。渐满斜晖。舟叶乱、浪花飞。听暮榔声合，鸥沈暗
渚，鹭起烟矶。忘机。夜深浪静，任烟寒、自载月明归。三十六
鳞过却，素笺不寄相思。

徵招（九日登高）

江蓠摇落江枫冷，霜空雁程初到。万景正悲凉，奈曲终人杳。登临嗟老矣，问今古、清愁多少。一梦东园，十年心事，恍然惊觉。

肠断，紫霞深，知音远、寂寂琴凄调。短发已无多，怕西风吹帽。黄花空自好。问谁识、对花怀抱。楚山远，九辩难招，更晚烟残照。

酹江月（中秋对月）

奁霏净洗，唤素娥睡起，平分秋色。雁背风高孀兔冷，露脚侵衣香湿。银浦流云，珠房迎晓，鬓影霜争白。玉尊良夜，与谁同醉瑶席。

忍记倚桂分题，簪花簪酒，处处成陈迹。十二楼空环佩杳，惟有孤云知得。如此江山，依然风月，月底人非昔。知音何许，泪痕空沁愁碧。

林式之

酹江月

桐皋东去，又依然、烟际云边柔橹。赖有双台知己耳，牢落孤怀欲吐。小倚云根，细商心事，提起千年语。九天飞梦，别来长记幽渚。

试说北海归文，西山何事，犹不甘臣武。广大尧天箕颍小，绵上可能如许。兴世真痴，先生长啸，尘海谁堪与。啸声吹送，刺天鸾鹤冲举。

吴龙翰

喜迁莺

微雨後，落花天。娇态病恹恹。怕人猜著是相思，成日不开帘。

宝钗横，蝉鬓乱。院宇待人归尽。缓移莲步玉阑前。纤手招花钿。

朱嗣发

摸鱼儿

对西风、鬓摇烟碧，参差前事流水。紫丝罗带鸳鸯结。的的镜盟钗誓。浑不记、漫手织回文，几度欲心碎。安花著蒂。奈雨覆云翻，情宽分窄，石上玉簪脆。

朱楼外。愁压空云欲坠。月痕犹照无寐。阴晴也只随天意。枉子玉消香碎。君且醉。君不见、长门青草春风泪。一时左计。悔不早荆钗，暮天修竹，头白倚寒翠。

陈达叟

更漏子

妾倚门，君上马。残月晓星犹挂。眉黛敛，泪珠凝。别离多少情。

翠翘横，云鬓乱。复入绮衾犹暖。人独自，枕成双。争教不断肠。

菩萨蛮

举头忽见衡阳雁。千声万字情何限。亘而薄情夫。一行书也无。

泣归香阁恨。和泪掩红粉。待雁却回时。也无书寄伊。

文天祥

齐天乐（庆湖北漕知鄂州李楼峰）

南楼月转银河曙，玉箫又吹梅早。鸂鶒沙晴，葡萄水暖，一缕燕香清袅。瑶池春透。想桃露霏霞，菊波沁晓。袍锦风流，御仙花带瑞虹绕。

玉关人下未老。唤矶头黄鹤，岸巾谈笑。剑拂准清，槊横楚黛，雨洗一川烟草。印黄似斗。看半砚蔷薇，满鞍杨柳。沙路归来，金貂蝉翼小。

齐天乐（甲戌湘宪种德堂灯屏）

夜来早得东风信，潇湘一川新绿，柳色含晴，梅心沁暖，春浅千花如束。银蟾乍浴。正沙雁将还，海鳌初矗。云拥旌旗，笑声人在画阑曲。

星虹瑶树缥缈，佩环鸣碧落，瑞笼华屋。露耿铜虬，冰翻铁马，帘幕光摇金粟。迟迟倚竹。更为把瑶尊，满斟醽醁。回首宫莲，夜深归院烛。

酹江月（南康军和苏韵）

庐山依旧，凄凉处、无限江南风物。空翠晴岚浮汗漫，还障天东半壁。雁过孤峰，猿归危嶂，风急波翻雪。乾坤未老，地灵尚有人杰。

堪嗟漂泊孤舟，河倾斗落，客梦催明发。南浦闲云过草树，回首旌旗明灭。三十年来，十年一过，空有星星发。夜深悉听，胡笳吹彻寒月。

酹江月（驿中言别友人）

水天空阔，恨东风不借、世间英物。蜀鸟吴花残照里，忍见荒城颓壁。铜雀春情，金人秋泪，此恨凭谁雪。堂堂剑气，斗牛空认奇杰。

那信江海余生，南行万里，属扁舟齐发。正为鸥盟留醉眼，细看涛生云灭。睨柱吞羸，回旗走懿，千古冲冠发。伴人无寐。秦淮应是孤月。

酹江月（和）

乾坤能大，算蛟龙、元不是池中物。风雨牢愁无著睡，那更寒虫四壁。横槊题诗，登楼作赋，万事空中雪。江流如此，方来还有英杰。

堪笑一叶漂零，重来淮水，正凉风新发。镜里朱颜都变尽，只有丹心难灭。去去龙沙，江山回首，一线青如发。故人应念，

杜鹃枝上残月。

满江红（和王夫人满江红韵，以庶几後山妾薄命之意）

燕子楼中，又捱过、几番秋色。相思处、青年如梦，乘鸾仙阙。肌玉暗消衣带缓，泪珠斜透花钿侧。最无端、蕉影上窗纱，青灯歇。

曲池合，高台灭。人间事，何堪说。向南阳阡上，满襟有血。世态便如翻覆雨，妾身元是分明月。笑乐昌、一段好风流，菱花缺。

满江红（代王夫人作）

试问琵琶，胡沙外、怎生风色。最苦是、姚黄一朵，移根仙阙。王母欢阑琼宴罢，仙人泪满金盘侧。听行宫、半夜雨淋铃，声声歇。

彩云散，香尘灭。铜驼恨，那堪说。想男儿慷慨，嚼穿龈血。回首昭阳离落日，伤心铜雀迎秋月。算妾身、不愿似天家，金瓯缺。

沁园（至元间留燕山作）

为子死孝，为臣死忠，死又何妨。自光岳气分，士无全节，君臣义缺，谁负刚肠。骂贼睚眦，爱君许远，留得声名万古香。

後來者，无二公之操，百炼之钢。

人生翕歔云亡。好烈烈轰轰做一场。使当时卖国，甘心降虏，受人唾骂，安得留芳。古庙幽沈，仪容俨雅，枯木寒鸦几夕阳。邮亭下，有奸雄过此，仔细思量。

邓 剡

念奴娇（驿中言别）

水天空阔，恨东风、不惜、世间英物。蜀鸟吴花残照里，忍见荒城颓壁。铜雀春情，金人秋泪，此恨凭谁雪。堂堂剑气，斗牛空认奇杰。

那信江海余生，南行万里，不放扁舟发。正为鸥盟留醉眼，细看涛生云灭。睨柱吞羸，回旗起懿，千古冲冠发。伴人无寐，秦淮应是孤月。

满江红

王母仙桃，亲曾醉、九重春色。谁信道、鹿衔花去，浪翻鳌阙。眉锁娇娥山宛转，髻梳堕马云欹侧。恨风沙、吹透汉宫衣，余香歇。

霓裳散，庭花灭。昭阳燕，应难说。想春深铜雀，梦残啼血。空有琵琶传出塞，更无环佩鸣归月。又争知、有客夜悲歌，壶敲缺。

浪淘沙

疏雨洗天晴。枕簟凉生。井梧一叶做秋声。谁念客身轻似叶，千里飘零。

梦断古台城。月淡潮平。便携酒访新亭。不见当时王谢宅，烟草青青。

唐多令

雨过水明霞。潮回岸带沙。叶声寒、飞透窗纱。堪恨西风吹世换，更吹我、落天涯。

寂寞古豪华。乌衣日又斜。说兴亡、燕入谁家。惟有南来无数雁，和明月、宿芦花。

烛影摇红（雪楼得次子，行台时治金陵）

郢雪歌高，天教鹤子参鸣和。薰风旌节瑞华，光动垂弧左。早是烟楼撞破。更明珠、重添一颗。镜容中夜，摩顶欣然，石麟天堕。

未羡眉山，两峰儿子中峰我。推贤世世珥金貂，何况阴功大。欲写弄璋书贺。愧无功、难消玉果。摩挲老眼，曾识英雄，试啼则个。

霜天晓角（寿文文溪，时守清江）

蛮烟塞雪。天老梅花骨。还著锦衣游戏，清江上、管风月。
木兰归海北。竹梧侵户碧。三十六峰苍玉，驾白鹿、友仙客。

木兰花慢（寿周耐轩府尹）

步凉飈绿野，钟鼓、园林。有骑竹更生，扶藜未老，歌舞棠阴。金鞭半横玉带，爆神人、风度五云深。大耐自应鹤骨，活人总是天心。

寿蒲香晚尚堪斟。梧竹对潇森。早问道燕城，衣裁绣袞，台筑黄金。天瓢正消几滴，化中原、焦土作甘霖。却伴赤松未晚，碧桃花下横琴。

摸鱼儿（寿周耐轩府尹，是岁起义仓）

问庐陵、米作何价。棠阴又绿今夏。活人手段依然在，独乐园中司马。初度也。算几处篝香，手额你多谢。风亭月榭。尽隐橘观棋，折荷筒酒，花竹秀而野。

阶庭树，满目鱼鱼雅雅。千金难买清暇。纷纷征榷尘如梦，谁有似公闲者。天怎舍。趁绿鬓朱颜，须入凌烟画。海天不夜。管岁岁安期，采蒲为寿，高宴碧桃下。

促拍丑奴儿（寿孟万户）

睡起怯春寒。海棠花、开未开间。莫言春色三分二，朱颜绿鬓，栽花种竹，谁似群闲。

侯印旧家毡。早天边、飞诏催还。从今几岁岁称觞处，人如玉雪，花如锦绣，福寿如山。

八声甘州（寿胡存齐）

笑钗符、恰正带宜男。还将寿花簪。早风薰竹醉，松凉鹤健，午坐存庵。三十六峰玉立，隔尘听玄谈。何似人难老，三十才三。

闻得天边好语，第一流人物，偏重江南。满玻璃春绿，十载受棠甘。青青鬓、尽堪图画，趁紫岩、年纪作枢参。却归宴、瑶池未晚，荷日红酣。

好事近（寿刘须溪）

桃脸破初寒，笑问刘郎前度。为说正元朝上，缥缈年桥午。百年方半日来多，且醉且吟去。须信剑南万首，胜侯封万户。

摸鱼儿（杨教之齐安任）

笑平生、布帆无恙，堂堂稳送君去。江声悲壮崖殷血，曾是英雄行处。今亦古。甚一点东风，天不周郎怀。城幡夜坚。

几铜爵春残，战沙秋冷，华发遽如许。

东坡老，千载风流赋。余音不绝如缕。临皋一笑三生梦，还认岷峨乡语。挥玉尘，尽不碍灯前，痛饮檐花雨。雪堂在否。管驾鹤归来，为君细赏，蝴蝶上阶句。|< ‘官闲无一事，蝴蝶飞上阶。’ 黄州朱教授载诗也，坡公深赏之。>|

疏影（笋薄之平江）

瑶尊蘸翠。短长亭送别，风恋晴袂。腊树迎春，一路清寒，能消几日羁思。霜华不惜阳关柳，悄莫系、行人嘶骑。对梅花、一笑分携，胜约别来相寄。人物仙蓬妙韵，瑞鸾敛迅翼，聊憩香枳。见说使君，好语先传，付与芙蓉清致。客来欲问荆州事，但细语、岳阳楼记。梦故人，剪烛西窗，已隔洞庭烟水。

刘 鉴

贺新郎（贺癯翁倅生曾孙）

曾作莺迁贺。道玉皇、久敕薇垣，分君星颗。只待好年好时日，约束东风吹堕。到今日、看来真个。恰好丁年翁七十，五云间、太乙吹藜火。青一点，杉溪左。

太翁阴鹭天来大。後隆山、层一层高，层层突过。簪绂蝉聊孙又子，眼里人家谁那。算只有、臞翁怎么。孙陆机云翁卫武，便履声、毡复尚书坐。拚几许，犀钱果。

满江红（上元呈徐静观）

裊裊春幡，恰十日、又逢元夕。人正在、景清堂上，金樽娱客。蜡炬红摇花外竹，宝香清透边石。听儿童、父老说青原，东风国。平易政，人皆悦。真实念，天知得。想旌旗一路，又添春色。满眼变成金色界，举头身近琼楼月。问明年、何处著鳌山，蓬莱北。

瞿翁

满江红（孟史君祷而得雨）

祷雨文昌，只全靠、心香一瓣。才信宿，沛然膏泽，来从方寸。早稻含风香旖旎，晚秧饱水青。问螺江、恰见线来流，今平岸。

君作事，看天面。天有眼，从君愿。信瑞莲芝草，几曾虚献。此雨千金无买处，丰年饱吃君侯饭。管酿成、春酒上公堂，人人献。

王 洵

唐多令

（庆曹松庐侍郎，与秋壑只争二日，曹新除两浙漕。八月初十）

雁荡接台山。秋来最好看。寿星明、高现云端。八月初弦三日里，二老、福人间。玉节近天颜。东西两路安。祝苍松、节劲根蟠。相汉元勋萧第一，留次位、著曹参。

汪梦斗

南乡子（初入都门漫赋）

西北有神州。曾倚斜阳江上楼。目断淮南山一抹，何由。
载泪东风洒汴流。

何事却狂游。直驾驴东渡白沟。自古幽燕为绝塞，休愁。
未是穷荒天尽头。

朝中措（客邸有感）

人言楼观似寥阳。巍倚太清傍。便有二京赋手，也须费力
铺张。

客窗梦断，星稀月澹，一枕凄凉。旧日春风汴水，多
少垂杨。

人月圆

寻常一样窗前月，人只看中秋。年年今夜，争寻诗酒，共
上高楼。

一奁明镜，能圆几度，白了人头。良辰美景，赏心乐事，输少年游。

金缕曲

（月夕赋道词，书毕，怆然有感，再赋此）

满目飞明镜。忆年时、呼朋楼上，畅怀觞咏。圆到今宵依前好，诗酒不成佳兴。身恰在、燕台天近。一段凄凉心中事，被秋光、照破无余蕴。却不是，诉贫病。

宫庭花草坦幽径。想夜深、女墙还有，过来蟾影。千古词人伤情处，旧说石城形胜。今又说、断桥风韵。客里婵娟都相似，只後朝、不见潮来信。且喜得，四边静。

彭元逊

汉宫春（元夕）

十日春风，又一番调弄，怕暖愁阴。夜来风雨，摇得杨柳黄深。熏篝未断，梦旧寒、浅醉同衾。便是闻灯见月，看花对酒惊心。

携手满身花影，香雾霏霏，露湿罗襟。笙歌行人归去，回首沈沈。人间此夜，误春光、一刻千金。明日问、红巾青鸟，苍苔自拾遗簪。

平韵满江红（牡丹）

翠袖余寒，早添得、铢衣几重。保须怪、妍华都谢，更为谁容。衔尽吴花成鹿苑，人间不恨雨和风。便一枝、流落到人家，清泪红。

山雾湿，倚熏笼。垂八叶，鬓酥融。恨宫云一朵，飞过空同。白日长闲青鸟在，杨家花落白苹中。问故人、忍更负东风，尊酒空。

解珮环（寻梅不见）

江空不渡，恨蘼芜杜若，零落无数。还道荒寒，婉婉流年，望望美人迟暮。风烟雨雪阴晴晚，更何须，春风千树。尽城、落木萧萧，日夜江声流去。

日晏山深闻笛，恐他年流落，与子同赋。事阔心违，交淡媒劳，蔓草沾衣多露。汀洲窈窕余醒寐，遗珮浮沈沅浦。有白鸥淡月，微波寄语，逍遥容与。

徵招（和焕甫秋声。君有远游之兴，为首行路难以感之）

人间无欠秋风处，偏到霜痕月杪。风雨船篷，日夜风波未了。忽潮生海立，又天阔、江清欲晓。孤迥幽深，激扬悲壮，浮沈浩渺。

行路古来难，貂裘敝、匹马关山人老。锦字未成，寒到君边书到否。倚门回首，儿女灯前娼笑。早斟酌、万里封侯，镜迟霜照。

子夜歌（和尚友）

视春衫、篋中半在，浥浥酒痕花露。恨桃李、如风过尽，梦里故人成雾。临颖美人，秦川公子，晚共何人语。对人家、花草池台，回首故园咫尺，未成归去。

昨宵听、危弦急管，酒醒不知何处。飘泊情多，衰迟感易，无限堪怜许。似尊前眼底，红颜消几寒暑。年少风流，未谙春

事，追与东风赋。待他年、君老巴山，共君听雨。

临江仙

红袖乌丝失酒，金钗银烛销春。柳边桃下复清晨。帽风回马旋，扇雨拂花情。

白帝空惊旧曲，阳关只梦行人。碧云何处认芳尘。紫荆花作荚，青杏核生仁。

临江仙

自结床头尘尾，角巾坐枕孤松。片云承日过山东。起听荷叶雨，行受芷花风。

无客同羹莼菜，有人为剥莲蓬。东墙年少未从容。何因知我意，吹笛月明中。

瑞鹧鸪

背人西去一莺啼。拍手还惊百知飞。浅雨微寒春有思，宿妆残酒欲恹时。

鸂鶒浪起蒲茸暖，翡翠风来柳絮低。故遣苍头寻杏子，凭肩小语只心知。

瑞鹧鸪

东洲游伴寄兰苕。人日晴时不用招。微雨来看杨柳色，故人相遇浴龙桥。

愁如春水年年长，老共东风日日消。几欲作笺无可寄，双鱼犹自等归潮。

蝶恋花

微雨烧香余润气，新绿恹恹，乳燕相依睡。无复卷帘知客意，杨花更欲因风起。

旧梦苍茫云海际。强作欢娱，不觉当年似。曾笑浮花并浪蕊。如今更惜棠梨子。

蝶恋花

日晚游人酥粉浣。四雨亭前，面面看花坐。扇拂游蜂青杏堕。新红一路秋千过。

帘外清歌帘底和。自理琵琶，不用笙佐。八折香罗余碧唾。露花点笔轻题破。

如梦令

今夜故人独宿。小雨梨花当屋。犹有未残枝，轻脆不堪人

触。休触。体触。憔悴怕惊郎目。

菩萨蛮

玉蛇踯躅流光卷。连珠合沓帘波远。花动见鱼行。红裳弦欲倾。

人来惊翡翠。小鸭惊还睡。两岸绿阴生。修廊时听莺。

谒金门

春一点。透得酥温玉软。唇晕睡花连袖染。嫣红惊绝艳。

日暮飞红扑脸。翠被夜寒波贴。梦断锦茵成堕靥。宫廊微月转。

月下笛

江上行人，竹间茅屋，下临深窈。春风袅袅，翠鬟窥树犹小。遥迎近倚，归还顾、分付横枝未了。扁舟却去，中流回首，惊散飞鸟。

重踏新亭屐齿，耿山抱孤城，月来华表。鸡声人语，隔江相半歌笑。壮游历历，同高李、未拟诗成草草。长桥外，有醒人吹笛，并在霜晓。

六丑（杨花）

似东风老大，那复有、当时风气。有情不收，江山身是寄。浩荡何世。但忆临官道，暂来不住，便出门千里。痴心指望回风坠。扇底相逢，钗头微缀。他家万条千缕，解遮亭障驿，不隔江水。

瓜洲曾舣，等行人岁岁。日下长秋，城乌夜起。帐庐好在春睡。共飞归湖上，草青无地。恹恹雨、春心如腻。欲待化、丰乐楼前，青门都废。何人念、流落无几。点点抔作，雪绵松润，为君裛泪。

隔浦莲近

夜寒晴早人起。见柳知新翠。撼树试花意。两蜂狂救堕蕊。见著羞懒避。春都在，时节到愁地。

屏间字。香痕半掬，误期一一曾记。朱弦谩锁，不会近番慵脆。强踏秋千似醉里。扶下，眼花踉跄飞坠。

忆旧游

记新楼试酒，上客回车，初识能歌。几许怜才意，觉援琴意动，授间情多。青鸾画下缥缈，烟雾隔轻罗。还自有人猜，素巾承汗，微影双蛾。

西陂千树雪，欲绝世乘风，下照沧波。怪倚憔悴，扁舟月上，草草相过。少年翰墨相误，幽恨愧星河。谁为语伶玄，秋

风并冷双燕窠。

生查子

痴多故恼人，妆晚翻嫌趣。只为眼波长，嗔笑娇难触。
春心不肯深，春睡何曾足。莫待柳花飞，飞去无拘束。

玉女迎春慢（柳）

浅入新年，逢人日、拂拂淡烟无雨。叶底妖禽自语。小啄幽香还吐。东风辛苦，便怕有、踏青人误。清明寒食，消得渡江，黄翠千缕。

看临小帖宜春，填轻晕湿，碧花生雾。为说钗头袅袅，系著轻盈不住。问郎留否。似昨夜、教成鹦鹉。走马章台，忆得画眉归去。

方 衡

齐天乐（寿贾使三月二十八日生）

伏以皇祚中兴，笃生元哲。维岳受命，允协良辰。同稟天地之清宁，间出山河之气数。仰惟某官，身兼三杰，德盛一夔。西清学士之班，选高天下；东方诸侯之长，功冠域中。拥百万之貔貅，制三边之狼虎。克膺大任，宜受遐龄。某辱在万间，尤深鼓舞。敬裁一曲，莫尽形容。仰祈熏慈，俯加采览。

皇天眷佑中兴烈。维岳共生鸿硕。镇抚精神，规恢调度，未数至言长策。中原僭望，总万里山河，尽归经画。更看旋乾转坤，烦一指麾力。

胡尘顿消海岱，倚天长啸处，兼惠南北。宝镇还朝，圣恩如海，趁得松高华席。星辰步峻，看丹凤飞来，趣登枢极。寿齐天，愿齐开寿域。

郭居安

声声慢（寿贾师宪）

捷书连昼，甘洒通宵，新来喜沁尧眉。许大担当，人间佛力须弥。年年八月八日，长记他、三月三时。平生事，想只和天语，不遣人知。

一片闲心鹤外，被乾坤系定，虹玉腰围。阊阖云边，西风万籁吹齐。归舟更归何处，是天教、家在苏堤。千千岁，比周公、多个彩衣。

木兰花慢（寿贾秋壑母两国胡夫人）

听都人共语，又还是、岁逢庚。记金帖频催，袞衣将至，绣幰先迎。笙歌六宫齐奏，到而今、犹唱贺升平。千岁人间福本，天公著意看承。

秋深。帘卷空明。问西子、最宜晴。喜新多暇，玉醪龙炙，菊院花城。明年耳孙头上，更君王、亲点泥金。兜率摩耶住世，长看佛度众生。

赵从橐

摸鱼儿（寿贾师宪）

指庭前、翠云金雨。霏霏香满仙宇。一清透彻浑无底，秋水也无流处。君试数。此样襟怀，顿得乾坤住。闲情半许。听万物氤氲，从来形色，每向静中觑。

琪花落，相接西池寿母。年年弦月时序。荷衣菊佩寻常事，分付两山容与。天证取。此老平生，可向青天语。瑶卮缓举。要见我何心，西湖万顷，来去自鸥鹭。

廖莹中

木兰花慢（寿贾师宪）

请诸君著眼，来看我、福华编。记江上秋风，鲸鲵涨雪，雁微迷烟。一时多人物，只我公、只手护山川。争睹阶符瑞象，又扶红日中天。

因怀下走奉囊鞬。磨盾夜无眠。知重开宇宙，活人万万，合寿千千。凫鹭太平世也，要东还、赴上是何年。消得清时钟鼓，不妨平地神仙。

个侬

恨个侬无赖，卖娇眼、春心偷掷。苍苔花落，先印下一双春迹。花不知名，乔才闻气，似月下筇篻，蒋山倾国。半解罗襟，蕙薰微度，镇宿粉、栖香双蝶。语态眠情，感多情、轻怜细阅。体问望宋墙高，窥韩路隔。

寻寻觅觅。又暮雨凝碧。花径横烟，红扉映月，尽一刻、千金堪值。卸袜熏笼，藏灯衣桁，任褰臂金斜，搔头玉滑。更恨檀郎，恶怜深惜。尽颤袅、周旋倾侧。软玉香钩，怪无端、凤珠微脱。多少怕晓听钟，琼钗暗擘。

丁寮院

万年欢

（寿两国夫人胡氏）

葛井丹明，西来金母，霓旌云旆。移下瑶池，竹外一壶秋水。菊香留宿醉。看後夜、冰轮满桂。貂蝉映、虹玉称觞，逐初堂上佳会。

娇孙彩衣聚戏。指明年八十，儿额先记。要比壮椿，八数更加千倍。好是皇恩锡类。许东殿、首舆扶至。君臣庆、齐待慈颜，万年欢对尧世。

黄右曹

卜算子（寿两国夫人胡氏）

清晓听麻姑，来约西王母。共取蟠桃簇玉盘，来劝摩取酒。
王母问摩耶，比意还知否。只为曾生我佛来，更与千千寿。

翁溪园

水龙吟（代寿制师贾参政）

镇淮楼下旌旗，晶明辉映云山阁。宸旒倚重，折冲千里，无逾秋壑。缓带轻裘，纶巾羽扇，从容筹略。使毡裘胆破，丁宁边吏，无生事，空沙漠。

二十四桥风月，称断楼、卷尽帘箔。绂麟华旦，饱吟玉蕊，款簪金药。驿骑朝驰，宝鞍卖赐，御筵宣押。更赐环促如，中书入令，作汾阳郭。

水调歌头（寿常州刘守）

丹鹤结青士，玄鹿待苍官。寿仙堂下，应伴鳧舄戏斑。麟记当年绣绂，燕剪今朝彩胜，淑气逐椒又盘，孕毓阳和粹，独占一春先。

平淮了，勋业盛，傲东山。中原犹待经略，趣诏凤池还。更数尧阶五荚，又上华封三祝，千载圣须贤。即拜玉枝赐，长冠紫宸班。

沁园春（代寿宗室）

记得花筵，巧夕星河，初度女牛。更四双蓂荚，十分桂魄，中元佳致，妆点初秋。蔼蔼非烟，濛濛如雾，锦水郁葱佳气浮。人人道，是王孙帝胄，今日东朝。

银潢万叶源流。见一点长庚辉绛霄。似东平为善，河间献雅，风流酝藉，西汉诸刘。恰遇称觞，蓬壶歌缓，满酌蒲萄双玉舟。椿松等算，年年醉傲，花马金裘。

洞仙歌（代寿李尉儒人）

几番梅雨，蒲风过、端阳後。细数月轮，犹待双蓂秀。戏彩华堂宴，设悦朱门右。酌金荷，争献寿。蟠桃新熟，阿母齐长久。

一门奋建，攀桂客、无双手。好事来春在，杏苑联蓝绶。应继琼林董，却胜燕山窦。夸盛事、真罕有。金花封诰，管取重重受。

踏莎行（寿人母八十三）

蓂荚飞双，桂分缺二。金风已肃深秋意。萱庭戏彩恰称觞，蕊宫仙子天台裔。

鹤发童颜，龟龄福备。孩儿书额添三字。常将机训付儿孙，取青行拥潘舆待。

倪君爽

夜行船

年少疏狂今已老。筵度散、杂剧打了。生向空来，死从空去，有何喜、有何烦恼。说与无常二鬼道。福亦不作，祸亦不造。地狱阎王，天堂玉帝，看你去、那里押到。

杨奂判

一剪梅

襄樊四载弄干戈。不见渔歌。不见樵歌。试问如今事若何。
金也消磨。穀也消磨。

柘枝不用舞婆娑。丑也能多。恶也能多。朱门日日贾朱娥。
军事如何。民事如何。

萧 某

沁园春（讥陈伯大御史）

士籍令行，伯仲分明，逐一排连。问子孙何习，父兄何业，明经词赋，右具如前。最是中间，娶妻某氏，试问于妻何与焉。乡保举，那当著押，开口论钱。

祖宗立法于前。又何必更张万万千。算行开改会，限田放余，生民凋瘵，膏血既涸。只有士心，仅存一脉，今又艰难最可怜。谁作俑，陈坚伯大，附势专权。

赵 文

乌夜啼（秋兴）

院静槐阴似水，雨余蝉语先秋。熟残梅子无人打，金弹满红沟。

又送行人归去，谁怜倦客淹留。画船旗鼓江南岸，人倚夕阳楼。

阮郎归（梨花）

冰肌玉骨淡裳衣。素云翠枝。一生不晓摘仙诗。雪香应自知。

微雨後，禁烟时，洗妆君莫迟。东风不解惜妍姿。吹成蝴蝶飞。

阮郎归（惜春用前韵）

舞红一架欲生衣。残英辞旧枝。雨声自唱惜春词。行人应未知。

新火后，薄罗时。君归何太迟。镜中失却少年姿。年随花共飞。

苏幕遮（春情）

绿秧平，烟树远，村燕声喧，凫雁归来晚。自倚阑干舒困眼。一架葡萄，青得池塘满。

饮先愁，吟又懒。几许闲情，百计难消遣。客路不如归梦短。何况啼鹃，怎不教肠断。

侧犯（夜饮海棠下）

恨花开尽，夜深自敛胭脂颗。雨过。绕曲曲花蓬锦围裹。浮空烧蜜炬，香雾霏霏堕。无那。倚滴滴娇红笑相殢。

歌俦饮伴，花底围春坐。念满眼、少年人，谁更老於我。岁岁花时，洞门无锁。莫负东君，酒盟诗课。

石州慢

京浙尘动态，闽峤风霜，不觉催老。封侯事付儿曹，懒把菱花频照。明光赋笔，那知白首山中，年年管领闲花草。叩角夜漫漫，问何时能晓。

堪笑。空有传世千篇，正似病呻饥啸。欲傲王侯，早被王侯相傲。盖棺事定，即今老子独龙，荣枯得丧浑难料。无酒不

须愁，问黄花知道。

望海潮（次龙有章韵）

云外梅阴，雨余苔晕，嫩寒初沁罗裳。书几凝尘，琴丝带润，小窗幽梦生凉。新水涨银塘。恨王孙去後，烟草茫茫。记得湖山胜处，相对拆封黄。

情笺思墨犹香。奈当时两鬓，都是吴霜。兔颖吟苦，鹈裘解尺，何意比 游梁。旧话不堪长。便倩薰风吹去，本地看风光。惟有青山，伴我耕钓老村壮。

大酺（感春）

正宝香残，重帘静，飞鸟时惊花铎。沈思前梦去，有当时老泪，欲弹还阁。太一宫墙，菩提寺路，谁管纷纷开落。心情浑何似，似琵琶马上，晓寒沙漠。想筝雁频移，钿金度瘦，素肌清削。

相思无奈著。重访旧、谁遣车生角。暗记省、刘郎前度，杜牧三生，为何人、顿乘芳约。试把菱花拭，愁来处、鬓比生觉。念幽独、成荒索。何日重见，错拟扬州骑鹤，绿阴不妨细酌。

莺啼序（春晚）

东风何许红紫，又匆匆吹去。最堪惜、九十春光，一半情绪听雨。到昨日、看花去处，如今尽是相思树。倚斜阳脉脉，多情燕子能语。

自怪情怀，近日顿懒，忆刘郎前度。断桥外、小院重帘，那人正柳边住。问章台、青青在否。芳信隔、魂无据。想行人，折尽柔条，滚愁成絮。

闲将杯酒，苦劝义和，揽辔更少驻。怎忍把、芳菲容易委路。春还倒转归来，为君起舞。寸肠万恨，何人共说，十年暗洒铜仙泪，是当时、滴滴金盘露。思量万事成空，只有初心，英英未化为土。浮生似客，春不怜人，人更怜春暮。君不见、青楼朱阁，舞女歌童，零落山丘，便房幽户。长门词赋，沈香乐府，悠悠谁是知音者，且绿阴多处修花谱。殷勤更倩啼莺，传语风光，後期莫误。

莺啼序（有感）

秋风又吹华发，怪流光暗度，最可恨、木落山空，故国芳草何处。看前古、兴亡堕泪，谁知历历今如古。听吴儿唱彻，庭花又翻新谱。

肠断江南，庚信最苦，有何人共赋。天又远，云海茫茫，鳞鸿似梦无据。怨东风、不如人意，珠履散、宝钗何许。想故人、月下沈吟，此时谁诉。

吾生已矣，如此江山，又何怀故宇。不恨赋归迟，归计大误。当时只合云龙，飘飘平楚。男儿死耳，嚶嚶呢呢，丁宁卖履分香事，又何如、化作胥潮去。东君岂是无能，成败归来，手种瓜圃。

膏残夜久，月落山寒，相对耿无语。恨前此、燕丹计早，荆庆才疏，易水衣冠，总成尘土。斗鸡走狗，呼卢蹴鞠，平生把臂江湖旧，约何时、共话连床雨。王孙招不归来，自采黄花，醉扶山路。

绮寮怨（题写韵轩）

绛阙珠宫何处，碧梧双凤吟。为底事、一落人间，轻题破、隐韵天音。当时点云滴雨，匆匆处，误墨沾素襟。算人间、最苦多情，争知道、天上情更深。

世事似晴又阴。罗襦甲帐，回头一梦难寻。虎啸崎嶇，护遗迹、尚如今。斜阳落花流水，吹紫宇、澹成林。霜空月明，天风响、环佩飞翠禽。

疏影

余赏其言，为赋\\

寒泉溅雪，有环佩隐隐，飞度霜月。易水风寒，壮士悲歌，关山万里离别。杨花浩荡晴空转，又化作、云鸿霜鹘。耿石壕，夜久无言寂历，如闻幽咽。云谷山人老矣，江空又岁晚，相对愁绝。玉立长身，自是胎仙，舞我黄庭三叠。人间只惯丁当字，妙处在、一声清拙。待明朝、试拂菱花，老我一簪华发。

瑞鹤仙（刘氏园西湖柳）

绿杨深似雨。西湖上、旧日晴丝恨缕。风流似张绪。羨春风依旧，年年眉妩。宫腰楚楚。倚画阑、曾斗妙舞。想而今似我，零落天涯，却悔相妒。

痛绝长秋去後，杨白花飞，旧腔谁谱。年光暗度。凄凉事，不堪诉。记菩提寺路，段家桥水，何时重到梦处。况柔条老去，争奈系春不住。

法驾导引（寿云岩师）

云漠漠，云漠漠，云拥紫皇家。岩上神仙无一事，幅巾临水看桃花。点点是丹砂。

法驾导引

山中好，山中好，长日养婴儿。午夜独行金阙路，晴窗自写绿章词。闲有鹤相随。

法驾导引

公度我，公度我，我是汉铜仙。借我玉龙为觥觥，为公锄雨种芝田。留眼看千年。

八声甘州（和孔瞻怀信国公，因念亦周弟）

是去年、春草又凄凄，尘生缕金衣。怅朱颜为土，白杨堪柱，燕子谁依。谩说漫漫六合，无地著相思。辽鹤归来後，城亦全非。

更有延平一剑，向风雷半夜，何处寻伊。怪天天何物，堪作玉弹棋。到年年、无肠堪断，向清明、独自掩荆扉。何况又、禽声杜宇，花事酴醾。

塞翁吟（黄园感事）

又海棠开後，楼上倍觉春寒。绿叶润，雨初乾。爱远树团团。当时胜买名花种，那信付与谁看。十载事，土花漫。但青得阑干。

悲欢。思人世、真如一梦，留不住、城头日残。看眼底、西湖过了，又还见、赵舞燕歌，抹粉涂丹。凭君更酌，後日重来，直是晴难。

鳳凰台上忆吹箫（转官球）

白玉磋成，香罗捻就，为谁特地团团。羨司花神女，有此清闲。疑是弓靴蹴鞠，刚一踢、误挂花间。方信道，酴醾失色，玉蕊无颜。

凭阑。几回淡月，怪天上冰轮，移下尘寰。奈堪同玉手，难插云鬟。人道转官球也，春去也，欲转何官。聊寄与、诗人

案头，冰雪相看。

玉烛新

梅花新霁後。正锦样华堂，一时装就。洞房花烛深深处，慢转铜壶银漏。新妆未了。奈浩荡、春心相候。香篆里、簇簇笙歌。微寒半侵罗袖。

侵晨浅捧兰汤，问堂上萱花，夜来安否。功名漫斗。漫赢得、万里相思清瘦。蓝袍俊秀。便胜却、登科龙首。春画永，帘幕重重，箫声缓奏。

花犯（贺後溪刘再娶）

绣帘深，刘郎一笑，风流胜前度。戟香门户。还别有祥云，檐外飞舞。洞底烛下应低语。晨妆须带曙。待献了、堂前罗袜，双双交祝付。

从桃与杨枝，如今便、合逊梅花为主。行乐处。西溪上、柳汀花屿。封侯事、看人漫苦。谁能向、黄河风雪路。且对取、锦屏金幕，双蛾新样妩。

氏州第一（寿刘府教）

风雨山城，天意欲雪，梅花照影清峭。彩燕飞春，祥麟绂旦，当日文星高照。天地无情，向十载、风埃吹老。盖世科名，

经邦事业，白衣苍狗。

不是贪名求分表。漫猎较、逢场一笑。野外朝仪，城中马队，且暂淹才调。为斯文争一脉，斯文在、乾坤未了，烂醉金尊，夜何其，东方渐晓。

莺啼序（寿胡存齐）

初荷一番沃雨，锦云红尚卷。隘华屋、赋客吟仙，候望南极天远。还报道、飘然紫气，山奇水胜都行偏。却归来领客，水晶庭院开宴。

窗户青红，正似京洛，按笙歌一片。似别有、金屋佳人，桃根桃叶清婉。倚薰风、虬须正绿，人似玉手掇纨扇。算风流，只有蓬瀛，画图曾见。

谁知老子，正自萧然，於此兴颇浅。只拟问、金砂玉蕊，兔髓乌肝，偃月炉中，七还九转。今来古往，悠悠史传，神仙本是英雄做、笑英雄、到此多留恋。看看破晓耕龙，跨海骑鲸，千年依旧庙脸。便教乞与，万里封侯，奈朔风如箭。又何似、广山一任，种竹栽花，棋局思量，墨池挥染。天还记得，生贤初意，乾坤正要人撑拄，便公能安隐天宁肯。待看佐汉功成，伴赤松游，恁时未晚。

最高楼（寿刘介叔）

春小小，和气满仙家。喜渐近春华。彩衣明媚人如玉，金杯潋滟酒成霞。寿诗翁，翁饮少，更添些。便万里传宣谁不羨。

便万里封侯谁不愿。适意处，退为佳。田园尽可渊明栗，弓刀何似邵平瓜。但年年，清浅水，看梅花。

临江仙（寿此山，有酒名如此堂）

如此中山如此酒，何须更觅蓬瀛。江湖历记平生。诗囊都束起，只好说丹经。家事付他儿辈，功名留待诸孙。维摩法喜鬓青青。日长深院里，时听读书声。

临江仙（寿前人）

恰好菊花前二日，寿星高照秋天。堂前王母鬓方玄。怀中娇凤小，已解祝公年。

如此生涯如此屋，看看海亦成田。闲中多把酒杯传。长生无别诀，放下是神仙。

洞仙歌（寿须溪。是年，其子受鹭洲山长）

千年鹭渚，持作须翁酒。胜有儿孙上翁寿。向玉和堂上，樽俎从容，笑此处，惯著丝纶大手。

金丹曾熟未，熟得金丹，头上安头甚时了。便踢翻炉鼎，抛却蒲团，直恁俊鹘梢空时候。但唤取、心齐老门生，向城北城南，傍花随柳。

塞翁吟

坐对梅花笑，还记初度年时。名利事，总成非。漫老矣何为。吴山夜月闽山雾，回首鬓影如丝。懒更问，斗牛箕。强凭醉成诗。

闲思。嗟飘泊，浮云飞絮，曾跌荡、春风柘枝。便万里、金台筑就，已长分采药庞公，誓墓义之。百年正尔，一笑尊前，儿女牵衣。

八声甘州（胡存齐除泉府大卿）

记年时、快马上青云，而今袞衣还。问公归何有，春风万斛，散满人间。闻道金銮召对，风采动朝班。宰相从来有，几个朱颜。

梅雨槐风清润，正台星一点，光照龙湾。赴经纶余暇，按行紫芝山。念江南、民生何似，把囊封、奏上九重关。须信道，济时功行，便是仙丹。

木兰花慢（送赵按察归洪州）

鹭州江上水，望南浦、送将归。想陌上儿童，尊前老父，口口能碑。家声一琴一鹤，甚和他、琴鹤也无之。城市貔貅静，泮宫芹藻春迟。

与公南北两天涯，渺再风何时。记楼月歌残，碧云句好，

尽是相思。江南烧痕未补，倩春归、说与上天知。早晚洪钧一转，东风先到寒枝。

扫花游（李仁山别墅）

结庐胜境，似旧日曾游，玉连佳处。万花织组。爱回廊宛转，楚腰束素。度密穿青，上有燕支万树。探梅去。正竹外一枝，春意如许。

奇绝盘谷序。更碧皱沿堤，绮霏承宇。柳桥花坞。问何人解有，玉兰能赋。老子婆娑，长与春风作主。彩衣舞。看人间、落花飞絮。

赵功可

八声甘州（燕山雪花）

渺平沙、莽莽海风吹，一寒气崔嵬。耿长天欲压，河流不动，云湿如灰。帝敕冰花剪刻，飞瑞上燕台。马上行人笑，万玉堆豨。

晃漾天街晴昼，料酒楼歌馆，都是春回。喜丰年有象，贺表四方来。仗下貂裘茸帽，拥千官、齐上紫金杯。明朝起，江南驿使，来进宫梅。

氏州第一（次韵送春）

杨柳楼深，推梦乍起，前山一片愁雨。嫩绿成云，飞红欲雪，天亦留春不住。借问东风，甚飘泊、天涯何许。可惜风流，三生杜牧，少年张绪。

陌上差差携手去。怕行到、歌台旧处。落日啼鹃，断烟荒草，吟不成谁语。听西河、人唱罢，何堪把、江南重赋。敲碎琼壶，又前村、数声钟鼓。

曲游春（次韵）

千树珑罩，正蒲风微过，梅雨新霁。客里幽窗，算无春可到，和悉都闭。万种人生计。应不似、午天闲睡。起来踏碎松阴，萧萧欲动疑水。

借问归舟归未。望柳色烟光，何处明媚。抖擞人间，除离情别恨，乾坤余几。一笑晴凫起。酒醒後、阑干独倚。时见双燕飞来，斜阳满地。

声声慢（残梦和儿韵）

情痴倦极，天阔归迟，吟魂无力随风。月落墙阴，一屏睡睫濛濛。邯郸平生难记，记花前、犹醉金钟。留连处，忽一声山外，吹度晴钟。

觉来重重追忆，似游尘飞去，那拾遗踪。寄谢芳卿，向来曾主芙蓉。人间兴亡万感，看千年、与梦皆空。披衣起，倚阑干、人在笑中。

桂枝香（和詹天游就访）

晓天凉露。天上玉箫吹，飞声如雨。金阙高寒，闲却一庭梅雨。漫漫八表尘埃梦，把文章、洗空千古。精神一似，风裳水佩，兰皋蘅浦。

看万里、跳龙跃虎。甚花娇英气，剑清尘妩。憔悴江南，应念小窗贫女。朱楼十二春无际，倚苍寒、青袖如故。茶香酒

熟，月明风细，试教歌舞。

绮寮怨（和儿韵）

忽忽东风又老，冷云吹晚阴。疏帘下、茶鼎孤烟，断桥外，梅豆千林。江南庾郎憔悴，睡未醒、病酒愁怎禁。倚阑干、一扇凉风，看平地、落花如雪深。

千曲囊中古琴。平泉金谷，不堪旧事重寻。当日登临。都化作、梦销沈。元龙丘坟无恙，谁唤起，共论心。哀歌怨吟。问何似、啼鸟枝上音。

柳梢青（怀青山兄，时在东湖）

一健如仙，东湖烟柳，坐拥吟翁。几许功名，百年身世，相见匆匆。

别来三度秋风。怕看见、云间过鸿。酒醒灯寒，更残月落，吾美楼中。

柳梢青（友人至）

客里凄凉，桐花满地，杜宇深山。幸自君来，谁教春去，剪剪轻寒。

愁怀无语相看。谩写人、徽弦自弹。小院黄昏，前村风雨，莫倚阑干。

汪宗臣

满江红（春雨）

检点春光，阴雨过、三分之一。从头数、元宵灯夕，都无晴日。不碍郊原肥草绿，但漫丘壑沈云黑。那东君、忒煞没网维，春无力。

燕忙甚，泥浑湿。蜂愁甚，脾无密。更两旬又是，梨花寒食。蔫红殷桃吾不较，岂堪浸烂东畴麦。望前村、白鹭衬霞红，探晴色。

蝶恋花（清明前两日闻燕）

年去年来来去早。怪底不来，庭院春光老。知过谁家翻别调。家家望断飞踪杳。

千里潇湘烟渺渺。不记雕梁，旧日恩多少。匝近清明檐外叫。故巢犹在朱檐晓。

酹江月（题乌江项羽庙）

白蛇宵断，逐鹿人、交趁罾鱼群起。赤帜雄张军缟素，龙种天生大器。堪鄙猴冠，自为狼藉，楚帐多尘垒。胆寒垓下，一鞭东窜休矣。

亭长空舫扁舟，范增群辈，尽涂脂流髓。望断秦关无限恨，羞面江东山水。购首千金，若为名利，黯黯斜阳里。石炉灰冷，美人魂落烟翠。

水调歌头（冬至）

候应黄钟动，吹出白葭灰。五云重压头，潜蛰地中雷。莫道希声妙寂，嶰竹雄鸣合凤，九寸律初裁。欲识天心处，请问学颜回。

冷中温，穷时达，信然哉。彩云山外如画，送上笔尖来。一气先通关窍，万物旋生头角，谁合又谁开。官路春光早，箫落数枝梅。

王清观

太常引（题洞宾醉桃源像）

邯郸梦里武陵溪。春色醉冥迷。花压帽檐歌，谩赢得、红尘满衣。

青蛇飞起，黄龙喝住，才是酒醒时。和露饮刀圭，待月满、长空鹤归。

熊则轩

满庭芳（郭县尹美任）

波有颓澜，渴无冷镬，谁言制邑为难。汾阳善政，史在笑谈间。三载刑清讼简，官事辨、俗阜民安。帘垂画，焚香宴坐，犹得半清闲。

西风，催入觐，声驰当道，名达朝端。任锦溪溪上，卧辙攀辕。从此燕轺北去，好官样、留与人看。扁舟稳，图书外，惟有月俱还。

阮盘溪

大江乘（郭县尹美任）

东阳四载，但好事、一一为民做了。谈笑半闲风月里，管甚讼庭生草。瓯茗炉香，菜羹淡饭，此外无烦恼。问侯何苦，自饥只要民饱。

犹念甘旨相违，白云万里，不得随昏晓。暂舍苍生归定省，回首又看父老。听得乘崖，交章力荐，道此官员好。且来典宪，中书还二十四考。

危西麓

风流子（郭县尹美任）

西风吹锦水、朝天路、冉冉两凫飞。看父老袅花，苦遮去辙，儿童骑竹，争问归期。帐簇马前纷蔽日，实绩纪行碑。冰饮三年，从容官事，棠阴百里，悠久民思。

圣明矜遐远，关山道，应是来骤华丝。画绣过家，莱庭彩舞斑衣。便稳奉安舆，江南向暖，早传言语，樵曲先知。重约旧临，倪耄迎候杭西。

柳梢青（湖上和徐雪江）

滟滟平湖，双双画桨，小小船儿。袅袅珠歌，翩翩翠舞，续续弹丝。

山南山北游，看十里、荷花未归。缓引壶觞，个人未醉，要我吟诗。

暗香

梢，开花繁艳，兵後流落人间。对花泫然承脸而赋\\
馆娃艳骨。见数枝雪里，争开时节。底事化工，著意阳和
暗偷泄。偏把红膏染质，都点缀、枝头如血。最好是、院落黄
昏，压栏照水清绝。

风韵自迥别。谩记省故家，玉手曾折。翠条袅娜，犹学宫
妆舞残月。肠断江南倦客，歌未了、琼壶敲缺。更忍见，吹万
点、满庭绛雪。

疏影

（西湖社友赋红梅，分韵得落字）

虬枝茜萼。使轻盈态度，香透帘幕。净洗铅华，浓抹胭脂，
风前伴我孤酌。诗翁瘦硬，断不被、春风熔铄。有陇间、
折赠殷勤，又恐暮笳吹落。寂寞。孤山月夜，玉人万里外，
空想前约。雁足书沈，马上弦哀，不尽寒阴沙漠。昭君滴滴
红冰泪，但顾影、未忺梳掠。等恁时、环佩归来，却慰此况萧索。

天香

迟日侵阶，和风入户，朱弦欲奏还倦。一幅鸾笺，五云飞
下，赐予内家琴苑。音随指动，犹仿佛、虞薰再见。妙处谁能
解心，和平自无哀怨。

猩罗帕封古洗，有龙涎、渗花千片。骤睹瑶台清品，眼明
如电。蕲白桐窗竹几，渐缕缕腾腾细成篆。就祝金闺，天长地
远。

王学文

摸鱼儿（送汪水云之湘）

记当年、舞衫零乱，霖铃忍按新阕。杜鹃枝上东风晚，点点泪痕凝血。芳信歇。念初试琵琶，曾识关山月。悲弦易绝。奈笑罢颦生，曲终愁在，谁解寸肠结。

浮云事，又作南柯梦彻。一簪聊寄华发。乾坤桑海无穷事，才历昆明初劫。谁共说。都付与焦桐，写入梅花叠。黄花送客。体更问湘魂，独醒何在，沈醉浩歌发。

王清惠

满江红

太液芙蓉，浑不似、旧时颜色。曾记得、春风雨露，玉楼金阙。名播兰簪妃后里，晕潮莲脸君王侧。忽一声、颺鼓揭天来，繁华歇。

龙虎散，风云灭。千古恨，凭谁说。对山河百二，泪盈襟血。客馆夜惊尘土梦，宫车晓碾关山月。问嫦娥、於我肯从容，同圆缺。

章丽贞

长相思

吴山秋。越山秋。吴越两山相对愁。长江不尽流。
风飕飕。雨飕飕。万里归人空白头。南冠泣楚囚。

袁正真

长相思

南高峰。北高峰。南北高峰云淡浓。湖山图画中。采芙蓉。
小小红船西复东。相思无路通。

金德淑

望江南

春睡起，积雪满燕山。万里长城横玉带，六街灯火已阑珊，
人立蓟楼间。

空懊恼，独客此时还。辔压马头金错落，鞍笼驼背锦斓班。
肠断唱门关。

连妙淑

望江南

寒料峭，独立望长城。木落萧萧天远大，声羌管遏云行。
归客若为情。樽酒尽，勒马问归程。渐近芦沟桥畔路，墙荒驿
夕阳明。长短几邮亭。

黄静淑

望江南

君去也，晓出蓊门西。鲁酒千杯人不醉，臂鹰健卒马如飞。
回首隔天涯。

云黯黯，万里雪霏霏。料得江南人到早，水边篱落忽横枝。
清兴少人知。

陶明淑

望江南

秋夜永，月影上阑干。客枕梦回燕塞冷，角声吹彻五更寒。
无语翠眉攒。

天渐晚，把酒泪先弹。塞北江南千万里，别君容易见君难。
何处是长安。

柳华淑

望江南

何处笛，觉妾梦难谐。春色恼人眠不得，卷帘移步下香阶。
呵冻卜金钗。

人云也，毕竟信音北乖。翠锁双蛾空宛转，雁行筝柱强安
排。终是没情怀。

杨慧淑

望江南

江北路，一望雪皑皑。万里打围鹰隼急，六军刁斗去还来。
归客别金台。

江北酒，一饮动千坏。客有黄金如粪土，薄情不肯赎奴回。
挥泪洒黄埃。

华清淑

望江南

燕塞雪，片片大如拳。蓟上酒楼喧鼓吹，帝城车马走骅骝。
羁馆独凄然。

燕塞月，缺了又还圆。万里妾心愁更苦，十春和泪看婵娟。
何日是归年。

梅顺淑

望江南

风渐软，暖气满天涯。莫道穷阴春不透，今朝楼上见桃花。
花外碾香车。

围步帐，羯鼓杂琵琶。压酒燕姬骑细马，秋千高挂彩绳斜。
知是阿谁家。

吴昭淑

望江南

今夜永，说剑引杯长。坐拥地炉生石炭，灯前细雨好烧香。
呵手理丝簧。

君且住，烂醉又何妨。别後相思天万里，江南江北永相忘。
真个断人肠。

周容淑

望江南

春去也，白雪尚飘零。万里归人骑快马，到家时节藕花馨。
那更忆长城。

妾薄命，两鬓渐星星。忍唱乾淳供奉曲，断肠人听断声。
肠断泪如倾。

吴淑真

霜天晓角

塞门桂月。蔡琰琴心切。弹到笳声悲处，千万恨、不能雪。
愁绝。泪还北。更与胡儿别。一片关山怀抱，如何对、别人说。
|<右听水云弹胡笳十八拍因而有作>|

张琼英

满江红（题南京夷山驿）

太液芙蓉，浑不似、丹青颜色。常记得、春风雨露，玉楼金阙。名播兰簪妃后里，晕生莲脸君王侧。忽一声、鼙鼓拍天来，繁华歇。

龙虎散，风云灭。千古恨，凭谁说。对山河百二，泪痕沾血。客馆夜惊尘土梦，宫车晓转关山月。问嫦娥、垂顾肯相容，同圆缺。

詹 玉

霓裳中序第一

（金刻宣和玉宝四字，有感因赋）

一规古蟾魄。瞥过宣和几春色。知那个、柳松花怯。曾磋玉团香，涂云抹月。龙章凤刻。是如何、儿女消得。便孤了、翠鸾何限，人更在天北。

磨灭。古今离别。幸相从、蓊门仙客。萧然林下秋叶。对云淡星疏，眉青影白。佳人已倾国。赢得痴铜旧画。兴亡事，道人知否，见了也华发。

汉宫春（题西山玉隆宫）

吟发萧萧。正古槎秋入，河汉银涛。红云甚家院落，一片笙箫。晋时言语，问何人、还肯逍遥。知几度、落花啼鸟，乡歌犹在儿曹。游帷旧时明月，照满庭空翠，剪剪春梢。西山笑人底事，流浪宫袍。江湖近日，说原无此字，据天游词补神仙。多在渔樵。千古意，水沈香里，孤枫阴落重霄。

多丽（念念）

晚云归，小楼又作阴凉。霎儿间，恨桐招雨，西风叶叶商量。醒时心、又还南浦，愁边句、多在斜阳。菱宛笼青，莲瓶拖艳，旋倾花水咽茶香。怨蛩有、许多言语，说动软心肠。夜沈沈，几条凉月，界破晴窗。

共绣帘吹絮未久。却孤剑水云乡。自家书、未能成字，邻家笛、且莫吹商。好梦偏悭，闲情未了，隔墙又唱秋娘。帕绡依、旧时香折，戏封做书囊。鸳鸯字，见时千万，绣一双双。

桂枝香（题写韵轩）

紫薇花露，潇洒作凉云，点商勾羽。字字飞仙，下笔一帘风雨。江亭月观今如许。叹飘零、墨香千古。夕阳芳草，落花流水，依然南浦。

甚两两、凌风驾虎。恁天孙标致，月娥眉妩。一笑生春，那学世间儿女。笔床砚滴曾窥处，有西山、青眼如故。素笺寄与，玉箫声彻，凤鸣鸾舞。

渡江云（春江雨宿）

拖阴笼晚暝，商量清苦，阵阵打篷声。分明都是泪，不道今宵，篷底有离人。松涛摇睡，梦不稳、难湿巫云。几点儿、泪痕跳响，休要醒时听。

销魂。灯下无语，泣梨花，掩重门夜永，应是添、伤春

滋味，中酒心情。东风湖上香泥软，明日去、天色须晴。相见也，洛阳沽酒旗亭。

三姝媚（古卫舟。人谓此舟曾载钱塘宫人）

一篷儿别苦。是谁家、花天月地儿女。紫曲藏娇，惯锦窠金翠，玉璫钟吕。绮席传宣，笑声里、龙楼三鼓。歌扇题诗，舞袖笼香，几曾尘土。

因甚留春不住。怎知道人间，匆匆今古。金屋银屏，被西风吹换，蓼汀苹渚。如此江山，应悔却、西湖歌舞。载取断云何处。江南烟雨。

一萼红

泊沙河。月钩儿挂浪，惊起两鱼梭。浅碧依痕，嫩凉生润，山色轻染修蛾。钓船在、绿杨阴下，暮听得、扇底有吴歌。一段风情，西湖和靖，赤壁东坡。

往事水流云去，叹山川良是，富贵人多。老树高低，疏星明淡，只有今古销磨。是几度、潮生潮落，甚人海、空只恁风波。闲著江湖尽宽，谁肯渔蓑。

齐天乐（赠童瓮天兵後归杭）

相逢唤醒金华梦，吴尘暗斑吟发。倚担评花，认旗沽酒，

历历行歌奇迹。吹香弄碧。又坡柳风情，逋梅月色。画鼓红船，满湖春水断桥客。

当时何限怪侣，甚花天月地，人被云隔。却载苍烟，更招白鹭，一醉修江又别。今回记得。再折柳穿鱼，赏花催雪。如此湖山，忍教人更说。

阮良归（闺情）

斜河一道界相思。好秋都上眉。鸾笺象管写心啼。搦愁题做诗。

添别恨，卜欢期。灯花红几时。看看月上小窗儿。夜香今夜迟。

八声甘州（寿张尚书）

从黄石容履，一编书，曾佐汉王关。甚殷勤佳约，茹芝人共，引鹤差鸾。借手便成羽翼，方略正如闲。说道赤松去，还在人间。

紫绶青春如许，是南辰尊宿，北斗天官。问沙时早晚，喜色满长安。传宣能勾凤诏，便玉除前面领仙班。功名了，却茶烟琴月，慢慢东山。

桂枝香（丙子送李倅东归）

沈云别浦。又何苦扁舟，青衫尘上。客里相逢，洒洒舌端飞雨。只今便把如伊吕。是当年、渔翁樵父。少知音者，苍烟吾社，白鸥吾侣。

是如此英雄辛苦。知从前、几个适齐去鲁。一剑西风，大海鱼龙掀舞。自来多被清谈误。把刘琨、埋没千古。扣舷一笑，夕阳西下，大江东去。

浣溪沙

淡淡青山两点春。娇羞一点口见樱。一梭儿玉一纡云。
白藕香中见西子，玉梅花下遇昭君。不曾真个也销魂。

庆清朝慢

红雨争妍，芳尘生润，将春都揉成泥。分明蕙风微露，持搦花枝。款款汗酥薰透，娇羞无奈湿云痴。偏厮称，霓裳霞佩，玉骨冰肌。

梅不似，兰不似，风流处，那更著意闻时。蓦地生绡扇底，嫩凉浮动好风微。醉得浑无气力，海棠一色睡胭脂。闲滋味，殢人花气，韩寿争知。

彭履道

凤凰台上忆吹箫（秦淮夜月）

劝客新楼，鸣箏上酒，夜凉人爱秋深。何似过、赏心佳处，依约湖阴。东望寒光缥缈，烟水阔、短笛销沈。阑干近，胜时种柳，清到如今。

凌波又成误约，自佩环飞去，暗想遗音。重省江城倦客，醉拥秋衾。谁家一掬红泪，孤雁远、湿逗罗襟。石城晓，数声又递寒砧。

兰陵王（渭城朝雨）

章台路。西出重城几步。秦楼晓、花气未明，一霎空濛洗高树。行人半倚户。飞去黄鹂自语。秋千小，不系柳条，惟有轻阴约飞絮。

钿车暗相遇。早拂拭红巾，初放鹦鹉。闻歌犹是淋铃处。掩面鸣箏，倚垆呼酒，东风重记旧眉妩。报伊共歌舞。西去。屡回顾。渐客舍荒凉，嘶马先驻。玉关万里知何许。但倦拥荒泽，瓜洲难渡。将军垂老，望故国，夜寒苦。

疏影（庐山瀑布）

银云缥缈。正石梁倒挂，飞下晴昊。早挽悬河，高泻鲸宫，洪声百步低小。分明仙仗崆峒过，又化作，归帆杳杳。倚参差、翠影红霞，远落明湖残照。曾共呼龙夭矫。几回过月下，先种瑶草。九叠屏风，青鸟冥冥，更约谪仙重到。昨梦骑黄鹄，飞不去、和天也笑。等恁时、秋夜携琴，已落洞天霜晓。

韦居安

摸鱼儿

绕苔城、水平坡渺，双明遥睇无际。就中惟有鱼湾好，占得西关佳致。杨柳外、菱泛宅浮家，当日元真子。溪山信美。叹陈迹犹存，前贤已往，谁会景中意。

萧闲甚，筑屋三间近水。汀洲香泛兰芷。清风明月知多少，肯滞软红尘里。垂钓饵。这春水生时，胜有桃花鳜。烦襟净洗。待办取轻蓑，来分半席，相对弄清泚。

柴元彪

唱金缕

（咸淳癸酉茶陵灯夕，时文文山为湖南提刑）

春到云中早。恰梅花、雪後，锁窗寒悄。鼓吹喧天灯市闹，在处鳌山蓬岛。正新岁、金鸡唱晓。一点魁星光焰里，这水晶、庭院知多少。鸣凤舞，洞箫袅。

太平官府人嬉笑。道紫微、魁星聚会，参差联照。借地栽花河阳县，桃李芳菲正好。暖沁入、东风池沼。百里楼台天不夜，看祥烟、瑞霭相缭绕。生意满，翠庭草。

水龙吟

（己卯中秋，寓玉山章泉赵石涧家，相留为延桂把菊之会）

秋云元自无心，那曾系得归心住。阳关酒尽，灞桥人远，也须别去。，，。有哀雁声声，愁蛩切切，悄悄地、听人语。

回首琵琶旧恨，叹西风、兴如许。江左百年，风流云散，不堪重举，怎得归业，樵歌互答，自相容与。又何须，三

五蟾光，重阳风雨。

踏莎行

（戊寅秋客中怀钱塘旧游）

淡柳平芜，乱烟疏雨。雁声叫彻芦花渚。亭前落叶又西风，
断送离怀无著处。

切切归期，盈盈尺素。断魂正在西兴渡。满船空载暮愁来，
潮头一吼推将去。

蝶恋花

（己卯菊节得家书，欲归未得）

去年走马章台路。送酒无人，寂寞黄花雨。又是重阳秋欲
暮。西风此恨谁分付。

无限归心归不去。却梦佳人，约我花间住。蓦地觉来无觅
处。雁声叫断潇湘浦。

苏幕幕（客中独坐。）

晚晴初，斜照里。远水连天，天外帆千里。百尺高楼谁独
倚。滴落梧桐，一片相思泪。

马又嘶，风又起。断续寒砧，又送黄昏至。明月照人人不
睡。愁雁声声，更切愁人耳。

海棠春（客中感怀）

阳关可是登高路。算到底、不如归去。时节近中秋，那更黄花雨。酒病恹恹，羁愁缕缕。且是没人分诉。何似白云深，更向深深处。

惜分飞（客怀）

候馆天寒灯半灭。对着灯儿泪咽。此恨难分说。能禁几度黄花别。

乍转寒更敲未歇。蛩语更添凄恻。今夜归心切。砧声敲碎谁家月。

高阳台（怀钱塘旧游）

丹碧归来，天荒地老，骎骎华发相催。见说钱塘，北高峰更崔嵬。琼林侍宴簪花处，二十年、满地苍苔。倩阿谁，为我起居，坡柳逋梅。

凄凉往事休重省，且凭阑感慨，抚景衔杯。冷暖由天，任他花谢花开。知心只有西湖月，尚依依、照我徘徊。更多情，不间朝昏，潮去潮来。

东 冈

百字令（戴平轩新居，子侄新婚）

排云拓月，向天上移下，神仙花屋。画栋飞檐千万落，黼黼城南乔木。出谷莺迁，趋庭燕尔，袍绶登科绿。嫦娥分付，广寒今夜花烛。

遥想高越于门，烂盈百辆，夹道争车毂。春满剡溪溪上路，一任瑶华飞六。輿奉潘慈，楼高华萼，坐享齐眉福。庭槐列戟，公侯衮衮相属。

范文

意难忘

清泪如铅。叹咸阳送远，露冷铜仙。岩花纷堕雪，津柳暗生烟。寒食後，暮江边。草色更芊芊。四十年，留春意绪，不似今年。

山阴欲棹归船。暂停杯雨外，舞剑灯前。重逢应未卜，此别转堪怜。凭急管，倩繁弦。思苦调难传。望故乡，都将往事，付与啼鹃。

叶 李

失调名（赠贾似道）

君来路。吾归路。来来去去何时住。公田关子竟何如，国事当时谁汝误。

雷州户。匡州户。人生会有相逢处。客中颇恨乏蒸羊，聊赠一篇长短句。

梁 栋

念奴娇（春梦）

一场春梦，待从头、说与傍人听著。罨画溪山红锦障，舞燕歌莺台阁。碧海倾春，黄金买夜，犹道看承薄。雕香剪玉，今生今世盟约。

须信欢乐过情，闲嗔冷妒，一阵东风恶。韵白娇红消瘦尽，江北江南零落。骨朽心存，恩深缘浅，忍把罗衣著。蓬莱何处，云涛天际冥漠。

摸鱼儿（登凤凰台）

枕寒流、碧萦衣带，高台平与云倚。燕来莺去谁为主，磨灭谪仙吟墨。愁思里。待说与山灵，还又羞拈起。箫韶已矣。甚竹实风摧，桐阴雨瘦，景物变新丽。

江山在，认得刘郎何寄。年来声誉休废。英雄不博胭脂井，谁念故人衰悴。时有几。便凤去台空，莫厌频游此。兴亡过耳。任北雪迷空，东风换绿，都付梦和醉。

一萼红（芙蓉和友人韵）

怨东风。把韵华付去，农李小桃红。黄落山空，香销水冷，此际才与君逢。敛秋思、愁肠日结，拥翠袖、应费剪裁工。晕脸迎霜，幽姿泣露，寂寞谁同。

休笑梳妆淡薄，看浮花浪蕊，眼底俱空。夜帐云闲，寒城月浸，有人吟偏深丛。自前度、王郎去后，旧游处、烟草接吴宫。惟有芳卿寄言，蹙损眉峰。

莫 仑

水龙吟

镜寒香歇江城路，今度见春全懒。断云过雨，花前歌扇，梅边酒盏。离思相欺，万丝萦绕，一襟销黯。但年光暗换，人生易感，西归水、南飞雁。

与愁排遣。奈江山、遮拦不断。娇讹梦语，湿荧啼袖，迷心醉眼。绣毂华茵，锦屏罗荐，何时拘管。但良宵空有，亭亭霜月，作相思伴。

玉楼春

绿杨芳迳莺声小。帘幕烘香桃杏晓。余寒犹峭雨疏疏，好梦自惊人悄悄。

恁君莫问情多少。门外江流罗带绕。直饶明日便相逢，已是一春闲过了。

生查子

三两信凉风，七八分圆月。愁绪到今年，又与前年别。
衾单容易寒，烛暗相将灭。欲识此时情，听取鸣蛩说。

卜算子

红底过丝明，绿外飞绵小。不道东风上海棠，白地春归了。
月笛曲栏留，露舄芳池绕。争得闲情似旧时，偏索檐花笑。

摸鱼儿

听春教、燕莺莺诉。朝朝花困风雨。六桥忘却清明后，碧尽柳丝千缕。蜂蝶侣。正闲觅闲花，闲草闲歌舞。最怜西子。尚薄薄云情，盈盈波泪，点点旧眉妩。

流红记，空泛秋宫怨句。才色何处娇妒。落红无限随风絮。诗恨有谁曾遇。堪恨处。恨二十四番，花信催花去。东君暗苦。更多嘱多情，多愁杜宇，多诉断肠语。

姚云文

摸鱼儿（艮岳）

渺人间、蓬瀛何许，一朝飞入梁苑。辋川梯洞层瑰出，带取鬼愁龙怨。穷游宴。谈笑里，金风吹折桃花扇。翠华天远。怅莎沼黏萤，锦屏烟合，草露泣苍藓。

东华梦，好在牙樯雕辇。画图历历曾见。落红万点孤臣泪，斜日牛羊春晚。摩双眼。看尘世，鳌宫又报鲸波浅。吟鞘拍断。便乞与娲皇，化成精卫，填不尽遗恨。

玲珑玉（半闲堂赋春雪）

开岁春迟，早赢得、一白潇潇。风窗淅簌，梦惊金帐春娇。是处貂裘透暖，任尊前回舞，红倦柔腰。今朝。亏陶家、茶鼎寂寥。

料得东皇戏剧，怕蛾儿街柳，先斗元宵。宇宙低迷，倩谁分、浅凸深凹。休嗟空花无据，便真个、琼雕玉琢，总是虚飘。虚飘。且沈醉，趁楼头、零片未消。

木兰花慢（清明后赏牡丹）

笑花神较懒，似忘却、趁清明。更油幄晴慳，蕙庵寒浅，湿重红云。东君似怜花透，环碧、需、遮住怕渠惊。惆怅犍车人远，绿杨深闭重城。

香名。谁误娉婷。曾注谱、上金屏。问洛中亭馆，竹西鼓吹，人醉花醒。且莫煎酥浣却，一枝枝、封蜡付铜瓶。三十六宫春在，人间雨无情。

紫萸香慢

近重阳、偏多风雨，绝怜此日暄明。问秋香浓未，待携客、出西城。正自羁怀多感，怕荒台高处，更不胜情。向尊前、又忆漉酒插花人。只座上、已无老兵。

凄情。浅醉还醒。愁不肯、与诗平。记长楸走马，雕弓笮柳，前事休评。紫萸一枝传赐，梦谁到、汉家陵。尽乌纱、便随风去，要天知道，华发如此星星。歌罢涕零。

洞仙歌

燕窠香湿，误天涯芳信。社近阴晴未前定。听莺簧宛转，似羽疑宫，歌未断，落落旧愁都醒。

疏狂追少日，杜曲樊楼，拚把黄金买春恨。回首武陵溪，花待郎归，洞云深、未知春尽。问杨柳梢头几分青，消不得，

朝来雨寒一阵。

齐天乐

柳花引过横塘路，萦回曲溪通圃。插槿编篱，挨梅砌石，次第海棠成坞。吟筇独拄。待寻访斜桥，水边窥户。已约青山，云深不碍客来处。

繁华阅人无数。问旧日平原，君还知否。啼鸟窗幽，昼阴春寂，慵因不如飞絮。匆匆燕语。似迎得春来，且留春住。惜取名花，一枝堪寄怀。

蝶恋花

春到海棠花几信。堠馆余寒，欲雨征衣润。燕认杏梁栖未稳。特丹忽报清明近。

恨入青山连晓镜。香雪柔酥，应被春消尽。绣闼深深人半醒。烛花贴在金钗影。

如梦令

昨夜佳人凭酒。隔著罗衾厮守。听彻五更钟，陡觉霜飞寒逗。却又。却又。陪笑倩人温手。

八声甘州（竞渡）

卷丝丝、雨织半晴天，析歌发清舷。甚苍虬怒跃，灵龟急吼，雪涌平川。楼外榴裙几点，描破绿杨烟。把画罗遥指，助啸争先。

樵悴潘郎曾记，得青龙千舸，采石矶边。叹内家帖子，闲却缕金笺。觉素标、插头如许，尽风情、终不似斗赢船。人声断，虚齐半掩，月印枯禅。

李 震

贺新郎（题高克恭夜山图）

楼据湖山背。倚高寒、尘飞不到，越山相对。老月腾辉群
动息，独坐清分沆瀣。更满听、潮声澎湃。醉里诗成神鬼泣，
景苍凉、又在新诗外。浑忘却、功名债。凭谁妙笔能图绘。羡
中郎、前身摩诘，宛然心会。拈出清宵无限意；半幅溪藤光怪。
方信有、人间仙界。云淡天低奇绝处，笑僧殊、未识丹青在。
留此轴，夸千载。

陈 纪

贺新郎（听琵琶）

趁拍哀弦促。听冷冷、弦间细语，手间推覆。莺语间关花底滑，急雨斜穿梧竹。又涧底、松风簌簌。铁拨鹍弦春夜永，对金钗钟乳人如玉。敲象板，翦银烛。六么声断凉州续。怅梅花、岁晚天寒，佳人空谷。有限弦声无限意，沦落天涯幽独。顿唤起、闲愁千斛。贺老定场无处问，到如今、只鼓昭君曲。呼羯鼓，泻醪醕。

念奴娇（梅花）

断桥流水，见横斜清浅，一枝孤袅。清气乾坤能有几，都被梅花占了。玉质生香，冰肌不粟，韵在霜天晓。林间姑射，高情迥出尘表。

除是孤竹夷齐，商山四皓，与尔方同调。世上纷纷巡檐者，尔辈何堪一笑。风雨尤愁，年来何逊，孤负渠多少。参横月落，有怀付与青鸟。

满江红（重九登增江凤台望崔清献故居）

凤去台空，庭叶下、嫩寒初透。人世上、几番风雨，几番重九。列岫迢迢供远目，晴空荡荡容长袖。把中年、怀抱更登台，秋知否。

天也老，山应瘦。时易失，欢难久。到于今惟有，黄花依旧。岁晚凄其诸葛恨，乾坤只可渊明酒。忆坡头、老菊晚香寒，空搔首。

倦寻芳

（郭颐堂寒食无家之感，为赋）

满簪霜雪，一帽尘埃，消几寒食。手捻梨花，还是年时岑寂。簌簌落红春似梦，萋萋柔绿愁如织。怪东君、太匆匆，亦是人间行客。

问几度、五侯传烛，但回首东风，吹尽尘迹。笑杜陵泪洒，金波如积。对酒且宽愁意绪，题诗与寄真消息。待归来，细温存、慰伊相忆。

齐天乐（蝉）

夕阳门巷荒城曲，清间早鸣秋树。薄翦绡衣，凉生鬓影，独饮天边风露。朝朝暮暮。奈一度凄吟，一番凄楚。尚有残声，蓦然飞过别枝去。

齐宫往事谩省，行人犹与说，当时齐女。雨歇空山，月笼古柳，仿佛旧曾听处。离情正苦。甚懒拂笺，倦拈琴谱。满地霜红，浅，莎寻蛻羽。

董嗣杲

湘月

莲幽竹邃，旧池亭几处，多爱君子。醉玉吹香还认取，忙里得闲标致。心逐云帆，情随烟笛，高会知谁继。宵筵会启，蓦然身外浮世。

因见杜牧疏狂，前绿梦里，谩蹙双眉翠。香满屏山春满几，炉拥麝焦禽睡。月落梅空，霜浓窗掩，两耳风起。艳歌终散，输他鹤帐寐。

齐天乐

玉山曾醉凉州梦，图芳京无今古。露颗虬藤，风枝蠹叶，遗墨何人收取。当时赠与。记轻别西湖，笑离南浦。万里奚囊，岂知随处助吟苦。

归来情寄谩远，旧寻犹在望，荒亭荒圃。绀蕾攒冰，苍阴弄月，休说堆盘马乳。云梯尚阻。袖一幅秋烟，扫空尘土。静想山窗，半乘寒架雨。

杨 均

霜天晓角（祭双庙乐章）

初献

丹楹转月。金绣纷幢钺。勋在有唐宗社，人千载、仰英烈。
维辰嗟尽节。故里昭虔揭。临御雍雍来下，歆初荐、俎羞
洁。

亚献

当年宋壁。血拥河流赤。全护东南形胜，百易万、五神力。
人心同奋激。立此生民极。哀角载歌霜晓，爽斗琮、圣
容怿。

终献

忠忱谊幅。对越如丹赤。缅想遗风余烈，犹身见、古颜色。
惟馨非黍稷。穆穆歆明德。簠滢芳彝须醉，回云旒、佑乡
国。

胡幼黄

水调歌头（寿段知事。时方旱，祈雨大作）

有喜君初度，风雨作秋声。连旬烈日，稻畦麦垅欲扬尘。
好是天瓢在手，笑把君龙呵叱，四野注如倾。勃勃生意满，翠
浪涌纵横。

君知否，仁者寿，寿斯仁。自从三代而下，民命寄苍旻。
满目桑麻谷粟，满目簿书期会，试说与仁人。小试作霖手，苏
醒永新民。

熊 禾

婆罗门引（送张监察出闽）

秋宵倦起，起来风露湿人衣。休休未是早行时。旋摘青蔬炊饭，暖酒就炉转。值青山有意，且把诗题。

兴阑便归。忽邂逅、故人期。道是游山正叔，消息曾知。茶烟午灶，听击棹、歌声笑语迟。云霭散、皓月呈辉。

沁园春（自寿）

自笑生身，历事以来，垂六十年。仿浮沈闾里，半非识面，交游朋友，各已华颠。富贵不来，少年已去，空风悠悠岁月迁。虽然是，壮心一点，犹自依然。

新阳又长天边。人指似山间诗酒仙。算胸次崔嵬，不胜百榼，笔端枯槁，难足千篇。隐几杖藜，相耕听诵，聊看诸郎相后先。余何事，但读书煮茗，日晏高眠。

满庭芳

斗转旋霄，梧飘金井，洞天秋气方新。幔亭仙子，飞佩下瑶京。霞袂霓裳缥缈，冰肌莹、月作精神。云璈动，琼仙歌舞，共庆捧瑶觥。

蟾宫，人未老，纵横礼乐，谈笑功名。从今去，有多少、富贵光荣。且听宾云奏曲，千秋岁、更引清声。齐眉处，朱颜绿鬓，相与共长生时，良人正赴廷对。

瑞鹤仙

翠旗迎风辇。正金母、西游瑶台宝殿。蓬来都历徧。飘然来到，笙歌庭院。朱颜绿鬓。须尽道、人间罕见。更恰恰占得，美景良辰，小春天暖。

开宴。画堂深处，银烛高烧，珠帘任卷。香浮宝篆。翻舞袖，掩歌扇。看兰孙桂子，成团成簇，共捧金荷齐劝。从今、鹤算龟龄，天长地远。

詹无咎

鹊桥仙（题烟火簇）

龟儿吐火。鹤儿衔火。药线上、轮儿走火。十胜一斗七星球，一架上、有许多包裹。梨花数朵。杏花数朵。又开放、牡丹数朵。便当场好手路歧人，也须教、点头咽唾。

贺新郎（端午）

梅子黄时雨。对幽窗、依依抱独，几多愁绪。润逼琴丝无雅韵，难续文园旧诣。头白尽、相如谁顾。燕子楼空尘又锁，望天涯、不寄红丝缕。嗟往事，且休语。

伤情当日班衣舞。更宫衣，香罗乍带，九天繁露。一寸草心迎永日，更把葵心自许。怎料有、风推雨如。惹起灵均千古恨，转凄凉、更不成端午。拚小醉，读骚句。

王槐建

水龙吟（送人归武夷）

武夷一片闲云，被风吹落清原顶。溪梅馥馥、飞来相傍，不嫌凄冷。瓦斧争鸣，丝桐一曲，满城倾听。奈阳春未了，骊驹已驾，桐阴底、梦魂醒。

何限吟笺赋笔，甚乡心、分却清兴。鳌峰胜处，遥知风月，属谁管领。邂逅何时，无穷事业，有穷光景。但相期、不负初心，此外分、皆前定。

刘应李

祝英台近（登武夷平林）

濯沧浪，歌窈窕，云日弄微霁。屏倚间空，鹤去几何岁。
尚留洞草芊青，岩花重碧，游泳处、露中风袂。

木兰舫。亭外冉冉斜阳，杯行尚联断。独凭危阑，解渴漱
寒水。少须酒力还低，茶香不断，清与处、月明川底。

王梦应

摸鱼儿

（寿王尉·癸未冬至后五日）

问谁歌、暗香疏影，此花堪照人世。起持霜月为花如寿，天亦愿花千岁。谁有意。著如此人间，更著花如此。高寒洒洒。看浩荡刚风，跨虬飞佩，玉影乱如水。

行春处，一笑人间紫翠。纷纷窥此天地。寿如川至。好是、润翁兹岁喜。荣沾南儒恩例。捧觴更喜郎君美。任夜来归待。见说生辰，恰逢本命，寿筵且未。听老聃孙子。祝公耆艾，祝公富贵。

锦堂春（寿李仁山）

浅帻分秋，凉尊试月，西风未雁犹蝉。看芙蓉影里，绿鬓年年。日上云颿压海，尘清玉马行天。更烟楼凤举，风幕麟游，锦后珠前。

绿阴池馆如画，记晴春药径，雨晓芝田。已办十年笑语，小聚云边。舞称香围艳雪，歌迟酒落红船。早群仙醉去，柳掖

花扶，似雾非烟。

念奴娇

欲霜更雨，记青云篱落，东风前此。帘外客秋人共老，雁与愁飞千里。水郭烟明，竹陂波小，万叶寒声起。凭高那更，九嶷吹尽云气。

婉娩空复多情，年年晋梦，花与柴桑是。谁解意消风日晚，短笛孤舟林水。江蟹笼新，露莢斟浅，浇得乡关思。平芜天远，一痕黄抹秋霁。

疏影

蓂腾晓被，听堕冰层角，晴暝仍未。土湿烟生，庭掩寒青，障泥懒为春试。东风旧与花飞去，料记得、年年沙际。忍落梅、万点苔根，化作一窗离思。

犹忆蔫红稚绿，断桥雪未扫，天近春易。老对荒寒，事旧人新，雁后不成情味。人间解有花如海，待一片、不教随水。但玉香、酥影玲珑，逐日暖红云里。

醉太平（送人入湘）

寒窗月晴。寒梢露明。一痕归影灯青。又分携短亭。蘅皋佩云。蒸溪酒春。有谁勤说归程。是峰头雁声。

孙 锐

渔父词（和玄真子）

平湖千顷浪花飞。春后银鱼霜更肥。菱叶饭，芦花衣。酒酣载月忙呼归。

水调歌头（玄真子吟）

玄真子隐居江湖，自号烟波钓徒。肃宗赐之奴曰渔童，婢曰樵青。人问其故。曰：渔童使捧钓收纶，芦中鼓枻；樵青使苏兰薪桂，竹里煎茶。玄真既离苍波，游绮市，与群仙集于平湖。樵青，鄙女也，得随仙迹，暂至尘寰，情动于中而献之歌。

渔钓有遗逸，天子宠玄真。赐之奴仆，得随嫖艳下神京。几度苹汀蓼岸，不问金钩无饵，谈笑取冰鳞。珍重主人意，名我曰樵青。

肩兰桨，萦桂棹，出波津。凌虚上，会群真。卸下绿蓑青笠，付与渔童收管，相与 红尘。归去又 ，同赏洞中春。

李 琳

平韵满江红（题宜春台）

碧蘸江山，鹤唳晓、云献画屏。瑶宫敞、舞金翔翠，巍枕春城。龙背神瓢飞旱雨，虹光花石转阴晴。蔼画香、飞雾福苍生，千古灵。

箫鸾响，笙鹤鸣。瑞烟起，彩云行。满阑干花影，绣颺帘旌。佛界三千笼日月，仙楼十二挂星辰。望赭袍、霞珮并云輶，游紫清。

木兰花慢（汴京）

蕊珠仙驭远，横羽葆、簇霓旌。甚鸾月流辉，凤云布彩，翠绕蓬瀛。舞衣怯环佩冷，问梨园、几度沸歌声。梦里芝田八骏，禁中花漏三更。

繁华一瞬化飞尘，辇路劫灰平。恨碧灭烟销，红凋露粉，寂寞秋城。兴亡事空陈迹，只青山、淡淡夕阳明。懒向沙鸥说得，柳风吹上旗亭。

六么令（京中清明）

淡烟疏雨，香径渺啼鶯。新晴画帘闲卷，燕外寒犹力。依约天涯芳草，染得春风碧。人间陈迹？斜阳今古，几缕游丝趁飞蝶。

柳向尊前起舞，又觉春如客。翠袖折取嫣红，笑与簪华发。回首青山一点，檐外寒云叠。梨花淡白，柳花飞絮，梦绕阑干一株雪。

醴陵士人

一剪梅

宰相巍巍坐庙堂。说着经量。便要经量。那个臣僚上一章。
头说经量。尾说经量。

轻狂太守在吾邦。闻说经量。星夜经量。山东河北久抛荒。
好去经量。胡不经量。

褚 生

百字令

半堤花雨。对芳辰消遣，无奈情绪。春色尚堪描画在，万紫千红尘土。鹃促归期，莺收佞舌，燕作留人语。绕栏红药，韵华留此孤主。

真个恨杀东风，几番过了，不似今番苦。乐事赏心磨灭尽，忽见飞书传羽。湖水湖烟，峰南峰北，总是堪伤处。新塘杨柳，小腰犹自歌舞。

祝英台近

倚危栏，斜日暮。萋萋甚情绪。稚柳娇黄，全未禁风雨。春江万里云涛，扁舟飞渡。那更听、塞鸿无数。

叹离阻。有恨落天涯，谁念孤旅。满目风尘，冉冉如飞雾。是何人惹惹来，那人何处。怎知道、愁来不去。

徐君宝妻

满庭芳

汉上繁华，江南上物，尚遗宣政风流。绿窗朱户，十里烂银钩。一旦刀兵齐举，旌旗拥、百万貔貅。长驱入，歌台舞榭，风卷落花愁。

清平三百载，典章人物，扫地俱休。幸此身未北，犹客南州。破鉴徐郎何在，空惆怅、相见无由。从今后，梦魂千里，夜夜岳阳楼。

刘 氏

沁园春

我生不辰，逢此百罹，况乎乱离。奈恶因缘到，不夫不主，被擒捉去，为妾为妻。父母公姑，弟兄姊妹，流落不知东与西。心中事，把家书写下，分付伊谁。

越人北向燕支。回首望、雁峰天一涯。奈翠鬟云软，笠儿怎带，柳腰春细，马性难骑。缺月疏桐，淡烟衰草，对此如何不泪垂。君知否，我生於何处，死亦魂归。

张淑芳

更漏子（秋）

墨痕香，红蜡泪。点点愁人离思。桐叶落，蓼花残。雁声天外寒。

五云岭，九溪坞。待到秋来更苦。风淅淅，水淙淙。不教蓬径通。

满路花（冬）

罗襟湿未干，又是凄凉雪。欲睡难成寐、音书绝。窗前竹叶，凛凛狂风折。寒衣弱不胜，有甚遥肠，望到春来时节。孤灯独照，字字吟成血。仅梅花知苦、香来接。离愁万种，提起心头切。比霜风更烈。瘦似枯枝，待何人与分说。

浣溪沙

散步山前春草香。朱阑绿水绕吟廊。花枝惊堕绣衣裳。

或定或摇江上柳，为鸾为凤月中篴。为谁掩抑锁芸窗。

王易简

齐天乐（客长安赋）

宫烟晓散春如雾。参差护晴窗户。柳色初分，汤香未冷，正是清明百五。临流笑语。映十二阑干，翠嚬红妒。短帽轻鞍，倦游曾偏断桥路。

东风为谁媚妩。岁华顿感慨，双鬓何许。前度刘郎，三生杜牧，赢得征衫尘土。心期暗数。总寂寞当年，酒筹花谱。付与春愁，小楼今夜雨。

酹江月

暗帘吹雨，怪西风梧井，凄凉何早。一寸柔情千万缕，临镜霜痕惊老。雁影关山，蛩声院宇，做就新怀抱。湘皋遗佩，故人空寄瑶草。

已是摇落堪悲，飘零多感，那更长安道。衰草寒芜吟未尽，无那平烟残照。千古闲愁，百年往事，不了黄花笑。渔樵深处，满庭红叶休扫。

庆宫春
(谢草窗惠词卷)

庭草春迟，汀苹香老，数声佩悄苍玉。年晚江空，天寒日暮，壮怀聊寄幽独。倦游多感，更西北、高楼送目。佳人不见，慷慨悲歌，夕阳乔木。

紫霞洞窅云深，袅袅余香，凤箫谁续。桃花赋在，竹枝词远，此恨年年相触。翠楸芳字，谩重省、当时顾曲。因君凝伫，依约吴山，半痕蛾绿。

天香
(宛委山房拟赋龙涎香)

烟峤收痕，云沙拥沫，孤槎万里春聚。蜡杵冰尘，水研花片，带得海山风露。纤痕透晓，银镂小、初浮一缕。重剪纱窗暗烛，深垂绣帘微雨。

余馨恼人最苦。染罗衣、少年情绪。谩省佩珠曾解，蕙羞兰妒。好是芳钿翠妩。恨素被浓熏梦无据。待剪秋云，殷勤寄与。

水龙吟
(浮翠山房拟赋白莲)

翠裳微护冰肌，夜深暗泣瑶台露。芳容淡泞，风神萧散，

凌波晚步。西子残妆，环儿初起，未须匀注。看明珰素袜，相逢憔悴，当应被、西风误。十里云愁雪妒。抱凄凉、盼娇无语。当时姊妹，朱颜褪酒，红衣按舞。别浦重寻，旧盟唯有，一行鸥鹭。伴玉颜月晓，盈盈冷艳，洗人间暑。

摸鱼儿

（紫云山房拟赋药）

怪蛟宫、水晶帘卷，冰痕初断香缕。澄波荡桨人初到，三十六陂烟雨。春又去。伴点点荷钱，隐约吴中路。相思日暮。恨洛浦娉婷，芳钿翠剪，奁影照凄楚。

功名梦，消得西风一度。高人今在何许。鲈香菰冷斜阳里，多少天涯意绪。谁记取。但枯豉红盐，溜玉凝秋箸。尊前起舞。算唯有渊明，黄花岁晚，此兴共千古。

齐天乐

（余闲书院拟赋蝉）

翠云深锁齐姬恨，纤柯暗翻冰羽。锦瑟重调，绡衣乍著，聊饮人间风露。相逢甚处。记槐影初凉，柳阴新雨。听尽残声，为谁惊起又飞去。

商量秋信最早。晚来吟未彻，却是凄楚。断韵还连，余悲似咽，欲和愁边佳句。幽期谁语。怕寒叶凋零，蛻痕尘土。古木斜晖，向人怀抱苦。

冯应瑞

天香（宛委山房拟赋龙涎香）

枯石流痕，残沙拥沫，骊宫夜蛰惊起。海市收时，鲛人分处，误入众芳丛里。春霖未就，都化作、凄凉云气。惟有清寒一点，消磨小窗残醉。

当年翠篝素被。拂余薰、倦怀如水。谩惜舞红犹在，为谁重试。几片金昏字古，向故篋聊将伴憔悴。

。

唐艺孙

天香（宛委山房拟赋龙涎香）

螺甲磨星，犀株杵月，蕤英嫩厌拖水。海屋楼高，仙娥钿小，缈结成心字。麝煤候暖，载一朵、轻云不起。银叶初生薄晕，金猊旋翻纤指。

芳杯恼人渐醉。碾微馨、凤团闲试。满架舞红都换，懒收珠佩。几片菱花镜里，更摘索双鬟伴秋睡。早是新凉，重薰翠被。

齐天乐（余闲书院拟赋蝉）

柳风微扇闲池阁，深林翠阴人静。渐理琴丝，谁调金奏，凄咽流空清韵。虹明雨润。正乍集庭柯，凭阑新听。午梦惊回，有人娇困酒初醒。

西轩晚凉又嫩。向枝头占得，银露行顷。蛻翦花轻，羽翻纸薄，老去易惊秋信。残声送暝。恨秦树斜阳，暗催光景。淡月疏桐，半窗留鬓影。

桂枝香（天柱山房拟赋蟹）

收帆渡口。认远岸夜篝，松炬如昼。还见沙痕雪涨，水纹霜后。秦宫梦到无肠断，望明河、月斜疏柳。琐窗相对，茶边犹记，眼波频溜。

渐嫩菊、初萼绿酒。叹风味尊前，潇洒如旧。几度金橙香雾，玉盘纤物。清悉小醉凄凉里，拚今生、容易消瘦。草心春浅，年年相忆，看灯时候。

吕同老

天香（宛委山房拟赋龙涎香）

冰片熔肌，水沈换骨，蜿蜒梦断瑶岛。翦碎腥云，杵匀枯沫，妙手制成翻巧。金篝候火，无似有、微薰初好。帘影垂风不动，屏深护春宜小。

残梅舞红褪了。佩珠寒、满怀清峭。几度酒余重省，旧愁多少。荀令风流未减，怎奈向、飘零赋情老。待寄相思，仙山路杳。

水龙吟（浮翠山房拟赋白莲）

素肌不污天真，晓来玉立瑶池里。亭亭翠盖，盈盈素靥，时妆净洗。太液波翻，霓裳舞罢，断魂流水。甚依然、旧日浓香淡粉，花不似、人憔悴。

欲唤凌波仙子。泛扁舟、浩波千里。只愁回首，冰帘半掩，明珰乱坠。月影凄迷，露花零落，小阑谁倚。共芳盟，犹有双栖雪鹭，夜寒惊起。

齐天乐（余闲书院拟赋蝉）

绿阴初蔽林塘路，凄凄乍流清韵。倦咽高槐，惊嘶别柳，还忆当时曾听。西窗梦醒。叹弦绝重调，珥空难整。绰约冰绡，夜深谁念露华冷。

不知身世易老，一声声断续，频报秋信。坠叶山明，疏枝月月，惆怅齐姬薄幸。余音未尽。早枯翼飞仙，暗嗟残景。见洗冰奁，怕翻双翠鬓。

桂枝香（天柱山房拟赋蟹）

松江岩侧。正乱叶坠红，残浪收碧。犹记灯寒暗聚，簫疏轻入。休嫌郭索尊前笑，且开颜、其倾芳液。翠橙丝雾，玉葱浣雪，嫩黄初擘。

自那日、新诗换得。又几度相逢，落潮秋色。常是篱边早菊，慰渠岑寂。如今谩江山兴，更谁怜、草泥踪迹。但将身世，浮沈醉乡，旧游休忆。

李居仁

天香（宛委山房拟赋龙涎香）

瀛峤浮烟，沧波挂月，潜虬睡起清晓。万里槎程，一番花信，付与露薇冰脑。纤云渐暖，凝翠席、氤氲不了。银叶重调火活，珠帘日垂风悄。

螺屏酒醒梦好。绣罗帏、依旧痕少。几度试拈心字，暗惊芳抱。隐约仙舟路杳。谩佩影玲珑护娇小。素手金篝，春情未老。

水龙吟（浮翠山房拟赋白莲）

蕊仙群拥宸游，素肌似怯波心冷。霜裳缟夜，冰壶凝露，红尘洗尽。弄玉轻盈，飞琼绰约，淡妆临镜。更多情、一片碧云不掩，笼娇面、回清影。

菱唱数声乍听。载名娃、藕丝萦艇。雪鸥沙鹭，夜来同梦，晓风吹醒。酒晕全消，粉痕微渍，色明香莹。问此花，盍贮瑶池，应未许、繁红并。

唐 珣

水龙吟（浮翠山房拟赋白莲）

淡妆人更婵娟，晚奁净洗铅华腻。冷冷月色，萧萧风，娇红敛避。太液池空，霓裳舞倦，不堪重记。叹冰魂犹在，翠舆难驻，玉簪为谁轻坠。

别有凌空一叶，泛清寒、素波千里。珠房泪湿，明珰恨远，旧游梦里。羽扇生秋，琼楼不夜，尚遗仙意。奈香云易散，绡衣半脱，露凉如水。

摸鱼儿（紫云山房拟赋药）

渐沧浪、冻痕消尽。琼丝初漾明镜。鲛人夜翦龙髯滑，织就水晶帘冷。鳧叶净。最好似、嫩荷半卷浮晴影。玉流翠凝。早枯鼓融香，红盐和雪，醉齿嚼清莹。

功名梦，曾被秋风唤醒。故人应动高兴。悠然世味浑如水，千里旧怀谁省。空对影。奈回首、姑苏台畔愁波暝。烟寒夜静。但只有芳洲，苹花共老，何日泛归艇。

齐天乐（余闲书院拟赋蝉）

蜡痕初染仙茎露，新声又移凉影。佩玉流空，绡衣翦雾，几度槐昏柳暝。幽窗睡醒。奈欲断还连，不堪重听。怨结齐姬，故宫烟树翠阴冷。

当时旧情在否，晚妆清镜里，犹记娇鬓。乱咽频惊，余悲渐杳，摇曳风枝未定。秋期话尽。又抱叶凄凄，暮寒山静。付与孤蛩。苦吟清夜永。

桂枝香（天柱山房拟赋蟹）

松江舍北。正水落晚汀，霜老枯荻。还见青匡似绣，绀螯如戟。西风有恨无肠断，恨东流、几番潮汐。夜灯争聚微光，挂影误投帘隙。

更喜荐、新萐玉液。正半壳含黄，一醉秋色。纤手香橙风味，有人相忆。江湖岁晚听飞雪，但沙痕、空记行迹。至今茶鼎，时时犹认，眼波愁碧。

赵汝钠

水龙吟（浮翠山房拟赋白莲）

露华洗尽凡妆，玉妃来待瑶池宴。风裳水佩，冰肌雪艳，清凉不汗。解语情多，凌波步稳，酒容易散。想温泉浴罢，天然真态，浑疑是、宫妆浅。

暗想凄愁别岸。粉痕消、香腮凝汗。雪空冰冷，此情唯许，鹭知鸥见。羽扇微摇，翠帷低拥，靖凉庭院。待夜深，月上阑干，更邀取、姮娥伴。

曹杲孙

贺新郎（题江心）

极目天如画。水花中、涌出莲宫，翠楹碧瓦。胜景中川金焦似，勒石。尚隔浦、风烟不跨。妖蜃自降真歇手，涨平沙、妙补乾坤罅。双寺合，万僧夏。

东西塔影龙分挂。夜无云、点点一天，星斗相射。七十二滩声到海，括橹瓯帆上下。泣不为、琵琶声哑。故寝荒凉成一梦，问来鸥、去鹭无知者。烟树湿，怒涛打。

林横舟

大江词

（寿仙尉·十一月初一）

一萼呈秀，近迎长佳节，拟书云物。隐隐虹桥天际下，光照梅仙丹壁。鹏路横飞，蟾宫直上，早脱麻衣雪。一时篇翰，并游俱是魁杰。

长记怀燕良辰，华堂称庆，皓齿清歌发。自暖杯中须缓举，莫放金炉香灭。事业伊周，功名韩白，未到星星发。九天有诏，蓝田风月。

杨舜举

浣溪沙（钱唐有感）

残照西风一片愁。疏杨画出六桥秋。游人不上十三楼。
有泪金仙还泣汉，无心玉马已朝周。平湖寂寂水空流。

危复之

永遇乐

早叶初莺，晚风孤蝶，幽思何限。檐角萦云，阶痕积雨，一夜苔生遍。玉窗闲掩，瑶琴慵理，寂寞水沈烟断。消无言、春归无觅处，卷帘见双飞燕。

风亭泉石，烟林薇蕨，梦绕旧时曾见。江上闲鸥，心盟犹在，分得眠沙半。引觞浮月，飞谈卷雾，莫管愁深欢浅。起来倚阑干，拾得残红一片。

罗志仁

金人捧露盘（丙午钱塘）

湿苔青，妖血碧，坏垣红。怕精灵、来往相逢。荒烟瓦砾，宝钗零乱隐鸾龙。吴峰越山献，翠颦锁、苦为谁容。

浮屠换、昭阳殿，僧磬改、景阳钟。兴亡事、泪老金铜。骊山废尽，更无宫女说元宗。角声起，海涛落，满眼秋风。

霓裳中序第一（四圣观）

来鸿又去燕。看罢江潮收画扇。湖曲雕阑倚倦。正船过西陵，快篙如箭。凌波不见。但陌花、遗曲凄怨。怨。孤山路，晚蒲病柳，淡绿锁深院。

谁恨。五云深处宫殿。记旧日、曾游翠辇。青红如写便面。下鹄池荒，放鹤人远。粉墙随岸转。漏碧瓦、残阳一线。蓬莱梦，人间那信，坐看海涛浅。

风流子（泛湖）

歌咽翠眉低。湖船客、尊酒谩重携。正断续齐钟，高峰南北，飘零野褐，太乙东西。凄凉处，翠凉处，翠连松九里，僧马溅障泥。葛岭楼台，梦随烟散，吴山宫阙，恨与云齐。

灵峰飞来久，飞不去，有落日断猿啼。无限风荷废港，露柳荒畦。岳公英骨，麒麟旧冢，坡仙吟魄，莺燕长堤。欲吊梅花无句，素壁慵题。

扬州慢

危榭摧红，断砖埋玉，定王台下园林。听檣干燕子，诉别后惊心。尽江上、青峰好在，可怜曾是，野烧痕深。付潇湘渔笛，吹残今古锁沈。

妙奴不见，纵秦郎、谁更知音。正雁妾悲歌，雕奚醉舞，楚户停砧。化碧旧愁何处，魂归些、晚日阴阴。渺云平铁坝，凄凉天也沾襟。

虞美人（净慈尼）

君王曾惜如花面。往事多恩怨。霓裳和泪换袈裟。又送鸾舆北去、听琵琶。

当年未削青螺髻。知是归期未。天花丈室万缘空。结绮临春何处、泪痕中。

木兰花慢（禁酿）

汉家糜粟诏，将不醉、饱生灵。便收拾银瓶，当垆人去，春歇旗亭。渊明权停种秫，遍人间，暂学屈原醒。天子宜呼李白，妇人却笑刘伶。

提葫芦更有谁听。爱酒已无星。想难变春江，蒲桃酿绿，空想芳馨。温存鸂鶒鹦鹉，且茶瓯淡对晚山青。但结秋风鱼梦，赐酺依旧沈冥。

菩萨蛮

晓莺催起。问当年秀色，为谁料理。怅别后、屏掩吴山，便楼燕月寒，鬓蝉云委。锦字无凭，付银烛、尽烧千纸。对寒泓静碧，又把去鸿，往恨都洗。

桃花自贪结子。道东风有意，吹送流水。谩记得当日、心嫁卿卿，是日暮天寒，翠袖堪倚。扇月乘鸾，尽梦隔、婵娟千里。到嗔人、从今不信，画檐鹊喜。

曾寅孙

减字木兰花
(题温日观葡萄卷)

生绡蜀茧。笔底墨云飞一片。点点秋腴。收得骊龙颔下珠。
兴来一扫。惜处有时慳似宝。露叶烟条。几度西风吹不凋。

沈 钦

甘州

（汴沈钦就用其韵）

有吴僧、醉倒墨池边，西风暗吹芳。对苍髯冷挂，龙珠万颗，清映经窗。却似仙人黄鹤，笛里换时光。静处观生意，竹老梅荒。

犹说当年分种，是枯槎远驾，万里途长。信留真何许，烨烨楮毫香。前度、离宫别馆，正金铺、深掩绿苔床。都休问，一番展卷，清昼生凉。

刘 沆

甘州

（万一云）

爱累累、万颗贯骊珠，特地写幽芳。想黄昏云淡，夜深人静，清影横窗。冷澹一枝两叶，笔下老秋光。参透圆明相，日观开荒。

最是柔髭修梗，映风姿雾质，雅趣悠长。更淋漓草圣，把玩墨犹香。珍重好、卷藏归去，枕屏间、偏称道人床。江南路，后回重见，同话凄凉。

止禅师

卜算子（离念）

书是玉关来，泪向松江随。梅自飘香柳自青，嘹唳征鸿过。
沙漠暗尘飞，嵩岳愁云锁。淮上千营夜枕戈，此恨凭谁破。

昭君怨（卖花人）

担子挑春虽小。白白红红都好。卖过巷东家。巷西家。
帘外一声声叫。帘里鸦鬟入报。问道买梅花。买桃花。

台城路（归杭）

当年不信江湖老，如今岁华惊晚。路改家迷，花空荫落，谁识重来刘阮。殊乡顿远。甚犹带羁怀，雁凄蛩怨。梦里忘归，乱浦烟浪片帆转。

闭门休叹故苑。杖藜游冶处，萧艾都遍。雨色云西，晴光水北，一洗悠然心眼。行行渐懒。快料理幽寻，酒瓢诗卷。赖

有湖边，踢时鸥数点。

菩萨蛮（晓行西湖边）

霜花铺岸浓如雪。田间水浅冰初结。林密乱鸦啼。山深雁过稀。

风恬湖似镜。冷浸楼台影。梅不怕隆寒，疏葩正耐看。

尾犯

（因有感於孤山，为赋此调）

一白受春知。独爱老来，疏瘦偏宜。古月黄昏，许松竹相依。晕藓枯搓半折，影浮波、渴龙倒窥。岁华凋谢，水边篱落，雪后忽横枝。

百花头上立，且休问、向北开迟。老了何郎，不成便无诗。惟只有、西州倦客，怕说著、西湖旧时。难忘处，放鹤山空人未归。

祝英台近（为自得齐赋）

水空流，心不竞，门掩柳阴早。芸暖书笺，声压四檐悄。断尘飞远清风，人间醒醉，任蝶梦、何时分晓。

古音少。素琴久已无弦，俗子未知道。听雨看云，依旧静中好。但教春气融融，一般意思，小窗外、不除芳草。

华胥引（赋松花）

碧浮春盖，黄点秋旗，细芳泛月。露委残钗，烟梳高髻曾
戏折。几度宿寄山房，麝尘云屑。香入蜂须，蜜房风味应别。
 菊酒浮汤，爱霏霏、粉黄清绝。嫩苞新子，凭谁香歌五粒。
只怕东风吹尽，长萧萧黄发。独鹤归来，满庭零乱金雪。

甘州（题曾心传藏温日观墨蒲萄画卷）

相不劳、添竹引龙须，断梗忽传芳。记珠悬润碧，飘摇秋
影，曾印禅窗。诗外片云落莫，错认是花光。无色空尘眼，雾
老烟荒。

一翦静中生意，任前看冷淡，真味深长。有清风如许，吹
断万红香。且休教夜深人见，怕误他、看月上银床。凝眸久，
却愁卷去，难博西凉。

韩信同

沁园春（寿南窗叶知录）

望紫云翁，启明在东，长庚在西。但空有寸心，荆州江汉，未能百里，弱水沙黎。菊底秋深，樵边信至，一曲阳春草木知。长吟咏，觉声如韩操，骨似陶诗。

不应鬓发能稀。七十寿强如六十耆。想高谈倾坐，风斯下矣，微乱漱物，清且涟漪。谩说翁，休夸淇叟，用舍行藏各有时。真修养，有近思家学，字字参芝。

王炎午

沁园春

又是年时，杏红欲脸，柳绿初芽。奈寻春步远，马嘶湖曲，卖花声过，人唱窗纱。暖日晴烟，轻衣罗扇，看遍王孙七宝车。谁知道，十年魂梦，风雨天涯。

休休何必伤嗟。谩赢得、青青两鬓华。且不知门外，桃花何代，不知江左，燕子谁家。世事无情，天公有意，岁岁东风岁岁花。拚一笑，且醒来杯酒，醉后杯茶。

徐 瑞

点绛唇

多事春风，年年绿遍江南草。罗裙色好。莫把相如恼。
梦入瑶台，搔背麻姑爪。还惊觉。杜鹃啼早。一夜相思老。

王去疾

菩萨蛮（蟠矶）

吴波深波声急。阑干下瞰鱼龙宅。江北与江南。斜阳山外山。

十洲三岛地。梦里身曾至。今日醉危亭。神仙邀我盟。

忆旧游（前题分得论字）

正落花时节，憔悴东风，绿满愁痕。悄客梦惊呼伴侣，断鸿有约，回泊归云。江空共道惆怅，夜雨隔篷闻。尽世外纵横，人间恩怨，细酌重论。

叹他乡异县，渺旧雨新知，历落情真。匆匆那忍别，料当君思我，我亦思君。人生自非麋鹿，无计久同群。此去重销魂，黄昏细雨人闭门。

陈恕可

水龙吟（浮翠山房拟赋白莲）

素姬初宴瑶池，佩环误落云深处。分香华井，洗妆湘渚，天姿淡泞。碧盖吹凉，玉冠迎晓，盈盈笑语。记当时乍识，江明夜静，只愁被、婵娟误。几点沙边飞鹭。旧盟寒、无迷烟雨。相思未尽，纤罗曳水，清铅泣露。玉镜台空，银瓶绠绝，断魂何许。待今宵试探，中流一叶，共凌波去。

齐天乐（余闲书院拟赋蝉）

碧柯摇曳声何许，阴阴晚凉庭院。露湿身轻，风生翅薄，昨夜绡衣初翦。琴丝宛转。弄几曲新声，几番凄惋。过雨高槐，为渠一洗故宫怨。

清虚襟度漫与，向人低诉处，幽思无限。败叶枯形，残阳绝响，消得西风肠断。尘情已倦。任翻鬓云寒，缀貂金浅。蜕羽难留，顿觉仙梦远。

齐天乐（同上）

蛻仙飞佩流空远，珊珊数声林杪。薄暑眠轻，浓阴听久，勾引凄凉多少。长吟未了。想犹怯高寒，又移深窈。与整绡衣，满身风露正清晓。

微薰庭院昼永，那回曾记得，如诉幽抱。断响难寻，余悲独省，叶底还惊秋早。齐宫路杳。叹往事魂消，夜阑人悄。谩省轻盈，粉奁双鬓好。

桂枝香（天柱山房拟赋蟹）

西风故国。记乍免内黄，归梦溪曲。还是秦星夜映，楚霜秋足。无肠枉抱东流恨，任年年、褪匡微绿。草汀篝火，芦洲纬箔，早寒渔屋。

叙旧别、芳筇荐玉。正香擘新橙，清泛佳菊。依约行沙乱雪，误惊窗竹。江湖岁晚相思远，对寒灯、谩怀幽独。嫩汤浮眼，枯形蛻壳，断魂重续。

刘 铨

少年游（戏友人与女客对棋）

石榴花下薄罗衣。睡起却寻棋。未省高低，被伊春笋，拈了白玻璃。

钏脱钗斜浑不省，意重子声迟。对面痴心，只愁必局，肠断欲输时。

蝶恋花（送春）

人自怜春春未去。萱草石榴，也解留春住。只道送春无送处。山花落得红成路。

高处莺啼低蝶舞。何况日长，燕子能言语。会与光阴相客主。晴云又卷西边雨。

乌夜啼（石榴）

垂杨影里残红。甚匆匆。只有榴花、全不怨东风。暮雨急。

晓鸦湿。绿玲珑。比似茜裙初染、一般同。

梁明夫

贺新郎（寿吕道山四十九岁）

万里天去。见浔阳江上，风引仙舟淮浦。到得玉阶方寸地，历历苍生辛苦。要尽活、江南一路。昼绣归来沾御渥，听邦人、箫鼓迎初度。龟与鹤，亦掀舞。

前身定是磻溪吕。笑当时、八十始卜，非熊非虎。试数行年逢革卦，革命正逢汤武。真千载、风云会遇。拟向庐山招五老，诣道山、同献蓬莱赋。仍剪菊，荐秋露。

梅 坡

鹊桥仙（三月廿一）

华桐日永，泛兰风细，节近朱明十日。玉麟何事吐书来，瑞世应、文章东壁。

绿衣戏彩，金樽酌醴，兰玉阶庭森列。更看千岁树青青，管取并、三槐手植。

满江红（四月初六）

天佑生贤，安排处、麦秋六日。人尽道、英雄慷慨，中兴人物。佛祖庆生宜后两，洞宾初度犹迟七。欲急流勇退作神仙，如何得。

州县考，劳书绩。东西府，今虚席。看台星北拱，寿星南极。即见紫泥书下逮，须还班头立。愿得君、千载庆风云，齐箕翼。

水调歌头（寿马守·五月十八）

五月进农黍，三叶换阶蓂。不知今夕何夕，嵩岳床生申。莲幕泮宫小试，花县二车偏历，所至蔼芳声。一札颁明诏，千里寄专城。

席方温，边报警，塞飞尘。腹中数万兵甲，笑却狄人兵。金印明年如斗，黄阁有人引类，阔步到公卿。遥拜祝椿算，长愿待枫宸。

千秋岁引（寿女人·八月初二）

两叶蓂开，千年桃熟，恰近秋期十三日。寿星辉映福星现，寿山高对城山立。蕊宫仙，王母宴，瑶池客。

齐劝芳樽斟玉液。齐唱新词翻玉笛。岁岁今朝陪燕集。荣华富贵长年出，重重锦上花添色。谢庭兰，燕山桂，登科必。

徐观国

蓦山溪

儒官措大，是官曰都得做。宰相故崇下，呼召也须同，太原公子，能武又能文，闲暇里，抱琴书，车马时相过。

樽开北海，减请还知么。叵耐这点徒，刚入词、把人点污。儒冠屈辱，和我被干连，累告讦，孟尝君，带累三千处。

阮郎中

失调名（赠妓）

东风捻就，腰儿纤细。系的粉裙儿不起。近来只惯掌中看，忍教在、烛花影里。

更阑应是，酒红微褪。暗蹙损、眉儿娇翠。夜深著两小鞋儿，靠那处、屏风立地。

俞克成

蝶恋花（怀旧）

梦断池塘惊乍晓。百舌无端，故作枝头闹。报道不禁寒料峭。未教舒展闲花草。
尽日帘垂人不到。老去情疏，底事伤春瘦。相对一樽归计早。玉山不减巫山好。

胡浩然

万年欢（上元）

灯月交光，渐轻风布暖，先到南国。罗绮娇容，十里绛纱笼烛。花艳惊郎醉目。有多少、佳人如玉。春衫袂，整整齐齐，内家新样妆束。

欢情未足。更兰谩勾牵旧恨，萦乱心曲。怅望归期，应是紫姑频卜。暗想双眉对蹙。断弦待、鸾胶重续。休迷恋，野草闲花，凤箫人在金谷。

东风齐著力（除夕）

残腊收寒，三阳初转，已换年华。东君律管，迤逦到山家。处处笙簧鼎沸，会佳宴、坐列仙娃。花丛里，金炉满爇，龙麝烟斜。

此景转堪夸。深意祝、寿同福海增加。玉觥满泛，且莫厌流霞。幸有迎春寿酒，银瓶浸、几朵梅花。休辞醉，园林秀色，百草萌牙。

送入我们来（除夕）

茶垒安扉，灵馐挂户，神雉烈竹轰雷。动念流光，四序式周回。须知今岁今宵尽，似顿觉明年明日催。向今夕，是处迎春送腊，罗绮筵开。

今古偏同此夜，贤愚共添一岁，贵贱仍偕。互祝遐龄，山海固难摧。石崇富贵钱铿寿，更潘岳仪容子建才。仗东风尽力，一齐吹送，入此门来。

春霁（春晴）

迟日融和，乍雨歇东郊，嫩草凝碧。紫燕双飞，海棠相衬，妆点上林春色。点然望极。因人天气浑无力。又听得。园苑，数声莺啭柳阴直。

当此暗想，故国繁华，俨然游人，依旧南陌。院深沈、梨花乱落，那堪如练点衣白。酒量顿宽洪量窄。算此情景，除非殢酒狂欢，恣歌沈醉，有谁知得。

满庭芳（吉度）

潇洒佳人，风流才子，天然分付成双。兰堂绮席，烛影耀荧煌。数辐红罗绣帐，宝妆篆、金鸭焚香。分明是，芙渠浪里，一对浴鸳鸯。

欢娱，当此际，山盟海誓，地久天长。顾五男二女，七子

成行。男作公卿将相，女须嫁、君宰侯王。从兹去，荣华富贵，
福祿寿无疆。

宋丰之

小冲山

花样妖娆柳样柔。眼波流不断、满眶秋。窥人佯整玉搔头。
娇无力，舞罢却成羞。

无计与迟留。满怀禁不得、许多愁。一溪春水送行舟。无
情月，偏照水东楼。

孙夫人

风中柳（闺情）

锁减芳容，端的为郎烦恼。鬓慵梳、宫妆草草。别离情绪，
等归来都告。怕伤郎、又还休道。

利锁名缰，几阻当年欢笑。更那堪、鳞鸿信杳。蟾枝高折，
愿从今须早。莫辜负、凤帏人老。

陈若晦

满庭芳（游人涤赋）

五洞深沈，九峰回抱，望中云汉相侵。暮春天气，宫殿翠烟深。一片山光澹净，溪月上、碧水浮金。琼楼杪，仙人度曲，空外响虚音。

龙香，时暗引，青鸾白鹤，飞下秋阴。露华冷、琼珠点缀瑶林。犹记华胥梦断，从别后、几许追寻。人间世，逝川东注，红日又西沈。

徐一初

摸鱼儿

对茱萸、一年一度。龙山今在何处。参军莫道无勋业，消得从容尊俎。君看取。便破帽飘零，也博名千古。当年幕府。知多少时流，等闲收拾，有个客如许。

追往事，满目山河晋土。征鸿又过边羽。登临莫上高层望，怕见故宫禾黍。觞绿醕。浇万斛牢愁，泪阁新亭雨。黄花无语。毕竟是西风，朝来披拂，犹忆旧时主。

陈彦章妻

沁园春

记得爷爷，说与奴奴，陈郎俊哉。笑世人无眼，老夫得法，官人易聘，国土难媒。印信乘龙，夤缘绿叶，选似扬鞭选得来。果然是，西雍人物，京样官坯。

郑郎上马三杯。莫把离愁恼别怀。那孤灯只砚，郎君珍重，离愁别恨，奴自推排。白发夫妻，青衫事业，两句微吟当折梅。彦章去，早归则个，免待相催。

郑文妻

忆秦娥

花深深。一钩罗袜行花阴。行花阴。闲将柳带，细结同心。
日边消息空沈沈。画眉楼上愁登临。愁登临。海棠开后，
望到如今。

刘鼎臣妻

鹧鸪天（剪彩花送珍省试）

金屋无人夜剪缯。宝钗翻作齿痕轻。临长执手殷勤送，衬取萧郎两鬓青。

听嘱付，好看承。千金不抵此时情。明年宴罢琼林晚，酒面微红相映明。

张任国

柳梢青

挂起招牌。一声喝采，旧店新开。熟事孩儿，家怀老子，
毕竟招财。

当初合下安排。又不豪门买呆。自古道、正身替代，见任
添差。

福建士子

月上小楼西，鸡唱霜天晓。泪眼相看话别时，把定纤纤手。
伊道不忘人，伊却都忘了。我若无情似你时，瞒不得、桥头柳。

钟辰翁

水调歌头（寿何帅）

某伏以天佑皇朝，龙虎叶千龄之运；时生人杰，麒麟开六月之祥。垂弧在辰，属部胥庆。共惟某官德钟清粹，气备中和。暂借鸿名，特欲重无戎之寄；伫来凤诏，促归充左辖之虚。属初度之载临，开华年而有永。某误蒙眷予，倍切欢愉。持南丰一瓣之香，归依已切；效东鲁三寿之祝，祈颂难穷。仰冀台慈，俯赐电览。某下情无任善颂之至。

皓皓一何洁，更暴以秋阳。秋毫尘滓、如何浣得这肝肠。况对金风初度，酌彼银河净浴，六月凛冰霜。精白生来别，日月许争光。

清明朝，清要路，偏流芳。澄清闽峤，姑命申伯式南邦。洗得甲兵静了，去作诗书元帅，却人相吾皇。清问同天老，俾尔寿而昌。

齐天乐（寿谢丞）

南墙槐竹风摇翠。欢声为谁吹起。水秀龟神，松清鹤健，

人在蓬壶深处。金猊喷雾。睹鬓雪青归，脸霞红驻。一点寿星，分明光照梅花树。

三年冰蘖清苦。这长生富贵，天应分付。经阅黄庭，鼎烹丹井，心事澹然如水。东山霖雨。正出洗太虚，未容别墅。紫诏飞来，玉堂锵步武。

萧仲芮

沁园春（寿春陵史君叔）

五马南来。一骑东驰，诏黄已催。正寻幽择胜，闲边点检，吟风弄月，忙处徘徊。玉井莲房，碧筒酒熟，趁得长年千岁杯。杯浮处，正芒寒南极，色映三台。

明光殿北屏门，记御笔亲题名姓来。看河东召人，韩侯归觐，通班玉笋，稳上鸾台。作汉无功，继唐八叶，绿鬓依然画绣回。安排了，待秋风先看，双桂联魁。

陈士豪

沁园春（寿胡守）

把酒西湖，问梅一笑，为谁试花。有淡庵人品，精忠许国，文昌地位，清白传家。鸾检封芝，麟符剖竹，立马嘶风催戍瓜。从今好，听夜郎江上，谯鼓喧挝。

雌堂玉暖吴娃。向燕寝香中早放衙。但一麾十里，风清画戟，五溪六诏，云拥高牙。褒玺疏荣，锋车趣召，万寿杯中色翠霞。何须更，问武陵玉屑，勾漏丹砂。

赵通判

沁园春（寿太守李宗丞）

贺白文章，英卫规模，簪纓世家。更襟怀，芳润光风齐月，
笔端奇伟，春藻天葩。课最严城，升班清禁，蔽芾棠阴人竞夸。
争知道，富恩波衮衮，万顷无涯。

清辉庭桂方花。映潋滟仙杯浮紫霞。庆云龙凤虎，明良际
会，鸿勋骏业，重叠辉华。寿挹南峰，福迎庐水，未羡还丹九
转砂。从此去，看腰黄眼赤，迤逦堤沙。

赵汝恂

念奴娇（寿萧守）

萧守六月九日生。其时购得右曼卿书寿字碑，挂於厅壁，乃景佑五年六月九日书，月日恰同，用以为意。

金塘瑞溢，爱琉璃十顷，风漪摇碧。玉女三千擎翠盖，簇拥芙蓉仙伯。鸾鹤回翔，龙蛇飞动，醉墨挥仙笔。磨崖书寿，分明知是今日。

应为今日生申，银钩照坐，光满图书壁。竹马儿童传好语，小住湖山开国。玉玺成文，金莲赐对，剑履登玄石。丹砂九转，功成依旧头黑。

石 麟

贺新凉（寿处州刘守）

一骑飞来速。报平山、将颁凤检，宠分符竹。自是平淮勋名在，姓字屏风纪录。正欲革、潢池风俗。古括久思贤太守，待东山、一起苍生福。唐李段，追芳躅。

横舟竹下凭青鹿。庆生朝、称觞蔼蔼，履珠簪玉。争奈回溪民望切，计日带牛佩犊。便合早、秣驹脂毂。圣眷处公犹未惬，俟朱幡、才下锋车趣。符已兆，台星六。

金缕词（寿南楼）

欲上南楼寿。记当年、祥占玉燕，一阳生候。今数书云犹七日，宫线未添刺绣。便草就、寿词盈袖。合捧金荷称鹤算，想华堂、胜醉眉春酒。惭斐句，为觞侑。

功名八稚年方少。自归来、陶庐蒋径，菊松为友。轩筑易安栽花药，不坠家声五柳。况满砌、芝兰争秀。岁岁斑斓衣戏处，老人星、一点辉南斗。顾对此，共长久。

水调歌头（寿）

九叶仙茅秀，旬浹一阳生。中山瑞气和暖，融作玉壶春。昨夜洪临跨鹤，翌早绿华骖凤，今日岳生申。须信神仙侣，引从降蓬瀛。

文中虎，寿中鹤，酒中鲸。一门盛事相继；桥梓奋鹏程。应羨华堂燕处，许大规摹涵养，大器晚方成。醒后宫花句，伫看赋琼林。

鹧鸪天（寿逸老堂主人，年八十二）

欲寿中山不老仙。寿词更拟办千篇。九萸日秀尧阶地，五色云祥鲁观天。

吟逸老，醉逃禅。香传丹桂子孙贤。莫言大器韬藏久，犹是梁魁擢第年。

水调歌头（寿致政叔，时又得孙）

日暖唐宫绣，云绚鲁台观。九叶仙茅方茂，瑞气霭中山。逸老堂前戏彩，新抱玄孙弥月，红字写眉间。八十庆公寿，添撇更成千。

寿中星，人中杰，酒中仙。功名富贵，事业分付子孙贤。赢得濠梁真乐，剩有陶园佳趣，村屨日安闲。第恐非熊兆，好事逼新年。

黄通判

满江红（寿太守赵司直）

太守风流，管领尽、十分春色。开藩了、万花妆就，舒长化国。太白方观宫锦样，老人又现端门侧。听螺州、千里沸观声，春无极。

龙种贵，蟾宫客。熊轼彦，鱼书直。更精神天赋，寒光停碧。宝篆定膺铜狄数，金樽好按梁州拍。待予环、赤舄映貂蝉，头方黑。

高子芳

念奴娇（庆朱察推）

葱葱佳气，人都道、今日垂孤令旦。怪得欢声如鼎沸，准拟华堂开宴。三虎容仪三子，二乔态度二宠是姊妹，争捧金杯劝。瑶池王母，何妨引领仙眷。

况有道骨仙风致仕奉道，灵丹秘诀，钟鼎何心恋。却笑玉阶轩冕客，难脱功名羁绊。萧散陶篱，徜徉裴野，风月堪为伴。拳拳祝颂，寿龄期等龟算。

菩萨蛮（寿夫人）

去年会祝夫人寿。今岁也又还依旧。鬓绿与颜朱。神仙想不如。

骨相真难老。疑是居蓬岛。那更舞霓裳。笙歌溢画堂。

萧仲昺

沁园春（庆宁乡令）

笑问鸥盟，所不同心，有如大江。念渊明漫仕，虽轻斗粟，弦歌有得，难慕柴桑。相业流芳，元枢新躅，拈作先生一瓣香。长生酒，仗西风桂子，吹到河阳。

湘江。笑绾铜章。便好筑绵州六一堂。看千年辽鹤，重归故，一船明月，又上潇湘。橐紫翻荷，官黄书诏，不待阴成蔽芾棠。中书考，更侯封鄴国，汤沐宁乡。

熊德修

洞仙歌（庆县宰）

洪崖仙裔，接武浮丘袂。佩玉长裾下尘世。东寻山水，独抱一琴来锦里。不犯人间宫祉。

城山堂宇静，百丈楼高，湖海元龙浩然气。初度启初筵，昼永堂垂，笙鹤铿、轰出云际。问雅乐、何时献三雍，待汉殿明年，日长风细。

范 飞

满江红（寿东人）

律转黄钟，尧蓂尚、零星一叶。人尽道、当年此日，诞生豪杰。我是君家门下士，三年屡献阳春雪。更此行、骑鹤上扬州，恩稠叠。君有子，文章伯。君有女，夸才色。更风流酝藉，东床佳客。婿祝长生儿祝寿，玉杯举罢金杯接。愿年年、长醉腊前梅，梅梢月。

程和仲

沁园春（寿竹林亭长）

呼伯雅来，满进松精，致寿于公。况富矣锦囊，吟边得句，森然武库，书里称雄。亭长新封，亩宫雅趣，一笑侯王名位穹。闲官守，任平章批抹，明月清风。

年年申庆桑蓬。幸至节今截江网重出一首作‘令’晨恰又逢。想霭霭其祥，瑞云阅兆，绵绵之算，线日增红。一段文章，三千功行，名在长生宝篆中。人间窄，待骖鸾驾鹤，上祝融峰。

咏 槐

贺新郎（代寿东屏）

绿长阶萸九。近黄钟、薰晴爱日，渐添宫绣。乾鹊檐头声声喜，催与东屏祝寿。怪一点、星明南斗。玉燕当年储瑞气，记垂弧、共醉蓬莱酒。无杰语，为觴侑。

英风耿耿擎云手。向青春、蟾宫已步，桂香盈袖。却要诗书成麹蘖，酝酿锦心绣口。待匣里、青萍雷吼。今日功名乘机会，笑谈间、首入英雄彀。看父子，继蓝绶。

陈梦协

渡江云（寿妇人集曲名）

瑞云浓，缥缈弦月当庭，天香满院。玉女传言，把真珠帘卷。拥鹄桥仙，引江城子，拟醉蓬莱宴。吹紫玉箫，唱黄金缕，按拍声声慢。

昼锦堂前，倾杯为寿，祝快活年，应天长远。喜似娘儿，解称人心愿。梦兰蕙芳，种宜男草，丹凤吟非晚。更步蟾宫，宴琼林日，汉宫春暖。

静 春

鹧鸪天（子寿母）

柳色青青罩翠烟。花光灼灼映临川。欲知窈窕呈祥日，恰近清明淑景天。

浮瑞霭，庆真仙。不须男女祝椿年。异时早约西王母，剩折蟠桃荐寿筵。

王 绍

菩萨蛮（侄寿伯）

天正朔旦开新历。吾家伯父长生日。兰玉傍庭阶。称觞特地来。

后年逢七十。今岁瞻南极。南极寿星宫。分明矍铄翁。

程节齐

清平乐（寿伯母）

吾家三母。先后相为寿。管领诸郎尽明秀。都是婺女星宿。
花筵今日居先。适逾甲子周天。敬以壮椿为祝，举觞我愿年年。

木兰化（寿丈母）

瑶池开宴后，问甚处、赋蟠桃。有砌底芝兰，涧边苹藻，
淑德方高。闺中秀、林下气，是寻常空委蓬蒿。相映鱼轩黄绶，
行膺鸾锦金罗。

自惭半子误恩多。所祝意如何。愿台星旁映，寿星齐照，
乐自陶陶。芝田阆风何在，但从今、岁岁此高歌。敬上一卮为
寿，神仙九酝香醪。

沁园春（贺新冠）

髡彼两髦，未几见兮，突而弁兮。记昔年犀玉，奇资秀质，

今朝簪佩，丰颊修眉。满面春风，一团和气，发露胸中书与诗。人都羡，是君家驹子，天上麟儿。

画堂人物熙熙。会簪履雍容举庆宜。看筮日礼宾，陈钟列俎，三加致祝，一献成仪。绿鬓貂蝉，朱颜豸角，早有君臣庆会期。荣冠带，看绶悬若若，印佩累累。

水调歌头（括坡诗）

秋色在潇洒，佳气夜充闾。人传好语，君家门左正垂弧。毕万从来有后，释氏果然抱送，丹穴凤生雏。未作汤饼客，先写弄獐书。

参军妇，贤相敌，古来无。钟奇毓秀，应是积善庆之余。想见珠庭玉角，表表出群英物，我已预知渠。他日容相顾，啼看定何如。

沁园春（庆舍第生子）

自古人言，庆在子孙，端有由来。看长庚孕李，昴星佐汉，福从人召，瑞自天开。曾忆当年，用翁熊梦，岂在区区春祀媒。只凭个、仁心积累，厚德栽培。

天工信巧安排。试说与君当一笑哉。记年时此际，嗷嗷万口，俾之粒食，活及婴孩。岁始星周，事还好在，故遣麒麟出此胎。何须问，是兴宗必矣，业广基恢。

沁园春（寿许宰二月初一）

三百篇诗，三十六篇，以祈寿言。惟上天所佑，锡之君子，中心岂弟，盖有仁存。允矣我公，韦平世胄，学问于兹有本原。临民处，看精神秋彻，气宇春温。

由来淑景中分。第一日桑弧挂左门。是赋受不凡，仁而宜寿，笑渠谄子，徒费辞繁。命匪在天，算非由数，我只把公心地论。从今去，管及登槐棘，福仿乾坤。

木兰花慢（八月初四）

西风吹昨梦，直飞上、广寒宫。见绛节霓旌。常娥延伫，玉立双童。殷勤桂枝分付，却为言、当日有仙翁。谪堕人间几载，只今恰挂桑蓬。

佳音未返碧楼空。青鸟耗难参通。闻洞府已成，南州占断，皓月光风。前期十日佳席，倩一言、为写此清衷。三岛十洲佳致，奈何携近尘笼。

水调歌（题角牴人障）

养气兼养勇，岂不丈夫哉。何人刚欲斗力，谩向此间来。莫论施身文绣，看取兼人胆谅，胸次尽嵬嵬。独步登坛后，诸子尽舆台。笑渠侬，身賁育，伎婴孩。虚娇自恃，未识金德木鸡才。始也旁观退听，少则直前交臂，智与力俱摧。世有赏音者，为唱凯歌回。

水调歌（题弩社头筹簇）

都尉部千弩，旧事汉材官。连拳一臂三石，夜半破阴山。
曾使中有扞足，造次摧坚挫锐，分白辱宠涓。省括一机耳，人
未识黄间。

锦为标，虽有戏，技为难。疾飞两箭，兄弟齐夺姓名还。
虎帐有筹第一，龙榜预占双捷，底事足荣观。未数蹶张辈，容
易立朝端。

张仲殊

步蟾宫（妻寿夫）

笙歌喜庆争催晓。篆烟舞、龙鸾缥缈。香罗上、不画寿仙人，
献一段、长生寿草。

一心一意同欢笑。两心事、卒难得了。教传语、天上太白
星，剩借取、几千年好。

吴 氏

好事近（妻寿夫）

腊近渐知春，已有早梅堪折。况是诞辰佳宴，拥笙簧罗列。
玉杯休惜十分斟，金炉更频爇。连理愿同千岁。看蟠桃重
结。

吴编修

贺新凉（自寿）

出处男儿事。甚从前、说著渊明，放高头地。点检柴桑无剩粟，未肯低头为米。算此事、非难非易。三十年间如昨日，秀才瞒、撰到专城贵。饱共暖，已不翅。

旁人问我归耶未。数旂年、平头六十，更须三岁。把似如今高一著，更好闻鸡禁市。总不似、长伸脚睡。六月荷风芡州路，北螺山、别是般滋味。今不去，视江水。

八声甘州（吴编修解任）

系酒船、夜入古江楼，浑莫辨西东。叹从前眼底，一丁不识，四海曾空。老去休休莫莫，谁识旧元龙。尚解被襟去，赋大王雄。

回首演仙高处，问赤松无恙，舍子何从。便不然学稼，犹有相牛翁。小婆娑、东家故舍，也著侬、四下二之中。芡州外，溪风山月，鸥鹭盟同。

摸鱼儿（又）

予何人、此何时节，驾言我欲行志。青原煮豆然萁后，谁
蒙龙蛇赤子。心为碎。宽底是、翻疑又怕严底是。吾方左计。
冷眼别人看，畏首畏尾，身复尚余几。

陶元亮，自古真奇男子。督邮尚若人耳。秋凤一曲柴桑路，
新秫炊香正美。黄鹄起。见说道、山光潭影皆欢喜。晴窗静倚。
还我向来高，仙人羽客，别有一天地。

赵龙图

念奴娇

吾今老矣。好归来、了取青山活计。甲子一周余半纪，谙尽人间物理。婚嫁随缘，田舍粗给，知足生惭愧。心田安逸，自然绰有余地。

还是初度来临，葛巾野服，不减貂蝉贵。门外风波烟浪恶，我已收心无累。弟劝兄酬，儿歌女舞，落得醺醺醉。满堂一笑，大家百二十岁。

竹林亭长

沁园春（自寿）

自笑生身，历事以来，垂六十年。今浮湛闾里，半非识面，交游朋友，各色华颠。富贵不来，少年已去，空见悠悠岁月迁。虽然是，只壮心一点，犹自依然。

新阳又长天边。人指似山间诗酒仙。算胸次崔嵬，不胜百榼，笔端枯槁，难足千篇。隐几杖藜，相耕听诵，聊看诸郎相后先。余何，但读书煮茗，日晏高眠。

杨樵云

满庭芳（影）

只道空烟，又疑流水，依依却是行云。了然相对，又是梦纷纭。半面春风图画，黄金在、难铸昭君。溪桥断，梅花晴雪，端的白三分。真真。难唤醒，三年抽藕，织得榴裙。甚徘徊窥镜，交翼鸾文。一片飞花来去，并刀快、翦取晴纹。无情处，分明著眼，强半带春醺。

水龙吟（梦）

多情不在分明，绣窗日日花阴午。依依云絮，溶溶香雪，飏他寻路。一滴东风，怎生消得，翠苞红栩。被疏钟敲断，流莺唤起，但长记、弓弯舞。

定是相思入骨，到如今、月痕同醉。教人枉了，若还真个，匆匆如此。全未惺松，缣纹生眼，胡床犹据。算从前、总是无凭，待说与、如何寄。

小楼连苑（梅）

一枝斜堕墙腰，向人颤袅如相媚。是谁翦取，断云零玉，轻轻妆缀。不是幽人，如何能到，水边沙际。又匆匆过了，春风半面，尽长把、重门闭。

只管相思成梦，道无情、又关乡意。苍苔半亩，如今已是，鹿胎田地。甚欲追陪，却嫌花下，翠环解语。待何时月转，幽房醉了，不教归去。

刘应雄

木兰花慢（元夕郡侯邀赋）

梅妆堪点额，觉残雪、未全消。忽春递南枝，小窗明透，渐褪寒骄。天公似怜人意，便挽回、和气做元宵。大守公家事了，何妨银烛高烧。

旋开铁锁粲星桥。快灯市、客相邀。且同乐时平，唱弹弦索，对舞纤腰。传柑记陪佳宴，待说来、须更换金貂。只恐出关人早，鸡鸣又报趣朝。

曾 隶

锁窗寒（帘下）

绣额云横，银钩月小，绿杨庭院。疏明满幅，永画未忺高卷。爱空纹、巧匀曲波，弄晴日色花阴转。任筛金影碎，轻敲檐玉，碍双飞燕。

凝见。窗留篆影，六曲雕阑，翠深绛浅。香风暗度，不隔娇松莺啭。似无情、重雾下垂，嫩桃想像添笑脸。望瑶阶、窄地双鸳，注盼金莲远。

黄水村

解边环（春梦）

凤楼倚倦。正海棠睡足，锦香衾软。似不似、雾阁云窗，拥绝妙灵君，霎时曾见。屏里吴山，又依约、兽环半掩。到教人觑了，非假非真，一种春怨。

游丝落花满院。料当时、错怪杏梁归燕。记得栩栩多情，似蝴蝶飞来，扑翻轻扇。偷眼帘帷，早不见、画眉人面。但凝红生半脸，枕痕一线。

姜个翁

霓裳中序第一（春晚旅寓）

园林罢组织。树树东风翠云滴。草满旧家行迹。是鼓舞得声声，晓莺如觅。愁红半湿。煞憔悴、墙根堪惜。可念我，飘零如此，一地送岑寂。

龟石。当年第一。也似老、人间风日。余葩选甚颜色。羞捻江南，断肠词笔。留春浑未得。翻些入、啼鹃夜泣。清江晚，绿杨归思，隔岸数峰出。

彭芳远

满江红（风前断笛平韵）

愁满关山，又吹得、芦花雪深。西楼外、天低水涌，龙挟秋吟。回首人间无此曲，数峰江上落余音。似断云、飞絮两悠悠，何处寻。

江南路，晴又阴，声韵改，泪盈襟。自中郎去后，羽泛商沈。牛背斜阳添别恨，鸾胶秋月续琴心。待醉骑、黄鹤度苍寒，霜满林。

戴山隐

满江红（风前断笛）

醉倚江楼，长空外、行云遥驻。甚凄凉孤吹，含商引羽。薄夜冷侵沙浦雁，老龙吟彻寒潭雨。暮凉飏、一阵卷潮来，惊飞去。

重欲听，知何处。谁为我，胡床据。谩寻寻觅觅，凝情如许。旧日山阳空有恨，杏花明月今谁赋。恐凭阑、人有爱梅心，空愁伫。

李裕翁

摸鱼儿（春光）

计江南、许多风景，繁华只在晴昼。些儿淡沲花著柳。疏雨。更艳艳绵绵，泼眼浓如酒。飞浮宇宙。但借日浮香，随烟著物，巧笔画难就。

惆怅处，曾记苏堤携手。十年惊觉回首。苍埃霁景成阴晦，湖水湖烟依旧。凝望久。问燕燕莺莺，识此年花否。长门别有。脉脉断肠人，柔情荡漾，长是为伊瘦。

龙端是

忆旧游（题南楼）

问南楼月色，十载相疏，何似今宵。旧雨菰蒲国，想波光雁影，远撼沅潇。拟苏堤上柳，烟碧为谁摇。叹庾扇尘深，胡床梦浅，翠减香销。

迢迢。谩回首，记酹酒江山，曾共金镳。暮色沈西垒，几狂朋来往，舟叶招招。浩歌拍手归去，风月两长桥。算此会何时，刘郎去后多嫩桃。

萧东父

齐天乐

扇鸾收影惊秋晚，梧桐又供疏雨。翠箔凉多，绣囊香减，陡觉簟冰如许。温存谁与。更禁得荒苔，露蛩相诉。恨结愁萦，风刀难翦几千缕。

闲思前事易远，怅旧欢无据，月堕湘浦。软玉分裯，腻云侵枕，犹忆喷兰低语。如今最苦。甚怕见灯昏，梦游间阻。怨杀娇痴，绿窗还嚏否。

王从叔

昭君怨

门外春风几度。马上行人何处。休更卷朱帘。草连天。
立尽海棠花月。飞到茶臼香雪。莫怪梦难成。梦无凭。

阮郎归

风中柳絮水中萍。聚散两无情。斜阳路上短长亭。今朝第
几程。

何限事，可怜生。能消几度春。别时言语总伤心。何曾一
字真。

南柯子（苦雨）

碧树留云湿，青山似笠低。鹧鸪啼罢竹难啼。不晓天天何
意、要梅肥。

昨日穿新葛，今朝御夹衣，思家怀抱政难为。只恐归来憔

悴、却羞归。

浣溪沙（梅）

水月精神玉雪胎。乾坤清气化生来。断桥流水领春回。
昨夜醉眠苔上石，天香冉冉下瑶台。起来窗外见花开。

秋蕊香（用清真韵）

薄薄罗衣乍暖，红入酒痕潮面。絮花舞倦带娇眼。昨夜平
堤水浅。

故人信断风筝线。误归燕。梦魂不怕山路远。无奈棋声隔
院。

吴元可

凤凰台上忆吹箫（秋意）

更不成愁，何曾是醉，豆花雨后轻阴。似此心情自可，多了闲吟。秋在西楼西畔，秋较浅、不似情深。

夜来月，为谁瘦小，尘镜羞临。

弹箏，旧家伴侣，记雁啼秋水，下指成音。听未稳、当时自误，又况如今。那是柔肠易断，人间事、独此难禁。雕笼近，数声别似春禽。

扬州慢（初秋）

露叶犹青，岩药迟动，幽幽未似秋阴。似梅风带溽，吹度长林。记当日、西廊共月，小屏轻扇，人语凉深。对清觞，醉笑醒颦，何似如今。

临高欲赋，甚年来、渐减狂心。为谁倚多才，难凭易感，早付销沈。解事张郎风致，鲈鱼好、归听吴音。又夜阑闻笛，故人忽到幽襟。

采桑子（春夜）

江南二月春深浅，芳草青时，燕子来迟。翦翦轻寒不满衣。
清宵欲寐还无寐，顾影颦眉。整带心思。一样东风两样吹。

浪淘沙

浅约未曾来。一迳苍苔。绀桃无数棘花开。怪得闭门机杼
静，挑菜初回。

幽树鸟声催。欲去徘徊。别久易相猜。幽绪一晴无处
著，戏打青梅。

李太古

永遇乐

玉砌标鲜，雪园风致，似曾相识。蝉锦霞香，乌丝云湿，吹渴蟾蜍滴。青青白白，关关滑滑，寒损珠衣狂客。尽声声、不如归去，归也怎生归得。

含桃红小，香芹翠软，惆怅宜城山色。百折浮岚，几湾流水，那一些儿直。落花情味，露花魂梦，蒲花消息。抚纤眉，织乌西下，为君凝碧。

恋绣衾

橘花风信满院香。摘青梅、犹自怕尝。向绿密、红疏处，喜相逢、飞下一双。

堪怜堪惜还堪爱，唤青衣、推上绣窗。暗记得、凭肩语，对菱花、啼损晚妆。

南歌子

月下秦淮海，花前晏小山。二仙仙去几时还。留得月魂花魄、在人间。河汉流旌节，天风裊佩环。满空香雾湿云鬟。何处一声横笛、杏花寒。

虞美人

西风海色秋无际。双泪如铅水。白羊成队梦初平。挂杖敲云、云处晓鸿惊。

小琼闲抱银筝笑。问有芳卿否。玉书分付莫开封。明日人间临水、拾流红。

卜算子（梦中作）

尽道是伤春，不似悲秋怨。门外分明见远山，人不见，空肠断。

朝来一霎晴，薄暮西风远。却忆黄花小雨声，误落下、三四点。

黄子行

西湖月（自度商调）

湖光冷浸玻璃，荡一饷薰风，小舟如叶。藕花十丈，云梳雾洗，翠娇红怯。壶觞围坐处，正酒醪吹波红映颊。尚记得、玉臂生凉，不放汗香轻浹。

滯人小摘墙榴，为碎掐猩红，细认裙褶。旧游如梦，新愁似织，泪珠盈睫。秋娘风味在，怎得对银缸生笑靥。消瘦沈约诗腰，仿佛堪捻。

西湖月（探梅）

初弦月挂林梢，又一番西园，探梅消息。粉墙朱户，苔枝露蕊，淡匀轻饰。玉儿应有恨，为怅望东昏相记忆。便解佩、飞入云阶，长伴此花倾国。

诗腰瘦损刘郎，记立马攀条，倚阑横笛。少年风味，拈花弄蕊，爱香怜色。扬州何逊在，试点染吟笺留醉墨。谩赢得、疏影寒窗，夜深孤寂。

贺新郎（冰簟）

开遍寒梅萼。正东皇、排酥砌玉，幻成楼阁。十万琼裾仙女队，来趁春光游乐。向醉里、玉簪轻落。零乱不知何处去，甚人间、一夜东风恶。吹起在，画檐角。

参差向晓森如削。似吴姬、妆残粉指，向人垂著。好似西园笋瘦，红锦裯儿乍剥。且莫遣、儿童敲却。拟办羔儿香瓮酒，唤刘叉、来醉尊前约。吟好句，再描摸。

满江红

（归自湖南题富春馆）

津鼓匆匆，犹记得、故人相送。春江上、鸟啼花影，马嘶香鞚。情逐阳关金缕断，泪和杨柳春丝重。算别来、几度月明时，相思梦。

山万叠，愁眉耸。春一点，归心动。问风俦月侣，有谁游从。百里家山明日到，一尊芳酒今宵共。任楼头、吹尽五更风，梅花弄。

花心动（落梅）

谁倚青楼，把谪仙长笛，数声吹裂。一片乍零，千点还飞，正是雨晴时节。水晶帘外东风起，卷不尽、满庭香雪。画阑小，斜铺乱贴，翠苔成缬。

袅袅余香未歇。空怅望音尘，两眉愁切。翠袖泪干，粉额
妆寒，此恨有谁同说。江南春信无痕迹，余情在、冷烟残月。
梦魂远，兰灯伴人易灭。

小重山

一点斜阳红欲滴。白鸥飞不尽，楚天碧。渔歌声断晚风急。
搅芦花，飞雪满林湿。

孤馆百尤集。家山千里远，梦难觅。江湖风月好休拾。故
溪云，深处著蓑笠。

龙紫蓬

齐天乐（题滕王阁）

雨帘云栋重寻处，青红半空飞去。槛影侵鸥，檐光送雁，摇荡秋容千里。歌珠舞翠。怎禁得无情，一江流水。可是西山，半眉新绿向人颦。

千年留下胜赏，尽登临无限，须付才思。坏堞闲愁，危檣往恨，欲拍阑干无路。新碑旧记。更今古匆匆，一番兴废。立尽斜阳，共谁评半语。

萧允之

渡江云（春感用清真韵）

蔷薇开欲谢，峭寒渐少，轩槛俯晴沙。先来愁未了，又听一声，新阁落渔家。徘徊伫立，似玉笛、三弄昭华。春昼长、暗怀谁写，戏墨乱翻鸦。吁嗟。诗情犹念隼，酒兴偏豪，记南楼月下。曾共乐、沈烟绮席，烛影窗纱。农香秀色知何处，甚忘却、堤柳汀葭。空惆怅，无人共采苹花。

满江红（雨中有怀）

冷逼疏帘，浑不似、今春寂寞。风雨横，赏心欢事，总如云薄。柳眼花须空点缀，莺情蝶思应萧索。但绕庭、流水碧潺潺，车音邈。

怀往事，孤素约。酒未饮，愁先觉。甚中年滋味，共谁商略。芳草易添闲客恨，垂杨难系行人脚。谩几回、吟遍夕阳红，阑干角。

琐窗寒

细雨收尘，轻寒弄日，柳丝掠道。桃边杏处，犹记玉骢曾到。对东风、回首旧游，香销艳歇无音耗。怅佳人、有约难来，绿遍满庭芳草。

愁抱。沈吟久，翠珥金钿，为何人好。回文细字，尘暗当年纤缟。倚阑干、斜阳又西，欢期易失春易老。待何时、再觅珍丛，共把清尊倒。

蝶恋花

十幅归帆风力满。记得来时，买酒朱桥畔。远树平芜空目断。乱山惟见斜阳半。

谁把新声翻玉管。吹过沧洲，多少伤春怨。已是客怀如絮乱。画楼人更回头看。

虞美人

朱楼曾记回娇盼。满坐春风转。红潮生面酒微醺。一曲清歌留住、半窗云。

大都咫尺无消息。望断青鸾翼。夜长香短烛花红。多少思量只在、雨声中。

点绛唇（记梦）

花径相逢，眼期心诺情如昨。怕人疑著。佯弄秋千索。
知有而今，何似留初莫。愁难托。雨铃风铎。梦断灯花落。

段宏章

洞仙歌（茶口）

一庭晴雪，了东风孤注。睡起浓香占窗户。对翠蛟盘雨，白凤迎风，知谁见、愁与飞红流处。

想飞琼弄玉，共驾苍烟，欲向人间挽春住。清泪满檀心，如此江山，都付与、斜阳杜宇。是曾约梅花带春来，又自共梨花，送春归去。

刘贵翁

满庭芳（萍）

宫鸟西飞，杨花北去，春风飘向伊谁。盈盈小小，轻薄不堪肥。天付风流到骨，消不尽、流落青池。谁知道，踏歌朝暮，痴绝待渠归。

恹恹，春似酒，日痕生绀，裙色明漪。笑东家西沼，到处依依。同是东风种得，独无据，飘泊年时。青梅落，水光帘影，小翠立横枝。

黄霁宇

水龙吟（青丝木香）

丽华一握青丝，金珠粟粟香环里，春窥绮阁，新妆风舞，铢衣如碎。翠凤苍虬，骑来下界，蝶惊蜂避。甚三生富贵，垂垂晓露，犹凝满身珠翠。

谁共那人结发，问何时、蹇修为理。对化一笑，香茸易翦，碎金难缀。半点芳心，乱愁如织，缕丝传意。倩东皇、拂拭新条，更与作、来生计。

刘天迪

齐天乐

（严县尹度上和李观我韵）

瑞麟香软飞瑶席，吟仙笑陪欢宴。桐影吹香，梅阴弄碧，一味微凉堪荐。停杯缓劝。记罗帕求诗，琵琶遮面。十载扬州，梦回前事楚云远。

人生总是逆旅，但相逢一笑，如此何限。采石宫袍，沈香醉笔，何似轻衫小扇。流年暗换。甚新雨情怀，故园心眼。明日西江，斜阳帆影转。

一萼红（夜闻南妇哭北夫）

拥孤衾，正朔风凄紧，毡帐夜生寒。春梦无凭，秋期又误，迢递烟水云山。断肠处、黄茅瘴雨，恨骢马、憔悴只空还。揉翠盟孤，啼红怨切，暗老朱颜。

堪叹扬州十里，甚倡条冶叶，不省春残。蔡琰悲笳，昭君怨曲，何预当日悲欢。谩赢得、西邻倦客，空惆怅、今古上眉端。梦破梅花，角声又报春阑。

虞美人（春残念远）

子规解劝春归去。春亦无心住。江南风景正堪怜。到得而今不去、待何年。

无端往事萦心曲。两鬓先惊绿。蔷薇发望春归。谢了蔷薇、又见楝花飞。

蝶恋花

日暮杨花飞乱雪。宝镜慵拈，强整双鸳结。烧罢夜香愁万叠。穿暗避阶前月。

凤尾罗衾寒尚怯，却悔当时，容易成分别。闷对枕鸾谁共说。柔情一点蔷薇血。

凤栖梧（舞酒妓）

一翦晴波娇欲溜。绿怨红愁，长为春风瘦。舞罢金杯眉黛皱。背人倦倚晴窗绣。

脸晕潮生微带酒。催唱新词，不应频摇手。闲把琵琶调未就。羞郎却又垂红袖。

点绛唇（书事）

一笑相逢，依稀似是桃根旧。娇波频溜。悄可灵犀透。
扶过危桥，轻引纤纤手。频回首。何时还又。微月黄昏后。

张半湖

满江红（夏）

新绿池塘，一两点、荷花微雨。人正静，桐阴竹影，半侵庭户。欹枕未圆蝴蝶梦，隔窗时听幽禽语。卷沙帏、随意理琴丝，黄金缕。

蛟绡扇，轻轻举。龙涎饼，微微炷。向水晶宫里，坐消襟暑。剥啄谁敲棋子响，莺儿林里惊飞去。最好是、活水沦新茶，醒春醑。

扫花游

柳丝曳绿，正豆雨初晴，水天朱夏。石榴绽也。看猩红万点，倚亭欹榭。锁闷深中，料想酒阑歌罢。日将下。是那处藕花，香胜沈麝。

窗外风竹打。似破戛玉敲金，送声潇洒。共观古画。唤石鼎烹茶，细商幽话。宝鸭烟消，天外新蟾低挂。凉无价。又丁东、数声檐马。

刘景翔

念奴娇（瑞香）

甚情幻化，似流酥围暖，酣春娇寐。不数锦篝烘古篆，沁入屏山沈水。笑吐丁香，紫绡衬粉，房列还同蒂。翠球移影，媚人清晓风细。依约玉骨盈盈，小春暖逗，开到灯宵际。疑是九华仙梦冷，误落人间游戏。比雪情多，评梅香浅。三白还堪瑞。尘缘洗尽，醒来还又匆翠。

小重山（枕屏风）

山翠晴岚曲曲偎。红香浮玉醉窝颓。不烦人筑避风台。潇湘路，随意自徘徊。

春倦怕频催。琵琶私语近、问谁来。春风那隔锦云堆。梦中蝶，飞去又飞来。

玉楼春（落花）

可怜又误江南景。雨腻风喧愁入暝。依稀碧玉水边魂，憔悴绿珠楼外影。

点点随人习远近。薄幸相逢情怎忍。年年三月化香尘，天上人间看梦醒。

如梦令

独立荷汀烟渚。一霎锦云香雨。似为我无情，惊起鸳鸯飞去。飞去。飞去。却在绿杨深处。

周伯阳

摸鱼儿（次韵送别）

又匆匆、月鞭露镫，梅花江上归路。海图破碎来时线，何以彩衣低舞。风雪暮。正望断青山，一发云横处。浩歌独举。便想见迎门，牵衣儿女，总是旧眉妩。

阳关曲，挥洒紫薇花露。妙音清远高古。经寒杨柳休轻折，摇动一溪霜雾。甘郸步。笑布袜青鞋，去住知何许。汀鸥少鹭。若问我重来，明年有约，今日是前度。

春从天上来（武昌秋夜）

浩荡青冥。正凉露如洗，万里虚明。鼓角悲健，秋入重城。仿佛石上三生。指蓬莱路，渺何许、月冷风清。倚南楼、一声长笛，几点残星。西风旧年有约，听候蛩语夜，客里心惊。红树山深，翠苔门掩，想见露草疏萤。便乘风归去，阑干外、河汉西倾。笑淹留，划然孤啸，云白天青。

尹公远

尉迟杯（题卢石溪响碧琴所）

冰弦语。在竹树、院落深深处。当年野草闲花，何许浮云飞絮。征鸿止止，纵汗漫、游人远回顾。迟琼楼、五色帘开，唤醒玄鹤飞舞。

何事梦断湖山，尚九里松声，八月潮怒。三十年余池台泪，应不为、花奴羯鼓。想天上，群仙老矣，其比似，人间更愁苦。倩画阑、留住西风，莫教愁入云去。溪翁琴皆浙音，故云。

齐天乐（赠卢天隐）

江湖千里秋风客，翩然白云黄鹄。石鼎烟霏，篆书红湿，随处菊香泉绿。幅巾野服。尽扫叶开门，抱琴听瀑。何事蓬壶，归来犹待海涛陆。

卢鸿旧时隐处，想斜阳草树，水榭云屋。尘尾玄玄，笔花语语，剪尽雨窗残烛。黄庭误读。且东老留诗，采和歌曲。后日重寻，洞天三十六。

李天骥

摸鱼儿（灯花）

又何须、向明还灭，寒花点缀孤影。玉龙度海吹鱼浪，烟淡宝钗横鬓。斜又整。是虫滴骊珠、两两相交颈。夜长人静。凭玉果低抛，金钱暗卜，此意有谁领。

欢娱事，料想凭伊先应。帕绡新泪犹凝。银篦未忍轻挑下，只恐暗风吹烬。重记省。怕莫是、明朝有个青鸾信。怎知无定。算只解窥人，人孤影只，成瘦又成病。

刘应几

忆旧游（闻雁）

记铜驼载酒，翠陌吹箫，曾听相呼。不尽离离意，觉柔肠如剪，立马踟蹰。人生似此苍鬓，禁得几声疏。想怨入秋深，愁随天远，满目平芜。

音书未曾寄，正人在燕台，忘却回车。奈菰蒲旧地，山空木落，霜老泉枯。月明仙掌何处，转首失栖乌。待说与云间，潇湘近日风卷湖。

周孚先

木兰花慢（富州道中）

访梅江路远，喜春在、剑川湄。正雁碛云深，渔村笛晚，茸帽斜欹。旧游不堪回首，更文园、多病减腰围。惟有秋娘声价，风流仍似前时。

依稀壁粉旧曾题。烟草半凄迷。叹单父台荒，黄公垆寂，难觅佳期。谁家歌楼催雪，遣夜来、风雨紧些儿。醉后唾壶高敲缺，龙光摇动晴漪。

鹧鸪天（禁酒）

曾唱阳关送客时，临岐借酒话分离。如今酒被多情苦，却唱阳关去别伊。

欢会远，渺难期。黄垆门掩昼阴迟。青楼更有痴儿女，谩忆胡姬捧劝词。

蝶恋花

舟舫津亭何处树。晓起珑璁，回首迷烟雾。江上离人来又去。飘零只似风前絮。

倦倚蓬窗谁共语。野草闲花。一一伤情绪。明日重来须记取。绿杨门巷深深处。

彭泰翁

念奴娇（秋日牡丹）

九华惊觉，又偷承雨露，羞匀春色。岸蓼汀苹成色界，未必天香人识。粉浣脂凝，霜销雾薄，娇颤浑无力。黄昏月掩，山城那更闻笛。

应是未了尘缘，重来迟暮，草草西风客。莺燕无情庭院悄，愁满阑干苔积。宫锦尊前，霓裳月下，梦亦无消息。嫣然一笑，江南如此风日。

忆旧游（雨中海棠）

玉环扶浅醉，翠袖笼寒，香汗初融。昨夜残妆在，最难胜珠络，都沁铅红。朝云低护深约，蜂蝶不知踪。奈燕子情多，斜飞轻触，泪洒羞容。重逢。记前度，解翦烛调笙，踏月鸣骢。风入人间远，待尘缘洗尽，飞佩凌空。丁宁为我留住，携酒寿东风。便花谱重修，高堂再赋疑梦中。

拜星月慢（祠壁宫姬控弦可念）

雾罥觚棱，尘侵团扇，恨满哀弹倦理。控雨笼云，共闲情孤倚。敛娥黛、怕似流莺历历，惹得玉锁琼碎。可惜阑干，但苔花沈穗。

算天音、不入人间耳。何人谩、裛损青衫泪。不是旧谱都忘，厌新腔娇脆。多生不得丹青意，重来又、花锁长门闭。到夜永、笙鹤归时，月明天似水。

曾允元

水龙吟（春梦）

日高深院无人，杨花扑帐春云暖。回文未就，停针不语，绣床倚遍。翠被笼香，绿鬟坠腻，伤春成怨。尽云山烟水，柔情一缕，又暗逐、金鞍远。鸾佩相逢甚处，似当年、刘郎仙苑。凭肩后约，画眉新巧，从来未惯。枕落钗声，帘开燕语，风流云散。甚依稀难记，人间天上，有缘重见。

月下笛（次韵）

又老杨花，浮萍点点，一溪春色。闲寻旧迹。认溪头、浣纱碛。柔条折尽成轻别，向空外、瑶簪一掷。算无情更苦，莺巢暗叶，啼破幽寂。

凝立。阑干侧。记露饮东园，联镳西陌。容锁鬓减，相逢应自难识。东风吹得愁似海，谩点染、空阶自碧。独归晚，解说心中事，月下短笛。

齐天乐（次韵赵芳谷曲，有香玉之怨）

碧梧枝上占秋信，微闻雨声还愜。虹影分晴，云光透晚，残日依依团箑。阑干一霎。又长笛归舟，乱鸦荒堞。两鬓西风，有人心事到红叶。

娇莲相对欲语，奈莲茎有刺，愁不成折。天上欢期，人间巧意，今夜明河如雪。新宽带结。想宝篆频温，翠奁低揭。雾湿云鬟，浅妆深拜月。

点绛唇

一夜东风，枕边吹散愁多少。数声啼鸟。梦转纱窗晓。
来是春初，去是春将老。长亭道。一般芳草。只有归时好。

朱元夫

沁园春（从叟还亲）

心上浮香，轩前度影，约久传梅。奈月意风情，枝南枝北，云婚雨嫁，年去年来。几望溪桥，屡肥芳信，历尽冰霜春自回。朝来报，报梢头儿女，并蒂花开。

佩环飞下妆台。喜今度佳期不用催。羡行李三千，金屏翠幄，仙姿第一，玉骨琼腮。雌蝶纷纷，雄蜂逐逐，争道工为使与媒。翁知么，有西楼过雁，暗为徘徊。

壶中天

（寿贺晓山五下九岁，四月十二日生，先年有横讼）

人生有酒，得闲处、便合开怀随意。况对寿、龟仙鹤舞，犹直壶天一醉。蚕麦江村，梅霖院落，立夏明朝是。樽前回首，去年四月十二。

依旧洛里吟窝，华台书隐，心事无怀氏。偃鼠醢鸡空扰扰，海月天风谁寄。珠璧祯祥，斗牛光景，预可占斯世。先生出否，明年方六十岁。

邵桂子

沁园春（李娶塘东曾）

知是今年，一冬较暖，开遍梅花。有一朵妖娆，塘之东畔，东君爱惜，云幕低遮。小萼微红，香腮传粉，把寿阳妆取自夸。谁知道，忽移来秀水，深处人家。

清香扑透窗纱。渐仙李农华无等差。这冰姿一样，玉颜双好，月明静夜，疏影横斜。传语曹林，须将止渴，结子今番早早些。梅自笑，嗔贺新郎曲，待拍红牙。

贺新郎（文总管之清江任）

新雨黄花路。看清江、旌旗千骑，使君东去。万里归来城头角，吹彻家山旧处。惜洲鹭、留君不驻。白发遗民壶觞语，笑浣花邻里来。夸见早，恨来暮。

故人只在山中住。记年时、肠断相望，天风海雨。满鬓星星华发少，君鬓尚今青否。休夸说、神仙官府。玉筍平生清入梦，会有时、乘兴携吾侣。不君醉，为君舞。

满江红（税官之扬州任）

离却京华，到这里、二千八百。穷醋大、齐齐整整，岂无贷揭。随地平章花与柳，为天评品风和月。只留得、一管钝毛锥，一丸墨。

初不是，丝绵帛。又不是，茶盐铁。更有苏州破砚，兔园旧册。一领征衣半尘土，两头翦笠几风雪。问栏头、直得几多钱，从头说。

百字令（韩知事美任）

三年幕画，是小试相业，桐阴个谱。协赞拥容心似佛，春在螺山螺浦。白玉无瑕，黄扉倚重，一府中流柱。萧然锦满，扁舟明日归去。

此去南北才名，看青云稳驾，玉阶徐步。共说荆州老长史，宰相须还他做。沙路星明，甘棠人远，无计攀辕住。薰香三祝，苍生正望霖雨。

彭子翔

贺新郎（童养合卺）

一点阳春小。傍妆台、梅梢粉嫩，桃花红透。合卺尊前人笑语，银烛两行红补。云正暖、流苏香兽。金屋阿娇元共贮，待玄霜、杵就方成偶。

西园扑蝶春风早。看浮花、浪蕊飞尽，娟娟闺秀。柳带草蒲堪绾结，只绾同心未就。算今夜、心都同了。待阙鸳鸯情似海，锦衾温、说到鸡声晓。头白也，镇相守。

木兰花慢（贺第二娶）

仙家春不老，谁说到、牡丹休。算蛮柳樊樱，怎生了得，白传风流。枝头。标梅实好，奈绿阴、庭户不禁愁。幸有琴中凤语，能通镜里鸾求。锵璫。杂佩下瀛洲。宝箧紫烟浮。望兰情红盼，三生曾识，一风如羞。绸缪。从今偕老，似柳郎、无负碧云秋。莫倚回文妙手，放教远觅封侯。昔柳毅为牧羊女传书，碧动杯酒，意即相属。后三娶崔氏，乃牧羊女化身也。

千秋岁（寿圆北山六十）

重阳来未。谁领黄花意。斟玉醑，歌金缕。云山笼瑞彩，风月熔清气。北山顶，寿星一点光无际。

六十今朝是。甲子从头起。堂堂去，千千岁。是非华表鹤，深浅蓬莱水。翁不管，年年先共黄花醉。

声声慢（寿六十一）

萸房初荐，橙子新搓。菊松图下捧金荷。看翁将息，后生似、去年些。更眼前、稚子又多。

鬓绿颜酡。对花醉、把花歌。熙宁安乐好行窝。佳辰虽异，翁此兴、不输他。更如何、欢喜也呵。|<熙宁四年邵尧夫欢喜吟云：‘行年六十二，箸骸未甚老。’>|

临江仙（寿六十二）

佛说波斯王此岁，衰颜羞见河流此首楞严。翁今丹脸发光浮。毗卢金色界，烂熳菊花秋。

七个明朝方九日，年年税在今朝。八千秋老又从头的。明朝无尽在，蝴蝶不须愁。

暗香

（寿停云翁七十。其年，云山风有亭火后重建）

停云望极。问秀溪何似，英溪风月。劫火灰飞，又见雕檐照寒碧。何事归来归去，似熙载、江南江北。还又向、殊乡初度。故乡人，却为客。是则。家咫尺。不是有、莼羹鲈鱸堪忆。从心时节。消得山阴几双屐。莫把放翁笑我，又似忆、平泉花石。篱菊老，梅枝亚，不归怎得。|<山阴屐，忆平泉，皆放翁七十诗>|

百 兰

醉蓬莱

怪柳吟翻雪，梅笑冲寒，郁匆如彩。还是瑶池，宴神仙俦侣。罗幕轻掀，绣帘低揭，按霓裳宫羽。宝炷熏浓，佩环声颤，凤飞鸾舞。

犹记年时，玉箫吹彻，并驾萧郎，共骖羸女。旋捧麒麟，种旧家前武。政了摘星天上，早约个、嫦娥住。妆点华堂，双扶醉玉，黑颠如许。

满庭芳（贺晚生子）

有分非难，是缘终合，采来还换须臾。少年培植，春意已敷腴。毕竟花多驻果，坚牢是、蚌老生珠。君知否，今番定也，颠不破翻瓊。

遥知纷瑞霭，十分郎罢，黄溢眉须。便何妨燕喜，剩买欢娱。况侍北堂难老，庭阶映、玉树森如。金荷劝，从教酩酊，扶醉看孙株。

雨中花（贺欧文建楼与桥）

钉斗云山，挨排烟水，六丁午夜文移。道滁孙子，欲寄游嬉。高趁鹭霞舒啸，低群鸥鹭忘机。牢笼两下，楼乘汗漫，桥枕清漪。

灞陵吟畅，岳阳登览，百色都副襟期。还好是、行天马渡，深月人归。倚柱荷香扑面，凭栏桂影侵衣。索梅无便，春风不碍，容我追随。

丁持正

碧桃春

几年辛苦捣元霜。一朝琼粉香。云英缥缈曳仙裳。相将骑凤凰。

銓帝乐，酌天浆。千年颜色芳，从兹归去白云乡。碧桃春昼长。

李石才

一箩金

武陵春色浓如酒。游冶才郎，初试花间手。绛蜡烛残人静后。眉峰便作伤春皱。

一霎风狂和雨骤。柳嫩花柔，浑不禁僝僽。明日余香知在否。粉罗犹有残红透。

魏顺之

水调歌头

人世斗南瑞，天上璧东星。谁分佳种，钟作间世玉麒麟。
本是南阳相种，来应瑞龙间气，试听即英声。若问贤相敌，君
去问参军。质金浑，标玉立，气冰清。梅花时候，结子便可鼎
调金。人谓丹山苞凤，天产渥洼骏骨，德毓窦家椿。来作汤饼
客，何幸厕嘉宾。

伍梅城

贺新郎（贺李簿生孙）

甲子头春雨。知老天、净洗荆扬，十年烟雾。夜半堕中星一颗，飞下五云深处。帝亲敕六丁呵护。须信斯人为世瑞，非人龙、定是文中虎。斗世道，系天数。

此儿殊怕人惊顾。况当家、廷评为祖，大中为父。料想廷评公一笑，笑对大中共语。应自把、小程夸取。会见九州熙白日，做状元、宰相荣门户。年正少，上新具。

贺新郎（贺李廉泉螟兄月岩子为子）

梦到天宫里。见长庚星颗，忽自月边飞至。真奏玉皇金阙道，臣已五年于此五岁。今亦欲、过宫一次。福禄寿星齐赞叹，过宫时、须过廉泉位。帝首肯，从他意。

朝来鹊送檐前喜。闻廉泉、似是紫岩，螟蛉兄子。是子南轩人物样，功业行看相似。岂同祖、同闻而已。细把所闻详所梦，想天文、实应人间事。况真是，长庚李。

最高楼

知君久，勘破得名关。未老得先闲。今年最喜吟身健，生朝更觉酒肠宽。且随家，将秫种，买花看。

门外吏、催科无一迹。窗下客、谈诗常经日。儿玉树，弟金兰号友兰。华堂举案齐眉乐，锦天歌客笑声欢。问何如，福东海，寿南山。

醉蓬莱（寿郁梅野）

倚东风笑问。落红啼鴂，清明来未。小雨弄晴，做轻寒天气，南极光中，五云深处，人庆秋岁。翡翠屏间，琉璃帘下，彩衣明媚。九老风流，五侯家数，如此乾坤，有人如此。天正烦君，作江南一瑞。世上今秦，山中古晋，尽不经吾意。但要牡丹，年年今日，伴人沈醉。

摸鱼儿（送陈太史东归）

极知君、腰骑鹤，此心与水相似。梧桐叶上黄昏雨，恨杀无情流水。滔滔地。今日大江头，明日人千里。君思往事。两袖淮云，一轮明月，要亦寻常耳。

君去也，我亦扁舟东矣。尊前何惜同醉。五年未老君犹健，五十行当富贵。书频寄。报王粲、何时可决荆州计。俱胝一纸。更细算何时，五星同会，天下太平未。

贺新郎（刘快轩新居）

上界神仙府。谁移来、登瀛堂畔，五云深处。江水一弓山万朵，竹外梅花千树。看都入、高人庭户。南北两厅相对起，要门前、便是浮岚路。依暖翠，开吟圃。

莺迁喜奉高堂母。向销金帐下，坐看秦歌赵舞。唐宋几年名阀阅，到此步高一步。君听取，邦人庆语。多少朱门随世化，独眼前、突兀新如许。真个是，擎天柱。

丁几仲

贺新郎（贺人妾生子）

喜溢蟾宫梦。起推衣、平章窠桂，湿鸦飞动。果报佳音传络秀，丹穴雏生彩凤。想孔释、亲来抱送。不羡徐卿秋水澈，试闻声、识破真英种。培杞梓，待时用。

当年绛帐承新宠。问何如归来，碧荷香妾名重。都是刘郎看承处，多少温柔从与怱怱。会起我嘉宾钦竦裴秀母事。左氏公羊，从初所学，看家传、声誉今腾涌。拚醉舞，与谁共。

禅 峰

百字谣（贺彭谦仲八月生子）

中秋近也，正于门瑞气，匆匆时节。隔岁维熊占吉梦，今夕天生英杰。仙籍流芳，瑞龙毓秀，应是非凡骨。诗书勋业，妙龄行见英发。

好是日满三朝，胜陈汤饼，投辖留宾客。玉果犀钱排绮宴，窈窕歌珠舞雪。枕玉凉时，屏山深处，好事权休说。小蛮杨柳，迺来还可攀折。

刘润谷

西江月（贺人女晬）

淑质生当良月，晬辰喜遇今朝。掌心托个儒人苗。早晚夫人争叫。

阿母神仙苗裔，阿爷宰相丰标。阿兄气宇更飘飘。阿弟看看速肖。

游稚仙

浣溪沙（贺人女晬）

晬日先联瑞日红。寿星明照寿筵中。庆门乐事正重重。
明日贾逵添戏彩，异时李汉看乘龙。鱼轩玉轴定荣封。

李团湖

沁园春

六桂传家，三槐植庭，箕裘大儒。甚二郎意气，拟同棱契，一时庆会。致主唐虞。百揆登庸，双亲未老，此乐人间还有无。那堪更、有棣华韡韡，听履亨衢。

朝来天上传呼。便写作、衣冠盛事图。有声容备乐，传宣锡劝，充庭牲饩，簇拥欢娱。整顿乾坤，巩安宗社，亦有臣功如此乎。中书考，愿年年此日，春满蓬壶。

黄诚之

满江红（寿韩尚书）

五岳三光，钟秀气、笃生人杰。天付与、心肠锦绣，精神冰雪。姓字早登龙虎榜，文书夜直丝纶阁。谢君王、特地掇鸾坡，来闽粤。

几千顷，恩波阔。十万户，欢声浹。看致君尧舜，归班夔契。谈笑扫清沙漠净，弥缝补就苍天缺。愿年年、长醉腊前春，梅梢月。

熊子默

洞仙歌（寿刘帅）

春逢花好，一笑长相见。令似当年徊仙苑。况歌翻桃叶，
香绕莱衣，须信道，人与千秋共远。

不妨留绂节，看即沙堤，玉笋班高侍金辇。问人间、缘底
事，犹欠河清，须妙手、鸿钧一传。待整顿乾坤、却归来，唤
舞鹤翔云，洞天游伴。

陈惟哲

水调歌头（寿曹太守）

近畿贤太守，陆地隐神仙。功高玉记，名通紫府自长年。
拂拭壶中光景，游戏人间风月，富贵本青毡。十载五分牧，惠泽浸江天。
把文章，做勋业，德才全。龟峰堂上，满城和气入歌筵。
春在百花庭院，坐拥十眉珠翠，寿酒吸长川。来岁称觞处，稳向凤池边。

欧阳朝阳

摸鱼儿（寿柴守，八月二十七日生，正是夫子绂麟之日）

正当绂麟时候，秋香还弄清晓。双旌五马人间贵，千里共
腾欢笑。人未老。看绿鬓朱颜，赢得花簪帽。兽炉篆袅。听檀
板轻敲，歌珠一串，依约似蓬岛。

青云步，九万论程未了。芹宫多世仪表。提封晋郡重拈出，
留样他年称好。书上考。怕种满棠阴，丹诏催归早。安期献枣。
对鹤健丹香，龟轻莲叶，起舞醉清醪。

碧 虚

贺新郎（寿毕府判）

袞袞登台阁。问诸公、谁讲谁明，诗书礼乐。前日毕星光焰里，有一濂渠伊洛。被翠玉、江山占却。天下国家多少事，好人才、半刺东南角。当路者，欠商确。

寿杯端拜深深酌。把寻常、祝颂芜词，一时删削。引饮莱公同鼎轴，共定澶渊一著。二百载、无人能学。文简毕公真事业，非先生之托谁之托。龟鹤舞，蛟龙跃。

彭正大

琐寒窗（寿欧阳教授）

千里儒流，称觞此际，梅花三度。书台最上，健羨一翁如许。问吴江、别来旧人，当时折柳凭谁语。但春在芹宫，芳滋兰畹，一帘今雨。

凭阑、凝望处。有绿水青山，乾坤付与。百年家谱，曾是斯文宗主。世间好景相寻，墨客骚人为伴侣。待西风、桂子重开，又步青云去。

叶巽齐

感皇恩（寿王簿）

冬岭秀乔松，江南飞雪。数朵梅花弄春色。玉颜苍鬓，人似松梅标格。岁寒长不老，人奇绝。

簿领余闲，长生有道，福寿从今更千百。孙枝浸盛，万卷家传方册。樽前频醉，此宵风月。

铁笔翁

庆长春（寿戴一轩）

有酒如渑，便开怀痛饮，我歌君拍。世事轮云都莫问，只要颜红鬓黑。鹧燕风清，鸳鸯水暖，打当生申节。薰风来也，几人感戴翁德。

好是驾海胸襟，屠龙手段，一笑乾坤窄。门外尘涛三百尺，不博剡溪一雪。绿幕红围，妙歌细舞，且醉三千客。问翁年纪，广成千有二百。

刘性初

醉蓬莱

喜首夏清和，槐绿成阴，榴红正朵。仙鹤踟蹰，来致千秋贺。南极长明，后天不老，瑞霭浮青琐。满树蟠桃，瑶池捧献，一年一颗。

好敞亭台，胜添花柳，时醉时歌，时行时坐。受用黄庭，宝熟丹田火。晓对青山，日吟白发，尽功名江左。戏彩亭边，陶陶自得，有何不可。

刘学颜

齐天乐（寿刘畊齐）

红冈小塔枫林路，曾见承平歌舞。舞罢人归，月斜影转，重见郎官星度。乡关境土，又二十余年，桑麻深露。说与闾巷，少年知得当时否。

如今苍颜白发，问耕聊尔耳，依稀农圃。父老吾伊，深山鸡黍，谁念乱离父母。村南书午。谩对客烹茶，笑谈今古。千岁迢迢，竹风时扫户。

江史君

好事近（寿六十）

耳顺恰当年，甲子方周五数。绛县老人曾纪，四百四十五。
孙弘博士适遭逢，马援击蛮未遇。五福祝君全备，更尊荣安富。

徐架阁

最高楼（寿七十）

年高德劭，休叹老而传。纵白发，尚红颜。楚丘且谓吾始壮，大致仕亦宜然。更尊荣，安富贵，寿绵延。

闻道生辰当月吉，万福千祥降自天。献春酒，展华筵。从心奚止不逾矩，绛人彭祖信齐肩。更殷勤，加颂祷，等椿年。

立 齐

沁园春（寿白侍从八十）

表表耆英，松柏贞刚，冰霜洁清。正持囊紫禁，急流勇退，步角巾绿野，闲处安身。里社鸡豚，家山猿鹤，物我相忘法从荣。东溪畔，似非熊尚父，在渭之滨。

闲来袖手梅亭。似桃李纷纷谷自春。算高风难进，缙绅楷式，颓波屹立，乡曲仪刑。厚德清名，疏星碧落，屈指如公今几人。无他祝，但似山难老，镇压嚣尘。

黄 革

酹江月（寿太守母八十·正月初一）

堂堂卿月，奉君恩来作，潜藩贤守。喜遇慈闈年八十，特向新下称寿。千里春风，满堂和气，是处歌声奏。荷衣紫绶，捧觞齐上春酒。

人道彭祖高年，寿高八百，管从来稀有。似此遐龄，屈指算、犹有十分之九。惠满梅山，宠新芝检，归展调羹手。疏封国号，天教富贵长久。

陈潜心

百字令（寿虞守·正月十二）

梅峰孕秀，太仙翁、咫尺元宵三夕。盛德温温如玉粹，多少殊勋嘉绩。两拥朱幡，独清节，高谊真难屈。景疏堂下，台星长伴南极。

雅羨椿桂联芳，金章紫绶，拜舞欢声溢。福备宜高仁者寿，喜占人间八十。汉重申公，周登尚父，盛事今犹昔。九重注想，蒲车行聘遗逸。

罗子衍

三登乐（庆黄守·正月廿二）

过了元宵，见七叶蓂又飞。恰今朝、昴宿降瑞。初度果生贤，尽道丰姿绝异。翰林人物，云霄富贵。

自栖鸾展骥。迤逦黄堂，每登要路无留滞。暂归来，访松菊，趣装行用济。增崇福祿，寿延千百岁。

刘公子

虞美人（寿女人·二月十一）

撷先四日花朝节。红紫争罗列。传言玉女降生朝。箕宿光联婺宿、灿云霄。

娉衣红袖齐歌舞。称颂椒觞举。君仙列侍宴瑶池。王母麻如同寿、更无期。

三 槐

百安谣（寿主簿·二月廿一）

武夷秀气，萃君家、春芭融和时节。赏了花朝才六日，曾记挺生英杰。量吸鲸川，志吞牛渚，标格冰壶洁。台星明处，年年辉映南极。

须信早晚横翔，云霄直上，宁久栖鸾棘。富贵荣华年正少，谢砌芝兰秀发。行及瓜期，荣趋花县，百里民怀德。交腾荐剡。褒迁大振勋业。

程东湾

沁园春（二月廿七）

毓德婺虚，联辉魁宿，天启儒英。正仲春蓂阶，三留叶秀，
晓来蓬矢，六挂门荣。星昴庭萧，神嵩降甫，怎似今朝记始生。
当此际，有满城和气，万井欢声。

龚黄政事勋名。镜里文书史胆惊。况百年经界，于今修复，
四贤道学，至此彰明。月封艳阳，日逢初度，紫诏入行催观玉
京。黄堂上、寿觞称处，介福邦民。

张 倅

百字谣（寿叶教·三月初九）

榆烟新起，正清明节过，翠萸九叶。欣会谪仙初度日，凤穴产真鸞鷟。心肠琅琅，文章锦绣，看镜期勋业。暂居马帐，后知有赖先觉。

可想大器晚成，功名有志，未逊苏秦学。奈不在身先在子，果向秋风转鹞。诗酒琴棋，风花雪月，养浩全真乐。寿觞五福，太公须遇文猩。

胡德芳

水调歌（寿黄邦彦·四月初八）

湛湛玉清水，矗矗炼丹山。秀环侯泮，广文分得括苍仙。
虞殿薰风初入。尧陛祥蓂七叶，此际庭真贤。学术瑞王国，声
誉蔼人寰。绿槐宫，丹桂殿，杏花坛。英华粲发，聊将文教布
龙藩。我亦执经北面，喜见发祥南斗，再拜祝长年。丹诏烂鸦
墨，绿发映貂蝉。

赵 宰

声声慢（寿吴宪·四月十三）

洞宾仙客，诞节明朝，方齐自号今日称觴。为月金丹，希年近也康强。平生铁石肺腑，肯依阿、贪恋朝行。芹溪上，把等闲出处，付与沧浪。

花竹午桥匆倩，身退静、功名大耐偏长。济世经纶，暂时收敛何妨。黄扉有分须到，况玉皇、久待平章。康时了，万千年、姓字弥香。

张 宰

满庭芳（寿字守·四月十四）

气吐虹霓，笔飞鸾凤，从来锦绣文章。谪仙才调，复见庆流芳。向自题名雁塔，不十载、德播河阳。慰民望，一麾出守，风月任平章。

清和，时欲半，吕仙庭日，正比相当。欣逢初度旦，敢献椒觞。只恐经纶大手，应休期、便趣曹装。愿箕宿，照临南极，拱北远流光。

梁大年

满江红（寿太守·四月三十）

九十炎光，又过了、三分之一。记当年光际，诞生良弼。崧岳降神钟秀气，孕成间世真英杰。妙文章、拾芥立功名，谁能敌。

周孔业，邹軻质。伊尹志，渊明节。袖经纶妙手，屡投班笔。富贵一朝知己逼，封侯谈笑真堪觅。信功名、管取出长年，看箕翼。

水调歌头（寿隐者·十一月初七）

南极寿星现，佳气蔼庭除。谁为绛人甲子，为我一轩渠。恰喜亥成二首，还庆阳来七日，和气渐舒徐。敬为图南祝，一瓣问兴居。

傲松筠，抚龟鹤，乐蓬壶。斑衣戏舞，春满兰玉正森如。却忆杜陵老子，因羨碧山学士，茅屋换银鱼。何似温柔地，丝竹伴琴书。

鼓 峰

烛影摇红（五月初三）

风入虞弦，麦秋向晚梅天润。彩丝长命斗新奇，还是端阳近。想见瑶池仙韵。对蟠桃、朱颜相映。篆飘宝鼎，酒满霞觞，黄堂深静。

超悟真筌，凤归不作登台恨。庆余有子在河图，详试龚黄政。好是棠阴清永。且游戏、壶中光景。会有飞诏，却奉轻轩，天朝归观。

程霁岩

水龙吟（寿吴尉·七月初一）

夏秋晦朔之间，伊谁为作交承主。颢昂仙伯，挺生此日，宝凉饒暑。绛县才能人，问将甲子，恰今岁岁数。举香山宴会，才先一载，愚深幸、获叨预。

何以寿君初度。愿朱颜、年年如许。棘栖鸾凤，瑞浮鸂鶒，争如燕处。双桂渐香，灵椿好在，福全九五。向画堂深处，不妨重按，旧时歌舞。

满庭芳（寿徐佑卿·七月初五）

一叶鸣秋，五蓂纪瑞，申月还庆生申。巍巍郎宿，辉映寿星明。一段精神玉立，秋潭白、足副徽称。长生箬，只在公丹府，何待祝修龄。

粉垣，才过了，便持荷橐，光近枫宸。况金瓯将启，庆满槐庭。朝旆行行入待，彩衣映、袞冕辉新，从今去，相门出相，未数汉韦平。

翠微翁

水调歌头（贺赵可父·七月初六）

萸英才开六，宝历已当千。人间收尽繁溽，凉意入琴弦。
尽道荐衡交剡，更值生申时节，喜色动闾阎。终夜望银汉，文
宿贯台躔。定燕秦，封晋魏，信当然。处处红莲开幕，曹掾岂
能淹。见说玉堂飞诏，已许金闺通籍，蓬岛伴神仙。来岁寿卮
酒，应醉御炉烟。

菊 翁

朝中措（庆友人·八月十三）

桂花庭院是蓬壶。行地列仙图。月姊搀先两日，捧觞来庆垂弧。埭簾伯仲，翁前再拜，彩袖嬉娱。人羨一经教子，君今满屋皆书。

赵佥判

水龙吟（寿太守·九月初一）

老人星照螺川，丽谯瑞霭笼晴昼。使君初度，满城和气，欢声盈口。篱菊浮金，茱萸泛紫，重阳时候。算年年长是，节前八日，先满 空格据律补、为公寿。

一代文章山斗。拥朱幡、暂劳分守。崇墉万堞，浮梁千丈，此恩难朽。褥袴方谣，丝纶已下，即登班首。看明年今日，开筵凤池，赐黄封酒。

李慧之

沁园春（寿韦轩八十一岁·九月初二）

八九十翁，似婴儿戏，汉司马迁。记渭川垂钓，一年之长，龙山吹帽，七日之前。口角春风，襟期秋月，万事从来只任缘。随渠道，更登天富贵，陆地神仙。

儿孙绿绶青编。看鼓舞云霄高刺天。但阶移花影，闲寻棋局，风斜竹径，缓起茶烟。心迹逾清，精神越健，不用金丹资节宣。洪崖老，笑将眉寿，祝我老人轩。

留晚香

最高楼（寿梅屋儒学谭提举 九月十九）

西江水，分润到全闽。芹藻亦生春。秀钟东壁双躔瑞，祥开南极一星明。把紫阳、年月算，恰同庚。文公庚戌九月十五生。

前十日、重阳秋正好。后十日、小阳春未透。梅与菊，此交承。酌公菊水来称寿，期公梅实去和羹。要教人，看久远，是功名。

杨 守

八声甘州（寿萧帅参·九月廿三）

问梅边消息有还无，似微笑应人。道近来别有，相家一种，叶叶都新。趁得嫩寒轻暖，七日小阳春。一点和羹意，来做生辰。

锦绣香中开国，向绮霞洞里，暂寄闲身。欠朝家多少，未了底经纶。便如何、偷闲去得，也须烦、妙手略调钧。归来也，恨寻棋局，点检园椿。

草夫人

满江红（寿妇人又受命·十月廿七）

清晓新妆，鸾台畔、潜呼小玉。问阿谁庭院，调长生曲。报道隔邻人庆寿，新来荣领金花轴。细推来、阳月已将周，惟三宿。

陈 颂，年多祝。环珠翠，人如簇。奉金杯相庆，满斟醺醑。愿享麻姑难老福，屡餐母蟠桃熟。更儿孙、岁岁莱庭，蓝袍绿。

游 慈

多丽（寿侍郎·十二月初七）

约梅花，年年开向华筵。借清香，飞入寿杯中，永祝英贤。
才履长、便登八帙，那须要、更待来年。和气先春，祥风破腊，
莫开七荚正敷妍。君不见，太公此际，犹欲钓磻川。

争知道、副车已办，西伯来畋。驻不阳、清谈终日，种成
桃李森然。向庭闱、绯衣戏彩，更孙（下缺）

静 山

摸鱼儿（黄时中入郡幕）

晓峰高、飞泉如瀑，潜虬鞭驾轩翥。为他一片韩山石，直到红云天尺五。想应道、公皆安在来何暮。金川小渚。那韶石参天，郡网宜录，为我分南顾。

锦衣画，满袖尚疑香雾。催人富贵如许。岭云见说今如砥，凤挟九成迎舞。烦道甫。问金镜铁胎，还记开元否。封词寄与。但日送河桥，吟消醉拍，载酒满江浒。

水龙吟（送人归江西）

片帆天际归舟，好风动、吹来消息。浪间双将，回头春沙，去来几日。十八滩头，水飞如舞，石才如壁。把连樯白粲，等闲卸却，更呼取、舳舻入。

不羡公家事了，羡二难、一番游历。江花江水，无边风月，不知行役。和郁孤词，倚崆峒剑，唤醒龙蛰。试问君，过我青原，听得几声羌笛。

刘 守

满江红（刘守解任）

归去来兮，要待足、何时是足。荣对辱、饮河鼯鼠，无过满腹。浴月朝霞红赛锦，排云晚岫青如玉。更修筠、与合抱长松，依梅麓。

森画戟，谩符竹。舞袖短，辕驹局。惟茧丝堡障，医疮剜肉。节对开炉应去也，钁头又有长生篆。算归程、恐到荔枝乡，已过熟。

逸 民

江城子（中秋忆举场）

秀才落得甚乾忙。冗中秋，闷重阳。百年三万，消得几科场。吟配十年灯火梦，新米粥，紫苏汤。如今且说世平康。收战场。息战枪。路断邯郸，无复梦黄粱。浪说为农今决矣，新酒熟，菊花香。

无何有翁

江城子（和）

小年底死踏槐忙。叹蝉声，早斜阳。今夕何年，白骨照沙场。天上人间都是梦，石中火，镬中汤。人如今且免秀，误才康。驰大马，试长枪。说与儿门，书里有膏粱。万万古来同一月，斫不尽、广寒香。

任翔龙

沁园春（赠谈命许丈）

客有问余，号曰当水，逸民者谁。是胸罗星斗，熟知天命，口分造化，妙泄天机。百十日前，再三地说，端的秋来攀桂枝。那时节，果鳌头高跨，鹄首横飞。

君休说是谈非。是则是干支带得来。也要他有个、读书种子，一丁不识，富贵何为。报道长安，梅边春色，早趁东风掠马蹄。重逢处，办一封好纸，觅状元诗。

程梅齐

西江月（赠造浮桥匠者簇）

刻木工夫最巧，舆梁底事尤精。玉虹饮水映波明。彼此往来利济。

真个作家手段，从今名播寰瀛。人从鳌背获安行。镇作城南景致。

刘省齐

沁园春（赠较弓会诸友）

男子才生，桑弧蓬矢，志期古同。况平生慷慨，胸襟磊落，弛张洞晓，经艺该通。笔扫云烟，腹储兵甲，志气天边万丈虹。行藏事，笑不侯李广，射石夸雄。

仰天一问穷通。叹风虎去龙时未逢。羡傅岩版筑，终符求象，渭滨渔钓，果兆非熊。白额未除，长鲸未脍，臂健何嫌二石弓。天山定，任扶桑高挂，凌阁图功。

刘仁父

踏莎行（赠傀儡人刘师父）

不假牵丝，何劳刻木。天然容貌施妆束。把头全仗姓刘人，就中学写秦城筑。

伎俩优长，恢谐软熟。当场喝采醒群目。赠行无以表殷勤，特将谢意标芳轴。

刘南翁

如梦令（春晚）

没计断春归路。借问春归何处。莺燕也含愁，总对落花无语。春去。春去。门掩一庭疏雨。

勿翁

贺新郎（端午和前韵）

庭外潇潇雨。对空山、再度端阳，悄无情绪。旧日文君今瘦损，寻旧曲、不成腔谱。更不周郎回顾。尚喜庭萱春未老，捧蒲觞、细细歌金缕。儿女醉，笑还语。

醉余更作婆娑舞。又谁知、灵均心事，菊英兰露。最苦当年哀郢意，因甚夫君未许。却枉使、蛾眉见妒。在再章台才十载，笑关河、失报应旁午。愁读到，楚辞句。

李君行

沁园春（刘山春新居）

三岛十洲，移掇者谁，玉城稚仙。解运诗之巧，裁山剪水，用诗之力，斡地回天。大笑宋初，秀才屋子，著不行官家十万钱。又谁说，李膺豪放，门号龙门。

我家呼喝山川。道今日山春莺已迁。汝南山顶上，虎毋久卧，秀溪底下，龙莫长眠。打起精神，护持诗府，推出诗城障山边。山川道，如稚仙肯出，当拜君言。

赋 梅

齐天乐（令狐金迁新廨）

雕阑曲曲芙蓉水，天然一时潇洒。露浥冰壶，风摇玉佩，缥缈蓬莱如画。银烛欲下。照藻桷翬飞，杏梁虹架。如此规模，杜陵何止万间厦。

明年春燕归早，卷帘应认得，旧家王谢。袖里经纶，幕中佳话，高断云根谁写。青冥纵靶。看人在金坡，炬莲盈把。句忆湘南，渌池明月夜。

易少夫人

临江仙（咏熟水）

何处甘泉来席上，嫩黄初汤银瓶。月团尝罢有余清。惠山名品在，歌舞暂留停。

欲赏壑源新气味，不应兼进猗苓。此中端有淡交情。相如方病酒，一饮骨毛轻。

临江仙（咏熟水话别）

记得高堂同饮散，一杯汤罢分携。绛纱笼影簇行旗。更残银漏急，天淡玉绳低。

只恐曲终人不见，歌声且为迟迟。如今车马各东西。画堂携手处，疑梦又疑非。

胡平仲

减字木兰花（咏梅）

天然标格。不问青枝和绿叶。仿佛吴姬。酒晕无端上玉肌。
怕愁贪睡。谁会伤春无限意。乞与徐熙。画出横斜竹外枝。

减字木兰花

兰凋蕙歇。野店酒初尝竹叶。绝艳幽姿。洗出铅华见雪肌。
云阶月地。凭仗幽人须着意。一夜花飞。一点微酸已著枝。

曹 遇

宴桃源（游西湖）

西湖避暑棹扁舟。忘机狎白鸥。荷香十里供瀛州。山光翠欲流。

歌浩浩，思悠悠。诗成兴未休。清风明月解相留。琴声万籁幽。

宴桃源

廉纤小雨养花天。池光映远山。蕙兰风暖正暄妍。归梁燕翼偏。

芳草碧，绿波涟。良辰近禁烟。酒酣午枕兴怡然。莺声惊梦仙。

蓦山溪（游鉴湖）

鉴湖千顷，四序风光好。拨棹皱涟漪，极目处、青山缭绕。

微茫烟霭，鸥莺点菰蒲，云帆过，钓舟横，俱被劳生扰。
知章请赐，独占心何小。风月本无私，同众乐、宁论多少。
浮家泛宅，它日郊陶朱，烹鲈鳜，酌松醪，吟笔千篇扫。

水调歌头

造物巧能赋，新腊报花期。江梅清瘦、只是洁白逞芳姿。
我欲超群绝类，故学仙家繁杏，农艳映横枝。朱粉腻香脸，酒
晕著冰肌。

玉堂里，山驿畔，最希奇。谁将绛蜡笼玉，香雪染胭脂。
好向歌台〔舞〕榭，斗取红妆娇面，偎依韵偏宜。羌管莫吹动，
风月正相知。

西江月（示彦忠）

秋霁嫦娥二八，寒光逼散浮云。小山业桂吐清芬，犹带蟾
宫风韵。

因念两登仙籍，恩沾雨露方新。汝今妙岁已能文。早折高
枝荣奋。

白君瑞

满江红（木芙蓉）

木落林疏，秋渐冷、芙蓉新拆。傍碧水，晓妆初鉴，露匀妖色。故向霜前呈艳态，想应青女加怜惜。映朝阳、翠叶拥红苞，闲庭侧。岩桂香，随飘泊。篱菊嫩，陪幽寂。笑春红容易，被风吹落。满眼炯然宫锦烂，一身如寄神仙宅。把绿尊、莫惜醉相酬，春工力。

水调歌头

凉吹拂衣袂，助我上高台。云檐风栋，窗户绝纤埃。四绕江山雄丽，万古盘龙踞虎，壮气锁崔嵬。二水中分远，艇子自归来。

望白云，迎碧汉，俯长淮。铎声到耳，亭亭孤塔现林隈。烟惹宫城深树，日照酒楼帘幕，物象眼前排。长啸下梯径，欲去更徘徊。

柳梢青（曹溪英墨梅）

玉骨冰姿，天然清楚，雪里曾看。物外幽人，细窥天巧，收入毫端。

一枝影落云笺。便似觉、清风夜寒。试向松窗，等闲一展，俗虑都捐。

风入松（寄故人）

一冬不见雪花飞。爱日荡晴晖。腊残未解寒塘冻，东风细、已露春期。正是年时策马，相随村落寻梅。

故人别久信音稀。排闷有新诗。雁声北去江城暖，暗舒展、花柳容仪。屈指烧灯不远，等闲休锁双眉。

念奴娇（寄临安友）

江干蹭蹬，镇寻常、怀想京城春色。静倚山亭凝望处，惟见鸟飞云莫。拂面埃尘，跳，老却风流格。年来却有，短蓑轻棹胸臆。

闻与俊逸嬉游，笙歌丛里，眷恋中华国。况是韶阳将近也，应办青骢金勒。丰乐阑干，西湖烟水，遍赏苏堤侧。举觞须酹，天隅犀渚孤客。

贾 应

水调歌头（呈判府宣机先生乞赐笑览）

晚日浴鲸海，璧月挂鳌峰。不知今夕何夕，灯火万家同。楼外芙渠开遍，人在琉璃影里，语笑隔帘重。对景且行乐，一醉任东风。黄堂宴，春酒绿，艳妆红。文章太守，和气都在笑谈中。正此觥筹交错，只恐笙歌未散，温诏促追锋。来岁传柑处，侍宴自从容。

杨元亨

沁园春（无为灯夕上陆史君）

一棹横江，问讯盟鸥，太守谓谁。道皇华使者，光风洒落。元宵三五，乐与民俱。宝榼金鞵，玉梅钗燕，斗鸭阑干花影嬉。人迎笑，似玉京春浅，长是灯时。

风流不减人知。算岳牧词人谁似之。把南楼风月，渚宫丘壑，竹西歌舞，行乐濡须。万斛金莲，满城开遍，朵朵留迎学士归。明年宴，看柑传天上，月在云西。

林实之

八声甘州

客星堂下水，碧浮空、烟树几重重。想故人当日，论情蓬藿，际会云龙。底事泥涂轩冕，不肯作三公。千仞钓江浒，此意谁同。

应笑赤松黄石，效痴儿成事，犹自言功。怎知他箕颍，袖手独春容。幸风月、有人料理，自家山叟与溪翁。鸣榔晚，一声长啸，相送冥鸿。

刘 𣥂

水调歌头

几载沧江梦，此夕复经过。双台双峙如画，空翠滴晴波。
不是先生高节，激起清风千古，汉鼎复如何。矫首望天际，烟
树翠婆娑。

危楼下，数不尽，去帆多。人人惊肉生髀，却日欲挥戈。
谁识矶边泉石，别有壶中天地，烟雨一青蓑。自笑亦华发，三
叹吊岩阿。

曾中思

水调歌头

有客泛轻舸，迤邐到桐庐。山湾水曲，个中依约是仙区。试唤清江渔父，为问来今往古，兴废事如何。笑指寒烟里，此是子陵居。

汉光武，兴皇运，握乾符。客星侵座，方见不与故人疏。自是先生高尚，无限经纶才略，飘泛寄江湖。凛凛亘千载，风月属樵渔。

黄子功

水调歌头

绾纤钓台下，敛衽谒严陵。石矶封藓，一笑挟策独先登。
山献修蛾几抹，江绕青罗千顷，今古富春声。行有二三子，心迹喜双清。
吊羊裘，追往躅，尚仪型。丹青洒落三反，谁动紫垣星。
重袖调元大手，归傲纶巾一线，志不在寒鲸。千载仰风节，鸿鹄自冥冥。

张嗣初

水调歌头

名节本来重，轩冕亦何轻。人间儿戏，刚自指点客星明。
黄屋龙旂九仞，苍石渔丝千尺，谁辱又谁荣。会得傥来意，方
识古交情。

想当时，奇男子，汉真人。龙潜豹隐，胸中同是一经纶。
公办中兴事业，我向沧浪学钓，各自寄吾真。谁信往来客，千
古诵清名。

沈明叔

水调歌头

汉事正犹豫，足迹正蹉跎。严陵老子，当时底事动天顽。
曾把丝纶一掷，藐视山河九鼎，高议凜人寒。竹帛非吾事，霄
汉任腾骞。

问云台，还得似，钓台巅。几年山下，使人犹识汉衣冠。
寄语功名余子，今日成尘何在，百战亦多艰。一笑桐江上，来
往钓名船。

寇寺丞

点绛唇（遗妓）

春睡腾腾，觉来鸳被堆香暖。起来慵懒。触目情何限。
深院日斜，人静花阴转。柔肠断。凭高不见。芳草连天远。

苏小小

减字木兰花

别离情绪。万里关山如底数。遣妾伤悲。未心郎家知不知。
自从君去。数尽残冬春又暮。音信全乖。等到花开不见来。

李秀兰

减字木兰花

自从君去。晓夜萦牵肠断处。绿遍香阶。过夏经秋雁又来。
想伊那里。应也情怀愁不止。渺渺书沈。直至如今没信音。

胡夫人

采桑子

与君别后愁无限，永远团圞。间阴多方。水远山遥过断肠。
终朝等候郎音耗，捱过春光。烟水茫茫。梅子青青又待黄。

丁羲叟

渔家傲

十里寒塘初过雨。采莲舟上谁家女。秋水接云迷远树。天光暮。船头忘了回来路。

却系兰舟深处住。歌声惊散鸳鸯侣。波上清风花上雾。无计去。月明肠断双栖去。

陶 氏

苏幕遮（闺怨）

与君别，情易许。执手相将，永远成鸳侣。一去音书千万里。望断阳关，泪滴如秋雨。

到如今，成间阻。等候郎来，细把相思诉。看著梅花花不语。花已成梅，结就心中苦。

吴 奕

升平乐

水阁层台，短亭深院，依稀万木笼阴。飞暑无涯，行去有势，晚来细雨回晴。庭槐转影，纱厨两两蝉鸣。幽梦断枕，金猊旋热，兰炷微薰。

堪命俊才俦侣，对华筵坐列，朱履红裙。檀板轻敲，金樽满泛，纵交畏日西沉。金丝玉管，间歌喉、时奏清音。

杨太尉

选冠子

碧眼连车，黄头间座，望断故人何处。当时胜丽，旧是繁华，都变虏言胡语。万里衔冤，几年埋恨，仔细向谁分诉。对南风凝眸，眺神旌、触目泪流如雨。

今幸会，电扫雷驱，云开雾敛，一旦青天重睹。桃林卧草，华岳嘶风，行迓太平周武。洗尽腥膻巷陌。从此追欢，酒坏频举。任笙箫声里，花朝月夕。醉中歌舞。

李子申

多丽

好人人。去来欲见无因。记当时、窃香倚暖，岂期蝶散鹑分。到而今、漫劳梦想，嗟后会、惨啼痕。绣阁银屏，知他可处，一重山尽一重云。暮天杳、梗踪萍，还是寄孤村。寂寥月，今宵为谁，虚照黄昏。

细追思、深诚密意，黯然一饷消魂。仗游鱼、漫传尺素，望塞雁、空噎回纹。帐衾寒、香消麝满，博山沈水更谁薰。断肠也、无聊情味，惟有殢芳尊。沈吟久，移灯向壁，掩上重门。

阎丘次杲

朝中措

横江一抹是平沙。沙上几千家。得到人家尽处，依然水接天涯。危栏送目，翩翩去鹜，点点归鸦。渔唱不知何处，多应只在芦花。

危昞霄

眼儿媚（题九里桥）

晴云十丈跨杉溪。偏称夜凉时。我来正值，一滩月朗，万木霜飞。

谪仙不住人间世，此恨有谁知。何人画我，倚阑得句，听水忘归。

万 某

水调歌头

(九日修故事访南山，崖间有前太守所作水调歌头，率尔次韵)

卷尽风和雨，晴日照清秋。南山高处回首、潇洒一扁州。
且向飞霞沦茗，还归云间书院，何幸有从游。随分了公事，同
乐与同尤。

少年事，湖海气，百尺楼。萧萧华发、归兴只念故山幽。
今日聊修故事，口岁大江东去，应念我穷愁。不但莼鲈口，杜
若访芳洲。

蔡士裕

金缕曲（罗帛翦梅缀枯枝，与真无异作）

怪得梅开早。被何人、香罗翦就，天工奇巧。茅舍竹篱容不得，移向花堂深悄。别一样、风流格调。玉质冰姿依然在，算暗中、只欠香频到。著些子，更奇妙。

有时来伴金尊倒。几徘徊、认成真后，又还误了。费尽东君回护力，空把芳心萦绕。竟不解、索他一笑。夜月纱窗黄昏后，为爱花、翻被花情恼。个恩爱，负多少。

浦湘曲（为金坛教谕干寿道考满悵词）

功名早。步武青云缭绕。斯文近有成效。绛纱拍拍春风满，香动一池芹藻。

瓜期到。便勇撤皋比，此去应光耀。立登枢要。向红药阶前紫薇阁，管不负年少。

覃怀高

水调歌头（游武夷）

翠蕤插云表，初意隔仙凡。临风据案一见，邂逅似开颜。
几欲拿舟九曲，便拟扪参绝顶，直下俯尘寰。聊此税吾驾，赢得片时闲。

问仙人，缘底事，去不还。长风浩浩，何许清梦杳难攀。
只有苍烟古木，好在清湍白石，依旧画图间。回首武夷路，杳霭没云鬟。

巴州守

水调歌头

霁色满空碧，爽气正横秋。登高行乐，来只说古巴州。
扫 尘埃来坐，携取烟云杖屦，容 清游。坐上尽佳客，一
醉破千尤。

倚虚壁，绝临 ，上层楼。黄花赤叶，鸟 啼断四山幽。
醉里不知归去，空有乱云衰草，落日几多愁。舞鹤在霄汉，宿
鹭点汀洲。

江无

满江红（衡岳词）

使节行秋，算天也、知公风力。长啸罢、烟云尽卷，
。重九汉峰黄泛酒，五更泰岳 观日。问扬公、去后有谁
， 朝集。大华 ， 。今古 ， 陈迹。甚牛山 ，
。 嫌口薄，高怀 。 、黄鹤
， 相识。

无名氏

浣溪沙（武进厅壁）

倦客东归得自由。西风江上泛扁舟。夜寒霜月素光流。
想得故人千里外，醉吟应上谢家楼。不多天气近中秋。

浣溪沙

北固江头浪拍空。归帆一夜趁秋风。月明初上荻花丛。
渐入三吴烟景好，此身将过浙江东。梦魂先在鉴湖中。

沁园春

小阁深沈，寸心怀感，暗忆旧时。念母兄贫窘，姻亲劝诱，
一身权作，七岁为期。及到门阑，小君猜忌，如履轻冰愁过违。
多磨难，是房中诟骂，堂上鞭笞。堪悲。命运乖衰。甚长个孩
儿朝夜啼。叹此生缘业，两餐淡薄，无时无泪，如醉如痴。暗
里相逢，低声说与，此个恩情休谩为。须知道，联难为夏竦，

不易张祁。

云鬓松令般涉（送傅国华奉使三韩）

鬓云松，眉叶聚。一阕离歌，不为行人驻。檀板停时君看取。数尺蛟绡，果是梨花雨。

鹭飞遥，天尺五。凤阁鸾坡，看即飞腾去。今夜长亭临别处。断梗飞云，尽是伤情绪。

胜胜慢

严凝天气，近腊时节，寒梅暗绽疏枝。素艳琼苞，盈盈掩映亭池。雪中欺寒探暖，替东君、先报芳菲。暗香远，把荒林幽圃，景致妆迟。

别是一般风韵，超群卉、不待淡荡风吹。雅态仪容，特地惹起相思。折来画堂宴赏，向尊前、吟咏怜伊。渐开尽，算闲花、野草怎知。

胜胜慢

寒应消尽，丽日添长，百花未敢先拆。冷艳幽香，分过溪南春色。调酥旋成素蕊，向碧琼、枝头匀滴。愁肠断，拍韶华三弄，雪映溪侧。

应是酒阑人静，香散睡、惟见玉肌冰格。细细疏风，清态

为谁脉脉。芳心向人似语，也相怜、风流词客。待宴赏，伴娇娥、和月共摘。

汉宫春

梅萼知春，见南枝向暖，一朵初芳。冰清玉丽，自然赋得幽香。烟庭水榭，更无花、争染春光。休谩说、桃夭杏冶，年年蝶闹蜂忙。立马伫、凝情久，念美人自别，鳞羽茫茫。临歧记伊，尚带宿酒残妆。云疏雨阔，怎知人、千里思量。除是托、多情驿使，殷勤折寄仙乡。

汉宫春

雪打风摧。正篱枯壁尽，却有寒梅。衰柳败蒲碍眼，喜见芳蕾。江村路曲，问青帘、与酌余醅。须凭取，东君为我，一枝先寄春来。

寂寞槿门牛巷，有清香自倚，不怕低回。终须会逢赏目，健步移栽。孤芳素艳，敢烦他、蜂蝶相陪。偏爱有、春风靳惜，同时不放花开。

汉宫春

点点江梅，对寒威强出，一弄新奇。零珠碎玉，为谁密上南枝。幽香冷艳，纵孤高、却遣谁知。惟只有、江头驿畔，征

鞍独为迟迟。

聊捻粉香重问，问春来甚日，春去何时。移将院落，算应未肯头低。无人共折，傍溪桥、雪压霜欺。君不见、长安陌上，只夸桃李芳菲。

鼓笛慢

雪霏冰结霜凝，是谁得春工意。南枝向暖，江边岭上，独先众卉。闲态幽姿，绿窗红蒂，粉英金蕊。念冰肤秀骨，人间要见，除非是、真仙子。

羌管且休横吹。待佳人、新妆初试。鸾台晓鉴，人花相对，何须更比。疏影横斜，暗香浮动，月低风细。又岂知，渐结枝头翠玉，有和羹美。

鼓笛慢

去年今日关山路，疏雨断魂天气。据鞍惊见，梅花的皪，篱边水际。一枝折得，雪妍冰丽，风梳雨洗。正水村山馆，倚阑愁寄，有多少、春情意。

好是孤芳莫比。自不分、歌梁舞地。砌香砌影，高禅文友，清谈相对。琴韵初调，茗瓯催论，炉薰欲试。向此时，一段风流，付与晋人标致。

鼓笛慢

淡烟池馆，霜飈乍紧，又是年华暮。黄花老尽，丹枫舞困，江梅初吐。点缀南枝，暗传春信，玉苞微露。凭危阑空断，谁家素脸，遥山远、空凝伫。

昨夜一枝开处。正前村、雪深幽曙。看来只恐，瑶台去散，玉京人去。庾岭寒余，汉宫妆晓，飞堆行雨。仗谁人惜取，孤芳雅致，作春光主。

念奴娇

雨肥红绽，把芳心轻吐，香喷清绝。日暮天寒，独自倚修竹，冰清玉洁。待得春来，百花若见，掩面应羞杀。当风抵雨，犯寒则怕吹霎。潇潇爱出墙东，途中遥望，已慰人心渴。斗压阑干，人面共花面，难分优劣。嚼蕊寻香，凌波微步，雪沁吴绫袜。玉纤折了，殢人须要斜插。

念奴娇

岁华渐杪，又还是春也，难禁愁寂。欲探疏梅，独自个、寻访山村水驿。路转溪斜，竹低墙短，应是瑶姬宅。玉蕤不动，月轮寒浸国色。回首故国风光，只因清好，重作江南客。堪笑广平，争解我、羁旅芳心脉脉。不借铅华，枝头雪霁，愈见香肌白。高楼且住，凭渠一弄羌笛。

念奴娇

兰枯蕙死，向竹齐深处，谁传消息。霜雪丛中浑似个，缥缈吴人标格。绛萼微深，琼苞不露，自与尘凡隔。黄昏遥见，一枝烟淡笼白。

曾记雾阁云窗，轻飞香篆，佳句应难得。道韞能文，终未胜、潇洒风流姿质。待到春来，满城桃李，相并无颜色。殷勤祝付，画楼休品长笛。

洞庭春色

绛萼欺寒，暗传春信，一枝乍芳。向篱边竹外，前村雪里，青梢犹瘦，疏影溪傍。惹露和烟凝酥艳，似潇洒玉人初试妆。江南路，有多情伫立，回尽柔肠。

倚楼最难忘处，正皓月、千里流光。纵广平心劲，难思丽句，少陵诗兴，犹爱清香。休怪东君先留意，问他日和羹谁又强。还轻许，笑凌空桧影，松荫交相。

沁园春

山驿萧疏，水亭清楚，仙姿太幽。望一枝颖脱，寒流林外，为传春信，风定香浮。断送光阴，还同昨夜，叶落从知天下秋。凭阑处，对冰肌玉骨，姑射来游。

无端品笛悠悠。似怨感长门人泪流。奈微酸已寄，青青杪，助当年太液，调鼎和羹。樵岭渔桥，依稀精彩，又何藉纷纷俗

士求。孤标在，想繁红闹紫，应与包羞。

真珠髻（红梅）

重重山外，苒苒流光，又是残冬时节。小园幽径，池边楼畔，翠木嫩条春别。纤蕊轻苞，粉萼染、猩猩鲜血。乍几日，好景和风，次第一齐催发。

天然香艳殊绝。比双成皎皎，倍增芳洁。去年因遇东归使，指远恨、意曾攀折。岂谓浮云，终不放、满枝明月。但叹息，时饮金钟，更绕丛丛繁雪。

远朝归

新律才交，早旧梢南枝，朱污粉腻。烟笼淡妆，恰值雨膏初细。而今看了，记他日、酸甜滋味。多应是，伴玉簪凤钗，低亸亚斜坠。迢迢。对酒当歌，眷恋得芳心，竟日何际。春光付与，尤是见欺桃李。叮咛寄语，且莫负、尊前花底。拚沈醉，尽铜壶、漏传三二。

击梧桐

雪叶红凋，烟林翠减，独有寒梅难并。瑞雪香肌，碎玉奇姿，迥得佳人风韵。清标暗折芳心，又是轻泄，江南春信。最好山前水畔，幽闲自前，横斜疏影。

尽日凭阑，寻思无语，可惜飘琼飞粉。但怅望、王孙未赏，空使清香成阵。怎得移根帝苑，开时不许众芳近。免教向、深岩暗谷，结成千万恨。

泛兰舟

霜月亭亭时节，野溪开冰灼。故人信付江南，归也仗谁托。寒影低横，轻香暗度，疏篱幽院何在，秦楼朱阁。称帘幕。

携酒共看，依依承醉更堪作。雅淡一种天然，如雪缀烟薄。肠断相逢，手捻嫩枝，追思浑似，那人浅妆梳掠。

十月海

千林凋尽，一阳未报，已绽南枝。独对霜天，冒寒先占花期。清香映月浮动，临浅水、疏影斜欹。孤标不似，绿李夭桃，取次成蹊。

纵寿阳、妆脸偏宜。应未笑、天然雅态冰肌。寄语高楼，凭栏羌管休吹。东君自是为主，调鼎鼐、终会他时。从今点缀，百草千花，须待春归。

蓦山溪

冰肌玉骨，不与凡花数。一点破清香，这心情、更谁为主。愁春归晚，时被雨廉纤，琼枝上，泪淋浪，似恨孤芳处。

幽姿标格，独向江头路。拟待使君来，把芳心、丁宁分付。
疏篱茅舍，回首试轻辞，争望远，嫁东风，对玉堂同处。

蓦山溪

梅传春信，又报年华晚。昨夜半开时，似雪到、梢头未遍。
凝酥缀粉，绰约玉肌肤，香黯淡，月朦胧，谁是黄昏伴。

故园深处，想见孤根暖。千里未归人，向此际、只回泪眼。
凭谁为我，折寄一枝来，凝睇久，俯层楼，忍更闻羌管。

蓦山溪

素苞淡注。自是东君试。占断陇头光，正雪里、前村独步。
一枝竹外，日暮怯轻寒，山色远，水声长，寂寞江头路。

小桥斜渡。人静销魂处。淡月破黄昏，影浮疏、清香暗度。
竹篱茅舍，斜倚为谁愁，应有恨，负幽情，惟恐风姨妒。

蓦山溪

沙塘水浅，又一番春信。玉体不知寒，衬修篁、几苞隐映。
幽香荏苒，不让洒蔷薇，弯月冷，漫涟漪，云断暗香影。

朱扉深处。谢绝尘埃境。百草未开花，惘然、教伊孤冷。
东风世态，只恋碧桃枝，曲玉管，且休吹，免使成遗恨。

蓦山溪

前村昨夜，先报春消息。庚岭一枝开，见行人、频频顾惜。东君布巧，妆蕊似裁，疏竹外，小溪边，雪里藏春色。朔风吹绽，不假和风拆。根暖独亨嘉，向百花、头先占得，高楼羌笛，且劝莫凄然，协帝梦，起商岩，须尽调羹力。

蓦山溪

冰肌玉骨，不假铅黄借。岂是占年芳，又只恐、嫌春不嫁。十分清瘦，可也有闲愁，沙路晚，雪村晴，半幅江南画。

林间系马，曾忆关山夜。醉袖惹香归，误几回、灯前娇雅。如今老矣，无计奈春何，人去后，独来时，风月闲亭榭。

蓦山溪

前村雪里，度一枝春信。况自占年芳，淡妆梳、常嫌脂粉。樱唇轻捧，何似鹤头红，香阵阵。回舆认。摘有金卮酝。

佳人嗅处，微把香尘喷。懊恼故无言，使人、重重再问。它年寄与，惟有陇头人，春未因。香尤嫩。好与添风韵。

蓦山溪

郊居牢落，一水流清浅。忆得去年冬，数枝梅、低临水畔。今朝重见，把酒祝东风，和雪看。整凝眸，宛若江南岸。

浮生瞥尔，劝汝休嗟叹。不觉失芳心，柳腰、纤纤仍换。一朝光景，休恁作浑闲，春不远。且追游，又办寻芳宴。

蓦山溪

重黎默运，可意萦人处。清楚玉蕤仙，独幽栖、村溪月坞。冰腮露鬓，佳致在西湖，月出早，雪消迟，立马红墙序。

寒梢微萼，点点蝇头许。欲露小檀心，似生怕、施朱红紫。返魂香细，堪吊独醒人，临泽国，袭清风，且咏离骚句。

蓦山溪

前村雪里，漏世春光早。似待故人来，束芳心、幽香未老。溪边昨夜，雨过却参横，云旖旎，玉玲珑，不遣纤尘到。

无情有意，寂寞谁知道。幽梦觉来时，淡无言、风清月了。何郎去后，憔悴少新诗，空怅望，倚楼人，玉笛霜天晓。

蓦山溪

竹篱苑舍，底是藏春处。玉蓓锁檀心，带黄昏、轻烟红雨。神清骨莹，端似雪堂仙，临岁晚，傲寒威，寂寞江村住。琼林阆苑，有信终归去。冷暖笑凡情，辨南枝、北枝几许。灵芳绝

艳，知肯为谁容，东阁里西，西湖畔，总与花为主。

蓦山溪

岁寒辽邈，望断江南信。墙外一枝斜，对兰堂、绮罗隐映。水清月淡，疑是寿阳妆，烟浪急，小桥横，点点疏清影。天姿潇洒，不减瑶台韵。占断玉楼春，被松筠、笑他孤冷。幽人何在，无处觅余寒，疏雨过，泪痕深，枉了衷肠恨。

蓦山溪（翦彩梅花）

危栏独倚，往事思量遍。回首掩朱扉，敛云鬓、闲拈针线。轻罗碎翦，缝个小梅花，灯闪闪，夜沈沈，玉指轻轻捻。

寒苞素艳，浑似枝头见。半拆与初开，谁赢得、江南手段。玉冠斜插，惟恨欠清香，风动处，月明时，不怕吹羌管。

蓦山溪（画梅）

孤村冬杪，有景真堪画。茅舍绕疏篱，见一枝、寒梅潇洒。欲将诗句，拟待说包容，辞未尽，意悠悠，难把精神写。

临溪疏影，都是前人话。此外更何如，更须索、良工描下。明窗净几，长做小图看，高楼笛，尽教吹，不怕随声谢。

蓦山溪（蜡梅）

梅梢破萼，已见春心了。别有淡容仪，又不与、嫣然同笑。
东风翦蜡，簇作闹蛾儿，冰未泮，水犹寒，散在千林表。

轻衫小帽，行尽荒山道。一点射脐香，恼著人、多多少少。
月斜门掩，消损怕黄昏，清影乱，翠帏深，且喜归来早。

蓦山溪（蜡梅）

小山苍翠，竹影横窗畔。青缕断薰炉，觉身居、风台月观。
清香招近，谁为植幽丛，金作蓓，蕾成花，尚带鹅黄浅。

汉宫半额，未许人间见。不比岭前梅，问无因、天高水远。
宜烟宜雨，淡淡一枝春，乘好兴，缀新诗，只恐冰生砚。

蓦山溪（蜡梅）

江面春信，已过长安路。柳眼尚贪眠，又争知、先传春去。
东风漏泄，休更殢垂杨，深雪里，一枝开，谁占先春处。

当时马上，回首曾凝顾。水浅月黄昏，倚琼枝、谁家亭户。
一声羌管，遗恨到如今，凭栏处，赏花时，莫使花轻负。

蓦山溪（野梅）

当时曾见，上苑东风暖。今岁却相逢，向烟村、亭边驿畔。

垂鞭立马，一晌黯无言，江面信，寿阳人，怅望成肠断。

琼妆雪缀，满野空零乱。谁是倚阑干，更那堪、胡笳羌管。
疏枝残蕊，犹懒不娇春，水清浅，月黄昏，冷淡从来惯。

梅花引

园林静。萧索景。寒梅漏泄东君信。探春回。探春回。四时却被，伊家苦相催。江村畔。开烂熳。看看又近年光晚。绽芬芳。喷清香。寿阳宫里，爱学靓梳妆。

夭桃红杏夸颜色。争似情怀雪中拆。冒严寒。冒严寒。游蜂戏蝶，莫作等闲看。故人别后何处。春色岭头逢驿使。赠新诗。折高枝。楼上一声，羌管不须吹。

绿头鸭

敛同云。破腊雪霁前村。占阳和、孤根先暖，数枝已报新春。如青女、谩同素质，笑姑射、难并天真。疏影横斜，澄波湖浅，暗香浮动月黄昏。山驿畔，行人立马，回首几销魂。江南远，陇使趁程，踏尽冰痕。

有个人人，玉肌偏似，移我常封金尊。捻纤枝、鬓边斜戴，嗅芳蕊、眉晕潜分。素脸笼霞，香心喷日，寿阳妆罢洒初醒。待调鼎、须贪结子，忍见落纷纷。霜天晓，愁闻画角，声断谯门。

金盏倒垂莲

依约疏林，见盈盈春意，几点霜蕤。应是东君，试手作芳菲。粉面倚、天风微笑，是日暖、雪已晴时。人静么凤翩翩，踏碎残枝。

幽香浑无着处，甚晴一般雨露，独占清奇。淡月疏云，何处不宜。陌上报春来也，但绿暗、青子离离。桃杏应仗先容，次第追随。

梅香慢

高阁寒轻，映万朵芳梅，乱堆香雪。未待江南，早冠百花，先占一阳佳节。翦彩凝酥，无处学、天然奇绝。便寿阳妆，工夫费尽，艳姿终别。

风里弄轻盈，掩珠英明莹，待腊飘烈。莫放芳菲歇。剩永宵欢赏，酒酣吟折。倒玉何妨，且听取、樽前新阕。怕笛声长，行云散尽，谩悲风月。

胃马索

晓窗明，庭外寒梅向残月。吴溪庾岭，一枝偷把阳和泄。冰姿素艳，自然天赋，品格真香殊常别。奈北人、不识南枝，唤作腊前杏先发。

奇绝。照溪临水，素禽飞下，玉羽琼芳斗清洁。懊恨春来何晚，伤心邻妇争先折。多情立马，待得黄昏，疏影斜斜微酸

结。恨马融、一声羌笛起处，纷纷落如雪。

定风波慢

漏新春、消息前村，数枝楚梅轻绽。雪艳精神，冰肤淡伫，姑射依稀见。冷香凝，金蕊浅。青女饶伊妒无限。堪羨。似寿阳妆阁，初匀粉面。

纤条绿染。异群葩、不似和风扇。向深冬、免使游蜂舞蝶，撩拨春心乱。水亭边，山驿畔。立马行人暗肠断。吟恋。又忍随羌管，飘零千片。

庆春泽

晓风严，正萧然兔园，薄雾微罩。梅渐弄白，簷危苞、匀胜胭脂，半点琼瑰小。望江南、信息何杳。纵寿阳妍姿，学就新妆，暗香须少。幽艳满寒梢，更游蜂舞蝶，浑无飞绕。天赋品格，借东皇施巧。孤根占得春前俊，笑雪霜、谩欺容貌。况此花高强，终待和羹，肯饶芳草。

尉迟杯

岁云暮。叹光阴苒苒能风许。江梅尚怯余寒，长安信音犹阻。春风无据。凭阑久，欲去还凝伫。忆溪边月下徘徊，暗香疏影庭户。

朝来冻解霜消，南枝上，香英数点微露。把酒看花，无言有泪，还是那时情绪。花依旧、晨妆何处。谩赢得、花前愁千缕。尽高楼，昼角频吹，任教纷纷飞絮。

木兰花慢

望阳生渐布，见梅萼、暖初回。向雪里、一枝才苞，素艳已占春台。烟笼半含粉面，透清香、暗触满襟怀。可惜前村望断，魏林庾岭栽培。

皑皑。嫩蕊清光，凝笑也恁风猥。但折取行人，途中对酒，不用尊罍。芬芳正当岁暮，谩休桃李苦相催。早报明年律应，又还依旧先开。

木兰花慢

饱经霜古树，怕春寒、趁腊引青枝。逗一点阳和，隔年信息，远报佳期。凄葩未容易吐，但凝酥半面点胭脂。山路相逢驻马，暗香微染征衣。

风前袅袅含情，虽不语、引长思。似怨感芳姿，山高水远，折赠何迟。分明为传驿使，寄一枝春色写新词。寄语市桥官柳，此先占了芳菲。

最高楼

梅花好，千万君须爱。比杏兼桃犹百倍，分明学得嫦娥样，不施朱粉天然态。蟾宫里，银河畔，风霜耐。

岭上故人千里外。寄去一枝君要会。表江南信相思。清香素艳应难对。满头宜向尊前戴。岁寒心，春消息，年年在。

尾犯

轻风淅淅，正园林萧索，未回暖律。岭头昨夜，寒梅初发，一枝消息。香苞渐拆。天不许、雪霜欺得。望东吴，驿使西来，为谁折赠春色。

玉莹冰清容质。迥不同、群花品格。如晓妆匀罢，寿阳香脸，徐妃粉额。好把琼英摘。频醉赏、舞筵歌席。休待听，呜咽临风，数声月下羌笛。

望远行

重阴未解，又早是、年时梅花争绽。暗香浮动，疏影横斜，月淡水清亭院。好是前村，雪里一枝开处，昨夜东风布暖。动行人、多少离愁肠断。

凝恋。天赋自然雅态，似寿阳、初匀粉面。故人折赠，欣逢驿使，只恐陇春晚。寄与高楼，休学龙吟三弄，留取琼花烂熳。正有人、同倚阑干争看。

宝鼎现

东君着意，化工恩被，灼灼妖艳。袅嫩梢轻蓓萼风惹露，偏早香英绽。似向人、故矜夸标致，倚阑全如顾盼。尚因怯寒，柔情弱态，天真无限。断桥压柳时非浅。先百花、风光独占。当送腊初归，迎春欲至，芳姿偏婉变。料碎翦就，缁纨辉丽，更把胭脂重染。自师赋得、一般容冶，宛胜神仙妆脸。

折送小阁幽窗，酷爱处、令亲几砚。尽孜孜观赏，不枉人称妙选。待密付、如膏雨泽。金玉仍妆点。任扰扰、百卉千花掩迹，一时羞见。

望梅花

寒梅堪羨。堪羨轻苞初展。被天人、制巧妆艳。群芳皆贱。碎翦月华千万片。缀向琼枝欲遍。

小庭幽院。雪月相交无辨。影玲珑、何处临溪见。谢家新宴。别有清香风际转。缥缈着人应头面。

喜迁莺

南枝向暖。乍秀出庚岭，梅英初吐。玉颊轻匀，琼腮微抹。姑射冰容相许。几回立马凝伫，影映寒光霜妒。尽占，在百花头上，严冬独步。

芳华春意早，昨夜一番，雪里开无数。万蕊千梢，铅堆粉污，总是化工偏赋。月明暗香浮动，休使龙吟声苦。且留取。待时时，频倚阑干重顾。

喜迁莺

腊残春未。正候馆梅开，墙阴雪里。冷艳凝寒，孤根回暖，昨夜一枝春至。素苞暗香浮动，别有风流标致。谢池月，最相宜，疏影横斜临水。

谁为。传驿骑。陇上故人，不见今千里。寄与东君，徒教知人，别后几寒清意。乱山万叠何在，但有飞天际。故园好，早归来，休恋繁桃李。

喜迁莺

霜凝雪汇。正斗标临丑，三阳将近。万木凋零，群芳消歇，禁苑有梅初盛。异香似薰沈水，素色端如玉莹。人尽道，第一番，天遣先占春信。

标韵。尤耿耿。月观水亭，谁解怜疏影。何逊扬州，拾遗东阁，一见便生清兴。望林止渴功就，不数夭桃繁杏。岁寒意，看结成秀子，归调商鼎。

喜迁莺

一阳初起。渐庚岭梅雪，才苞香蕊。品格清高，姿容闲雅，别受化工深意。放开独占严景，不使混同凡卉。微雨击。似玉容寂寞，无言有泪。

难比。凝素态，不共艳阳，桃杏争妍丽。疑是佳人，巧捻香酥，枝上玉纤轻缀。前村可惜无赏，好近天庭阶砌。成实后，有调和鼎鼐，一般滋味。

陇上消残雪，曲水流断，淑气潜通。群花冷未吐，夜来梅萼，数枝繁红。光夺化工。发艳色、不染东风。信凭晓风，难压精神，占青春未上，别是标容。

天香渐杳，似蓬阙玉妃，酒困娇慵。只愁恐、上溪东。又须寄与，多感多情，道此花开早，未识游蜂。

喜迁莺

倚花阑清晓，裴回探得，南枝初绽。通春意、漏巧斗奇，东君道先回暖。盈盈素面。刚强点、胭脂深浅。是他自有，标格清香，恁千种妖饶，万般闲雅。

移时细看。算浓雪严霜，怎生拘管。也拟是、小桃未蕊，依约杏添清伴。笛声休怨。怕恐使、群芳零乱。待须把酒，守着花枝，愿期与花枝，久长相见。

喜迁莺

忆笙歌筵上，匆匆见了，相别。红炉暖、画帘绣阁，曾共鬓边斜插。南枝向暖，北槛里、春风犹怯。也应别后，不减芳菲，念咫尺阑干，甚时重折。

清风间发，如天与浓香，粉匀檀颊。纱窗影、故人凝处，冷落暮天残雪。一轩明月。怅望花争清切。便教尽放，都不思

量，也须有，蓦然上心时节。

喜迁莺

睹南翔征雁，疏林败叶，凋霜零乱。独红梅、自守岁寒，天教最后开绽。盈盈水畔。疏影蘸、横斜清浅。化工似把，深色胭脂，怪姑射冰姿，剩与红间。

谁人宠眷。待金锁不开，凭阑先看。曾飞落、寿阳粉额，妆成汉宫传遍。江南风暖。春信喜、一枝清远。对酒便好，折取奇苞，捻清香嗅，举杯重劝。

满庭霜

一种江梅，偷传春信，夜来先绽南枝。嫩苞寒萼，妆点缀胭脂。雪里浑迷素质，明月下、惟有香肌。山村路，人家舍窄，低亚水边篱。偏宜。寿阳女，新妆淡淡，粉面曾施。更胡笛羌管，塞曲争吹。陌上行人暂听，香风动、都入愁眉。音书杳，天涯望断，折寄拟凭谁。

满庭霜（蜡梅）

园林萧索，亭台寂静，万木皆冻凋伤。晓来初见，一品蜡梅芳。疑是黄酥点缀，超群卉、独占中央。堪闲玩，檀心紫蕊，清雅喷幽香。

华堂。欢会处，陶陶共醉，相劝瑶觞。逞风流开早，不畏严霜。才子佳人属意，搜新句、吟咏诗章。歌筵罢，醺醺归去，蟾影照回廊。

黄莺儿

香梢匀蕊先回暖，点点胭脂轻衬。红苞隐映疏篁，红翠相间。方瑞雪乍晴时，爱日初添线。五云楼上遥看，似睹溪边，仙子妆面。

堪羨。影转玉枝斜，艳拂朝霞浅。就中妖娆，独得芬芳，偏教容易琼苑。闻又报一阳时，不似莺声声唤。肯与梅脸争春，靥笑群芳晚。

锦堂春（雪梅）

腊雪初晴，冰销凝泮，寻幽闲赏名园。时向长亭登眺，倚遍朱阑。拂面严风冻薄，满阶前、霜叶声乾。见小台深处，数叶红梅，漏泄春权。

百花休恨开晚，奈韶华瞬息，常放教先。非是东君私语，和煦恩偏。欲寄江南音耗，念故人、隔阔云烟。一枝赠春色，待把金刀，翦倩人传。

瑶台月

严砚凜冽，万木冻，园林肃静如洗。寒梅占早，争先暗吐香蕊。逞素容、探暖欺寒，遍妆点、亭台佳致。通一气，超群卉。值腊后，雪清丽。开筵共赏，南枝宴会。

好折赠、东君驿使。把岭头信息远寄。遇诗朋酒侣，尊前吟缀。且优游，对景欢娱，更莫厌、陶陶沈醉。羌管怨，琼花缀。结子用调鼎饵。将军止渴，思得此味。

玉梅香慢

寒色犹高，春力尚怯。微律先催梅拆。晓日轻烘，清风烦触，凝散数枝残雪。嫩英妒粉，嗟素艳、有蜂蝶。全似人人，向我依然，顿成离缺。

裴回寸肠万结。又因花、暗城凝咽。捻蕊怜香，不禁恨深难绝。若是芳心解语，应共把、此情细细说。泪满阑干，无言强折。

双头莲

触目庭台，当岁晚凋残，恁时方见。琼英细蕊，似美玉碾就，轻冰裁翦。暗想蜂蝶不知，有清香为援。深疑是，傅粉酡颜，何殊寿阳妆面。

惟恐易落难留，仗何人巧把，名词褒羨。狂风横雨，枉坠落、细蕊纷纷千片。异日结实成阴，托称殊非浅。调鼎鼐，试作和羹，佳名方显。

夏云峰

琼结苞，酥凝蕊，粉心轻点胭脂。疑是素娥妆罢，玉翠低垂。化工深意，巧付与、别个标仪。怎奈向，风寒影里，独是开时。绿何不与春期。此花又、岂肯争竞芳菲。疑雨恨烟，忍风岭畔江湄。冷烟幽艳，曾不许、霜雪相欺。只恐向，笛声怨处，吹落残枝。

庆清朝

北陆严凝，东郊料峭，化工争付归期。前村夜来雪里，先见纤枝。想像靓妆淡伫，钗头翡翠茧蛾见。冰壶莹，坐间静对，姑射仙姿。

潇洒处，非艳冶最奇。是名赋、处士新诗。尊前坐曲，忍听羌管频吹。试问占先众卉，微笑不奈苦寒欺。何须问，定应未美，桃李芳菲。

烛影摇红

点点飞香，见梅知道春心透。怕寒不卷玉楼帘，羞与花同瘦。手捻青枝频嗅。诮冷落、蔷薇金斗。翻惊绿鬓，不似芳姿，年年依旧。

才破凝酥，满园桃李看看又。江南幽梦了无痕，啼晕残襟袖。鸳被有谁温绣。怎敢案更、十分谿酒。伴君独自，几个黄

昏，月明时候。

凤凰台忆吹箫

红蓓珠圆，素蕤玉净，南荒已报春还。便迤迳，云开五岭，雪霁群蛮。喜见东君信息，应不管、潘鬓新班。凭谁寄，心萦秋水，目断春山。

长记小桥斜渡，潇洒处，苇篱茅舍三间。肯伴我、风光赏遍，月影疑残。好为调羹结子，玉铉冷、金鼎空闲。北枝畔，谁念嶰律犹寒。

东风第一枝

腊雪犹凝，东风递暖，江南梅早先拆。一枝经晓芬芳，几处漏春信息。孤根寒艳，料化工、别施恩力。迥不与、桃李争妍，自称寿阳妆饰。

雪烂熳、怨蝶未知，嗟燕孤、画楼绮陌。暗香空写银笺，素艳谩传妙笔。王孙轻顾，便好与、移栽京国。更免逐、羌管凋零，冷落暮山寒驿。

东风第一枝

溪侧风回，前村雾散，寒梅一枝初绽。雪艳凝酥，冰肌莹玉，嫩条细软。歌台舞榭，似万斛、珠玑飘散。异众芳，独占

东风，第一点装琼苑。

青萼点、绛唇疏影，潇洒喷、紫檀龙麝。也知青女娇羞，寿阳懒匀粉面。江梅腊尽，武陵人、应知春晚。最苦是，皎月临风，画楼一声羌管。

昼夜乐

一阳生后风光好。百花瘁，群木槁。南枝探暖欺寒，嘉卉争先占早。晓来风送清香杳。映园林、报春来到。素艳自超群，似姑射容貌。

画堂开宴邀朋友，赏琼英，同欢笑。陇头寄信丁宁，楼上新妆斗巧。对景乘兴倾芳酒，拼沈醉、玉山频倒。结实用和羹，是真奇国宝。

柳初新

千林凋谢严凝日。青帝许、梅花拆。孤根回暖，前村雪里，昨夜一枝凝白。天匠与、雕琼镂玉，淡然非、人间标格。

别有神仙第宅。绣帘垂、碧纱窗隔。月明风送，清香苒苒，着摸美人词客。向晓来、芳苞乍摘。对菱花、倍添姿色。

蜡梅香

爱日初长。正园林才见，万木凋黄。槛外朝来，已见数枝，

复欲掩映回廊。赐与东皇。付芳信、妆点江乡。想玉楼中，谁家艳质，试学新妆。

桃杏苦寻芳。纵成蹊，岂能似恁清香。素艳妖娆，应是尽夜，曾与明月添光。瑞雪冰霜。浑疑是、粉蝶轻狂。待拚吟赏，休听画楼，横管悲伤。

满江红

林外溪边，深深见、一林寒雪。惟觉有、袭人襟袖，暗香不绝。天与风流标格在，肯同桃杏开时节。也须烦、玉手折将来，和明月。调鼎事，君休说。龙笛韵，空悲咽。将何助清赏，待传佳阕。君不见广平词赋丽，挥毫弄翰心如铁。便直饶、何逊在扬州，成虚设。

选冠子

憔悴江山，凄凉古道，寒日澹烟残雪。行人立马，手折江梅，红萼素英初发。月下瑶台，弄玉飞琼，不老年年春色。被东君、唤遣烧红，高韵且饶清白。

因动感、野水溪桥，竹篱茅舍，何似玉堂金阙。天教占了，第一枝春，何处不宜风月。休问庾岭止渴，金鼎调羹，有谁如得。傲冰霜、雅态清香，花里自称三绝。

选冠子

庚岭烟光，江南风景，冷落岁寒庭院。疏林万木冻折，孤根独犯，晓霜回暖。萼点胭脂，粉凝芳叶，依稀几枝初绽。上层楼、月夜凭阑，风送暗香清远。

嗟往昔、汉妃临鸾，新妆才饰，艳绝人间金钿。东君信息，造化工夫，却笑众葩开晚。若是芳菲迅速，终与和羹，凤池仙馆。愿楼头、羌笛休吹，免使为花肠断。

落梅慢

带烟和雪，繁枝澹伫，谁将粉融酥滴。疏枝冷蕊压群芳，年年常占春色。江路溪桥谩到，裊裊风中无力。暗香浮动冰姿，明月里，相无花比高格。

争奈光阴瞬息。动幽怨、潜生羌笛。新花斗巧，有天然闲态，倚阑堪惜。零乱残英片片，飞上舞筵歌席。断肠忍泪念前期，经岁还有芳容隔。

早梅香

北帝收威，又探得早梅，漏春消息。粉蕊琼苞，拟将胭脂，轻染颜色。素质盈盈，终不许、雪霜欺得。奈化工、偏宜赋与，寿阳将饰。

独自逞冰姿，比夭桃繁杏，迥然殊别。为报山翁，逢此有花，樽前且须攀折。醉赏吟恋，莫辜负、好天风月。恐笛声悲，纷纷便似，乱飞香雪。

马家春慢

珠箔风轻，绣帘浪卷，乍入间蓬岛。斗玉阑干，渐庭馆帘栊春晓。天许奇葩贵品，异繁杏、夭桃轻巧。命化工、倾国风流，与一枝纤妙。

樽前五陵年少。纵丹青异格，难别颜貌。悲露凝烟，困红娇额，微嚬低笑。须信浓香易歇，更莫惜、醉攀吟绕。待舞蝶游蜂，细把芳心都告。

望梅

画阑人寂，喜轻盈照水，犯寒先拆。袅芳枝、云缕蛟绡，露浅浅涂黄，汉宫娇额。翦玉裁冰，已占断、江南春色。恨风前素艳，雪里暗香，偶成抛掷。

如今眼穿故国。待拈花嗅蕊。时话思忆。相陇头、依约飘零，甚千里芳心，杳无消息。粉怯珠愁，又只恐、吹残羌笛。正斜飞、半窗晓月，梦回陇驿。

望梅

小寒时节，正同云暮惨，劲风朝烈。信早梅、偏占阳和，向日暖临溪，一枝先发。时有香来，望明艳、瑶枝非雪。想玲珑嫩蕊，绰约横斜，旖旎清绝。

仙姿更谁并列。有幽香映水，疏影笼月。且大家、留倚阑干，对绿醕飞觥，锦笺吟阅。桃李繁华，奈比此、芬芳俱别。等和羹大用，休把翠条谩折。

洞仙歌

蓬莱宫殿。去人间三万。玉体仙娥有谁见。被月朋雪友，邀下琼楼，溪桥畔。相对寒光浅浅。

一般天上格，独带真香，冰麝犹嫌未清远。似太真望幸，一饷销凝，愁未惯。消瘦难禁素练。又只恐。东风跋寒来，伴神女同归，阆峰仙苑。

洞仙歌

摧残万物，不忍临轩槛。待得春来是早晚。向纷纷、雪里开，一枝见。清香满。漏泄东君先绽。

暗香浮动、疏影横斜，只这些儿意不浅。怎禁他，澹澹地、匀粉弹红，争些儿、羞杀桃腮杏脸。为传语、东风共垂杨，奈辛苦，千丝万丝撩乱。

洞仙歌

断云疏雨，冷落空山道。匹马骎骎又重到。望孤村，两三间、茅屋疏篱，溪水畔、一簇芦花晚照。寻思行乐地，事去无

痕。回首湘波与天杳。叹人生几度，能醉金钗、青镜里、赢得朱颜未老。又入枝头、一点破黄昏，问客路春风，为谁开早。

洞仙歌

梳风洗雨，兰蕙摧残后。玉蕊檀芳做霜晓。板桥平，溪岸小。月下归来、乘露冷，赢得清香满抱。

一枝春在手，细嗅重看，风味人间自然少。拟欲问东君，妙语难寻，搜索尽、池塘春草。想不是、诗人赏幽姿，纵竹外横斜，是谁知道。

摸鱼儿

岁华向晚，遥天布同云，霰雪轻飞。前村昨夜漏春光，楚梅先放南枝。叹东君运巧思。裁琼镂玉妆繁蕊。花中偏异。解向严冬逞芳菲。免使游蜂粉蝶戏。梁台上，汉宫里。殷勤仗、高楼羌管休吹。何妨留取凭阑干，大家吟玩欢醉。待明年，念芳草、玉孙万里。归未得、仙源应是。又被花、开向天涯、泪洒东风对桃李。

春雪间早梅

梅将雪共春。彩艳灼灼不相因。逐吹霏霏能争密，排枝碎碎巧妆新。谁令香来满坐，独使净敛无尘。芳意饶呈瑞，寒光

助照人。玲珑次第开已遍，点缀坐来频。那是俱怀疑似，须知造花，雨各逼真。荧煌清影初乱眼，浩荡逸气忽迷神。未许琼花并重，将从玉树相亲。先期迎献岁，更同歌酒占兹辰。六华蜡蒂相辉映，轻盈敢自珍。

万年欢

北陆风回，顿园林凋尽，庭院岑寂。潇洒寒梅，偷报艳阳消息。素澹英姿粹质。天赋与、出伦标格。一枝向、雪里初开，纤说清香寻得。

神仙乍离姑射。更琼妆翠佩，冰莹肌骨。仿佛华清浴罢，懒匀脂泽。陇上休轰怨笛。且留取、累累成实。终须待、金鼎调羹，偏与群芳春色。

万年欢

天气严凝，乍寒梅数枝，岭上开拆。傅粉凝脂，疑是素娥妆饰。先报阳和信息。更雪月、交光一色。因追念，往日欢游，共君携手同摘。

别来又经岁隔。奈高楼梦断，无计寻觅。冷艳寒容，啼雨恨烟愁湿。似向人前泪滴。怎不使、伊家思忆。惟只恐，寂寞空枝，又随昨夜羌笛。

雨中花

梦破江南春信，渐入江梅，暗香初发。乞与横斜疏影，为怜情绝。梁苑相如，平生有赋，未甘发。便广寒争遣，韶华惊怨，讵妨轻折。

扬州二十四桥歌吹，不道画楼声歇。生怕有、江边一树，要堆轻雪。老去苦无欢事，凌波空有纤袜。恨无好语，何郎风味，定教谁说。

早梅芳（雪梅）

冰唯清，玉唯润。清润无风韵。此花风韵，自然清润传香粉。故应春意别，不使凡英恨。到春前腊后，长是寄芳信。

此情闲，此意还。一点萦方寸。风亭水馆，解与行人破离恨。广寒宫未有，姑射仙曾认。向雪中月下，吟未尽。

婆罗门

江南地暖，数枝先得岭头春。分付似、翦玉裁冰。素质偏怜匀澹，羞杀寿阳人。算多情留意，偏在东君。

暗香旋生。对澹月与黄昏。寂寞谁家院宇，斜掩重门。墙应半开，却望雕鞍无故人。断肠处、容晚飘零。

踏青游

岭上梅残，堤畔柳眠娇小。绽数枝、横烟临沼。既大雅，且农丽，繁而不扰。冒寒来、游蜂戏蝶尚阻，年年占得春早。

澹白轻红，清香迎芳道。更情与、碧天如扫。魏台争，吴姬袖，妖妍多少。为传语、无言分付甘桃李，不比闲花浪草。

绛都春

东君运巧。向枝头点缀，琼英虽小。全是一般，风味花中最轻妙。横斜疏影当池沼。似弄粉、初临鸾照。众芳皆有，深红浅白，岂能争早。

莫厌金樽频倒。把芳酒赏花，追陪欢笑。有愿告天，愿天多情休教老。奇花也愿休残了。免乐事、离多欢少。易老难叙衷肠，算天怎表。

雪梅香

岁将暮，云帆风卷正凄凉。见梅花呈瑞，素英澹薄含芳。千片逞姿向江国，一枝无力倚邻墙。凝眸望，昨夜前村，雅态难忘。

争妍斗鲜洁，皓彩寒辉，冷艳溥香。姑射真人，更兼粉傅容光。梁苑奇才动佳句，汉宫娇态学严妆。无繆恨，独对光辉，别岸垂杨。

雪梅香

冻云深，六出瑶花满长空。渐飘来呈瑞，皑皑万里皆同。
荒野枯冰竦欲折，小亭寒梅吐轻红。香清，疏影横斜，照水溶溶。

临风。传芳信，驿使来自，庾岭南峰。占早争先，总无粉蝶游蜂。妆点鲜妍汉宫里，羌笛呜咽画楼东。赏南枝，倚阑凝望，时见征鸿。

千秋岁

腊残春近。江上梅开粉。一枝漏泄东君信。寿阳妆面靓，
姑射冰姿莹。似浅杏。清香试与分明认。

只恐霜侵破，又怕风吹损，待折取，还不忍。莫将花上貌，
来点多情鬓。凝睇久，行人立马成遗恨。

月上海棠

南枝昨夜先回暖。便临寒、开花暗香远。化工忒乜，把琼瑶、恣情裁剪。皑皑的、点缀梢头又遍。

横斜影蘸清溪浅。似玉人、临鸾照粉面。大家休折，且迟留、对花开宴。祝东风、吹作和羹未晚。

眼儿媚

前时同醉曲江滨。初样小梅春。花列人远，几经风雨，结子青青。谁知别后无肠断，行尽水云程。修峰万仞，邮亭息鞅，独对黄昏。

相见欢

月明疏影林间。水潺潺。一点浓香十里、渡关山。
且莫负。好分付。冷无眠。只怕笛声呜咽、到愁边。

捣练子（八梅）

捣练子，赋梅枝。暖借东风次第吹。自是百花留不住，让教先发放春归。

捣练子，赋梅芳。柳绿桃红谩点妆。试问仙标横竹外，敢同高节伴冰霜。

捣练子，赋梅红。玉体凝酥半醉中。诗酒兴来须要早，忍看红雨落西东。

捣练子，赋梅香。蕙魄兰魂又再阳。只为人间无着处，借他龙笛返仙乡。

捣练子，赋梅英。枝上商量细细生。不是根株贪结子，被吹羌笛两三声。

捣练子，赋梅妆。镜里佳人傅粉忙。额子画成终未是，更须插向鬓云傍。

捣练子，赋梅音。云底江南树树深。怅望故人千里远，故将春色寄芳心。

捣练子，赋梅青。休共檀梨取次争。叶底青青如豆小，已知金鼎待和羹。

鹧鸪天

冷落人间昼掩门。冷冷残粉麝成纹。几枝影溪边见，一拂清香马上闻。

冰作质，月为魂。萧萧细雨入黄昏。人间暂识东风信，梦绕江南云水村。

鹧鸪天

梦草池塘春意回。巧传消息是寒梅。北枝休羡南枝暖，凭仗东风次第开。

酥点萼，粉匀腮。未攀已得好香来。西邻且莫吹羌笛，留待行春把酒杯。

鹧鸪天

雪屋冰床深闭门。缟衣应笑织成纹。雨中清泪无人见，月下幽香只自闻。

长在眼，远销魂。玉奴那忍负东昏。偶然谪坠行云去，不入春风花柳村。

鹧鸪天

小槛冬深未破梅。孤枝清瘦耐风埃。月中寂寞无人管，雪里萧疏近水栽。

微雨过，早春回。阳和消息自天来，才员根多谢东君力，琼蕊苞红一夜开。

鹧鸪天

春入江梅破晚寒。冻枝惊鹊语声乾。离愁满抱人谁问，病耳初闻心也宽。

风细细，露珊珊。可堪驿使道漫漫。斜梢待得人来后，簪向乌云仔细看。

鹧鸪天（蜡梅）

别得东皇造化恩。黛消铅褪自天真。耻随庾岭花争白，疑是东篱菊近魂。

风淡淡，月盈盈。麝煤沈馥动孤根。寒蝉冷蝶知何处，惟有蜂房不待春。

浣溪纱

水净烟闲不染尘。小山斜卧几枝春。夜寒香惹一溪云。
粉淡朱轻妆未了，十分孤迥好精神。为伊清瘦却愁人。

浣溪纱

冉冉飞云横画阑。黄昏烟雨满江干。小梅香浅不禁寒。
楼上风轻帘不卷，酒红销尽妆残。玉人斜捻一枝看。

浣溪纱

十月开花是子真。小春分付与精神。折来含露晓妆新。
暖意便从窗下见，粉容何待鉴中匀。宛然长似玉花清。

浣溪纱

梅粉初娇拟嫩腮。一枝信腊前开。玉英珠颗傍妆台。
明月泛将疏影去。暗香疑是那人来。消魂独自立空阶。

浣溪纱（茶梅）

翦碎红娘舞旧衣。汉宫妆粉满琼枝。东风来晚未曾知。
颜色不同香小异，瑶台春近宴回时。宝灯相引素娥归。

浣溪纱（蜡梅）

梅与为名蜡与容。寒枝偏缀小金钟。插时只恐鬓边熔。
疑是佳人熏麝月，起来风味入怀浓。暗香依旧月朦胧。

浣溪纱（蜡梅）

梅与称名蜡与黄。枝无袅娜色无光。掩檀欺麝冠群芳。
结处定缘蜂力就，开时微带蜜脾香。风标不减寿阳妆。

太常引

行云踪迹杳无期。梅梢上、又春归。不道久别离。这一度、
清香为谁。

多情嘱付，庾楼羌管，凭仗且休吹。留取两三枝。待和泪、
封将寄伊。

太常引

江梅开似蕊珠宫。报桃李、又春风。蓦岫看前峰，待摘取、
横斜盏中。魏林楚岭，素妆清绝，不与众芳同。和月映帘栊。
羞几点、施朱太红。

小重山

竹里清香帘影明。一枝照水弄精神。楼头横管罢龙吟。
休三弄，留为与调羹。

紫陌与青门。溪边浮动处，绝纤尘。等闲休付寿阳人。潇
洒处，月淡又黄错。

小重山

不是蛾儿不是酥。化工应道也难摹。花儿清瘦影儿孤。多
情处，时有暗香浮。

试问玉肌肤。夜来霜雪重，怕寒无。一支欲寄洞庭姝。可
惜许。有雁衔芦。

小重山

天际春来都为君。依稀丹萼动，泛红云。恼人天气近黄昏。
霜月底，山麝斗微薰。

标格自天真。寿阳仙骨瘦，玉无纹。芳容临鉴洗余醺。双
蛾稳，花面两难分。

西地锦

不与群花相续。独占春光速。幽香远远散西东，惟竹篱茅屋。

羌管谁调一曲。送月夜、犹芬馥。凭君折取向玉堂，只这些清福。

西地锦

岭上初消残雪。有梅花先坼。东君造化多成翠，巧风韵奇绝。

小院黄昏时节。暗香浮、疏影横斜。寄取和羹未晚，却免教攀折。

踏歌

带雪。向南枝，一朵江梅坼。许多时、甚处收香白。占千葩百卉、先春色。拟莹洁。正广寒宫殿人窥隔。销魂处、画角数声彻。

暗香浮动黄昏月。最潇洒处最奇绝。孤标迥、不与群芳列。吟赏竟边宵，痛饮无休歇。输有心牧童偷折。

感皇恩

翦玉蹙花苞，腊寒时候。间竹横溪自清瘦。黄昏时候，拂拂暗香微透。寿阳妆面恨，眉频斗。

堪赏占断，三春先手。不是东君意偏有。百花羞尽，故教孤芳独秀。只愁明月夜，笛声奏。

枕屏儿

江国春来，留得素英肯住。月笼香，风弄粉，诗人尽许。酥蕊嫩，檀心小，不禁风雨。须东君、与他做主。

繁杏夭桃，颜色浅深难驻。奈芳容，全不称，冰姿伴侣。水亭边，山驿畔，一枝风措。十分似、那人淡伫。

忆秦娥

瑶台月。寒光零乱蒙香雪。蒙香雪。横枝疏影，动人清彻。分明姑射仙骨。冰姿雪里难埋没。难埋没。百花头上，为春先发。

望江南

梅花好。满树锦江边。不似武陵曾见日，清香冷艳扑尊前。销得醉留边。凭造化，分付与花权。已共雪光争腊早，且将春信为君传。桃李莫夸先。

望江南

梅花好，依约透春光。记得佳人初睡起，巧临鸾鉴试新妆。
粉面斗琼芳。

江亭上，绕树嗅清香。拟把一枝传信去，不知何处是兰房。
独自暗凄凉。

品令

山重云起。断桥外、池塘水。晓来风定。竹枝相亚，残阳
影里。多少风流，都在冷香疏蕊。

江南千里。问折得、谁能寄。几番归去，酒醒月满，阑干
十二。且隐深溪，免笑等闲桃李。

品令

一阳生暖。见庚岭、梅初绽。琼枝玉树，浑如傅粉，寿阳
妆面。疏影横斜，隐隐月溪清浅。

前村雪里，向雪里、真难辨。倩谁说与、高楼人道，休吹
羌管。且与从容。来岁和羹未晚。

品令

雪花飞坠。有人报、江南意。博山炉畔，砚屏风里，铜槃
寒水。赋得幽香，疏散数枝相倚。

绛肤黄蕊。另一种、高标致。笛中芳信，岭头春色，不传红紫。寂寞闲亭，月下夜阑影碎。

相思引

笑盈盈，香喷喷。姑射仙人风韵。天与肌肤常素嫩。玉面犹嫌粉。

斜倚小楼凝远信。多少往来人恨。只恐乘云春雨因。迢迢娇容褪。

相思引

半苞红，微露粉。潇洒早梅犹嫩。香入梦魂残酒醒。芳意相牵引。不畏晓霜侵手冷。欲折一枝芳信。折得却无人寄问。争信相思损。

庆金枝

新春入旧年，绽梅萼、一枝先。陇头人待信音传。算楚岸、未香残。

小枕风雪凭栏干。下帘幕、护轻寒。年华永占入芳筵。付尊前、渐成欢。

菩萨蛮

天威乱糝琼蕤密。一光吞尽千山碧。梅与雪争妍。孤香风暗传。

玉骨从来瘦。不奈春僝僽。羌管一声残。水乡生暮寒。

菩萨蛮

黄昏月暗清溪色。帘垂小阁霜华白。一夜玉玲珑。横斜水有中。

小行孤影动。生怕惊花梦。半夜得春归。屏山人未归。

菩萨蛮

霜天不管青山瘦。轻云浅拂修眉皱。烟树隔潇湘。隔帆吹异香。

影残春恨小。淡墨欹斜倒。无处着消愁。笛寒人倚楼。

南乡子

梅蕊露鲜妍。雪态冰姿巧耐寒。南北枝头香不断，堪观。露浥琼苞粉未干。

画手写应难。横管休吹恐易残。留得佳人临晓际，凭栏。试把新妆比并看。

南乡子

把酒对江梅。个是花中第一枝。冰雪肌肤潇洒态，须知。
姑射仙人正似伊。

东阁赋新诗。惭愧当年杜拾遗。月里何人横玉笛，休吹。
正是芳梢著子时。

南乡子

莫作俗花看。珠有清香雪太寒。拟把千钟酬国艳，林间。
醉倒犹嫌酒量慳。

欲去更重攀。送尽斜阳未忍还。争得重城休上锁，留连。
借取冰轮照玉颜。

南乡子

醉捻一枝春。此意谁人会得君。嫩白轻红才入手，盈盈。
一似前时酒半醺。

心眼两相亲。绝代风流恼杀人。粉蝶霜禽休怅望，叮咛。
只要扬州作主盟。

南乡子

栏槛对幽堂，翠叶枝头万朵霜。檀口乍开龙麝喷，非常。
体胜佳人异骨香。

花与月争光。偏引蜂儿戏绕墙。不与群英争艳丽，芬芳。
溪落东君只淡妆。

南乡子

凛冽苦寒时。万木凋枯力渐衰。昨夜前村深雪里，春回。
庾岭南枝绽早梅。映月与清辉。驿使加鞭喜探回。风送馨香来
小院，芳时。料想群花尚未知。

南乡子（催梅）

把酒祝江梅。春到南枝早早开。人在陇头凝望久。徘徊。
驿使如今尚未来。

寄语莫相催。直待东风细剪裁。只恐未能传信息，妆台。
先要飞来亲粉腮。

夏金钗

梅蕊破初寒，春来何太早。轻傅粉、向人先笑。比并年时
较些少。愁底事，十分清瘦了。

影静野塘空，香寒霜月晓。风韵减、酒醒花老。可杀多情

要人道。疏竹外、一枝斜更好。

人月圆

园林已有春消息，寻待岭头梅。一枝清淡，疏疏带雪，昨夜初开。

芳心几点，东风多少，先为传来。不随红紫，纷纷闹闹，蝶妒蜂猜。

一斛珠

寒冰初泮。岭头一朵香苞绽。萼萼如画真堪羨。休逞随风、柳絮垂金线。

月宫每嬖开较晓。寿阳又喜匀妆面。更闻何处鸣羌管。一曲一声、惹起神撩乱。

解佩令

蕙兰无韵，桃李堪扫。都不数、凡花闲草。对月临风，长是伊、故来相恼。和魂梦、被他香到。江头陇畔，争先占早。一枝枝、看来总好。似恁风标，待发愿、春前祈祷。祝东君、放教不老。

醉花阴

粉妆一捻和香聚。教露华休妒。今日在尊前，只为情多，脉脉都无语。

西湖雪过留难住。指广寒归去。去后又明年，人在江南。梦到花开处。

醉花阴

霓裳浅艳来何处。不是闲云雨。雪苑旧精神，燕席吟窗，昨夜生轻素。

珊珊岂是东风妒。惜暗香分付。香在玉清宫，不惹年华，只带春寒去。

扫寺舞

酥点萼。玉碾萼。点时碾时香雪薄。才折得。春方弱。半掩朱扉，垂绣幕。怕吹落。

捻一饷。嗅一饷。捻时嗅时宿酒忘。春争上。不忍放。待对菱花，斜插向。宝钗上。

玉楼人

去年寻处曾时酒。还是向、南枝见后。宜霜宜雪精神，没

些儿、风味减旧。

先春似与群芳斗。暗度香、不待频嗅。有人笑折归来，玉纤长、尽露罗袖。

燕归梁

月里云装冷艳裁。独秀在岩隈。雪中昨夜一枝开。探春色岁前来。

清香折得，多情寄与，人向龙头回。凭君移取近瑶台。伴桃李、日边栽。

忆人人

密传春信。微妆晓景，淡伫香苞欲绽。临风虽未吐芳心，奈暗露、盈盈粉面。

何人月下，一声长笛，即是飞英凌乱。凭阑无惜赏芳姿，更莫待、倾筐已满。

忆人人

前村深雪，难寻幽艳，无奈清香漏绽。烟梢霜萼出墙时，似暗妒、寿阳妆面。

幽香浮动，无缘攀赏，但只心劳魂乱。不辞他日醉琼姿，又只恐、阴成子满。

采桑子

阳和欲报春来也，先上南枝。桃李休疑。折偏香梢人未知。
黄昏小院谁攀折，疏影斜欹。半掩朱扉。旋嗅清香月下归。

采桑子

江南春信梅先赋，休道春迟。映竹开时。姑射仙人雪作肌。
青楼且莫吹羌管，留劝金卮。折取南枝，香满名园蝶未知。

采桑子

南枝淡伫无妖艳，蜡蕊羞黄。争似红妆。不假施朱弄晓光。
雪融日暖琼肌腻，酒晕生香。桃脸相当。尤笑桃花混众芳。

采桑子

幽芳莹白前村里，岂藉春工。胜尽群红。琼捻凝酥向不同。
一声羌管愁人处，片片西东。睹此遗踪。不怨狂风怨马融。

采桑子

东君意观君卉，故放争先。带露含烟。对月偏宜映水边。
琼苞素蕊胭脂淡，雪后风前。堪赏堪怜。曾与歌楼佐管弦。

采桑子

群芳尽老园林烬，独有寒梅。探得春回。昨夜前村一朵开。
轻盈雪里孤根秀，素脸香腮。羌管休催。留取琼葩佐酒杯。

采桑子

霜风漏泄春消息，折破孤芳。野兴傍徨。姑射神仙触处藏。
新妆不假施朱粉，雪月交光。欲赠东皇。冷淡龙涎点点香。

采桑子

烟笼淡月寒宵永，悄悄帘栊。微度香风。几点梅开小院中。
拥衾欹枕难成寐，萧寺初钟。雁响遥空。家在青山千万里
重。

采桑子（再雪中）

飞琼欲赴瑶台宴，先具威仪。云驾霓衣。从者皆骑白凤飞。

人间尽变为银海，此景偏奇。姑射冰姿。昨夜前村见一枝。

采桑子（蜡梅）

熔金脱得花钿小，点缀琼枝。月淡风微。露浥香肌自是奇。
玉人呵手昂头翦，纤鬓边垂。似簇蜂儿。春入芳容不步飞。

寻梅

幽香浅浅湿未透。认雪底、思来始有。剪裁尚觉琼瑶皱。
苦寒中、越恁骨清肌瘦。

东风气象园林旧。又去年、而今时候。急宜小摘当尊酒。
选一枝、且付玉人纤手。

鞞红

粉香尤嫩，衾寒可惯。怎奈向、春心已转。玉容别是，一般闲婉。
悄不管、桃红香浅。月影帘栊，金琼波面。渐细细、香风满院。
一枝折寄，故人虽远，辄莫使、江南信断。

武林春

昨夜前村深雪里，春信为谁传。风送清香满座间。不有热

沈檀。

竹外一枝斜更好，偏称玉人攀。休放游蜂去又还。嫌怕损芳颜。

瑞鹧鸪

临鸾常恁整妆梅。枝枝仙艳月中开。可杀天心、故与多端丽，那更罗衣峭窄裁。

几回蟾蜍魂消黯，芙蓉匀透双腮。好将心事、都分付与，时暂到、小庭来。玉砌红芳点绿苔。

瑞鹧鸪（蜡梅）

汉宫铅粉净无痕。蜡点寒梢水畔村。忍犯冰霜欺竹柏，肯同雪月吊兰荪。

骚人咏去清诗健，驿使传来旧典存。病眼浑疑春思早，一枝聊洗画图昏。

瑞鹧鸪（蜡点梅花）

柳未回青兰未芽。谁知此物在君家。绿窗借得先春手，黄蜡吹成耐冻花。

衣麝暗薰香仿佛，山蜂误认影横斜。凭君说与徐熙道，翰墨从今不足夸。

一落索

腊后东风微透。越梅时候。一枝芳信到江南，来报先春秀。
宿醉频拈轻嗅。堪醒残酒。笛声容易莫相催，留待纤纤手。

鬓边华

小梅香细艳浅。过楚岸、尊前偶见。爱闲淡，天与精神，
掠青鬓、开人醉眼。

如今抛掷经春，恨不见、芳枝寄远。向心上、谁解相思，
赖长对、妆楼粉面。

御阶行

平生有个风流愿。愿长与梅为伴。问伊因甚破寒来，只恐
百花先绽。比兰比麝，比酥比玉，休恁闲撩乱。

瑶台月下分明见。依旧残妆浅。不知分得几多香，一片清
如一片。直须遮断，恐人眼毒，不解轻轻看。

西江月

北岭天饶瑞雪，南枝地段苞。朦胧霁月映寒消。谁把玉人

纱罩。

香胜炉薰龙麝，奇过庭拥琼瑶。一杯清酒愿相招。慰我茅堂清瘦。

西江月

翡翠枝头晚萼，婵娟月里飘香。春兰秋蕙作寻常。不与夭桃朋党。

笑见深红浅白，从教蝶舞蜂忙。风流标致道家妆。潇洒得来别样。

西江月（蜡梅）

黄蜡谁将点缀，红膏不许施妆。孤根来自水云乡。风味天然酝酿。

看取玉奴呵手，摘来珠露沾裳。翠鬟斜插一枝香。似簇蜂儿头上。

西江月

万木经霜冻折，孤根独报春来。前村雪里一枝开。将缓月华光彩。

一点唇红不褪，妆如傅粉皑皑。和羹端的禀天才。终入庖人鼎鼐。

蝶恋花

暖发黄宫和气软。雪里精神，巧借东君翦。嫩蕊商量春色浅。青枝疑是香酥溅。
谁道和羹芳信远。点点微酸，已向枝头见。休待玉英飞四散。且移疏影横金盏。

桃源忆故人

园林万木凋零尽。惟是寒梅香喷。不许雪霜欺损。迥有天然性。
南枝渐吐红苞嫩。冠绝夭桃繁杏。不记故人音信。对影成离恨。

桃源忆故人

江天雪意云飞重。却倚阑干初冻。回傍小楼独拥。尽日无人共。
墙梅未落春先纵。欲寄一枝谁送。月夜暗香浮动。似作离人梦。

桃源忆故人（蜡梅）

南枝向暖清香喷。谁付骚人词咏。一种陇头春信。不借胭脂晕。

梢头谁把轻黄搵。浑似不忺施粉。疑是寿阳孤冷。染得相思病。

桃源忆故人

寒苞初吐黄金莹。色染蔷薇犹嫩。枝上紫檀香喷。洒落饶风韵。

南枝一种同春信。何事不忺朱粉。自称霓裳孤冷。怨感宫腰恨。

添字浣溪沙（白梅）

雪态冰姿好似伊。料应尝笑水仙迟。驿使初传芳信早，赏佳期。

暗想花神多巧妙，黏酥缀玉压纤枝。粉面临鸾宜月殿，整妆时。

添字浣溪沙（红梅）

谁染深红酥缀来。意浓含笑美颜开。误认浣溪人饮罢，上香腮。

辨杏疑桃称好句，名园色异占多才。折得一枝斜插鬓，坠金钗。

添字浣溪沙

取次匀妆粉有痕。参差玉软淡精神。姑射重绡风卷乱，喜相迎。

蝶戏飞层双翅重，清中富贵最多情。全似寿阳当日事，点残英。

添字浣溪沙（蜡梅）

蜜室蜂房别有香。腊前偏会泄春光。凝伫清容何所似，笑姚黄。

蜡注金钟诚得意，风飘气味压群芳。不似寿阳夸粉面，道家妆。

玉交枝

胆样瓶儿几点春。翦来犹带水云痕。且移孤冷，相伴最深樽。

每为惜花无晓夜，教人甚处不销魂。为君惆怅，独自倚黄昏。

玉交枝（蜡梅）

蕙子兰孙小样儿。化工簇就寄南枝。笑他兰蕙，虽韵带轻肥。
香霭紫檀和雾重，色攒黄蜡界金徽。有人潇洒，插向鬓边宜。

玉交枝

谁道花房采蜜脾。翦成黄蜡小花儿。恶嫌朱粉，不肯肖青枝。
檀吐暗香兰许韵，月移芳影雪生肌。不妨花蕊，羌笛尽教吹。

玉楼春

迢递前村深发里。望断行云香细细。笛中宫里慕芳姿，怨曲啼妆长见泪。
不会同心荣落易。冷艳翻随分岭水。有谁曾念陇头人，远寄江南春日意。

玉楼春

萧萧海上风长起。也有梅花开玉蕊。爱君风措莹如冰，伴我情怀清似水。

诗人纵复工难拟。莫把闲花容易比。浓香吹尽不须愁，细雨微风催结子。

玉楼春（蜡梅）

腊前先报东君信。清似龙涎香得润。黄轻不肯整齐开，比着红梅仍旧韵。

纤枝瘦绿天生嫩。可惜轻寒摧挫损。刘郎只解误桃花，怅恨今年春又尽。

捣练子

欺万木，怯寒时。倚阑初认月宫姬。拭新妆，披素衣。孤标韵，暗香奇。冰容玉艳缀琼枝。借阳和，天付伊。

喜团圆

轻攒碎玉，玲珑竹外。脱去繁花。尤谗东君，最先点破，压倒群花。

瘦影生香，黄昏月馆，清浅溪沙。仙标淡伫，偏宜么凤，肯带栖鸦。

愁倚栏

冰肌玉骨精神。不风尘。昨夜窗前都折尽，忽疑君。
清泪拂拂沾由巾。谁相念、折赠芳春。羌管休吹别塞曲，
有人听。

减字木兰花

庭梅初绽。风递幽香清更远。别有孤根。不待阳和一点恩。
雪中风韵。皓质冰姿真莹静。月下精神。来到窗前疑是君。

减字木兰花

疏梅风韵。不许游蜂飞蝶近。要识芳容。除向瑶台月下逢。
尊前一见。换尽平生桃李眼。却笑襄王。楚梦无踪空断肠。

减字木兰花

山城驿近。又报寒梅传驿信。远水孤村。月下何人与断魂。
幽芳在手。花木无情那得瘦。似此天真。好赠东阳姓沈人。

减字木兰花

香肌清瘦。泪湿轻红疏雨后。笑靥微开。宿雨微醺越女腮。
多情无奈。玉管休吹帘影外。薄晚池台。惆怅繁华梦里来。

减字木兰花

东君有待。留得一枝香雪在。晚日融融。只恐轻酥暖渐熔。
歌催管送。芳酒一尊谁与共。寂寞墙东。潇洒黄昏满院风。

减字木兰花（蜡梅）

鹅黄初吐。无数蜂儿飞不去。别有香风。不与南枝斗浅红。
凭谁折取。拟把玉人分付与。碧玉搔头。淡淡霓裳人倚楼。

减字木兰花

园林衰槁。一品梅花开太早。紫蕊檀心。独占中央色似金。
幽香清远。对景开尊同赏玩。雅称仙姿。莫是多情染相思。

临江仙

漏出春光三四朵，冰肌玉骨偏宜。乍开应笑百花迟。将军
曾止渴，画角已先知。

素艳不容蜂蝶采，清香自有人知。而今虽被霜雪欺。和羹终待手，金鼎自逢时。

临江仙

陇首云收天色暮，寒光射月初开。昆荆山玉莫疑猜。琳琅疑此地，仙子不红腮。

丽质霜裾真性雅，余香暗送从来。乱将碎玉缀枝排。雪中寻不见，青萼辨奇才。

临江仙

昨夜新阳回候馆，芳菲正满霜林。此时珍赏重千金。谁知红粉艳。还有岁寒心。

风动霞衣香散漫，酒醺丹脸深沈。妖娆偏称美人簪。一枝无处赠，折得自孤吟。

临江仙

爱日新添春一线，化工先到寒梅。不随桃李傍熙台。前村深雪里。昨夜一枝开。

姑射仙人标格韵，凝墙粉谢香腮。数家清弄笛声哀。愁人不怨听，自向枕边来。

临江仙

玉貌香腮天赋与，清姿不假铅华。素芳寻在五陵家。欲知春信息，庾岭一枝斜。别有玲珑潇洒处，月梢淡影笼遮。休教羌笛一声嗟。宫妆犹未似，留取意无涯。

踏莎行

枝绿初匀，萼红犹浅。化工妆点年华晚。暗香疏影水亭边，黄昏月下依稀见。

十二危楼，谁人倚遍。只愁羌笛声幽怨。少留情意待春来，东君准拟长拘管。

踏莎行

萼破前村，枝横江路。铁心应也频凝伫。怕愁惟恐不禁愁，宁教雪月相分付。

不测春来，难追香去。无人知我心先误。多情总道是东君，东君也有无情处。

踏莎行

点点琼酥，初寒乍结。看来未忍轻轻折。园林正告久萧条，

春工著意饶先发。

眼底不凡，枝头自别。也知彻苦宜霜雪。这般风味恁馨香，
怎教桃李同时节。

玉母池边，曾记旧识。玉京仙苑新移得。素娥青女好精神，
比看终是无颜色。

传入汉宫，偷拟妆饰。寿阳空恁劳心力。寒香都不为春来，
莫将远寄春消息。

渔家傲

蕙死兰枯篱菊槁。返魂香入江南早。竹外一枝斜更好。谁
解道。只今惟有东坡老。

去岁花前人醉倒。酒醒花落嫌人扫。人去不来春又到。愁
满抱。青山一带连芳草。

渔家傲

雪点江梅才可可。梅心暗弄纤纤朵。疑是月娥庭下过。仙
翘钿。云衫密缀真珠颗。

玉斝金瓯连臂坐。芳辰莫把离魂挫。一曲绣筵娇婀娜。情
无那。阳关声里樱桃破。

定风波

又是春归烟雨村。一枝香雪度黄昏。竹外云低疏影亚。潇洒。水清沙浅见天真。

瘦玉欺寒香不暖。堪羨。冰姿照夜月无痕。楼上笛声休听取。说与。江南人远易销魂。

定风波

一树寒梅傍小溪。夜来陡觉绽南枝。冷艳冰姿金蕊浅。堪羨。凝明因与雪霜期。

折赠美人临宝鉴。云脸。鬓边斜插最相宜。凭仗高楼频祝付。说与。马融羌管且停吹。

鹊踏枝

南国寒轻山自碧。庭际梅花，先报春消息。绮萼玉英何忍摘。真堪树下陈瑶度。

旋嗅清香酒力。翦采无功，粉笔争描得。一曲新欢须共惜。等闲零落羌笛。

鹊踏枝

故里山遥春霭碧。为想繁枝，清梦何曾息。缣带霜英人摘。纷纷日暮飘綈席。

休抱离肠凭酒力。只有轻纨，依约应传得。白发未归空自

惜。柔肠寄尽平阳笛。

清平乐

寒溪过雪。梅蕊春前发。照影弄姿香苒苒。临水一枝风月。
梦游仿佛仙乡。绿窗曾见幽芳。事往无人共说，愁闻玉笛
声长。

春光好

看看腊尽春回。消息到、江南早梅。昨夜前村深雪里，一
朵花开。

盈盈玉蕊如裁。更风细、清香暗来。空使行人肠欲断，驻
马裴回。

殢人娇（后庭梅花开有感）

玉瘦香浓，檀深雪散。今年恨、探梅较晚。江楼楚馆。云
闲水远。清昼永，凭阑翠帘低卷。

坐上客来，尊中酒满。歌声共、水流云断。南枝可插，便
须频翦。莫直待、西楼数声羌管。

二色宫桃

镂玉香苞酥点萼。正万木、园林萧索。惟有一枝雪里开，江南有信凭谁托。前年记赏登高阁。叹年来、旧欢如昨。听取乐天一句云，花开处、且须行乐。

河传

香苞素质。天赋与、倾城标格。应是晓来，暗传东君消息。把孤芳、回暖律。寿阳粉面增妆饰。说与高楼。休更吹羌笛。花下醉赏。留取时倚阑干，斗清香、添酒力。

七娘子

清香浮到黄昏，向水边、疏影梅开尽。溪边畔，轻蕊有如浅杏。一枝喜得东君信。

风吹只怕霜侵损。更新来、插向多情鬓。寿阳妆鉴，雪肌玉莹。岭头别后微添粉。

忆少年

疏疏整整，斜斜淡淡，盈盈脉脉。徒怜暗香句，笑梨花颜色。

羁马萧萧行又急。空回首、水寒沙白。天涯倦牢落，忍一声羌笛。

浪淘沙

春色入横塘。变尽凄凉。青梢弄粉雪溪傍。疑是化工偏著意，欲试新妆。

玉蓓锁春藏。占断寒芳。他时鼎鼐不须忙。泄漏清香方有思，别是春光。

浪淘沙

雪里暗香浓。乍吐琼英。横斜疏影月明中。学傅胭脂桃与杏，虚废春工。

素艳有谁同。不并妖红。应如褒姒笑时容。绝胜梨花春带雨，旖旎春风。

浪淘沙

村左小溪傍。粉黛宜芳。寒添潇洒冷添霜。清瘦几枝堪入画，竹映苔墙。

疏影浸横塘。月暗浮香。当时曾伴寿阳妆。不似东君先倚槛，泄漏春光。

点绛唇

破萼江梅，迥然标格冰肌莹。暗香疏影。月张银塘静。
折取一枝，与插多情鬓。临鸾镜。粉容相并。试问谁端正。

点绛唇

烟淡黄昏，小移疏影横斜去。暗香微度。点缀梢头雨。
玉管休吹，更要留春住。人何处。对花无语。望断江南路。

点绛唇

点点江梅，向疏篱处香风逗。未容春透。花亦知人瘦。
姑射山头，谁伴黄昏后。君知否。自然孤秀。横玉休三奏。

点绛唇

雪里芳丛，岭头还报东君信。寿阳妆靓。姑射冰肌莹。
曲岸横斜，清浅波相应。风不定。暗香疏影。占断花中韵。

点绛唇

万木凋残，早梅独占孤根暖。前村雪满。昨夜南枝绽。堪
恨倚栏，容易吹羌管。飘琼片。翠蛾争选。贴向桃花面。

点绛唇

昨夜寒梅，一枝雪里多风措。幽香无数。不与群花语。
最是凝情，月夜交光处。谁为主。待须折取。羌管休轻举。

点绛唇

春日芳心，暗香偏向黄昏逗。玉肌寒透。抵死添清瘦。
影落横塘，月淡人归后。君知否。一枝先秀。应向东君奏。

点绛唇

赋雪归来，绿窗一夜霜风紧。也知春信。消息南枝近。隐
映斜阳，玉暖香成阵。西湖景。繁英有恨。只。

惜双双

冒雪披风开数点。万花压、欺寒探暖。掩映闲庭院。月下
疏影横斜，幽香远。

命友开尊同宴玩。听丽质、歌声宛转。对景侧金盏。任他
结实和羹，归仙馆。

朝中措

山城水隘小桥傍。竹里早梅芳。纵有丹青图画，难描幽韵清香。妖娆天赋，偏宜素淡，杨氏宫妆。雅态何须艳丽，孤标下在春光。

虞美人

清江一曲君应见。昨夜潮头浅。不争落落斗奇奇。看取水边寒蕊、雪边枝。

日斜疏影还欹倒。沙上娇字鹄老。只今何处有新诗。好在小春十月、醉翁辞。

醉落魄

琼搓粉滴。南枝只报江南坼。横斜疏影溪边窄。翦碎白云，分付陇头客。

冰肌绰约疑姑射，铅华消尽见真色。不随桃李开红白。我为东君，来报春消息。

醉落魄（赏梅）

梅花似雪。赏花记得得同欢悦。列阑犹自贪攀折。不怯春

寒，须要待明月。

如今月上花争发。疏枝冷蕊对离缺。人心只道花争别。不道人心，不似旧时节。

更漏子

宝香瓶，桐叶卷。荡水痕微还远。思乡信，觉春迟。野梅初见时。

上潮风，临晚渡。人欲过西江去。吹寒管，陇云低。江南花未知。

更漏子

绛纱笼，金叶盖。向晓灯花犹在。冰未结，小琉璃。陇梅香满枝。

雪无香，花有意。不是江南新寄。霜月尽，碧天寒。玉楼人倚阑。

落梅风

宫烟如水湿芳晨。寒梅似雪相亲。玉楼侧畔数枝春。惹香尘。

寿阳娇面偏怜惜，妆成一面花新。镜中重把玉纤匀。酒初醺。

古记

一枕恹恹春困。记得小梅风韵。何处最关情，嫩蕊初传芳信。堪恨。堪恨。谁傍横斜疏影。

古记

腊半雪梅初绽。玉屑琼英碎翦。素艳与清香，别有风流堪羡。苞嫩。蕊嫩。羞破寿阳人面。

古记

疑是水晶宫殿。云女天仙宝宴。吟赏欲黄昏，风送一声羌管。烟淡。霜淡。月在画楼西畔。

生查子

朔风吹冻云，云破天容碧。新月过溪来，隐见横云色。天与水争妍，花与月争白。一倩管城君，寄此春消息。

调笑集句

盖闻：行乐须及良辰，种情正在吾辈。飞觴举白，目断巫山之暮云；缀玉联珠，韵胜池塘之春草。集古人之妙句，助今日之馀欢。

珠璧合暗连文。月入千江体不分。此曲只应天上有，歌声岂合世间闻。

巫山

巫山高高十二峰。云想衣裳花想容。欲往从之不堪远，丹峰碧障深重重。楼阁玲珑五云起。美人娟娟隔秋水。江边一望楚天长，满怀明月人千里。

千里。楚江水。明月楼高愁独倚。井梧宫殿生秋意。望断巫山十二。雪肌花貌参差是。朱阁五云仙子。

桃源

渔舟容易入春山。别有天地非人间。玉颜亭亭花下立，鬓乱钗横特地寒。留君不住君须去。不知此地归何处。春来偏是桃花水，流水落花空相误。

相误。桃源路。万里苍苍烟水暮。留君不住君须去。秋月春风闲度。桃花零乱如红雨。人面不知何处。

洛浦

艳阳灼灼河洛神。态浓意远淑且真。入眼平生未曾有，缓步佯羞行玉尘。凌波不过横塘路。风吹仙袂飘飘举。来如春梦不多时，天非花艳轻非雾。

非雾。花无语。还似朝云何处去。凌波不过横塘路。燕燕莺莺飞舞。风吹仙袂飘飘举。拟倩游丝惹住。

明妃

明妃初出汉宫时。青春绣服正相宜。无端又被东风误，故著寻常淡薄衣。上马即知无返日。寒山一带伤心碧。人生憔悴生理难，好在毡城莫相忆。

相忆。无消息。目断遥天云自白。寒山一带伤心碧。风土萧疏胡国。长安不见浮云隔。纵使君来争得。

班女

九重春色醉仙桃。春娇满眼睡红绡。同辇随君侍君侧，云鬓花颜金步摇。一霎秋风惊画扇。庭院苍苔红叶遍。蕊珠宫里旧承恩，回首何时复来见。

来见。蕊宫殿。记得随班迎风辇。馀花落尽苍苔院。斜掩金铺一片。千金卖笑无方便。和泪盈盈娇眼。

文君

锦城丝管日纷纷。金钗半醉坐添春。相如正应居客右，当轩直马入锦茵。斜倚绿窗鸳鉴女。琴弹秋思明心素。心有灵犀一点通。感君绸缪逐君去。

君去。逐鸳侣。斜倚绿窗鸳鉴女。琴弹秋思明心素。一寸还成千缕。锦城春色知何许。那似还山眉妩。

吴娘

素枝琼树一枝春。丹青难写是精神。偷啼自搵残妆粉，不忍重看旧写真。佩玉鸣鸾罢歌舞。锦瑟华年谁与度。暮雨潇潇郎不归，含情欲说独无处。

无处。难轻诉。锦瑟华年谁与度。黄昏更下潇潇雨。况是青春将暮。花虽无语莺能语。来道曾逢郎否。

琵琶

十三学得琵琶成。翡翠帘开云母屏。暮雨朝来颜色故，夜半月高弦素鸣。江水江花岂终极。上下花间声转急。此恨绵绵无绝期。江州司马青衫湿。

衫湿。情何极。上下花间声转急。满船明月芦花白。秋水长天一色。芳年未老时难得。目断远空凝碧。

放队

玉炉夜起沈香烟。唤起佳人舞绣筵。去似朝云处觅。游间陌上拾花钿。

九张机

醉留客者，乐府之旧名；九张机者，才子之新调。凭戛玉之清歌，写掷梭之春怨。章章寄恨，句句言情。恭对华筵，敢陈口号。一掷梭心一缕丝，连连织就九张机。从来巧思知多少，苦恨春风久不归。

一张机。织梭光景去如飞。兰房夜永愁无寐。哎哎轧轧，织成春恨，留着待郎归。

两张机。月明人静漏声稀。千丝万缕相萦系。织成一段，回纹锦字。将去寄呈伊。

三张机。中心有朵耍花儿。娇红嫩绿春明媚。君须早折。一枝浓艳，莫待过芳菲。

四张机。鸳鸯织就欲双飞。可怜未老头先白，春波碧草，晓寒深处，相对浴红衣。

五张机。芳心密与巧心期。合欢树上枝连理。双头花下，两同心处，一对化生儿。

六张机。雕花铺锦半离披。兰房别有留春计。炉添小篆，日长一线，相对绣工迟。

七张机。春蚕吐尽一生丝。莫教容易裁罗绮。无端翦破，仙鸾彩凤，分作两般衣。

八张机。纤纤玉手住无时。蜀江濯尽春波媚。香遗囊麝，花房绣被。归去意迟迟。

九张机。一心长在百花枝。百花共作红堆被。都将春色，藏头里面，不怕睡多时。

轻丝。象床玉手出新奇。千花万草光凝碧。裁缝衣著，春天歌舞，飞蝶语黄鹂。

春衣。素丝染就已堪悲。尘世昏污无颜色。应同秋扇，从兹永刻弃。无复奉君时。

歌声飞飞落梁尘。舞罢香风卷绣茵。更欲缕成机上恨，尊前忽有断肠上。敛袂而归，相将好去。

同前

一张机。采桑陌上试春衣。风晴日暖慵无力。桃花枝上，啼莺言语，不肯放人归。

两张机。行人立马意迟迟。深心未忍轻分付，回头一笑，花间归去，只恐被花知。

三张机。吴蚕已老燕雏飞。东风宴罢长洲苑，轻绡催趁，馆娃宫女，要换舞时衣。

四张机。咿哑声里暗颦眉。回梭织朵垂莲子。盘花易绾，愁心难整，脉脉乱如丝。

五张机。横纹织就沈郎诗。中心一句无人会。不言愁恨，不言憔悴。只恁寄相思。

六张机。行行都是耍花儿。花间更有双蝴蝶，停梭一晌，闲窗影里。独自看多时。

七张机。鸳鸯织就又迟疑。只恐被人轻裁剪，分飞两处，一声离恨，何计再相随。

八张机。回纹知是阿谁诗。织成一片凄凉意。行行读遍，

厌厌无语，不忍更寻思。

九张机。双花双叶又双枝。薄情自古多离别。从头到底。
将心萦系。穿过一条丝。

南歌子

席近浑如远，帘高故放低。偏它能画斗头眉。戴顶烧香铺
翠、小冠儿。

酒伴残妆在。花随秀鬓垂。薄罗小扇写新诗。解下双双带、
要重题。

南歌子

象戏红牙局，琵琶绿锦条。小窗方簟困香醪。帘外拂檐宫
柳、翠阴交。

烟媚莺莺近，风微燕燕高。更将乳酪伴樱桃。要黄那人一
递、一匙抄。

南歌子

小小生金屋，盈盈向凤帏。斜枝石竹绣罗衣。为怕春来风
日、卷帘稀。

金殿承恩久，兰堂得梦回。薰炉空惹御香归。今衣花前还
是、是平西。

南歌子

闾儿虽不大，都无半点俗。窗儿根底数竿竹。画展江南山景、两三幅。

彝鼎烧异香，胆瓶插嫩菊。悠然无事净心目。共那人人相对、弈棋局。

南歌子

风动槐龙舞，花深禁漏传。一竿红日照花砖。走马晨晖门里、快行宣。

百五新火，清明尚禁烟。鱼符不请便朝天。醉里归来疑是、梦游仙。

感皇恩

暖律破寒威，春回宫柳。晴景初曦上元候。禁城烟火，移下一天星斗。素娥凝碧汉，明如昼。

绣毂电转，锦鞞飞骤。九踏笙歌按新奏。胜游方凝，忽听晓钟银漏。两两归去也，应回首。

鱼游春水

秦楼东风里。燕子还来寻旧垒。余寒微透，红日薄侵罗绮。嫩笋才抽碧玉簪，细柳轻颦黄金蕊。莺啭上林，鱼游春水。

屈曲阑干遍倚。又是一番新桃李。佳人应念归期，梅妆淡洗。凤箫声杳沈孤雁，目断澄波无双鲤。云山万重，寸心千里。

五条结同心

珠帘垂户。金索悬窗，家接浣沙溪路。相见桐阴下，一钩月、恰在凤凰栖处。素琼捻就宫腰小。花枝袅、盈盈娇步。新妆浅，满腮红雪，绰约片云欲度。

尘寰岂能留住。唯只愁、化作彩云飞。蝉翼衫儿，薄冰肌莹，轻罩一团香雾。彩笺巧缀相思苦。脉脉动、怜才心绪。好作个、秦楼活计，吹箫伴侣。

侍香金童

宝台蒙绣，瑞兽高三尺。玉殿无风烟自直。迤逦传杯盈绮席。苒苒菲菲，断处凝碧。

是龙涎凤髓，恼人情意极。想韩寿、风流应暗识。去似彩云无处觅。惟有多情，袖中留得。

洞仙歌

溶溶泄泄，似飘扬愁绪。不是因风等闲度。道无心用甚，却又情多，行未驻，还作高阳暮雨。

襄王情尚浅，会少离多，空自朝朝又暮暮。肠断晓光中，一缕归时，销散后、不知何处。试密锁、琼楼洞房深，与遮断江皋，楚台归路。

永遇乐

功名闲事，利禄休问，莫系心上。幸有衣食，随缘过得，著甚乾劳攘。风前月下，三杯两盏，撞著即莫与放。且与个、山壮道友，退闲故人来往。

新来做得，一个宽袖布衫，著来也畅。出户迎宾，入城干事，合似王保长。我咱恁后，神歌鬼舞，任尔万般毁谤。死来后，一家一个，那底怎向。

西江月

灯火楼台欲下，笙歌院落将归。冰瓮金缕胜溜璃。春笋捧来纤细。

饮罢高阳人散，曲终巫峡云飞。千方修合斗新奇。须带别离滋味。

水调歌头

帆落松陵浦，枯柳缆琼艘。杖策无人独步，浪压百花桥。我挂风裳水佩，一笑波寒月白，余韵触惊涛。绝景有谁赏，雾幕闭三高。

不须臾，千古事，一萧条。鲈鱼纵有，泽荒甫里，失里失溪桥。更吾名高来茂，终归荒田野草，且稳一枝巢。举酒酹空阔，烟远路迢迢。

菩萨蛮

江城烽为连三月。不堪对酒江亭别。休作断肠声。老来无泪倾。

风高帆影疾。目送舟痕碧。锦字几时来。薰风无雁回。

减字木兰花

蔷薇叶暗。满架浓阴风不乱。午酒才醒。历历黄鹂枕上听。此情难遣。不比红蕉心易展。要识离愁。只似杨花不自由。

浣溪沙（酴醾）

梦入瑶台千步芳。万妃相向玉为装。同心髻带翠罗长。浓艳只宜供枕席，醉魂长是傍壶觞。绀纱囊薄为谁香。

浣溪沙

白玉楼中白雪歌。更将白纻衬春罗。软红香里最么么。
桃叶桃根随处有，江南江北见来多。风前月底奈愁何。

临江仙（闻郡守移传芑林）

竹里行厨草草，花边系马。使君移传意何穷。儿童随骑火，
猿鹤避歌钟。

梅雪自欺舞态，烛花先放春红。酒醒人散夜堂空。殷勤松
上月，独照老仙翁。

阮郎归

山池芳草绿初匀。柳寒眉尚频。东风只雨细如尘。一庭花
脸皴。

莺共蝶，怨还嗔。眼前无好春。这番天气杀愁人。人愁旋
旋新。

浣溪沙

春院无人花自香。飞来蜂蝶意何狂。玉钩帘卷日偏长。
笑又不成愁未是，曲屏闲倚绣鸳鸯。归时应供 妆。

南乡子

李郭共仙舟。准拟苏台烂熯游。风雪为谁留住也，沧洲。
一尺银沙未肯收。

无语只关愁。强殢金卮不计筹。想得人人梳洗懒，妆楼。
只窣帘儿不上钩。

凤栖梧

姑射仙人游汗漫。白凤翩翩，银海光凌乱。龟手童贪戏玩。
风檐更折梅梢看。

漠漠银沙平晚岸。笑拥寒蓑，聊作渔翁伴。横玉愁云吹不
断。归舟又载苹花满。

归自谣

愁冉冉。目送书空鸿数点。落霞风剪分染。胜处屏云犹未
掩。羞娥敛。红潮怕上春风脸。

卜算子

曾约再来时，花暗春风树。今日人来花未，春未知人处。
坐客有疏狂，彩笔题新语。浑为玉人酹玉山，忘了阳关路。

卜算子

烟髻绾层巅，云叶生寒树。斜日行人窈窕村，愁阵纵横处。
细细写蛮笺，道寄相思语。会倩春风展柳眉，回马章台路。

好事近

潇洒小楼东，斜亚一枝梅雪。若在玉溪仙馆，更风流厅绝。
花神应为护芳心，付与何人折。行客几回搔首，认暗香浮月。

谒金门

江上路。依约数家烟树。一枕归心村店暮。更乱山深处。
梦过江南芳草渡。晓色又催人去。愁似游丝竿万缕。倩东风约住。

杜韦娘

华堂深院，霜笼月采生寒晕。度翠幄、风触梅香喷。渐岁晚、春光将近。惹离恨万种，多情易感，欢难聚少愁成阵。拥红炉，凤枕慵欹，银灯挑尽。

当此际，争忍前期后约，度朵无凭准。对好景、空积相思恨。但自觉、恹恹方寸。拟蛮笺象管，丹青好手，写出寄与伊教信。尽千工万巧，唯有心期难问。

摸鱼儿

被谁家、数声弦管，惊回好梦难省。起来无语疏雨过，芳草嫩苔侵径。春昼永。迟日暮，碧沼浪浸红楼影。卷帘人静。被风触，一叶两叶，杏花零乱对残景。

依前是，撩拨春心堪恨。檀郎言约无定。不知何处贪欢笑，恣纵酒迷歌逞。珠泪迸。自别后，每忆翠黛凭谁整。芳年相称。又到得今来，却成病了，羞懒对鸾镜。

满庭芳

五斗相逢，千种一饮，古今乐事无过。香生银瓮，浮蚁浴春波。潋滟光凝盏面，轻风皱、浅碧宫罗。乘欢处，倾壘痛饮，珠贯引清歌。云何。君不饮，良辰美景，聚少离多。忍怎放春风，容易蹉跎。但愿一樽常共，花阴下、急景如梭。须乘醉，雕鞍归去，争看醉颜酡。

潇湘静

画帘微卷香风逗。正明月、乍圆时候。金盘露冷，玉炉篆

消，渐红鳞生酒。娇唱倚繁弦，琼枝碎、轻回云袖。风台歌短，铜壶漏永，人欲醉、夜如画。

因念流年迅景，被浮名、暗辜欢偶。人生大抵，离多会少，更相将白首。何似猛寻芳，都莫问、积金过斗。歌阑宴阁，云窗凤枕，钗横麝透。

十月桃

东篱菊尽，偏园林败叶，满地寒荇。露井平明，破香笼粉初开。佳人共喜芳意，呵手剪、密插鸾钗。无言有艳，不避繁霜，变作春媒。

问武陵溪上谁栽。分付与南园，舞榭歌台。恰似凝酥衬玉，点缀装裁。东君自是为主，先暖信、律管飞灰。从今雪里，第一番花，休话江梅。

汉宫春

江月初圆，正新春夜永，灯市行乐。芙蕖万朵，向晚为谁开却。层楼画阁。尽卷上、东风帘幕。罗绮拥，欢声和气，惊破柳梢梅萼。绰约。暗尘浮动，正鱼龙曼衍，戏车交作。高牙影里，缓控玉羁金络。铅华间错。更一部、笙歌围著。香散处，厌厌醉听，南楼珈角。

汉宫春

玉减香销，被婵娟误我，临镜妆慵。无聊强开强解，蹙破眉峰。凭高望远，但断肠、残月初钟。须信道，承恩在貌，如何教妾为容。风暖鸟声和碎，更日高院静，花影重重。愁来待只殢酒，酒因愁浓。长门怨感，恨无金、买赋临邛。翻动念，年年女伴，越溪共采鞭蓉。

风流子

淑景皇州满，东风渐、催促柳花飞。过清明骤雨，五侯台榭，青烟散入，新火开时，绣帘外、傍人飞燕子，映叶语黄鹂。秋迁昼永，绮罗人散，花阴笑隔，红粉墙低。

青门多行乐，寻芳处、何计强逐轻肥。空对旧游满目，谁共开眉。遇有时系马，垂杨影下，风前伫立，惆怅佳期。回望故园桃李，应待人归。

夏日宴黄堂

日初长。正园林换叶，瓜李飘香。帘外寸过，送一霎微凉。萍芜迳，曲凝珠颗，衬汀沙、细簇蜂房。被晚风轻飏，圆荷翻水，泼觉鸳鸯。

此景最难忘。趁芳樽泛蚁，筠簟铺湘。兰舟棹稳，倚何处垂杨。岂能文字成狂饮，更红裙、闲又何妨。任醉归明月，虾须帘筛，几线余霜。

渔家傲

轻拍红牙留客住。韩家石鼎联新句。珍重龙团并凤髓。君王与。春风吹破黄金缕。

往事不须凭陆羽。且看盏面浓如乳。若是蓬莱鳌稳负。知何处。玉川一枕清风去。

醉春风

陌上清明近。行人难借问。风流何处不来归，闷闷闷。回雁峰前，戏鱼波上，试寻芳信。

夜久兰膏烬。春睡何曾稳。枕边珠泪几时干，恨恨恨。惟有窗前，过来明月，照人方寸。

卓牌儿

当年早梅芳，曾邂逅、习琼侣。肌云莹玉，颜开嫩桃，腰支轻袅，未胜金缕。佯羞整云鬟，频积压人、娇波寄语。湘佩笑解，韩香暗传，幽欢后期难诉。

梦魂顿阴。似一枕、高唐云雨。蕙心兰态，知何计重遇。试问春蚕丝多少，未抵离愁半缕。凝伫。望凤楼何处。

南乡子

晓日压重檐。斗帐犹寒起未忺。天气困人梳洗倦，眉尖。淡画春山不喜添。

闲把绣丝捋。经得金针又怕拈。陌上行人归也未，恹恹。满院杨花不卷帘。

南乡子（咏双荔支）

深结花工知。赐与衣裳尽是绯。曾向玉盘深处见，隈随。两个心肠一片儿。

从小便相依。酒伴歌筵不暂离。只恐被人分擘破，东西。怎得，团圆似旧时。

望远行

当时云雨梦，不负楚玉期。翠峰中、高楼十二掩瑶扉。尽人间欢会，只有雨心自知。渐玉困花柔香汗挥。

歌声翻别怨，云双欲回时。这无情红日，何似且休西。但涓涓珠泪，滴湿仙郎羽衣。怎忍见、双鸳相背飞。

归田乐

水绕溪桥绿。泛苹汀、步迷花曲。衣由散余馥。种竹更洗竹。咏竹题竹。日暮无人位于伴幽独。

光阴双转毂。可惜许、等闲愁万斛。世间种种，只是荣和辱。念足又愿足。意足心足。忘了眉头怎生蹙。

临江仙

促坐重燃绛蜡，香泉细泻银瓶。一瓯月露照人明。清真无俗韵，久淡似交情。

正味能销酒力，余甘解助茶清。琼浆一饮觉身轻。蓝桥知不远，归卧对云英。

行香子

天与秋光。转转情伤。探金英、知近重阳。薄衣初减，绿蚁初尝。渐一番风，一番雨，一番凉。

黄昏院落，恹恹惶惶。酒醒时、往事愁肠。那堪永夜，明月空床。问砧声捣，蛩声细，漏声长。

诉衷情

碧天明晃金波。清浅滞星河。深深院宇人静，独自问姮娥。圆夜少，缺时多。事因何。嫦娥莫是，也有别离，一似人么。

绕池游

渐春工巧，玉漏花深寒浅。韵景变、融晴蕙风暖。都门十二，三五银蟾光满。瑞烟葱茜，禁城闾苑。棚同雉扇。绛蜡交辉星汉。神仙籍、梨园奏弦管。都人游玩。万井山呼欢抃。岁岁天仗，愿瞻凤辇。

好事近

小院看酴醾，正是盛开时节。莫惜大家沈醉，有春醅初泼。花前月下细看来，无物此清绝。若问此花何似一堆香雪。

阮郎归

春风吹雨绕残枝。落花无可飞。小池寒渌欲生漪。雨晴还日西。

帘半卷，燕双归。讳愁无奈眉。翻身整著残棋。沈吟应却迟。

点绛唇

公子归来，画堂深院丛罗绮。绿杯浮蚁。风皱红鳞起。信马斜阳，误入桃源里。珠帘底。淡妆斜倚。一寸秋江水。

海棠春

晓莺窗外啼春晓。睡未足、把人莺觉。翠被晓寒轻。宝篆沈烟袅。宿醒未解，双娥报道。别院笙歌宴早。试问海棠花，昨夜开多少。

宴桃源

落日霞消一缕。素月棱棱微吐。何处夜归人，呕哑几声柔橹。归去。归去。家在烟波深处。

祝英台

海棠开、花影下、忆得共游戏。恰似双鸾，同步彩云里。梦回雨收云散，匆匆归去，一枕乍、惊回浓睡。

甚情味。人去花亦雕零，农芳伴憔悴。点点飞红，知是去时泪。可堪冷落黄昏，潇潇微雨，断魂处。朱阑独倚。

夜游宫

是处追寻侣。灯光散、九衢红雾。人在星河繁闹处。暗相逢，惹天香，飘满路。

游困先归去。奈怨别、相思情绪。闲傍小桃 独长。月明寒，捻宣男，无一语。

杨柳枝

簌簌花飞一残。乍衣单。屏风数幅画江山。水云闲。别易会难无计那，泪潸潸。夕阳楼上凭栏干。望长安。

摊破浣溪沙

相恨相思一个人。柳眉桃脸自然春。别离情思，寂寞向谁论。
映地残霞红照水，断魂芳草碧连云。水边楼上，回首倚黄昏。

一剪梅

恨入椒觞暖未拈。春匆微蘸，谁是纤纤。别来愁夜不胜长，明日从教一线添。

夜久寒深睡未忺。旧愁新恨，占断眉尖。一钩斜月却知人。直到天明，不下疏帘。

卜算子

垂螺近额时，只怕莺声老。尽日贪花斗草忙，不信有闲烦

恼。

凤鬟已胜钗，恨别玉孙早。若把芳心说与伊，道绿遍、池塘草。

忆王孙

杨风前旗鼓闹。正陌上、闲花芳草。忍将愁眼觑芳菲，人未老。春先老。

长安此日知多少。日易见、长安难到。无情苔水不西流，渐迢迢、仙舟小。

南歌子

夕露沾芳草，斜阳带远村。几声残角起谯门。撩乱栖鸦飞舞、闹黄昏。

天共高城远，香余绣被温。客程常是可销魂。乍向心头横著、个人人。

南歌子

楼迥迷云日，溪深涨晓沙。年来悴憔费铅华。楼上一天春思、浩无涯。

罗带宽腰素，真珠溜脸霞。海棠开尽柳飞花。薄幸只知游荡、不思家。

南歌子

玉殿分时，金盘弄赐冰。晚来阶下按歌声。恰好一方明月、可中庭。

露下天如水，风来夜又清。偏他不肯大家行。漾下扇儿拍手、引流萤。

玉珑璁

城南路。桥南路。玉钩帘卷香横雾。新相识。旧相识。浅顰低拍，嫩红轻碧。惜惜惜。

刘郎去。阮郎住。为云为雨朝还暮。心相忆。空相忆。露荷心性，柳花踪迹。得得得。

浣溪沙（蔡州瓜陂铺有用篦刀刻青泥壁为词一）

碎剪香罗浥泪痕。鹧鸪声断不堪闻。马嘶人去近黄昏。整整斜斜杨柳陌，疏疏密密可花村。一番风月更销魂。

点绛唇（丰城南禅寺题壁）

燕子依依，晓来总为谁归去。淡云生处。已觉宾鸿度。

浅笑深颦，便面机中素。乘鸾女。琐窗琼宇。会有明年暑。

踏青游（游崔念四妓馆）

识个人人，恰正二年欢会。似赌赛、六只浑四。向巫山、重重去，如鱼水。两情美。同倚画楼十二。倚了又还重倚。

两日不来，时时在人心里。拟问卜、常占归计。拚三八清齐，望永同鸳被。到梦里。蓦然被人惊觉，梦也有头无尾。

玉楼春（铅山驿壁）

东风杨柳门前路。毕竟雕鞍留不住。柔情胜似岭头云，别泪多如花上雨。

青楼画幕无重数。听得楼边车马去。若将眉黛染情深，且到丹青难画处。

浣溪沙

云锁柴门半掩关。垂纶犹自在前湾。独乘孤棹夜方还。任使有荣居紫禁，争如无事隐青山。浮名浮利总输闲。

浣溪沙（二）

一副纶竿一只船。蓑衣竹笠是生缘。五湖来往不知年。
青嶂更无荣辱到，白头终没利名牵。芦花深处伴鸥眠。

浣溪沙（三）

钓罢高歌酒一杯。醉醒曾笑楚臣来。夕阳维缆碧江隈。
蓑笠第因山雨戴，船窗多为水花开。安居流景任相催。

浣溪沙（四）

雨气兼香泛芰荷。回舟冒雨懒披蓑。夜阑风静水无波。
白酒追欢常恨少，青山入望岂嫌多。人间荣辱尽从他。

定风波

雨雾云必望远山。钓竿林下恣清闲。蝉噪日斜林影转。溪岸。绿深红浅画屏间。
对酒狂歌时鼓枻。更邀同志醉前湾。待月却寻维缆处，归来，烟萝一径接柴关。

雨中花（改冯相三愿词）

我有五重深深愿。第一愿、且图久远。二愿恰如雕梁双燕。

岁岁后、长相见。

三愿薄情相顾恋。第四愿、永不分散。五愿奴留收园结果，
做个人宅院。

望海潮（吊杨芳与黄岩妓投江）

彩筒角黍，兰桡画舫，佳时竞吊沅湘。古意未收，新愁又起，
断魂流水茫茫。堪笑又堪伤，有临皋仙子，连璧檀郎。暗约同归，
远烟深处开沧浪。

倚楼魂已飞扬。共偷挥玉箸，痛饮霞觞。烟水无情，揉花碎玉，
空余怨抑凄凉。杨谢旧遗芳。算世间纵有，不恁非常。但看芙蓉并蒂，
他日一双双。

失调名

喜则喜、得入手。愁则愁、不长久。忻则忻、我两个厮守。
怕则怕、人来破斗。

扑蝴蝶

烟条雨叶，绿遍江南岸。思归倦客客，寻芳来较晚。岫边红日初斜，
陌上飞花正满。凄凉数声羌管。怨春短。玉人应在，明月楼中画眉懒。
蛮笺锦字，多时鱼雁断。恨随去水东流，事与行云共远。罗衾旧香犹暖。

侍香金童

喜叶之地，手把怀儿摸。甚恰恨、出题厮撞著。内臣过得
不住脚。忙里只是，看得斑驳。

骇这一身冷汗，都如云雾薄。比似年时头势恶。待检又还
猛想度。只恐根底，有人寻着。

柳梢青

晓星明灭。白露点、秋风落叶。故址颓垣，荒烟衰草，溪
前宫阙。

长安道上行客，念依旧、名深利切。改变容颜，销磨古今，
垆头残月。

眉峰碧

蹙破眉峰碧。纤手还重执。镇日相看未足时，忍便使、鸳
鸯只。

薄暮投夺驿。风雨愁通夕。窗外芭蕉窗里人，分明叶上心
头滴。

行香子

清要无因，举选艰辛。系书钱、须要十分。浮名浮利，虚苦劳神。叹旅中愁，心中闷，部中身。

虽抱文章，苦苦推寻。更休说、谁假谁真。不如归去，作个齐民。免一回来，一回讨，一回论。

湘灵瑟

霜风摧兰。银屏生晓寒。淡扫眉山。脸红殷。潇湘浦，芙蓉湾。相思数声哀叹。画楼尊酒闲。

减字木兰花

家门希差。养得一枚依样画。百事无能。只去篱边缠倒藤。几回水上。轧捺不翻真个强。无处容他。只好炎天作巴。

失调名

妙手庖人，搓得细如麻线。面儿白、心下黑，身长行短。蓦地下来后，吓出一身冷汗。这一场欢会，早危如累卵。

便做羊肉燥子，勃推钉碗。终不似、引盘美满。舞万遍。无心看。愁听弦管。收盘盏。寸肠暗断。

浪淘沙

水饭恶冤家。些小黄瓜。尊前正欲饮流霞。却被伊来刚打住，好闷人那。不免着匙爬。一似吞沙。主人若也要人夸。莫惜更搀三五盏，锦上添花。

夜游宫

因被吾皇手诏。把天下、寺来改了。大觉金仙也不小。德士道。却我甚头脑。

道袍须索要。冠儿戴、恁且休笑。最是一种祥瑞好。古来少。葫芦上面生芝草。

西江月

早岁轻衫短帽。中间圆项方袍。忽然天赐降宸毫。接引私心入道。可谓一身三教。如今且得逍遥。擎卷稽首拜云霄。有分长生不老。

青玉案

钉鞋踏破祥符路。似白鹭、纷纷去。试盂幞头谁与度。八厢儿事，两员直殿，怀挟无藏处。

时辰报尽天将暮。把笔胡填备员句。试问闲愁知几许。两

条脂烛，半盂馊饭，一阵黄昏雨。

滴滴金

当初亲下求言诏。引得都来胡道。人人招是骆宾王，并洛阳年少。自讼监军并岳庙。都一时闲了。误人多是误人多，误了人多少。

水调歌头

平生太湖上，短棹几经过。知今重到，何事愁与水云多。拟把匣中长剑，换取扁舟一叶，归去老渔蓑。银艾非吾事，丘壑已蹉跎。脍新鲈，斟美酒，起悲歌。

太平生长，岂谓今日识兵戈。欲泻三江雪浪，净洗胡尘千里，不用挽天河。回首望霄汉，双泪堕清波。

失调名

做园子，得数载。栽培得、那花木，就中堪爱。特将一个、保义酬劳，反做了、今日殃害。

诏书下来索金带。这官告、看看毁坏。放牙笏、便担屎担，却依旧种菜。

失调名

叠假山、得保义。幞头上、帶著百般村气。做模样、偏得人憎，又识甚条例。

今日伏惟安置。官诰又来索气。不如更叠个盆山，卖八文十二。

结带巾

头巾带。谁理会。三千贯赏钱，新行条例。不得向后长垂。与胡服相类。

法甚严，人尽畏。便缝阔大带，向前面系。和我太学先辈，被人呼保义。

鹧鸪天（上元词）

春晓千门放钥匙。万官班从出祥曦。九重彩浪浮龙盖，一点红云护赭衣。

车马过，打球归。芳尘洒定不教飞。钧天品动回銮曲，十里珠帘待日西。

日暮迎祥对御回。宫花载路锦成堆。天津桥畔鞭声过，宣德楼前扇影开。

奏舜乐，进尧杯。传宣车马上天街。君王喜与民同乐，八面三呼震地来。

紫禁烟光一万重。五门金碧射晴空。梨园羯鼓三千面，陆

海鳌山十二峰。

香雾重，月华浓。露台仙仗彩云中。朱栏画栋金泥幕，卷尽红莲十里风。

香雾氤氲结彩山。蓬莱顶上驾头还。绣鞞犹坐三千骑，玉带金鱼四十班。

风细细，佩珊珊。一天和气转春寒。千门万户笙箫里，十二楼台上栏。

禁卫传呼约下廊。层层掌扇簇王。明珠照地三千乘，一片春雷入未央。

宫漏永，御街长。华灯偏共月争光。乐声都在人声里，五夜车尘马足香。

宝炬金莲一万条。火龙围围辇转州桥。月迎仙仗回三殿，风递韵音下九霄。

登复道，听鸣鞘。再颁酥酒赐臣僚。太平无事多欢乐，夜半传宣放早朝。

玉座临轩宴近臣。御楼灯火发春温。九重天闻仙乐，万宝床边待至尊。

花似海，月如盆。不任宣劝醉醺醺。岂知头上宫花重，贪爱传柑遗细君。

九陌游人起暗尘。一天灯雾锁彤云。瑶台雪映无穷玉，阆苑花开不夜春。

攒宝骑，簇雕轮。汉家宫阙五侯门。景阳钟动才归去，犹挂西窗望月痕。

宣德楼前雪未融。贺正人见彩山红。九衢照影纷纷月，万井吹香细细风。

复道远，暗相通。平阳主第五王宫。凤箫声里春寒浅，不到珠帘第二重。

风约微云不放阴。满天星点缀明金。烛龙衔耀烘残雪，羯鼓催花发上林。

河影转，漏声沈。缕衣罗薄云深。更期明夜相逢处，还尽今宵未足心。

五日都无一日阴。往来车马如林。葆真行到烛初上，丰乐游归夜已深。

人未散，月将沈。更期明夜到而今。归来尚向灯前说，犹恨追游不称心。

彻晓华灯照凤城。犹嗔宫漏促天明。九重天上闻花气，五色云中应笑声。

频报道，奏河清。万民和乐见人情。年丰火贱无边事，万国称觞贺太平。

忆得当年全盛时。人情物态自熙熙。家家帘幕人归晚，处处楼台月迟。

花市里，使人迷。州东无暇看州西。都人只到收灯夜，已向樽前约上池。

步障移春锦绣业。珠帘翠幕护春风。沉香甲煎薰炉暖，玉树明金蜜炬融。

车流水，马游龙。欢声浮动建章宫。谁怜此夜春江上，魂断黄梁一梦中。

真个新曾见太平。元宵且说景龙灯。四方同奏升平曲，天下都无叹息声。

长月好，定天晴。人人五夜到天明。如今一把伤心泪，犹恨江南过此生。

昨夜金风，黄叶乱飘阶下。听窗前、芭蕉雨打。触处池塘，睹风荷凋谢。景色凄凉，总闲却、舞台歌榭。

独倚阑干，惟有木犀幽雅。吐清香、胜如兰麝。似金盂妆成，想丹青难画。纤手折来，胆瓶中、一枝潇洒。

念奴娇

沁园秋早。对亭台冷落，荒凉池沼。西帝晨游无异胜，都把仙花开了。金粟玲珑，鹅黄娇嫩，不管霜风悄。清香入梦，梦惟怕天晓。

乘兴折取一枝，满身兰尘麝，不减蟾宫好。赠与佳人，因笑道、休学嫦娥空老。待约明朝，金英满地，莫遣儿童扫。相将花上，醉眠尤胜芳草。

鹧鸪天

五百人中第一仙。等闲平步上青天。绿袍乍著君恩重，黄榜初开御墨鲜。

龙作为，玉为鞭。花如罗绮柳如绵。时人莫讶登科早，自是嫦娥爱少年。

木兰花

东风昨夜吹春画。陡觉去年梅蕊旧。谁人能解把长绳，系得鸟飞并兔走。

清香潋潋杯中酒。新眼苗条江上柳。尊前莫惜玉颜酡。且喜一年年入手。

木兰花

东风昨夜归来后。景物便为春意候。金丝齐奏喜新春，愿介香醪千岁寿。

寻花插破桃枝臭。造化工夫先到柳。熔酥剪彩恨无香，且放趋势香先入酒。

新水令

冒风连骑出金城，闻孤猿韵切，怀念亲眷。为笑徐都尉，循夸彩绘，写出盈盈娇面。振旅阗阗。讶睹阆苑神仙。越公深骤万马，侵袭转盼。感先锋，容放镜，收鸾鉴一半。归前阵，惨怛切，同陪元帅恣欢恋。二岁偶尔，将军沈醉连绵，私令婢捧菱花，都市寿篇。新官听说邀郎宴。因令赋悲欢。孰敢。做人甚难。梅妆复照，傅粉重见。

驻马听

雕鞍成谩驻。望断也不归，院深天暮。倚遍旧日，会共凭

肩门户。踏青何处所。想醉拍、春衫歌舞。征旆举。一步红尘，一步回头。

行行愁独语。想媚容、今灾怨郎不住。来为相思苦。又空将愁去。人生无定据。叹后会、不知何处。愁万缕。仗东风、和泪吹与。

南歌子

禁苑沈沈静，春波漾漾行。仙姿才韵两相并。叶上题时、千古得佳名。墙外分明见，花间隐红声。银钩掷处眼双明。应讶昔时、不得见情人。

阮郎归（端五）

及妆时结薄衫儿。蒙金艾虎儿。画罗领抹襴裙儿。盆莲小景儿。香袋子，搔钱儿。胸前一对儿。绣帘妆罢出来时。问人宜不宜。

阮郎归（端五）

门儿高挂艾人儿。鹅儿粉扑儿。结儿缀着小符儿。蛇儿百索儿。

纱帕子，玉环儿。孩儿画扇儿。奴儿自是豆娘儿。今朝正及时。

阮郎归

天上佳期。九衢灯月交辉。摩 候孩儿，斗巧争奇。戴短檐珠子帽，披小缕金衣。嗔眉笑眼，百般地、敛手相宜。转睛底、工夫不秒，引得人爱后如痴。快轮钱，须要扑，不问归迟。归来猛醒，争如我、活底孩儿。

伊州曲

金鸡障下胡雏戏。药极祸来，渔阳兵起。鸾舆幸蜀，玉环缢死。马嵬坡下尘滓。夜对行宫皓月，恨最恨、春风桃了。洪都方士。念君萦系。妃子。蓬莱殿里。觅寻太真，宫中睡起。遥谢群意。泪流琼脸，梨花带雨，仿佛霓裳初试。寄钿合、共金驻，私言徒尔。在天愿为、比翼同飞。居地应为、连理双枝。天长与地久，唯此恨无已。

失调名

月到中秋偏莹。乍团圆、早欺我孤影。穿帘共透幕，来寻趁。钩起窗儿，里面故把、灯儿扑尽。

看尽古今歌咏。状玉盘、又拟金饼。谁花言巧语、胡厮胫。我只道、尔是照人孤眠，恼杀人，旧都名业镜。

倾杯序

昔有王生，冠世文章，尝随旧游江渚。偶尔停舟寓目，遥望江祠，依依陌上闲步。恭诣殿砌，稽首瞻仰，返回归路。遇老叟，坐于矶石，貌纯古。因语，子非王勃是致，生惊询之，片晌方悟。子有清才，幸对滕王高阁，可作当年词赋。汝但上舟，休虑。迢迢仗清风去。到筵中、下笔华丽，如神助。

会俊侣。面如玉。大夫久坐觉生怒。报云落霞并飞孤惊。秋水长天，一色澄素。阎公竦然，复坐华筵，次时引序。道鸣鸾佩玉，锵锵罢歌舞。

栋云飞过南浦。暮帘卷向西山雨。闲云潭影，淡淡悠悠，物换星移，几度寒暑。阁中帝子，悄悄垂名，在于何处。算长江、俨然自东去。

蝶恋花

花为年年春易改。待放柔条，系取春常在。宫样妆成还可爱。鬓过斜作拖枝戴。

每到无情风雨大。点检群芳，却是深丛耐。扔曳绿罗金缕带。丹青传得妖娆态。

如梦令

今夜茶风起。应是玉消琼碎。淡淡荡满城春，恼破愁人春

睡。须醉。须醉。莫待梅黄雨细。

最高楼

司春有序，排次到茶糜。远预报，在庭知。蕊珠宫里晨妆罢，披香殿下晓班齐。探花正、驱使问，菊花期。

元不逊、梅花浮月影，也知妒、梨花带雨枝。偏恨柳、绿条垂。与其和晚包团絮，不如对酒折芳蕤。谢东君，收拾在，牡丹时。

南柯子

翠袖熏龙脑，乌云映玉台。春葱一簇荐金杯。曾记西楼同醉、角声催。袅袅凌波浅，深深步月来。隔纱微笑恐郎猜。素艳浓香依旧、去年开。

满庭芳

青幄高张，琼枝巧缀，万颗香染红殷。绛罗衣润，疑是火然山。白玉钗头试簪，黄金带、奇巧式钻。题评处，仙家异种，分付在人间。年年。输帝里，欢呼内监，妆点金拌。况曾得真妃，笑脸频看。炎岭当时奏曲，风流命、乐府名传。凭谁道、移归禁苑，长使近天颜。

浣溪沙

酒拍胭脂颗颗新。丹砂然火弃精神。暑天秋杪锦生春。
香味已惊樱实淡，绛皮还笑荔枝皱。美人偏喜破朱唇。

南柯子

积雪迷松迳，围炉掩竹扉。床头一味有蹲鸱。软火深开香
熟、已多时。

自得陶朱法，休教懒瓚知。浪传黄独正甘肥。紫玉婴儿盈
尺、更新奇。

贺新郎（为东阆赵先生寿）

天意扶炎宋。为吾皇、维衡岳孕，长沙星梦。社稷动庸天
地窄，不数智名功勇。要自有、胸中妙用。擎着东南天一柱，
看边民、买物犒归耕种。官职易，此身重。

黄封已见传宣送。却春来、洪钧初转，紫枢归拱。岁岁玉
楼春宴处，慧质明妆环拥。正弟劝、兄酬欢纵。一寸丹心坚似
铁，待磨崖、勒就浯溪颂。龙尾道，接天踵。

贺圣朝（预赏元宵）

太平无事，四边宁静狼烟眇。国泰民安，谩说尧舜禹汤好。万民翘望彩都门，龙灯凤烛相照。只听得教坊杂剧欢笑。美人巧。

宝篆宫前，咒水书符断妖。更梦近、竹林深处胜蓬岛。笙歌闹。奈吾皇、不待元灾景色来到。只恐后月，阴晴未保。

祝英台近

客毡寒，兰房悄，金炉熬红兽。好个霜天，消遣正宜酒。嫩橙初截鹅肪，肌肤香透。又还记、吴姬纤手。

事难偶。墨冻空染梨笺，新词谩题就。酒薄愁浓，欹枕听寒漏。可堪霜月亭亭，照人无寐，映窗外、一枝梅瘦。

花心动（连昌宫有感）

碧瓦朱甍，锁千门沈沈，丽日初旭。画栋暗尘，锦瑟空弦，窈窕故窗红绿。御柳宫花依然好，春不管为谁妆束。翠华远，风光尽属，野樵夷牧。

指似行人恸哭。尚能道、先朝圣游不足。凤辇路荒，龙沼波干，犹有弃珠遗玉。禁廊人静风琴响，祇疑是、霓裳遗曲。断魂晚，寒鸦又啼古木。

西江月

梁上喃喃燕语，纸间戢戢蚕生。满城风雨近清明。不道有人新病。

春事一溪流水，杨花千点浮萍。好风一霎为吹晴。独步小围清影。

梅花引

清阴陌。狂踪迹。朱门团扇香迎客。牡丹风。数苞红。水香扑蕊，新妆谁为容。

蜡灯春酒风光夕。锦浪龙髯花六尺。月波寒。玉琅玕。无情又是，华星送宝鞍。

恋绣衾

元宵三五酒半醺。马蹄前、步步是春。闹市里、看灯去，喜金吾、不禁夜深。

如今老在都休也，未黄昏、先闭上门。待月到、窗儿上，对梅花、如对故人。

青玉案

年年社日停针线。怎忍见、双飞燕。今日江城春已半。一身犹在，乱山深处，寂寞溪桥畔。春衫破谁针线。点点行行泪痕满。落日解鞍芳草岸。花无人戴，酒无人劝，醉也无人管。

捣练子

偏 戏，最风流。斗帐金猊暖不收。一阵蜜蜂狂絮里，酒酣眠折玉搔头。

捣练子

初酒醒，乍衣单。褪著裙儿侧著冠。门外小桥寒食夜，月明人去杏花残。

楼心月

柳下争拿一桨摇。水痕不觉透红绡。月明相顾羞归去，都坐池头合凤箫。

楼心月

手把新荷叶一枝。唤来池上只愁归。流萤里在红纱袖，忽到持杯个个飞。

楼心月

新著生红小舞衣。案前磨墨误淋漓。含嗔逗晚不梳洗，背面牙床吃荔支。

花心动（得于江西歌者，而不知名氏）

粉堞云齐，度清笳、愁入暮烟林杪。素艳透春，玉骨凄凉，勾带月痕生早。江天苍莽黄昏后，依然是、粉寒香瘦。动追感、西园嫩约，夜深人悄。记得东风窈窕。曾夜踏模斜，醉携小。惆怅旧欢，回首俱非，忍看笺红豆。香销纸帐人孤寝，相思恨、花还知否。梦回处，霜飞翠楼已晓。

踏莎行

殢酒情怀，恨春时节。柳丝巷陌黄昏月。把君团扇卜君来，近墙扑得双蝴蝶。

笑不成言，喜还生怯。颠狂绝似前春雪。夜寒无处著相思，梨花一树人如削。

鹧鸪天

题得相思字数行。起来桐叶满纱窗。秋光欲雨基声泻，粉帐不容花露香。新寂寞，旧疏狂。玉炉消息记钱塘。小阑立偏红蕉树，一带残云趁月黄。

阮郎归

薄罗生色画醺醺。醺醺满架时。隔池贪看燕争泥。坠双红荔支。销金字，晚唐时。夹纱团扇儿。自遮微雨傍花归。个情天得知。

青门怨

月篝烟景。远思孤影。旧梦云飞，离魂冰冷。脉脉恨满东风。对孤鸿。

翠珠尘冷香如雾。人何许。心逐章台絮。夜深酒醒烛暗，独倚危楼。为谁愁。

水调歌头

不能烦恼得，掉臂便归休。前度风樯，这回潦辙几悠悠。幸得有云一谷，更自有书万卷，著甚么来由。月采混鱼目，霜口涴蝇头。

相山中，侯醉境，将诗流。情知薄命，天样勋业也须收。辟选世间万事，推放那边一壁，百尺卧高楼。日月草头露，天地水中沤。

满庭芳

凤阁祥烟，龙城佳气，明禋恭谢时丰。绮罗争看，帘幕卷南风。十里仙仪宝仗，暖红翠、玉碾玲珑。銮回也，箫韶缓奏，声在五云中。

千官，迎万乘，丝纶叠叠，锦绣重重。听鸣镳辇路，宴龙螭宫。瞻仰天颜有喜，君恩霈、宁宇雍容。生平愿，洪基巩固，圣寿永无穷。

庆清朝

银潜心花残，红消是泪。九重鱼钥欢声沸。奏万乘、祥曦门外。盖圣君、恭谢灵休，谨访景明嘉礼。天意好，祥风瑞月，时正当、小春天气。

禁街十里香中，御替万红影里。千官花底，控绣勒、宝鞭摇曳。看万年，永庆吾皇，捻指又瞻三载。

御街行

时康三载升平世。恭谢三朝礼。群臣禁卫带花回，龊巷儿郎精锐。战袍新样团雕，重隘围子队。

绣衣花帽挨排砌。锦仗天街里。有如仙队玉京来，妙乐钧天盈耳。都民观望时，果是消灾灭罪。

瑞鹤仙

是欢声盈万户。庆景陵礼毕，銮舆游步。西郊暖风布。喜湖山深锁，非烟非雾。传收绣羽。骅骝驰骤绒缕。望彤芳、稳稳金銮，袞鸾翔舞。云驭。近回天厩，锡宴琼津，洪恩均顾。霞天向暮。翠华动，舞韶举。绛纱笼千点，星飞清禁，银烛交辉辇路。瑞光中、渺祝无疆，太平圣主。

沁园春

国步多艰，民心靡定，诚吾隐忧。欢浙民转徙，怨寒嗟暑，荆襄死守，阅岁经秋。虏未易支，人将相食，识者深为社稷羞。当今亟，出阵大谏，箸借留侯。

迂阔为谋。天士如何可籍收。况群尧舜，臣皆稷契，世逢汤武，业比伊周。政不必新，贯仍宜旧，莫与秀才做尽休。吾老，广四门贤路，一柱中流。

小重山

鼓报黄昏禽影歇。单衣犹款试，觉寒怯。尘生锦瑟可曾阅。人去也，闲过好时节。

对则复愁绝。东风吹不散，鬓边雪。些儿心事对谁说。眠不得，一枕杏花月。

谒金门

休只坐。也去看花则个。明日满庭红欲坠。花还愁似我。
索性痴收眠一和。凭个梦儿好做。杜宇不知春已过。枝头声越大。

行香子

浙右华亭。物价帘廉平。一道会、买个三升。打开瓶后，
滑辣光馨。教君霎时饮，霎时醉，霎时醒。

听得渊明。说与刘伶。这一瓶、约迭三斤。君还不信，把
秤来秤。有一斤酒，一斤水，一斤瓶。

长相思

晴也行。雨也行。雨也行时不似晴。天晴终快人。
名也成。利也成。利也成时不似名。名成天下惊。

摸鱼儿（紫云山房拟赋菰）

过湘皋、碧龙惊起，冰涎犹护髯影。春洲未有菱歌伴，独
占暮烟千顷。呼短艇。试翦取纤条，玉溜青丝莹。尊前细认。
似水面新荷，波心关掩，点点翠钿净。

凄凉味，酪乳那堪比并。吴监一箸秋冷。当时不为鲈鱼去，

聊尔动渠归兴。还记省。是几度西风，几度吹愁醒。鸥昏鹭暝。漫得霜痕，萧萧两鬓，羞与共秋镜。

多丽（杨花）

日初长，宝炉一缕沈烟。绿阴新，垂杨亭榭，知谁巧擘香绵。有时共、落红零乱，有时共、芳草留连。只道无情，那知有意，几回飞过绮窗前。人争讶，艳阳三月，干雪舞晴天。游丝外，不堪燕掠，无奈蜂粘。

那小鬟、忒忒娇劣，镇日地、倚阑干。轻吹处、樱桃的的，闲拈处、笋指纤纤。爱点猩罗，装成粉缟，嗔人不许放朱帘。端相好、蓦然风起，特送上秋千。明朝看，池塘雨过，萍翠应添。

沁园春（未开梅）

我善观梅，识梅妙处，舍我其谁。待裁冰翦雪，已无足道，凝酥弄粉，愈不为奇。枉费心神，巡檐索笑，点检南枝并北枝。梅应道，似这般题品，未是相知。

分明有个端倪。遮莫把僮凡眼窥。那精神全在，半含蕊处，风流全在，未有香时。万木丛边，两三点白，此是生生造化机。花开也，又怎生消得，个样词儿。

壶中天

日长晴昼。厌厌地、懒向窗前綰绣。因倚屏风无意绪，把眉儿双皱。似醉还醒，才眠又起，频捻梨花嗅。看他儿女，闲寻百草来斗。

相民能几何时，料归期不到，清和别人‘有恁’时候。生怕鸳鸯香被冷，旋熏沈檀薰透。欲把单衣，鼎新裁翦，又怕供春瘦。试看今夜，孤灯还有花杏。

满江红（梅词）

一点阳和，天不许、凡花无得。这些儿深意，蜂蝶怎生窥测。北陆正当风凛冽，南枝却漏春消息。教琼仙、翦水缀成葩，天然白。影横处，寒窗月。香浮处，寒梢雪。被东皇做就，这般标格。虽是腊前年后景，终非竹外篱这物。不安排、顿放玉堂中，真堪惜。

买坡塘（和李玉田韵）

喜西风、朝来如约，新凉一雨初霁。家山望断知何处，渺渺长天秋水。空眼底。叹雁杳鱼沈，尺纸无人寄。芸窗草砌。渐影颤疏桐，声敲落叶，孤枕怎成睡。

逢场戏。遮莫悲另作‘怨’秋憔悴。今朝有酒须醉。尊前待唤佳人道，为雪藕丝轻脆。闲省记。便笑口频开，一岁知能几。归期尚未。且蜡屐兰桡，湖山深处，同赏月中桂。

瑞鹤仙（和李梅南）

赏残陶么菊。正袅袅愁予，风凄露肃。何人抱幽独。更檐马锵金，廊鱼响木。此情谁属。向底处、骋怀游目。小窗前，频览菱花，一笑鬓丝犹绿。

萧索。故国云迷，佳人日暮，轻颦倚竹。短钗敲玉。算几夜，恁孤宿。问旅情如许，怎生排遣，应费酒诗轴。最无端、谁隔西楼，正调弦促。

更漏子

画楼深，春画永。帘幕东风微冷。莺啭罢，燕归来。佳人午梦回。

鬓钗横，眉黛浅。一捻楚腰纤软。推绣户，倚雕阑。无言看牡丹。

更漏子

鬓慵梳，眉懒画。独自行来花下。情脉脉，泪垂垂。此情知为谁。

雨初晴，帘半卷。两两衔泥新燕。人比燕，不成双。枉教人断肠。

更漏子

粉墙低，蓬户小。一点尘埃不到。眠纱帐，坐蒲团。道人随分安。

笋芽新，蔬甲嫩。日日家常羹饭。羹饭罢，怎消闲。携筇出看山。

愁倚阑令

东风恶，宿云凝。忒无情。合造梨花深院雨，断肠声。

枕上春梦初醒。红窗外、何处啼莺。已办春游双画舫，几时晴。

红窗迥

河可挽。石可转。那一个愁字，却难驱遣。眉向酒边暂展。酒后依旧见。

枫叶满阶红万片。待拾来、一一题写教偏。却倩霜风吹卷。直到沙岛远。

一翦梅

漠漠春阴酒半酣。风透春衫。雨透春衫。人家蚕事欲眠三。桑满筐篮。柘满筐篮。

先自离怀百不堪。檐燕呢喃。梁燕呢喃。篝灯强把锦书看。
人在江南。心在江南。

长相思

不思量。又思量。一点寒灯耿夜光。鸳鸯闲半床。雨声长。
漏声长。几阵斜风摇纸窗。如何不断肠。

长相思

云垂垂。雨霏霏。只恐今年花事迟。不然辜负伊。燕飞飞。
柳依依。有个人人倚翠扉。深攒双黛眉。

长相思

雨如丝。柳如丝。织出春来一段奇。莺梭一往飞。酒如池。
醉如泥。遮莫教人有醒时。雨晴都不知。

长相思

燕成双。蝶成双。飞去飞来杨柳旁。问伊因底忙。
绿纱窗。篆炉香。午梦惊回书满床。棋声春昼长。

采桑子

年年才到花时候，风雨成旬。不肯开晴。误却寻化陌上人。
今朝报道天晴也，花已成尘。寄语花神。何似当初莫做春。

风光好

柳阴阴。水深深。风约双鳧不自禁。碧波心。
孤村桥断人迷路。舟横渡。旋买村醪浅浅斟。更微吟。

虞美人

绮疏人所罗衣叠。岫幌铺残月。宝烟细袅博山中。梦惹暖
红鸳锦、醉香风。

觉来犹记乘鸾处。不是蓝桥住。落花流水认前溪。想见五
云为路、静无泥。

虞美人（咏·八月梅）

悲商吹尽枝间绿。绛萼含冰玉。为谁搀早冒寒开。应念天
涯憔悴、挽春回。

玉壶自酌清漪满。又识东风面。夜深斜月印窗纱。好在数
枝疏瘦、两三花。

虞美人（赠吕庆长）

萧萧啾竹千蛟舞。云阁催诗雨。中秋时节变新凉。又是一番红叶、下三湘。

君如膝上王文度。早晚乡关去。绣香佳处且留连。正好橙黄橘绿、未寒天。

虞美人（咏双海棠）

当年合德并飞燕。颦颦无人见。清魂沦入海棠枝。料想天寒同著、翠罗衣。

同心佩带连环玉。并髻云鬟绿。谁教红萼自成双。恰似新荷叶里、睡鸳鸯。

木兰花（春日述怀）

小桃枝上东风转。草绿江南岸。绿杨学舞小蛮腰，红药惜开菩萨面。

故乡何处天涯远。黄梁梦断行云断。登楼准拟故人书，殷勤试问西归雁。

朝中措（咏秋日牡丹赠严尹父）

严霜对草树凋红。叶落小围空。何事洛阳花面，欲来冠冕秋风。

尊前羞损，篱边野菊，池上扶蓉。莫放花归昆阆，且留客醉金钟。

朝中措

红鸾飞下绿云中。天淡日和融。回首小园桃杏，怜伊独困霜风。

妖姿丽质，天然富贵，不假铅红。梦作一双蝴蝶，翻翻绕遍芳丛。

朝中措

洛阳常见画图中。春去只心融。国色辉开寒日，天香熏破霜风。

平生看了，姚黄魏紫，一捻深红。莫是神仙韩令，裁成顷刻花丛。

朝中措（咏九月桃呈 晋侯）

从来黄菊占秋风。红只许芙蓉。正是百花浓睡，如何唤起春工。

小桃破萼，胭脂淡伫，妆粉轻笼。为报多情刘阮，武陵消息先通。

朝中措

宦游只欲赋归休。花为解防愁。看取星星潘鬓，花应羞上人头。

武陵流水，桃源路远，空误渔舟。把住春光一醉，从教风叶悲秋。

西江月（登城晚望）

草市人归日落，荒城风急鸦翻。独携尊酒上高寒。缥缈云横楚观。

柳外半篙绿水，烟中数笔青山。天涯流落岁将残。望断故园心眼。

西江月（待雪）

扑扑云垂四野。冥冥雁下平芜。萧萧风叶乱黄芦。寒入一滩鸥鹭。

准拟云窗水榭。装成玉树冰壶。卷帘独坐捻髭髯。待看六花飞舞。

西江月

风雨朝来恶甚，池塘春去无多。绿杨阴里溜莺梭。枝上老红犹堕。

酒满蚁浮金匝，烛残泪滴铜荷。更阑孤枕奈情何。只恐巫山破。

西江月（冷氏小楼春望）

花下春光正好，柳边春色才多。雨声日夜长沧波。暗地芒心滴破。

拍拍浪飞白雪，冥冥山点青螺。汀兰岸芷有情么。还惜江城春过。

西江月（待雪）

膝下红金不暖，窗前绛蜡犹然。夜深城麓走风烟。的砾还飘雪散。

海上正迷蝶梦，山阴未棹溪船。愿骑白凤玉为鞭。西赴瑶池芳宴。

西江月（雪）

琼沼融成沆瀣，冰檐滴尽真珠。一园草木气方苏。又学杨花飞舞。

何必乱飘密洒，却疑细糝轻铺。谁将粉墨画成图。玉做小亭高树。

西江月（即席呈吴节判二首）

翦翦轻寒雨后，瞳瞳晓日晴时。春风先到绿杨枝。金缕野桥山市。

鶗鴂巧调琴筑，海棠惜吐胭脂。玉骢未解锦障泥。且挂征鞭一醉。

西江月

翠领游仙梦破，暖香残酒醒时。子规啼月下花枝。日涌山光照市。柳拂眉间黛色，桃匀脸上胭脂。萋萋芳草路无泥。脉脉归心似醉。

西江月

风雨馀寒过了，池塘春水生时。迁莺飞上拂云枝。春遍柳村花市。

酒面清空似水，玉杯温莹如脂。莫教花谢浣尘泥。把住东君索醉。

点绛唇（晓步楚观）

晓翠初分，挂藤窈窕穿深静。鸟啼风径。竹舞千蛟影。又过重阳，感叹伤流景。人多病。酒杯慵问。闲却金卮柄。

好事近（咏梅）

篱落晓来霜，花嫩不禁寒力。脉脉自摇疏影，印一奁空碧。天生潇潇谢夫人，绝世有谁识。何必嫣然一笑，已倾城倾国。

好事近

秋漠漠。登临常羡东飞鹤。东飞鹤。一襟乡泪，为君双落。明年不负黄花约。故人须我归舟泊。归舟泊。荆溪亭下，晚秋寒薄。

好事近（待雪）

风淅淅。天容暗淡梅花白。梅花白。点酥凝粉，比君不得。清歌飞下龙沙雪。绮疏休印蟾宫月。蟾宫月。婵娟虽好，有时圆缺。

西地锦（章台留客）

重过黄梁古驿。著一鞭春色。长亭细柳，青青尚浅，不禁攀折。

且醉章台风月。莫归鞍催发。紫泥诏下，朝天去了，如何来得。

如梦令（留客）

试问春归何处。红入小桃花树。同访古章台，把盏重听金缕。休去。休去。应被好山留住。

清平乐（辛卯清明日）

风不定。舞碎海棠红影。数点雨声池上听。湿尽一庭花冷。倚阑多少心情。轻寒未放春晴。谁管天涯憔悴，楚乡又过清明。

浣溪沙

遍地轻阴绿满枝。乍晴初试袷罗衣。东风院落日长时。鸂鶒池边飞燕子，海棠花里闹蜂儿。一春心事只春知。

望江南（立秋日晓作）

清夜老，流水淡疏星。云毒窗前生晓色，梧桐叶上得秋声。村落一鸡鸣。

催唤起，带梦著冠缨。老去悲秋如宋玉，病来止酒似渊明。满院竹风清。

醉蓬莱（生朝日）

见笋成新竹，燕教雏飞，画堂清昼。萱草榴花，遍小庭如绣。角簾纱厨，葛巾葵扇，正麦秋时候。玉尘生风，悠然隐几，香蟠金兽。

又值生初，故乡何在，三楚云高，谩劳回首。睡起情怀，况渊明止酒。赖有宾朋，惠来相顾，尽一时英秀。旋涤瑶觞，重歌金缕，与公同寿。

满庭芳（牡丹）

梅子成阴，海棠初谢，小园才过清明。百花扫地，红紫践为尘。别有烟红露绿，嫣然笑、管领东君。还知否，天香国色，独步殿余春。

轻盈。多态度，洛阳图画，韩令经营。想谪仙风韵，洒面词成。一捻深红尚透，谁信道、花亦通灵。君休待、花归阆苑，

莫惜醉山倾。

满庭芳

若论风流，无过圆社，拐掀蹬撮搭齐全。门庭富贵，曾到御帘前。灌口二郎为首，赵皇上、下脚流传。人都道、齐云一社，三锦独争先。

花前。并月下，全身绣带，偷侧双肩。更高而不远，一搭打秋千。球落处、圆光掀拐，以佩剑、侧蹠相连。高人处，翻身估料，天下总呼圆。

满庭芳

十二香皮，裁成圆锦，莫非年少堪收。绿杨深处，恣意乐追游。低拂花梢慢下，侵云汉、月满当秋。堪观处，偷头十字拐，舞袖拂银钩。

肩尖，并拐搭，五陵公子，恣意忘尤。几回沈醉，低筑傍高楼。虽不遇文章高贵，分左右、曾对于侯。君知否，闲中第一，占断是风流。

鹧鸪天（遏云致筵会用）

遇酒当歌酒满斟。一觴一咏乐天真。三杯五盏陶情性，对月临风自赏心。

环列处，总佳宾。歌声嘹亮遏行云。春风满座知音者，一曲教君侧耳听。

满庭芳（集曲名）

共庆清朝，四时欢会，贺筵开会集佳宾。风流鼓板，法曲献仙音。鼓笛令、无双多丽，十拍板、音韵宣清。文序子，双声叠韵，有若瑞龙吟。当筵，闻品令，声声慢处，丹凤微鸣。听清风八韵，打拍底、更好精神。安公子、倾杯未饮，好女儿、齐隔帘听。真无比、最高楼上，一曲称人心。

水调歌头

八蛮朝凤阙，四境绝狼烟。太平无事，超烘聚哨效梨园。笛弄昆仑上品，筛动云阳妙选，一鼓可人怜。乱撒真珠迸，点滴雨声喧。

韵堪听，声不俗，驻云轩。谐音节奏，分明花里遇神仙。到处朝山拜岳，长是争筹赌赛，四海把名传。幸遇知音听，一曲赞尧天。

西江月（打双陆例）

么六把门已定，二四三五成梁。须知四六做烟梁。五六单行无障。

掷得么三采出，填胥此处高强。到家先起妙无双。号曰金赢取赏。

卜算子令

先取化一枝，然后行令，唱其词，逐句指点。举动稍误，即行罚酒，后词准此。

我有一枝花，指自身，复指花。斟我些儿酒。指自令斟酒。唯愿花心似我心，指花，指自身头。岁岁长相守。放下花枝，叉手。

满满泛金杯，指酒盏。重把花一嗅，与他人手。把花竹下坐接去。

浪淘沙令

今日 筵中。指席上。酒侣相逢。指同余人。大家满满泛金钟。指众宾，指酒盏。自起自斟还自饮，自起身，自斟酒，举盏。一笑春风。止可一笑。

传与主人翁。执盏向主人。权且饶侬。指主人，指自身。侬今沈醉眼朦胧。指自身，复自身，复拭自。此酒可怜无伴饮，指酒。付与诸公。指酒，付邻座。

调笑令

花酒。指花，指酒。满筵有。指席上。酒满金杯花在手。指酒，指花。头上戴花方饮酒。以花插头上，举杯饮。饮罢了放下杯。高叉手。叉手。琵琶拨尽相思调。作弹琵琶手势。更向当筵舞袖。起身，举两袖舞。

花酒令

花酒。左手把花，右指酒。是我平生结底亲朋友。指自身及众宾。十朵五枝花，以手伸五指反覆，应十朵；又舒五指，应五枝，仍指花。三杯两盏酒。伸三指、又伸二指，应三杯两盏数，指酒。

休问南辰人北斗。伸手作休问状，指南北。任从他乌飞兔走。以手发退，作任从状，又作飞走状。酒满金卮花在手。指酒尊，指酒盏，指花。且戴花饮酒。左手插花，右手持酒饮。

锦缠道

燕子呢喃，景色乍长春昼。睹园林、万花如绣。海棠经雨胭脂透。柳展宫眉，翠拂行人首。

向郊原踏青，恣歌携手。醉醺醺、尚寻芳酒。问牧童、遥指孤村道。杏花深处，那里人家有。

浣溪沙

水涨鱼天拍柳桥。云鸠拖雨过不皋。一番春信入东郊。
闲碾凤团消短梦，静看燕子叠新巢。又移日影上花梢。

如梦令

莺嘴啄花红溜。燕尾点波绿皱。指冷玉笙寒，吹彻小梅春透。依旧。依旧。人与绿杨俱瘦。

金明池（春游）

琼苑金池，青门紫陌，似雪杨花满路。雪日淡、天低昼永，过三点、两点细雨。好花枝、半出墙头，似怅望、芳草王孙何处。更水绕人家，桥当门巷，燕燕莺莺飞舞。

怎得东君长为主。把绿鬓朱颜，一时留住。佳人唱、金衣莫惜，才子倒、玉山休诉。况春来、倍觉伤心，念故国情多，新年愁苦。纵宝马嘶风，红尘拂面，也则寻芳归去。

眼儿媚

杨柳丝丝弄轻柔。烟缕织成愁。海棠未雨，梨花先雪，一半春休。而今往事难重省，归梦绕秦楼。相思只在，丁香枝上，豆蔻梢头。

青玉案

一年春事都来几。早过了、三之二。绿暗红嫣浑可事。绿杨庭院，暖风帘幕，有个人憔悴。

买化载酒长安市。又争似、家山见桃李。不枉东风吹客泪，相思难表，梦魂无据，惟有归来是。

声声令

帘移碎影，香褪衣襟。旧家庭院嫩苔侵。东风过尽，暮云锁、绿窗深。怕对人、闲枕剩衾。

楼底轻阴。春信断、怯登临。断肠魂梦两沈沈。花飞水远，便从今、莫追寻。又怎禁、暮地上心。

临江仙

绿暗汀洲三月暮，落花风静帆收。垂杨低映木兰舟。半篙春水滑，一段夕阳愁。

灞水桥东回首处，美人亲上帘钩。青鸾无计入红楼。行云归楚峡，飞梦到扬州。

怨王孙

梦断漏悄。愁浓酒恼。宝枕生寒，翠屏向晓。门外谁扫残

红。夜来风。

玉箫声断人何处。春又去。忍把归期负。此情此恨此际，
拟托行去云。问东君。

凤凰阁

遍园林绿暗，浑如翠幄。下无一片是花萼。可恨狂风横雨，
忒煞情薄。尽底把、韵花送地。

杨花无奈，是处穿帘透幕。岂知人意正萧索。春去也，这
般愁、没处安著。怎奈向、黄昏院落。

祝英台近

剪酴醾、移红药，深院教鹦鹉。消遣宿醒，欹枕熏沈炷。
自从载酒西湖，探梅南浦，久不见、雪儿歌舞。恨无据。在甚
不展眉头，凝愁过百五。双燕见情，难寄断肠句。可怜泪湿青
绡，怨题红叶，落乱、一帘风雨。

鹧鸪天（春闺）

枝上流莺和泪闻。新啼痕。一春鱼鸟无消息，千里关山劳
梦魂。

无一语，对方尊。安排肠断到黄昏。甫能炙得灯儿了，雨
打梨花深闭门。

长相思

红满枝。绿满枝。宿雨厌厌睡起迟。闲庭花影移。
忆归期。数归期。梦虽多相见稀。相逢知几时。

谒金门

春雨足。染就一溪新绿。柳外飞来双羽玉。弄晴相对浴。
楼外翠帘高轴。倚遍阑干几曲。云淡水平烟树簇。寸心千里目。

探春令

绿杨枝上晓莺啼，报融和天气。被数声、吹入纱总里。又
惊起娇娥睡。

绿云斜钿金钗坠。惹芳心如醉。为少年湿了，鲛绡帕上，
都是相思泪。

点绛唇

春雨濛濛，淡烟深锁垂杨院。暖风轻扇。落尽桃花片。
薄幸不来，前事思量遍。无由见。泪痕如线。界破残妆面。

点绛唇

莺踏花翻，乱红堆径无人扫。杜鹃来了。梅子枝头小。
拨尽琵琶，总是相思调。知音少。暗伤怀抱。门掩青春老。

声声慢

梅黄金重，雨细丝轻，园林雾烟如织。殿阁风微，帘外燕喧莺寂。池塘彩鸳戏水，雾荷翻、千点珠滴。闲昼永，称潇湘竿叟，烂柯仙客。

日午槐阴低转，茶瓯罢、清风顿生以腋。碾玉盘深，朱李静沈寒碧。朋侪闲歌白雪，卸巾纱、樽俎狼藉。有皓月，照黄昏，眠又未得。

大圣乐（初夏）

千朵奇峰，半轩微雨，晓来初过。渐燕子、引教雏飞，菡萏暗薰芳草，池面凉多。浅斟琼卮浮绿蚁，展湘簟双纹生细波。轻纨举，动团圆素月，仙佳婆娑。

临风对月恣乐，便好把千金邀艳娥。幸太平无事，击壤鼓腹，携酒高歌。富贵安居，功名天赋，争奈皆由时命呵。休眉锁。问朱颜去了，还更来么。

菩萨蛮

金风簌簌惊黄叶。高楼影转银蟾匝。梦断绣帘垂。月明乌鹊飞。

新愁知几许。欲似丝千缕。雁已不堪闻。砧声何处村。

捣练子

心耿耿，泪双双。皓月清风冷透窗。人去秋来宫漏永，夜深无语地银缸。

女冠子

同云密布。撒梨花、柳絮飞舞。楼台悄似玉。向红炉暖阁院宇。深庭广排筵会，听笙歌犹未彻，渐觉轻寒，透帘穿户。乱飘僧舍，密洒歌楼，酒帘如故。

想樵人、山径迷断踪路。料渔人、收纶罢钓归南浦。路无伴侣。见孤村寂寞，招飏酒旗斜处。南轩孤雁过，唳唳声声，又无书度。见腊梅、枝上嫩蕊，两两两三微吐。

满江红

斗帐高眠，寒窗静、潇潇雨意。南楼近、更移三鼓，漏传

一水。点点不离杨柳外，声声只在芭蕉里。也不管、滴破故乡心，愁人耳。

无似有，游丝细。聚复散，真珠碎。天应分付与，别离滋味。破我一床蝴蝶梦，输他双枕鸳鸯睡。向此际、别有好思量，人千里。

秋霁（秋晴）

虹影侵阶，乍雨歇长空，万里凝碧。孤鹭高飞，落霞相映，远状水乡秋色。黯然望极。动人无限愁如织。又听得。云外数声，新雁正嘹厉。

当此暗想，画阁轻抛，杳然殊无，些个消息。漏声稀、银屏冷落，那堪残月照窗白。衣带顿宽犹阻隔。算此情苦，除非宋玉风流，共怀伤感，有谁知得。

忆秦娥

香馥馥。樽前有个人如玉。人如玉。翠翘金凤，内家妆束。娇羞爱把眉儿蹙。逢人只唱相思曲。相思曲。一声声是，怨红愁绿。

柳梢青

有个人人。海棠标韵，飞燕轻盈。酒晕潮红，羞娥凝绿，

一笑生春。为伊无限伤心。更说甚、巫山楚云。斗帐香消，纱窗月冷，著意温存。

提影摇红

乳燕穿帘，乱莺啼树清明近。隔帘时度柳花飞，犹觉寒成阵。长记眉峰偷隐。脸桃红、难藏酒晕。背人微笑，半钿鸾钗，戏笼蝉鬓。

别久啼多，眼应不似当时俊。满园珠翠逞春娇，没个他风韵。若见宾鸿问。待相将、彩笺寄恨。几时得见，斗草归来，双鸳微润。

苏幕遮

陇云沈，新月小。杨柳梢头，能有春多少。试著罗裳寒尚峭。帘卷青楼，占得东风早。

翠屏深，香篆袅。流水落花，不管刘郎到。三叠阳关声渐杳。断雨残云，只怕巫山晓。

昼锦堂

雨洗桃花，风飘柳絮，日日飞满雕檐。懊恼一春幽恨，尽属眉尖。愁闻双飞新燕语，更堪孤枕宿醒忺。云鬟乱，独步画堂，轻风暗触珠帘。

我厌。晴昼永，琼户悄，香销金兽慵添。自与萧娘别后。事事俱嫌。短歌曲无心理。凤箫龙管不曾拈。空惆怅，长是每年三月，病酒恹恹。

青玉案

人生南北如歧路。世事悠悠等风絮。造化小儿无定据。翻来覆去，倒横直竖，眼见都如许。

伊周功业何须慕。不学渊明便归去。坎止流行随所寓。玉堂金马，竹篱茅舍，总是无心处。

绛都春（早梅）

寒阴渐晓。报驿使探春，南枝开早。粉蕊弄香，芳脸凝栈琼枝小。雪天分外精神好。向白玉堂前应到。化工不管，朱门闭也，暗传间耗。

轻渺。盈盈笑靥，称娇面、爱学宫妆新巧。几度醉吟，独倚栏干黄昏后。月智能疏影横斜照。更莫待、单于吹老。便须折取归来，胆瓶顿了。

孤鸾

天然标格。是小萼堆红，芳姿凝白。淡伫新妆，浅点寿阳额。东君相留厚意，倩年年、与传消息。昨夜前村雪里，有一

枝先折。

念故人、何处水云隔。纵驿使相逢，难寄春色。试问丹青手，是怎生描得。晓来一番雨过，更那堪、数声羌笛。归去和羹未晚，劝行人休摘。

金菊对芙蓉

花则一名，种分三色，嫩红妖白娇黄。正清秋佳景。雨霁风凉。郊墟十里飘兰麝，潇洒处、旖旎非常。自然风韵，开时不惹，蝶乱蜂狂。

携酒独揖蟾光。问花神何属，离兑中央。引骚人乘兴，广赋诗章。几多才子争攀折，嫦娥道、三种深香。状元红是，黄为榜眼，白探花郎。

秋霁（櫟括东坡前赤壁）

壬戌之秋，是苏子与客，泛舟赤壁。举酒属客，月明风细，水光与天相接。扣舷唱月。桂棹兰桨堪游逸。又有客。能吹洞箫，和声呜咽。

追想孟德、困於周郎，到今空有，当时踪迹。算惟有、清风朗月，取之无禁用不竭。客喜洗盏还再酌。既已同醉，相与枕藉舟中，始知东方，晃然既白。

贺新郎（櫟括东坡后赤壁）

步自雪堂去。望临皋、将归二客，从余遵路。木叶萧萧霜降，仰见天高月吐。共对影、行歌频顾。月的风清如此夜，叹无肴、有酒成虚度。闻薄暮，网罟举。

归而斗酒谋妇。便携载酒，相从旧追游处。断岸横江寻赤壁，不复江山如故，但放舟、中流容与。客去冥然方应睡，梦蹁跹、羽衣揖余语。相顾笑，逐惊寤。

如梦令（佳人）

韵似江梅标致。美似江梅多丽。清似腊梅香，白似雪梅香腻，非是。非是。我道梅花似你。

忆秦娥（忆别）

暮云碧。佳人不见愁如织。愁如织。两行征雁，数羌笛。
锦书难寄西飞翼。无言只是空相忆。空相忆。纱窗人梦，梦双人只。

忆秦娥

娇滴滴。双眉敛破春山色。春山色。为君含笑，为君愁蹙。
多情别后无消息。此时更有谁知得。谁知得。夜深无寐，度江横笛。

忆秦娥（咏笛）

秋寂寂。碧纱窗外人横笛。人横笛。天津桥上，旧曾听得。宫妆玉指无人识。龙吟水底声初息。声初息。月明江上，数峰凝碧。

帘外五更风。吹梦无踪。一楼重上与谁同。记得玉钗拨火，宝篆成空。

回首紫金峰。雨润烟浓。一江春浪醉醒中。留得罗襟前日泪，弹与征鸿。

满庭芳（秋思）

碧落横秋，浮云崩浪，夜凉先到梧桐。荷花十丈，人在赤城中。凤髻尚梳雾湿，眉峰翠、的烁双瞳。多应是，金丹一粒，点就蕊仙宫。相逢。蓬岛客，酒翻银海，一饮如虹。弄横玉招月，吹上层空。青鸾传书满座，蟠桃树、已结轻红。拚沈醉，人间拍手，一笑有东风。

失调名

和尚性好耍。贪恋一枝花。见说醉归明月夜。滋味难禁价。金帛宁论价。毒手遭他下。料想从今难更也。空惹傍人话。

望江南

江南竹，巧匠织成笼。赠与吾师藏法体，碧潭深处伴蛟龙。色即是成空。

西江月

早晚以成行色，主人莫与留延。正当春月艳阳天。去赛从前心愿。

执状去呈仙尉，殷勤早与周旋。不辞客路往来难，暂辍舞裙歌扇。

燕山亭（芍药词）

风雨无情，红叶吐时，下得恹恹摧挫。云艳卷凉，旋汲银屏，收拾二三千朵。长日留伊，要把酒、不教放过。无那。越放纵香心，越盘一大。

特地点检笙歌，先要吹个、六么曲破。总是少年，负却才名，佳客共伊围坐。粉薄香浓，为笑多、不肯梳里。知么。须醉倒、今宵伴我。

鹧鸪天

山色晴岚景物佳。暖烘回雁起平沙。东郊渐觉花供眼，南陌依稀草吐芽。

堤上柳，未藏鸦。寻芳趁步到山家。陇头几树红梅落，红杏枝头未著花。

眼儿媚

深闺院日初长。娇女绮罗裳。不做东君造化，金针刺绣群芳样。

斜枝嫩叶包开蕊。唯只欠馨香。曾向园林深处，引教蝶乱蜂狂。

南乡子

帘卷水西楼。一曲新腔唱打油。宿雨眠云少梦，休讴。且尽生前酒一瓯。

明日又登舟。却指今宵是旧游。同是他乡沦落客，休愁。月子弯弯照几州。

失调名

帝里元宵风光好，胜仙岛蓬来。玉动飞尘，车喝绣毂，月照楼台。

三官此夕欢谐。金莲万盏，撒向天街。讶鼓通宵，花灯竟

起，五夜齐开。

酹江月（寿叶丞相）

阳春歌阕，正玉梅翻雪，江涛如海。秀孕东阳山水此句少一字，果诞黑头元宰。早蹋天扉，洪钧独运，嘉会符千载。衔杯乐圣，不妨机务聊解。

且恁笑弄云泉，术平勋业，说与苍生须在。闻道槐庭虚位久，天意端如有待。袞绣来时，渔蓑脱取，留我他年晒。良辰一笑，醉乡天地宽大。

水调歌头（寿枢密）

明月双溪上，胜景号金华。当年此夕，多少鸾凤杂云霞。共拥飘飘仙伯。来作人间英杰，王谢旧名家。纶 李妙文采，帷幄富忠嘉。

圣天子，形梦寐，倦尤加。麒麟阁上，早晚丹陛听宣麻。鼎轴无穷勋业，岁岁薰风日永，萱秀北堂花。潋潋绮筵酒，寿算等河沙。

水龙吟（寿癯齐赵侍郎）

昔人风调谁高，二疏盛日还乡里。公卿祖道，百城图画，争传佳事。闻自垂车日，都门外、送车凡几。今世无工画，署

之勿道，焜煌处、烛青史。

佳甚不阳山水。是昔时、钓游某地。风流脱似，洛中耆老，一人而已。好为霞觞酌，正庭阶、彩衣荣待。便明朝有诏，启门解说，值先生醉。

谒金门（寿李侍郎）

春不老。细数花风犹到。挥翰玉堂应早早。花知中令考。词进芳笺才调。文饮清樽怀抱。一片潇湘供一笑。楚同青未了。

千春词（寿游侍郎）

瞿岭云齐，建溪源远，庆衍英奇。且机乘天巧，臣贤主圣，后光同日月以为期。千载相逢，一朝盛事，自昔人夸今见之。催归诏，要领班宸殿，捧万年卮。

嘻嘻。莫道春迟。已著梅梢第一枝。映紫荷持橐，星辰步武，黄金横带，朝夕论思。不但斯时，重恢事业，整顿乾坤弘所施。洪钧转，虽寒根雪谷，物物生辉。

酹江月（寿史贰卿）

欢声雷动，问邦民，知道君侯生日。欲把天文占好事，夜地遥瞻南极。耿耿三台，寒光相射，瑞采连珠璧。白今以始，

我公眉寿千忆。

见说燕寝香凝，旌旗微动，猎猎薰风入。收拾乾坤生长意，留向人间敷锡。预约明年，难史难弟，同侍虞琴侧。坐令仁寿，八荒开此寿域。

沁园春（寿游侍郎）

兹审某官秀毓全闽，龄开八凌。一身高邵，为天下之达尊；两字康宁，离福中之至贵。绂麟呈瑞，厦燕倾诚。某适以事拘，后於躬贺。望宫墙之仞，誓坚雅志之依刘；歌眉寿之章，愿效诗人颂鲁。倘蒙电眄，无任眷荣。

五岳三光，孕秀精神，时生俊髦。看出匣锋铓，备施盘错，济川力量，历试风涛。直卷经纶，十徵不就，争羨先生出处高。徜徉处，有晋公绿野，陶令东皋。

精神翰墨游遨。无一点风霜上鬓毛。不访蓬莱，偏搜仙药，不登阊苑，三摘蟠桃。洒洒丰姿，棱棱标致，长对梅花雪里梢。青如许，与老松苍竹，定岁寒交。

念奴娇（寿侍郎）

今年秋早，似常年、人世光阴如电。君看老仙风度别，绿发芳瞳长健。细数平生，三千功行，一一修持遍。通明殿上，钧天张乐高燕。

应似六一先生，神清之洞，万仞苍苔藓。少待中原开霁了，一片闲云舒卷。姹女炼成，婴儿养就，坐阅蓬莱浅。青霄笙鹤，

也应回顾鸡犬。

水调歌头（寿真玉堂）

早是玉堂，犹著侍臣冠。便为霖亦晚，何况此身闲。胸次光风霁月，意味满庭芳草，体用两相关。坐对粤山好，名更重於山。

寿生申，霜肃晓，露宾寒。从教重九过了，政有菊堪餐。日绕不篱笑傲，香萸秋容淡薄，晚节要人看。久不见贾谊，天已问平安。

水调歌头（寿刘监丞）

伏以日躔婺宿，正五蓂敷英之辰；神隆崧嵩，记六矢垂蓬之旦。祥薰宇宙，欢动里闾。恭惟某云渊源，冰壶节操。霁月光风之潇洒，浑金璞玉之温纯。望重东山，起夜鹤晓猿之悲；思形宣室，开云龙风虎之机。绂麟喜际於诞辰，笼鸽想多於颂语。某阻缀帛趋之末，倍深燕贺之私。砌九十五字之芜词，寄声水调；祝万八千岁之椿算，与日川增。持献雷门，仰祈电瞩。

一线添宫绣，昼景刻初还。五示句浹不散，瑞色满乾坤。凝作山堂佳气，来庆冰壶寿旦，戏彩喜重斑。相对窦桂椿，环列谢芝兰。经纶事，戡定策，两才全。苍生翘首三载，霖雨报东山。已感宵衣梦寐，应录御屏姓字光动紫微垣。一骑日边至，趣诏凤池班。

满江红（寿杨殿撰）

蓓蕾江梅，正好是、小春时候。螺浦下、乾坤间气，山川钟秀。作起风流今几代，诚齐心印亲传授。更修名、大节与谁同，韩山斗。

修月斧，擎天手。鸿敛翼，云归岫。有壮园陶径，菊滋松茂。只恐东山真事业，更应西洛登耆旧。有年年、宣劝到鳌扉，黄封酒。

满庭芳（寿安抚）

北斗璇魁，南闽元帅，西清真地行仙。东林白社，依约认前缘。霞洞天台万叠，记当时、秀减山川。三生梦，岩公宝刻，云锁石桥边。

时度御炉吹雾，宫烛传烟。望图中家庆，朱紫蝉联。入见辕门佳节，到新春、长是开筵。明年看，五云深处，黄发映貂蝉。

水调歌头（寿范帅）

三楚诗书帅，人物压中州。飘飘青琐，典刑蜀国旧风流。小袖玉堂挥手，来拥元戎十乘，红旆照青油。尺一唤归去，名久在金瓯。

倚春声，赓水调，倩歌喉。登龙旧客，只回误上陵舟。正

是蟠桃开也，特向尊前为寿。一醉一千秋。携取此花去，还侍玉宸游。

朝中措（寿魏都大）

郎星初度一旬前。瑞雪早蹁跹。金节耆祥称寿，一妃宣劝迎年。

锦天绣地，薰香手祷，福祿如川。只恐催呈魏笏，便还紫橐青毡。

宝鼎现（寿曹安抚）

天遍良月。瑞霭匆倩，绮霞粲浩。望宝阁、奎躔交绚，秀毓文星正佳节。九万里俱在下，礼乐三千剡切。扶兴运、魁星标瑞，曾补赭黄袞阙。盎盎一道棠阴芾，宜福星、临照南国。

岁屡稔，月沈夜析，父老欢谣齐喜溢。庆袞袞、罗庭前兰玉，好是香连夜月。十万户深深祝，愿此寿星南极。自是天上神仙，宽宸顾、实劳耆德。辄使星入观，又报日边消息。天为遣、梅花催雪。惟有春知得。要待列、金鼎和羹，两两台星齐色。

沁园春（寿郭宪使）

阊阖初开，羽葆来从，斗畔天南。看长身玉立，精神耿耿，

风姿冰冷，琼佩珊珊。政数龚黄，才称屈宋，君合居其伯仲间。犹堪庆，早恩沾令子，新著朝冠。

东园。未即开藩。且乡曲吾曹共往还。向棋边几见，烂柯樵客，琴中时写，流水高山。野鹤立阶，灵龟支坐，修竹梅花伴岁寒。荣华事，有传家从橐，立上清班。

虞美人（寿赵仓）

翠屏罗幕遮前后。舞袖翻长寿。紫髯冠佩御炉香。看取明年归奉、万年觞。

今宵池上蟠桃席。咫尺长安日。宝烟飞焰万花浓。试看中间白鹤、驾仙风。

瑞鹤仙（寿提举）

薰风送炎暑。正万品亨嘉，恢台当序。祥烟淡天宇。渐银蟾满魄，金茎凝露。奎躔壁度。见寒光、凌乱辉吐。记当此际，真仙命世，恍惊飙驭。

荣遇。妙龄英发，腾实蜚轡，肃将玉命，已洽百城休誉。愿从今、夕揭金瓯，永隆依注。

万年欢（寿太守）

南极星明，问笙歌弦管，今是何夕。竹马儿童，尽道使君

生日。又见蟠桃结实。是谁向、珠宫偷得。炉烟袅，惟愿年年，使君常驻熊轼。

那知宦游似客。任双旌五马，飘转南北。经柳甘棠，都是使君新植。见说吾皇仄席。恐非晚、归朝宣直。功成了，却隐东山，算惟龟鹤相识。

酹江月（寿倅车）

东南钟秀。记当年、玉麟坠地，风云奔走。别驾风流才展骥，未快经纶大手。风月平分，吏民胥庆，松李阴浓昼。满城灯火。崧高神降时候。好是今夕华筵，水沈烟里，竹径松姿瘦。闻道君王仄席尺一凤凰飞诏。堤筑新沙，印垂大斗，毡复貂蝉旧。麒麟勋业，壮椿难计眉寿。

沁园春（寿王倅）

天遣东皇，来庆诞辰，和气先回。趁未将风月，平分八桂，且垂弧矢，相映三槐。歌遏行云，舞萦回雪，不比常年寿宴开。有贤守，送三千乐指，环侍金罍。

文章政事奇哉。曾飞舄天外来。便合除之六察，少旌最绩，何为别驾，暂屈长才。尚亿传家，行将跨灶，岂但侯藩与外台。称觴看，灵龟支坐，老鹤眠阶。

东坡引（寿余倅）

人物伊周样。清政龚黄状。平分风月双溪上。红颜方少壮。红颜方少壮。

生贤令节，满觞摇漾。红袖舞，青蛾唱。我来祝寿无他望。相门重拜相。相门重拜相。

木兰花（庆赵倅）

北湖云锦。铺遍琉璃三万顷。风月诗仙。趁得花时出洞天。红菱碧藕。满劝一杯千岁寿。来岁看花。新筑苏堤路上沙。

八宝妆（寿节推权教）

是舍人才调，犹采茅、紫芝峰。有列宿心胸，清辞太白，雅趣元龙。从他暂、无毡官冷，怡然怀抱自从容。枫陛荐章柏合，金闺仙籍名通。

暑余凉送薰风。圆桂魄、丽遥空。庆初度垂弧，莲开十丈，酒满千钟。明年称寿何处，看玉犀、人在玉堂中。藻鉴正当莲省，诸生来到蟾宫。

沁园春（寿刘提干）

学富总龟，英蜚漕鹗，正当少年。向山阴发轫，从容莲幕，结知当路，翠剡争先。万斛龙骧，湖襄飞饷，赏秩新纶来日边。

重重庆，又金鱼新渥，玉树芝兰。

今朝好语欢传。正南极真人生世天。是紫囊阴鹭，朱幡美德，平山钟秀，崧岳生贤。事业惊人，行魁膺唱，展庆公庭云母间。称觞祝，对今宵明月，千古团圆。

满庭芳（寿干官五月十五日）

梅雨初晴，时当夏五，一轮桂魄方圆。平山毓秀，间世产英贤。那更椿庭戏彩。只觞处，簇拥神仙。荷囊紫，朱幡辉映，新渥又兰孙。

山阴，方借迳，结知当路，荐剡争先。况湖襄输转，赏秩新颁。更喜两飞漕鹗，魁兰省、首听胪传。丹墀上，屏分云母，鲁后与周前。

齐天乐（寿刘机宜）

天开图画江山秀。怪得人间希有。屏岛精神，潭溪骨格，钟作名门华胄。满堂昼绣。甚楔集兰亭，竹修林茂。得得明朝，绂麟亲解公侯绶。

心胸剩罗列宿。便能光绍，太常勋旧。却恋般湖，贪求精舍，日日佳篇醇酎。陶朱敌富。更沧海双珠，掌中明透。赢得年年，莲龟松鹤祝公寿。

桂枝香（寿赵运管）

武夷九曲。甚乐响韵，旆走星纛。更捧琼浆九酝，蟠桃初熟。元来崧岳生申旦，会群仙、献长生箓。岁寒堂上，冰壶影里，长跨青鹿。记往日、堤沙旧筑。有书龕金滕，勋写歌鹄。更化和朝，半是引臣乔木。蝗年瑞庆才经月，侍重瞳、应奉卮玉。此时奋建联班，却将万年祝。

满江红（寿洪教授）

才入新年，喜两见、希奇盛事。正五旦、虹流电绕，星枢呈瑞。方庆千秋开宝运，又今六日生名世。河清生圣岳生贤，风云际。

修月手，凌云气。吞泽量，飞泉思。况声名已自，惊天动地。上寿不须儿女语，著鞭且展英雄志。北方焰看来年，魁名字。

贺新郎（寿刘宰）

四海文章伯。自雪堂人老，有谁当得。余子纷纷何足数，除是壶中仙客。况夺得、秋光清彻。笔下诗成愁鬼魅，更千军侍帐看飞檄。须信道，万人杰。

胸襟浩荡乾坤窄。向楼东吟笑，壮心谁识。直渡黄河擒颉虏，吐尽平生奇策。终不负、雄姿英发。闻说九重飞紫诏，想鸣珂、早晚朝天阙。鸿鹄举，楚天阔。

西江月（庆赵宰季修）

一派先天妙学，十年克己工夫。割鸡聊此宰中都。人在春台鼓舞。

昏垫非由已溺，拊摩不异予辜。万家香大祝悬弧。我亦无多颂语。

沁园春（寿刘宰）

天下知名，今日刘郎，胜如旧时。记当年幕府，元戎高会，万花围席，争看题诗。尽道坡仙，再生尘世，有制宜烦立马挥。东阳小，岂容久驻，鳧舄暂以飞。

诸人荐墨交驰。要推上青云百丈梯。况平生慷慨，闻鸡起舞，中原事业，不付公谁。生记今朝，频将指数，较莱公争半月期。功名事，不输前辈，行即诏封泥。

金缕词（寿宁化刘宰）

瑞气重闽宇。小春余、璇霜避暖，敛威青女。一点阳和钟英气，崧岳今朝诞甫。正两荚、尚留萸舞。应想宁川称寿处，听金笼、放鸽儿童语。愿千岁，祝慈父。

君家自有安民谱。袖良规、时宽轡策，夜闲桴鼓。直赖汀南为保障，无复鼙鼓啸聚。果峻秩、升褒叙。治最行将书第一，去思碑、拟颂歌明府。飞诏趣，缀鸳鹭。

鹧鸪天（寿赵簿）

当日名驹产渥洼。追风千里坠君家。不辞贤路甘栖棘，来伴河阳且种花。

梅试雪，酒潮霞。寿觞还捧笑声哗。唐朝九相青毡旧，为报新堤早筑沙。

满庭芳（寿梅监税、丙戌登第）

标格清高，性姿雅淡，群芳独步惟梅。当年秀气，付作此奇材。不逐东风桃李俗，冰霜里、弹压春回。还应是，崧神降瑞，屈指一阳来。

文章、推大手，关征小试，暂费筹财。我殷勤为寿，起舞持杯。鹏翮抟风再整，南枝报、管占新魁。从今看，和美大用，指日主三台。

鹧鸪天（寿摆铺）

鹤算遗芳续世传。武夷来作散神仙。柳营隐隐兵戎整，兰砌泂泂子舍贤。

倾柏酒，爇沈烟。殷勤起舞祝长年。行须一札飞鸦诏，促缀银班侍九天。

西江月（寿苗摆铺）

一夕凉浮如水，崧高瑞世生贤。揭来闲伴幔亭仙。行副九天隆眷。

数万范公兵甲，三千李白诗篇。兜鍪元许换貂蝉。好把平戎策献。

西江月（寿周主簿）

侯绩分从东鲁，世勋来在姬公。桂枝少日冠蟾宫。枳棘暂栖鸾凤。

报道小春来也，令辰申降高崧。功名富贵管无穷。指日经纶大用。

临江仙（寿石守）

良月露浓仙掌润，郁忽佳气充闾。几年重席旧师儒。大椿同未老，灵寿不须扶。

江左衣冠登桂籍，蝉联四世谁如。琳宫昨下凤凰书。金闺班趣缀，禁路莫踟蹰。

醉蓬莱（寿李侍郎）

庆长庚协梦，仙李蟠根，挺生名世。粉省收声，早云霄自致。凤掖鸾台，荷囊簪笔，久要津历试。红旆颁春，碧油开府，出分寄。

均逸真祠，左弧开宴，璧月光澄，玉炉烟细。漆发冰眸，揽浮丘仙袂。伫看九重，迅驰三节，诏促还丹陛。槐府凉生，榴樽香泛，年年欢醉。

满庭芳（寿陈守）

桐叶霜乾，芦花风软，晚来一色清秋。碧天无际，良夜月楼。瑞应长庚入梦，钟奇秀、特座贤侯。堪夸处，雄英姿发，连箭射双雕。

回头。思往事，皂囊三进，豪气衡牛。记前回凤诏，空下南州。冷笑浮云坠甌，鲈鱼美、归老扁舟。祝君寿，青山不尽，绿水自悠悠。

七娘子（寿梅守）

暖律未回春时候。向旧根、腊底红先透。玉有冷香，粉无纤垢。更饶雪里还清瘦。

琳宫拟诏风注守。任折来、深醺金杯酒。欲赏一枝，樽前为寿。愿公归作调羹手。

多丽（寿临江通判）

近中秋，迥然玉宇澄鲜。更尧蓂、十有一叶，向人特敷妍。喜名家、世行阴德，有余庆、门拥祥烟。梦协熊罴，间生鸞鷟，妙年攀桂振青毡。横飞上，金闺粉署，小试佐临川。翩然返，一身似叶，琳馆清闲。

记榜下、曩尝附骥，浪萍还有夤缘。曳长裾、不辞远道，接温柔刺、复面同年。邂逅佳辰，铺排雅席，金炉香袅欲何言。愿趣诏、入扶宗社，浩气愈纯全。长年少，龟龄共永，鹤算同坚。

百字令

某恭审某人笃生华旦，茂衍遐龄。暂归潭府之安，行正台行衡之拜。某宅身杜厦，仰德韩门。不揆芜辞，上期椿算。

自天钟秀，看人物谁与、君家为比。椿桂相辉年少日，事业文章如此。玉殿诗书，金瓯姓字，简记宸衷里。有三株桂，一时归耀桑梓。

我愿寿祝南山，尊空北海，不护陪珠履。惟有瓣香心起敬，敢颂鲁侯燕喜。大厦万间，金城千里，国计如家计。日边有诏，苍生端望公起。

玉烛新（寿监岳）

养高梓里，袖手珍词，太平五福人物。自是昔年，场屋文章旧豪杰。诗书平生事业。问造物、为谁慳惜。谩眷怀、兰玉

桂香，已露消息。

尝试问、天公好事，鼎来家庆自因袭。更看绶蓝森列，映灵椿双碧。诸郎击鲜奏食。笑贾陆、一更十日。画堂上，鹤算延长，兕觥无极。

南柯子（寿赵路分）

花萼清辉近，蓬莱紫气浓。庄园流庆与天同。生得名驹千里、尔秋风。阅式戈初偃，论文酒不空。摩挲铜狄霸桥东。看取朱衣双引、袞真封。

满庭芳（寿殿帅）

威策冰河，兵严玉帐，济时人在壶天。妙龄谈笑，图书上凌烟。但见勋书鼎鼎，谁知道、名列高仙。风云会，钩陈羽衡，绿鬓映貂蝉。绵绵。流庆远，芝兰秀发，折桂争先。占盛一门，文武更双全。已饵琼英绛雪，灵龟寿、何止千年。年年看，笙歌业裹，金钱侧垂莲。

水调歌头（寿学生）

金兽袅香穗，银烛烂花枝。眼前风景殊异，酌酒庆生时。要是祖宗流庆，方有此身此日，盍亦反共思。何以上雅寿，敢用此为规。

况君家，本学业，致轻肥。上签玉轴，全胜阡陌占东西。
好把胸中一点，照破堂中万卷，五福自来宜。谨勿效雌伏，指
日要雄飞。

水调歌头（寿丘月林）

天地钟奇秀，山泽有儒仙。词锋前驱万马，三度奏捷菊花
天。信是文场敏手，如把泉卢对掷，高叱便回旋。一点英雄气，
四头浩无边。

长羨君，先我著，祖生鞭。今朝尊酒持劝，岂特颂长年。
要入兰宫妙选，共向集英殿里，玉陛听胪传。姓字标黄甲，香
墨照人鲜。

水调歌头（庆东屏）

来复迈七日，享泰兆三阳。恰逢临吉中应，浸长三阳刚。
天地凝成正气，岳渎钟为秀杰，玉燕纪呈祥。莹彻冰壶操，皎
月映秋霜。

日星回，乾坤辟，再更张。时乘君子道长，茅茹喜生光。
抱负黄钟大吕，资稟盐梅栋柏，施用在岩廊。一骑春风里，紫
诏下山堂。

沁园春（寿东屏）

奏捷淮壖，协国燕石，鼓只凯旋。正归班玉笋，花袍方卸，彩衣亟著，忠孝双全。清德独高，皇心简注，燕寝凝香朱两翻。君王问，录习风姓字，趣对金銮。

平山。蹑履綈冠。竞来庆嘉平五日间。是炎刘昴宿，光至再现，绛人甲子，四百新颁。碧麦称觞，玉枝等算，长对梅化一岁寒。春回也，报调羹时候，梅子微酸。

西江月（寿东屏有青在堂）

几萼红搀桃径，双茎翠舞萸阶。小春霏霭瑞蓬莱。寿旦称觞青在。

牛斗辉腾气概，风云壮入襟怀。年年鹤发笑颜开。西爽亭戏彩。

柳梢青（寿在人）

正好江南，一分春色，梨花白雪。化日迟迟，文章半刺，平分风月。

满堂花醉三千，看妙舞、六么十八。笑捧瑶卮，祝君归示，琼楼金阙。

西江月（寿中山）

一片冰霜气概，几多锦绣文章。鹏抟相踵桂枝香。盛事争

夸歆向。

岁岁莫敷九叶，喜催一线迎长。柏松祝处奉霞觞。事业非熊吕望。

水调歌头（庆友人）

何以作公寿，一纸寄讴吟。当年生申有兆，鸞鷟梦文禽。气宇虹霓万丈，胸次蟠龙七泽，锦绣萃中心。高谊薄云表，随处是知音。

人俊逸，文卓犖，气雄深。版岩合辞故隐，霖雨慰当今。且所梅花酌酒，行即桂枝入手，桑荫未移阴。珍重此时祝，何日盍朋簪。

满江红（庆发举友人）

学富胸襟，才名擅、菊潭第一。都缘是、文星在命，光联南极。已向九霄横鹗荐，词场独步花生笔。况而今、好事又相逢，趋朝急。增喜气，眉黄色。须还做，龙头客。且今朝满泛，寿觞琼液。自昔箕畴称五福，惟人兼备真难得。看明朝、夺取锦标归，头方黑。

乳燕飞（寿种春翁）

指点金蕉叶。倩双成、十分为注，九天琼液。中有玉梅风

露气酒名梅露，持寿卯金仙伯。听贱子、歌翻新阕。不作寻常儿女祝，把先生、好事从头说。须快饮，莫留滴。

风流晋宋人物。有锦囊万首，不博小儿馆职。膝下双雏真伟器，足继传家事业。且做个、人间闲客。度问种春春几许，尽芝田万顷天来阔。天有尽，春无极。

沁园春（寿长齐友人）

眼底高年，如老曾仙，斗南一人。能持齐守戒，香山居士，乐天如命，康节先生。满眼儿孙，满堂金玉，多宝如来现后身。真堪羨，有许多福力，越见精神。

庆公今日生申。喜渐近中秋对月明。这平生积善，三千功行，前程享福，八百椿龄。见说寿筵，大开佛事，煮鹤炮龙烙凤麟。从今后，愿年年长健，事事如心。

踏莎行（庆友人）

月朏银河，秋生玉宙。金风业桂香生袖。儿孙重侍戏斑兰，霞觞共庆公家寿。

学问从心，希年谁有。东之行应贤良召。吉音先动菊花期，一门依旧夸三秀。

望江南（寿东人母）

阶萸舞，才半小春天。青女霜前犹避暖，素娥月里乍羞圆。
蓬岛降天仙。称寿处，琼液拍浮船。长伴瑶池母宴，蟠桃花下
驾云骈。结实看千年。

蝶恋花（寿江察判孺人）

风雨一春寒料峭。才到中和，喜气薰晴晓。九叶仙茅呈瑞
巧。青青辉映萱庭草。

红著蟠桃春不老。戏采称觞，阿母开颜笑。丹桂五板年并
少，荣亲伫下金花诰。

鹧鸪天（寿妇人）

织女初秋渡鹊河。逾旬蟾苑聘嫦娥。蓬莱仙子今宵降，前
后神仙引一本作‘拥’从多。

餐玉蕊，抚云璈。寿筵戏彩捧金荷。黄金照社三儿贵，他
日潘舆侍绮罗。

满江红（寿赴安人）

萱堂开，仙姿秀、金枝玉叶。亲曾映、尧阶三月，萸舒六
英。荣侍早随台辅鼎，长生已镂天潢牒。自当年、苹藻伋劬门，
能循法。

掌中贵，双珠握。慈训笃，家传学。信陶亲珪母，要还相

业。最好鳌头攀盛事，只今鹤发承殊渥。任年年、王母献蟠桃，金书帖。

八声甘州（寿国太夫人）

渐纷纷、木叶下亭皋，秋容际寒空。庆屏山南畔，龟游绿藻，鹤舞青松。缥缈非烟非雾，喜色有无中。帘幕金风细，香篆濛濛。

好是庭闱称寿，族舞裙歌板，欢意重重。况芝兰满砌，行见黑头公。看升平、乌栖画戟，更重开、大国荷荣封。人难老，年年醉赏，满院芙蓉。

庆灵椿（夫人生日）

瑞溪庭，满闰秋色好，帘幕低垂。一床簪笏人间盛，沈檀影里，笙歌沸处，齐捧瑶卮。

习礼复明诗。胡氏清畏人知。寿堂已庆灵椿老，年年岁岁，重添嫩叶，频长繁枝。

万年欢（仁寿夫人生日）

日暖霜融，画戟门开，锦筵欲振梁尘。正是慈闱熙熙，庆诞佳辰。象服鱼轩粲烂，喜高年、福禄长新。承颜处，朱紫满堂，华胄诜诜。

家声未论王谢，有禁中颇牧，江左机云。雁序鸳行，雍容高步金门。更有子孙侍列，拥阶庭、玉洁兰薰。持芳醑、满酌瑶觞，意祝遐寿千春。

水调歌头（寿刘宰母）

泽国嫩寒月，天气小阳春。萱堂今朝生日，瑞霭郁轮囷。身佩铜章墨绶，手捧霞觞玉液，献寿太夫人。且喜藤舆稳，共戏彩衣新。

发垂鹄，瞳点漆，倍精神。麻姑来订，笑道沧海几扬尘。伫看起居八座，更好回班百辟，异数耸绅。此母生此子，再拜谢宸恩。

满江红（寿妇人有二子登第，一为教，一为户）

绣线添长，屈指隔、书云三日华堂里，十分佳气，匆匆郁郁。一点老人星正照，千年王母桃万实。向绮罗、丛里酌流霞，称觞客。

凤雏贵，名仙籍。鸾诰宠，恩慈极。萃一门盛事，皆诗书力。芹泮珠曹争禄养，桂林雁郡催行色。看明年、两处寿筵开，长生节。

醉瑶池（寿妇人）

柳捻金丝花吐绣。蝶拍莺歌，来献天人寿。一点红黄眉上秀。玻璃满泛长生酒。

丁祝遐龄天样久。年年岁岁笙歌奏。早晚郎君纡紫绶。归来色共斑衣斗。

瑞鹤仙（寿夫人）

五云翔碧汉。望卿月光中，老人星现。黄堂盛华宴。庆君恩、许奉安舆游衍。鹿城壮观。幸王母、人间得见。望君侯、彩服称觞，喜溢万家欢宴。

堪羨。一生福善，九袞康宁，万钟尊显。肩舁上殿。封两国、未应晚。管阴功、何止平反，一笑钧陶惠满。看瑶池、手种蟠桃，著花万遍。

满庭芳（寿硕人）

千里旌麾，万家灯火，晓来气霭佳瑞。宝猊烟里，龟甲锦屏张。尽道蓬莱仙瑞世，九霄外、鸣玉飞香。阴功著，恩疏三品，金诰久弥芳。

华堂。丝管，金樽齐捧，百拜称觞。看绕庭兰玉，济济成行。占尽人间五福，壶中景、日月偏长。春难老，芳瞳发秀，千岁寿宁康。

酹江月（寿逊色硕人）

云幢凤舞，下天风、吹落轮袍仙曲。阿母人间今百岁，两鬓犹含秋绿。萍小乾坤，九看日月，不用长生篆。一封天上，鼎来五色花轴。

须信寿老难侔，世间无价，空有明珠千斛。此夕兰堂风露好，雅称飞觞支属。十样宫眉，两行红袖，烧烛围香玉。不妨沈醉，共拚月上华屋。

鹊桥仙（寿黄丞母）

凤箫羽扇，霓裳云袂，谩尔人间游戏。行看两国锡鸾封，信知道、母因子贵。

潘舆彩舞，瑶池春媚。笑语兰孙共醉。大椿一万六千年，自今日、从头数起。

玉楼春（子寿母）

戏彩堂高无溽暑。满座风生闻笑语。慈闱今日庆生申，歌遏行云香篆缕。万事从今休挂虑。儿辈行当壮门户。一杯祝寿比壮椿，愿长与、儿孙作主。

减字木兰花（子寿母八十）

慈闱生日。恰则今年当八十。玉与澄清。五夜分明见寿星。

恩深鞠育。长愿一身全五福。满劝椒觞。岁岁今朝拜阿娘。

满江红（侄寿叔）

指日中秋，便满目、蟾光如洗。又还竹溪溪上，长庚瑞世。事业权舆韩范辈，文章拍调苏黄里。借北来双鹤寿芳筵，人千岁。

羞阿卖，依兰砌。看大阮，趋枫陛。这冰壶人物，蓬山地位。荐墨未曾乾翠剡，除书已拟封黄纸。把爆筵、趁取牡丹红，花前醉。

鹧鸪天（弟寿兄又赴省）

冬至阳生才两日，欣逢伯氏绂麟长。鹧鸪原上欢声沸，棣萼堂前喜气新。

斟九酝，劝千巡。华途从此问云津。杨前未把耆年祝，且愿青云早致身。

千秋岁（夫寿妻）

记当初归我，似德耀、嫁梁鸿。算三十年间，艰难历遍，甘苦相同。新来有孙可抱，也添些、喜色到眉峰。今日又逢生日，不妨樽酒从容。

老翁。只是一村农。欠你孺人封。幸儿渐知耕，妇能知识，

莫问穷通。君看世间宝贵，比浮云、缥缈过晴空。何似大家清健，玉林岁岁春风。

蝶恋花（寿家人）

急鼓初钟声报晓。楼上今朝，卷起珠帘早。环佩珊珊香裊裊。尘埃不到如蓬岛。

何用珠玑相映照。韵胜形清，自有天然好。莫向尊前辞醉倒。松枝鹤骨偏宜老。

鹊桥仙（寿朱经略硕人）

东西二府，掖垣一相，谁似硕人兄弟。骖鸾来伴紫阳仙，要同享、橘中千岁。

银灯初试，花城不夜，铁马响冰春碎。来年璧月淡罽毼，看犹有、传柑归遗。

沁园春（侄寿叔又调官）

某共审某官，门弧纪瑞，朝旆生辉。寿年固等於南山，宠命行膺於北阙。既有联翩之喜，可无祝祷之忱。某闾砌幼元，竹林小阮，风蒙矜诲，倍切欣愉。敬缀沁园之词，用侈壮椿之祝。三熏三献，一盼为荣。

长至阳生，律转黄钟，门左弧垂。记当年瑞世，梦传天燕，

今朝诞节，香爇金猊。南极星明，北山堂邃，松桧苍苍龟鹤随。况蟠桃下熟，仙童来献，喜介双眉。

平生谋画多奇。算收拾功名须有时。曾指麾万骑，争飞栗挽，折冲千里，彗扫星驰。荐口澜翻，宸恩鼎至，此去须还衣锦归。人都道，黑头卿相，慷慨男儿。

鹧鸪天（寿弟生日）

新月光寒昨夜霜。三年不一奉瑶觞。朱颜大药知能驻，白日仙家岂计长。

枫渐赤，橘初黄。五湖烟水动归航。且倾寿酒歌难老，便见除书出未央。

永遇乐（寿族兄正月初六，与定光佛同日生）

柏颂才过，梅妆方试，六秀萸英。恰是今朝，白花岩里，一佛生时节。前身再现，金城桃熟，千岁莲花重发。更一念、善概念常在，作个在家菩萨。

活饥好事，造桥阴鹭，乐施常开金穴。瑶籍儿孙，玉京夫妇，庆聚神仙窟。阁中姓蓝，子舍赵氏。从今生旦，三千纪算，常对昙华优钵。华严会，彩箱庆满僧宝骨。

鹊桥仙（春寿妻）

日长槐夏，凉生冰室，又是生辰来到。年年把酒对荷花，颜色比、荷花更好。

儿歌女舞，彩衣共戏，仰祝齐眉偕老。欢欢喜喜八千春，更何处、蓬莱仙岛。

菩萨蛮（夫寿妻）

秋风扫尽闲花草。黄花不逐秋光老。试与插钗头。钗头占断秋。

簪花人有意。共祝年年醉。不用泛瑶觞。花先著酒香。

减字木兰（寿外公）

祥呈香褭。尝记翁生当己卯。福祿俱添。绿鬓红颜七十三。芝兰满砌。争著彩衣堂下戏。祝寿无涯。王母襟期醉九霞。

鹊桥仙（寿丈人）

某兹者共翻丈人宣义蓬弧纪瑞，庭户增辉。某百拜称觞，未遂职供於半子；一章侑席，切唏芹献於野人。调谨按於鹊桥，年冀齐於鹤算。露封以献，电盼为荣。

才临复日，便逢生旦，料想门阑多喜。好将何物寿冰翁，但有个、新词为礼。

如今已办，一千余阕，尽按宫商角徵。一年一阕祝椿龄，

自今日、从头数起。

鹧鸪天（自寿）

云外青山是我家。两年城里作生涯。杜陵赏月延秋桂，彭泽无钱对菊花。

初度日，感年华。三杯浊酒一瓯茶。尊前儿女休相笑，更有人穷似汝爷。

贺新郎（生日自寿）

官职从他大。官大时、烦恼偏多，不如到我。我有数间临水屋，随分田园些个。也薄有、新蔬时果。浊酒三杯棋一局，对花前、时抱添丁坐。闲觅句，唱仍和。

年年生日人争贺。漫相共月、黄扉紫园，唱仍和一日平章风月事，奉保永无期祸。只如此、有何不可。阁箸相疑真可笑，政事堂、日里如何。似恁地，待则么。

久雨忽开霁，花靥斗春娇。家人笑道，老子今日是生朝。细数平生功行，断自狂吟之外，全不犯科条。心事淡如水，天合与逍遥。

也何须，期寿算，比松乔。但令此去清健，到处狎渔樵。说一门前鸥鹭，护我山中杞菊，日日长心苗。世事儿戏耳，尊酒百尤消。

鹧鸪天（生日自寿赋谢人庆寿）

生羡鸡冠与凤仙。时秋华艳遍园间。自怜生日悲生事，搔首吴江载月船。

休身外，且樽前。喜君文彩锦相鲜。青去贻我长生曲，唤醒凄凉乐暮年。

沁园春（自寿）

甲子一周，织乌相催，又还十年。但诗狂酒圣，坐常有客，书痴传癖，囊不留钱。拍手浩歌，出门长笑，谁是知心老天。犹多事，更时游艺圃，日耨情田。

细思世事无边。只好把清樽对眼前。看槐国功名，有如戏剧，竹林宴赏，便似神仙。富贵危机。荣华作梦，早已输人一著先。从今去、莫将醉趣，与醒人传。

减字木兰花（寿隐士）

一丘一壑。野鹤孤云随处乐。篆带纱巾。且与筠壮作主人。高山流水指下风生千古意。寿庆年年。长在新秋六月前。

西江月（寿居士）

好个马山居士，功名富贵浮云。庵儿侧傍万杉阴。烟里时

横小艇。

律中林钟将半，花堂寿斝频斟。声声齐祝百千龄。坐看云仍贵盛。

满庭芳（贺人生日新冠）

月属重三，冀开二六，于门东马骈阗。彩麟高设，金鸭喷祥烟。试问谁来瑞世，人都道、蓬岛神仙。非凡子，年才志学，勋业已精专。

坐联。汤饼客，倾银注玉，盛展华筵。羨巍冠初冠，气宇飘然。底用遐龄频祝，但愿双亲未老，富贵双全。功名事，吾家旧物，早共复青毡。

点绛唇（贺女人生日新筵）

重午日才过，又经四日逢华旦。月娥降诞。春早桃花嫩。许字方笄，金雀屏开半。东床选。门楣壮观。偕老行如愿。

贺新郎（赵娶温氏）

路入蓝桥境。忆当年、云英来会，玄霜捣尽。争似温公风流婿，一笑欢传玉镜。便胜似、琼浆玉饮。自是振振佳公子，冰肌玉骨相辉映。一对儿，好厮称。

夜深银烛交红影。雀屏开、凤帷拥绣，鸳衾铺锦。雨意云

情应多少，梦到巫山一枕。好语向、耳边频听。但愿来春青云路，管一枝、青桂嫦娥近。闻早寄，凤楼信。

百字谣（贺人娶姑女）

太真姑女，问新来、谁与欢传玉镜。莫恨无人伸好语，人在蓝桥仙境。一笔樽前，欢然相与，便胜琼浆饮。殷勤客意，耳边说与君听。

长记旧日君家，门阑喜动，绣褥芙蓉隐。回首龙门人得意，又报凤楼芳信。只是相传，房奁中物，好事侵侵近。管教人道，一双冰玉清润。

鹊桥仙（贺王姓人新婚）

风流仙客，文章逸少，王仙客。王逸少。复见当年佳婿。夤缘王子高端不数琼姬，向林下、亲逢道气。

屏开金雀，床铺绣褥，多羨豪家深意。借用王孙事。凭谁说何戎，剩觅取、缠头利市。王元室。

清平乐（贺人娶宗女）

繁弦急管。喜色门阑满。应是雀屏曾中选。新近东床禁脔。功名有分非难。休因女婿求官。幸与嫦娥为伴，直须仙桂新攀。

杏花天（贺人三兄弟皆娶赵氏）

弟兄旧说河东凤。怎得似、君家伯仲。一双白璧殷勤种。齐向金屏选中。

乘龙去、门阑喜动。管取早叶、熊罴吉梦。儿孙不与尘埃共。总是龙驹凤种。

朝中措（贺周姓娶祝氏）

几年弱水望蓬莱。心事喜同谐。佳婿欣逢公瑾，新婚喜近英台。

豪家深意，芙蓉褥隐，金雀屏开。但愿门阑多喜，凤楼早寄书来。

满庭芳

金贴鼓腰，绣妆檐额，吾宗自昔豪奢。椒馨兰馥，烟雾霭横斜。吹管聒天今夜，香风度、罗绮光花。看双美，郎君俊秀，玉女更宜家。繁华。歌宴处，金盘撒果，银烛烧花。任芙蓉帐掩，翡翠屏遮。更看名传桂籍，蓬瀛近、隐泛仙槎。归来去，双亲绿鬓，相对饮流霞。

临江仙

乐奏箫韵花烛夜，风流玉女才郎。同心结上桂枝香。如鸾如凤友，就效两双双。

莫把画堂深处负，笙歌引入兰房。满斟玉斝醉何妨。南山堪作誓，福祿应天长。

柳梢青（贺陈姓娶田氏）

孺子风流陈，孟尝门地田，合下相当。俏似年时，送他织女，来嫁生郎。

满堂珠履飞觞。看花烛、迎归洞房。海誓山盟，从今结了，永效鸾凰。

少年游

上苑莺调舌。暖日融融媚节。秦晋新婚，人间天上真奇绝。傅粉烟霄，倾国神仙列。彼此和鸣，凤楼一处明月。

歌喉佳宴设。鸳帐炉香对蕙。合卺杯深，少年相欢切。罗带盘金缕，好把同心结。终取山河，誓为夫妇欢悦。

喜迁莺

早梅天气，正绣户乍启。琼筵才展。鹊渡河桥，云游巫峡

泛碧桃花片。翠娥侍女来报，莲步已离仙苑。待残漏，鸳帐深处，同心双绾。

欢宴。当此际，红烛影中，檀麝飘香篆。掷果风流，谪仙才调，佳婿想应堪羨。少年俊雅雅狂荡，蓦有人言拘管。镇携手，向花前月下，重门深院。

点绛唇

仙子仙郎，两情今是欢娱会。莲花池内。好个鸳鸯对。
一自芳容，一自才华最。真佳配。荣华富贵。寿考千秋岁。

鹧鸪天（集曲名）

烛影摇红玉漏迟。鹊桥仙子下瑶池。倾杯乐处笙歌沸，苏幕遮阑笑语随。醉落魄，阮郎归。传言玉女步轻移。凤凰台上深深愿，一日和鸣十二时。

卜算（姓彭）

半破玉梅春，小簇金莲炬。结里风流倬底郎，直入阳台去。休诧鹊桥仙，说甚缙山侣。便合齐眉八百年，个是真仙子。

鹧鸪天

绛蜡银台晃绣帟。一帘香雾拥金猊。人间欢会于飞宴，天上佳期乞巧时。

倾合卺，醉淋漓。同心结了倍相宜。从今把做嫦娥看，好伴仙郎结桂枝。

水调歌头（贺真西山）

人道孰为大，尚小易咸常。厥初皇极中建，扶世有三网。仁义阴阳道立，父母乾坤位正，六子发辉光。一日不容缓，此意久弥昌。杯举庆，天作合，月探囊。十年不字以正，乃字便惟良。推阐家人一卦，迤邐齐家治国，鼎鼎得姬姜。旧物中书令，玉润继汾阳。

沁园春（冬至日娶）

姑射琼仙，论人间世，学宫样妆。费精神刺绣，裁成云锦，今朝喜遇，弱线添长。收拾云情，铺张雨态，来嫁朱门趁一阳。真还是，两情鱼水，并颈鸳鸯。

登科人道无双。问小底何如大底强。幸洞房花烛，得吹箫侣，短檠灯火，伴读收郎。办苦工夫，求生宝贵，要折丹枝天上香。来秋也，看载鹰鹗荐，载开之璋。

西江月

银烛晓催春漏，珠帘暮卷东风。乃翁相对玉楼中。不枉当年冰梦。

花意似随人好，酒香难比情浓。夜深欲睡海棠红。密密骖鸾驾凤。

满江红

雪意垂垂，算天为、风流酝酿。便催得、蕊宫仙子，队移仙仗。明月珠连湘浦合，清风佩过秦楼响。带天香、郁郁碾云骈，通宵降。温玉枕，销金帐。花烛下，狨毡上。这英才美貌，一双不枉。鸾凤镜明栖彩翼，鸳鸯被阔翻浪。祝君莫学画眉痴，如张敞。

贺新郎

贺鹊冰檐绕。伴华堂、两催妆束，音传青鸟。瑞气沈烟金鸭袅。脆管繁弦迭奏。拥出个、仙娥窈窕。秋水芙蓉相映照。算人间、天上真希少。肌玉润，臂金瘦。

仙郎况是青春调。向鸳鸯、彩丝结就，同心巧。料想梅花先得。昨夜一枝开早。无地著、许多欢笑。准拟计台魁鹗表。著青衫、跃马长安道。一百岁，一双好。

沁园春

柳眼偷金，梅肌晕玉，春信已催。正浅寒天气，嫩晴日花，雨收巫峡，烟卷蓬莱。青鸟衔音，彩鸾迎驾，白昼传呼王母来。屏帏里，看合欢杯尽，连理花开。

笙歌上下楼台。更罗绮丛中薰麝煤。想雪香酥暖，粉娇翠软，风流乐事，慰惬情怀。花帽兰袍，皂鞋槐简，谁似何郎年少才。人偕老，类鸳鸯匹偶，鸾凤和谐。

贺新郎

瑞靄笼晴晓。正小春时候，和气十分缭绕。月姊精神还窈窕。甚似星郎年少。同共入、蓬莱仙岛。鸾凤锵锵风缥缈。算一双、两好真奇妙。天上有，世间少。

桥门名姓掀张了太学生。更那堪、榜下新婚，才名表表。便好相成勤风夜，莫使脱簪遗笑。且早趁、青春才调。向去功名成就后。到恁时节风流好。胜今日，登科小。

水调歌头（贺人再娶）

阿谁煎凤髓，续此玉琴弦。依然音调清婉，律吕互相宣。天使彭城姝丽，来配鲁邦才子，永作地行仙。况有盈门礼，百两拥骈阗。

更临鸾，看举案，两无偏。从此欢谐千岁，月正与花前。胜长芝兰玉树，俱作蟾宫佳客，声誉振螺川。仍看明年去，平步上青天。

鹧鸪天（送人出赘）

喜气乘龙步步春。梅花影里送君行。君行真到蓝桥处，一见云英便受卿。

鸾鹤舞，凤凰舞，凤凰鸣。群仙簇拥绿衣人。我咱有句叮咛话，千万时思望白云。

青玉案（送刘置宠）

青螺江上梅花暮。有姑射、神仙侣。胜把明珠倾满斛。老仙源委，玉妃风韵，真是欺蛮素。

彩鸾齐跨山中去。浑似天台旧时路。试部风流春几许。芳心嫩叶，如今时候，好景才三五。

踏莎行（贺友人娶宠）

金鼎休翻，玉壶休倒。为伊弹彻求凰操。歌台舞榭没长情，不如相伴文园老。

荆里钗宜，布边裙好。有缘封国还他到。端能一意谢红尘。归来便带宜男草。

水调歌头（贺人生子）

尧历庆良月，嶰管换新冬。玉成西爽，五云拂晓画楼东。人指谢家庭砌，眼底猗兰奕叶，物地茁新丛。不是善根种，争得占春风。

步鹏程，名虎榜，早收功。建安衣钵，定知他日属奇童。且说而今胜事，珠履三千称贺，相对醉颜红。拜贺无他语，相庆黑头公。

百字谣（叔庆岁生子）

金秋行令，恰清晨、白露初交中节。铁怪西窗传好事，生个他年英杰。吉梦既符，知如徐子，冰玉为神骨。吾家有庆，阶兰喜又新发。

如今早已生男，清樽华宴，且好延佳客。更自承师勤问道，门外不妨立雪。抗志云霄，留心简册，听我叮咛说。侵侵月殿，桂枝取次高折。

减字木兰药（十一月娶，后十一月生子）

向来梅发。雪袂仙裳回绛阙。今又梅开。已领熊罴好梦来。试将梅比。才著阳知争结子。梅子生成。早晚须调鼎鼐羹。

西江月（贺人生子）

绛蜡攒宝炬，碧争香亲金卮。东风吹下玉龙儿。融就满堂和气。此日兰汤新浴，他年桂苑同携。小词聊代弄璋诗。剩与犀钱得市。

鹧鸪天（秋榜将开得子）

菊萸萸残玉未颓。文星喜趁梦熊回。预传鲲拟南溟去，亲送魁从北斗来。

真间世，定奇材。满堂欢笑动春雷。明年郎罢蟾宫近，更把丹枝为我栽。

长相思（贺生子、其弟又新婚）

潇洒江海春早处，天然一种两般奇。开花结子，何事恰同时。

昨夜北枝开雪里，朝来青子又南枝。这般好事，消得付新词。

虞美人（和人生子）

归心正似三春柳。试著莱衣小。橘怀几日向翁开。怀祖已嗔文度、不归来。

禅心已断人间爱。只有平交在。笑论瓜葛一枰同。看取云光新赋、有家风。

沁园春

萱草阑干，杨花庭院，夜景澄虚。望庚星昴宿，荧荧照室，祥烟瑞霭，郁郁充闾。白鹿入胎，黄龟献梦，果应君家生凤雏。真英物，似昆山片玉，沧海明珠。

玳筵丝竹 有多少犀钱分座隅。念谢堂冷落，久无神语，淮淝骚扰，谁定过谟。天产英雄，地钟秀气，振起家声今有余。看宫袍加鹄，玉带悬鱼。

水仙子（贺生孙生子）

晚节寒花犹带蕊。隐映老人星瑞世。绿衣初是政成归，真盛事。谁可比。那更新来孙又子。烟细金炉香旖旎。想像瑶池生绿蚁。酿成佳气郁葱葱，当此际。将一醉。百几从交今日始。

喜迁莺（贺生双子）

物中双美。以便邳县双凫，禹门双鲤。太华双莲，蓝田双璧，剑丰城而已。争是一门双秀，又是一朝双喜。人总道，机云双陆，同年弧矢。希耳。会见这，双桂连芳，双鹄冲霄举，鱼诏双金，带横双玉，惟道无双国土。但愿英双戏彩，且直与、双新儿齿。愿岁岁，见东风双燕，满城桃李。

鹊桥仙（贺生双子）

银何星汉，夜凉如洗。要轩豁、君家庆瑞。果闻两两获骊珠，天付与、精神秋水。好是今朝，同逢盛事。无限欢欢喜喜。他年二陆看成名，方表得、此时双美。

玉楼春（贺生双子）

天上双星欢迤邐。报道一门双喜。果庆双弧矢，双桂连芳，双璧光华起。

看取他时双采戏。双堕号、机云才子。更带横双玉，鱼佩双金，作个无双字。

沁园春（贺生第二子）

蛮柳眠风，妃棠醉日，春意方浓。怪凌晨乾鹊，欢声啧啧，充闾瑞霭，佳气葱葱。白鹿效灵，黄龟献梦，还应君生第二龙。兰房里，想犀帷晕翠，锦褙裁红。五峰。秀气攸钟。更头玉皎皎天性聪。自谪仙芳歇，久尘赋颂，江西派冷，谁嗣宗风。骨脉尤香，云仍载诞，衮衮公侯从此封。三朝满，好平分犀玉，满泛金钟。

沁园春（贺生第二子）

明月呈规，祥烟非雾，载符梦铃。记前时已庆，人间鸞鷟，今番再见，天上麒麟。知是于门，功标紫府，夜半仙官敕五丁。亲送与，向君家作个，难弟难兄。

绝奇不数徐卿。看他日名登千佛经。正翁翁矍铄，婆婆老福，薰修觉海，结果初成。自愧空词，不酬杯水，汤饼难充堂上宾。无功也，这犀钱玉果，敢望平分。

西江月（贺生第二子）

积玉堆金闲事，惊天动地虚名。算来二足是人生，有子方为吉庆。

莫道一夔足矣，也须学著徐卿。我翁休笑又添丁。这个孩儿好命。

桃源忆故人（贺生第二子）

庭槐沐雨翻新翠。叠雪香罗初试。铃响彩旗天坠。忽报徐卿二。帘帟坐客欢声沸。脱紫须烦半臂。借问月娥知未。速长蟾宫桂。

喜迁莺（贺生第三子）

古今三绝。惟郑国三良，汉家三杰。三俊才名，三儒文学，

更有三君清节。争似一门三秀，三子三孙奇物。人总道，寒蜀郡三苏，河东三薛。

庆惬。况正是，三月风光，杯好倾三百。子并三贤，孙齐三少，俱笃三余事业。文既三冬足用，名即三无高揭。新俱庆，看宠加三命，礼膺三接。

剔银灯（庆生第五子）

古来五子伊谁，有唐室、五王称首。窦氏五龙，柳家五马，西晋室、陶家五柳。英名不朽。更东汉、马良并秀。君今也、五男还又。应是五星孕就。腹笥五经，身膺五福，指日继、五侯之后。个般非偶。好与醉、刘伶五斗。

鹊桥仙（五十八岁方得子）

元家道保无稊，白家阿雀白居易，俱生在、五旬有八。喜君得子与同年，怪檐外、嘲哳。

我疑释老，携来付与，人尽说、眉如翠刷。龙门种定入龙门，且早做、韩縻生活。

木兰花（兄螟乃弟子）

花间棠棣。匹似人间兄与弟。一种花枝。底事当年却盛衰。中藏蜾蠃。忽遇螟蛉真类我。换叶移根。要与相辉映一门。

瑞鹧鸪（贺人螟子）

试问谢庭兰与芝。根花何似接花奇。琼蕤不自香闺种，桂种当从月地移。

须信祝螟成蜾蠃，那须梦虺及熊羆。夜来梦报蟾宫籍，新注江家五岁儿。

水调歌头（和韵谢人贺生子）

玉琯届良月，璇极炳明星。适当季舍，有梦应麒麟。但愧衡门深隐，偶尔玉川添累，还解振家声。乐章歌一阕，笔阵扫千车。

羨君侯，为学富，焕文清。青云咫尺要路，曳紫更腰金。顾我荆榛虽茂，其奈栋材无用，何似八千椿。君王行赐宴，礼重敬如宾。

酹江月（谢人贺生子）

天高气爽，正金风玉露，安排秋节。株守蓬窗无寸效，自愧才非人杰。那更家贫，又添丁累，料想无奇骨。新章褒美，天然好语还发。

堪羨力薄无储，宾庖萧索，乏礼延佳客。多谢诸公来宠贲，虽有一甌春雪。玉果未圆，犀钱须办，早早为君说。恐辜珠玉，

小词聊且权折。

虞美人（侄贺叔生女）

春风吹到深深院。添个人针线。莫言生女不妒儿。二郎不做、有门楣。一家姊妹盈盈地。兄弟同欢喜。彩丝从此不须添。看取碧纱帐内、有人牵。

柳梢青（贺人生女）

玉宇无尘，银蟾低转，渐觉缤纷。还是仙娥，厌游天阙，来降蓬瀛。

分明秋水精神。好嘱取、红叶殷勤。觅个檀郎，屏开金雀，玉润冰清。

鹧鸪天（贺人生女）

象榻香篝冷宝猊。虺蛇吉梦寤惊时。缙萦生下虽无益，谢女他年或解围。

花骨脉，雪肤肌。飞琼抱送下瑶池。弄璋错写何妨事，爱女从来甚爱儿。

清平乐（贺友人生双女）

梅兄梅弟。桃姊并桃妹。争似月临双女位。吉梦重点蛇虺。
小乔应嫁周郎。云英定遇裴航。会有九男事帝，谁夸七子
成行。

柳梢青（贺生第三女。全用三女事）

家近闽南。三姑姊妹，秀揖仙岩。须女精神，中条夫人第
三女，玉卮标格王母第三女，谪下尘凡。

他时佳婿成双，红丝应牵第三郭元振第三女。倚看樽前，
团栾六子，三女三男易系辞。

一剪梅（贺生孙）

太华峰头 莲。闻十丈，藕大如船。晓来佳气蔼飞烟。
彩戏盈门。弧矢盈门。

共把长生酒天樽。殷勤祝愿，耳畔低言。从今流庆更源源。
子既生孙。孙又生孙。

临江仙（贺生孙）

祖德绵绵盛，家声烨烨传。流光重庆子生贤。想见朝来庭
户、起非烟。对客延汤饼，呼童散彩钱。休夸骨瘦与神全。看
取犀庭玉角、已朝天。

满江红（贺生孙）

月淡风轻，凉意在、碧梧修竹。极日际，澄空似水，素秋新沐。夜看庚星飞下界，晓传子舍生兰玉。想充闾、佳气郁葱葱，香芬馥。

裁锦褓，铺金褥。沈水暖，金盆浴。向画堂深处，拥红斟绿。况是天潢真相宅，定知丰采惊凡目。看他年、槐馆振家声，飞腾速。

沁园春（贺生孙）

喜见于门，子月阳生，子舍春回。想释丘抱送，绝奇神骨，暂参授受，忠恕胚胎。夸灶参先，撞楼踵后，鼎样一门三秀才。应不数，那窦家五桂，王氏三槐。

南丰门户奇哉。他日一声平地雷。若非是河东，名传三凤，也应天上，光映三台。莫道后时，方为贺客，且把犀钱玉果来。却还取，这长生一曲，富贵三杯。

水调歌头（贺人生侄）

燕分炳箕宿，鲁野照奎星。天开岳渎，储瑞重见吐书麟。人道兰庭生谢，我羡竹林得阮，中夜沸欢声。奇称符百药，童号迈终军。

姿稟厚，骨骼异，气神清。好把一经为教，切莫诧赢金。
击瓮画图休展，对日有言可听，材大等壮椿。年欲临志学，上
国早充宾。

瑞鹧鸪（贺宗室子满月）

璇源一派接天流。秀毓君家公共侯。满月佳时近重九，生
朝令节踵千秋。

旦评指日腾佳誉，蟾苑他年快壮游。气宇如今复何似，相
应十倍虎窥牛。

西江月（贺人女中秋日满月）

八月秋中玉律，十分月满瑶台。芳姿谪下佛宫来。疑是东
方世界。

黛绿旋闻香发，桃红新晕芳腮。春风满面笑容开。长似观
音自在。

清平乐（贺赵宅子晬）

天潢佳气。钟作人间瑞。坐对满堂珠玉贵。此日还当周瑞。
手持金印金戈。知他壮志如何。将相终膺大用，姓名早掇
巍科。

木兰花（贺人女试倅）

小春良月。尧砌萸开三数叶。瑞启三躔。此夕人间诞女仙。
寿期百岁。今日欢娱初庆倅。喜事重重。亦有嘉祥应梦熊。

杏花天（贺人女倅）

画堂帘幕香风细。郁郁南阳佳气。欢传吉梦占蛇虺。此日
还当一岁。

华筵外、初随彩戏。早已似、文姬聪慧。伫看色动门阑喜。
便有乘龙佳婿。

沁园春

袞绣堂前，福星开度，寿星入垣。有建隆臣普，上天宰辅，
绍光臣鼎，平地神仙。入秉钧衡，出分藩屏，托住东南半壁天。
年来好，甚烽消万里，尘静三边。

紫宸几度传宣。刚不肯归班押讲筵。纵云台勋业，已登盟
府，金城筹策。犹念中原。好袖同河，更扶日月，色正三台第
一躔。王韩去，愿齐休社稷，於万斯年。

六州歌头（寿徐枢密）

扬休玉色，山立秉鸿枢。圣天子、方有志，会东都。行真儒。身佩安危寄，本兵柄，悠军政，朝野庆，钧衡任，赖诗谟。天上麒麟挺，徐卿子，坐肃愔夫。向六阳时候，佳瑞纪门弧。炳炳阶符。照蓬壶。

看兄枢使，弟元帅，真盛事，世间无。筹密边烽息，凜羌胡。玉音俞。伫正三槐们，散膏泽，福寰区。河如带，山如砺，巩皇图。金鼎调元远大，中书考，致主唐虞。想公门桃李，应不弃山樗。愿借嘘枯。

好事近（寿郭宪）

春信梅梢，欲雪又还晴早。趁得绣衣初度，作霜天清晓。乡来事直有天知，行拜玉皇诏。稳上神仙官府，听履声云杪。

念奴娇（寿陈运使）

素娥不老，才胜赏中秋、无边月色。又报仙翁来桂苑，连庆生申佳节。玉宇无尘，金茎有露，对景成三绝。重阳近也，黄花香入瑶度。

尽说湖海无龙，裕民堂上，几度吟梅雪。满眼阴阴甘棠树，消行寿同南极。八桂难留，九芝促觐，早露真消息。星辰听履，好看明岁今日。

临江仙（寿赵守）

香雾菲笼薄晓，帘栊爱日如春。谪仙游戏到寰瀛。金枝扒独秀，宝籍著长生。

锦轴疏恩怡寿母，朱轮光映难兄。会看家庆日增荣。雁联鸳序立，彩戏袞衣新。

沁园春（寿黄守）

皂盖朱幡，玉节虎符，宏开大藩。把济川舟楫，试横碧水，擎天柱石，小驻丹山。麦秀两歧，棠阴千里，治最当今黄颍川。平章看、文词坡谷，从品欧韩。

謁来游戏人间。况雅量汪汪海样宽。适弧垂门外，香凝燕寝，星对照两地交驭。自有青州，活民阴德，不用延年九转丹。人皆祝，愿黑头黄阁，绿鬓朱颜。

满江红（寿宪幕）

长风送有，近中秋、更无一点尘俗。绛阙真仙来瑞世，昨夜翔鸾飞鹄。奕世登科，诸昆竞秀，秀名盖天南北。持心恬退，更能韞椟藏玉。

须信宪幕平反，据经议狱，全活阴功足。川泳云飞宾主意，荐剡新翻浓墨。一路欢声，几多各气，吹作长生曲。赐环促如，清班两鬓长绿。

满江红（寿李侯）

银漏穿花，星河浅、窗牖曙色。烧蜜炬、锦帟春煦，瑞烟濛濛。堂上金钗行十二，庭前珠履三千客。捧流霞、潋滟玉东西，歌声溢。全五福，知无敌。来百禄，知无极。抱龙骧勋策，小劳公力。袖内光藏神武剑，他年待正天西北。顾贱夫、何可共功名，攀麟翼。

满江红（寿卢侯，旧为大将军）

绿鬓将军，是人道、天生韩霍。最奇处、虎头燕颌，龙韬豹略。卧护懒通天子诏，长驱爱把匈奴缚。我皇家、许样大乾坤，身难著。试部我，青原约。青原约。君合再，青油幕。这兵书一卷，怎生闲。万里城边须饮马，八公山上多鸣鹤。待归来、依旧来、依旧执金吾，凌烟阁。

水调歌头

箫鼓闾街巷，锦绣里山川。夜来南极，闪闪光射泰阶躔。陡觉佳祥翕集，听得闾阎笑道，蓬岛降真仙。香满琴堂里，人在洞壶天。

斟鉴落，歌窈窕，舞蹁跹。重阳虽近，莫把萸菊玷华筵。菲礼岂能祝寿，自有仙桃满院，一实数千年。早晚朝元会，苍鬓映貂蝉。

沁园春（寿赵宰）

快阁春边，倚阑干外，东西晚晴。有银潢公子，摩挲石刻，金华仙伯，主掌鸥盟。陶柳清新，潘花红嫩，早有丰年笑语声。还知道，是街头父老，竞说升平。

怪来昨夜长庚。与一道澄江月共明。但寿烟起处，千山天远，寿杯满后，千尺泉清。兴庆宫中，长生殿里，早踏金鳌背上行。明年好，望紫云楼上，上点台星。

鹧鸪天（寿姑）

溪水连天秋雁飞。藕花风细鲤钱肥。阿婆一笑知何事，怀橘郎君衣锦归。

天上月，几秋期。娟娟凉景画堂西。堂前拜月人长健，两鬓青如年少时。

沁园春（寿冰壶刘监丞，以竹为寿）

径竹扶疏，直上青霄，玉立万竿。似冰壶潇洒，虚心直节，清标贞干，风月无边。清荫盈庭，细香满座，凡款公门皆七贤。称觞旦，与松梅并祝，辞表南山。

绵延。龙种儿孙。列砌森庭栖凤鸾。况节楼辟命，管城草檄，计台璫试。玉笋联班。盛事重重，荐腾梧茧，渡蚁阴功须

状元。燕山乐，又使符踵至，趣赴淇园。

沁园春（寿朱金判，鹤为寿）

有鹤东来，鸣而向余，借篇寿词。道临皋亭下，坡仙曾梦，锦官城里，清献常携。山斗才名，冰霜节操，苏赵如今重见之。生申旦，正菊花开后，橙子黄时。

自从枳棘鸾栖。何尚泛芙蓉绿水池。便来归西掖，坐看红药，也应天禄，书照青藜。顾我鸡群，来陪燕贺，且祝千年与齐。樽前鹤，乃翩跹起舞，来上瑶卮。

水调歌头（寿平交五十）

学易喜加数，富贵正当年。谁识晚成大器，信道古来然。莫叹无闻不足，官政从今艾服，知命自由天。恰合买臣愿，好著祖生鞭。

藏学问，通今古，冠英贤。管取一名一第，行折桂枝先。未数奉书朱穆五十岁师赵康叔，窃笑表微拭镜韦微五十拭镜自叹，接武引群仙。生日年年庆，绛老愿齐肩。

减字木兰花（弟寿兄五十）

阿兄生日。屈指今年年五十。豆雨祿晴。昨夜分明见寿星。槐黄已迫。愿言共展冲天翼。桂子飘香。看取吾家棣萼芳。

减字木兰花（寿人六十）

喜逢生日。倏指今年方六十。次第回春。甲子从头又一新。
敬驰一曲。付与歌儿勤为祝。满劝金钟。试部蟠桃几度红。

西江月（寿六十四）

葭管一阳已复，蓂阶五叶还留。星瞻南极瑞光浮。知是降生时候。

算衍恰侔周卦，福多更协箕畴。绿衣戏无捧琼舟。满劝长生寿酒。

满江红（寿人六十日）

在昔尝闻，老彭祖、寿龄八百。试屈指、我公今岁，才方八八。乙百更添三十六，算来总是公年月。对梅花、时候庆生朝，真欢悦。儿即劝，金蕉叶。孙又把，沈檀爇。喜儿孙满目，芝兰英发。笑问堂前王母看，而今几度蟠桃结。道当时、新手共栽培，何须说。

满江红（寿人六十五）

细读箕畴，洛书字、六旬有五。试屈指、我公今岁，恰符其数。五福备合几坎九，既言一寿还称富。乃今知、好德与康宁，皆由天与。

记当日，崧生甫。喜今夕，逢初度。看儿孙鼎盛，贺宾旁午。炉暖博山腾麝馥，杯擎琥珀斟香醕。问千秋万岁与谁同，西王母。

满江红（寿季父七下）

安乐窝中，庆华发、苍颜七十。生处好、十分清瘦，仙风道骨。自古天教仁者寿，只今人饮贤人德。更一年、两度腊嘉平，垂弧夕。

华堂上，灵椿匹。兰庭下，孙枝七。望芹翁次第，年超八秩。欢伯便同分玉髓，河儿不用闰瑶笈。记醉时、三万六千场，从今日。

壶中天（寿赵戎母七十）

古来稀有，只闻道、是个人生七十。还遇小春梅蕊绽，对景装排绮席。云帔拖霞，朱颜晕酒，瑞气明南极。瑶池欢宴，玉杯争劝琼液。

堪羨玉叶名郎，天潢毓秀，梧竹生标格。百万貔貅归总押，霸气豪无敌。藩屏皇家，荣封寿母，名著金闺籍。融融液液，共看桃结佳实。

满江红（寿陈碧山七十一）

维岳生贤，天欲补、中兴袞职。奈圣世、朝无阙事，且令休逸。锦绣文章胸次好贮，蓬壶岁月闲中积。羡人生、七十古来稀，今逾一。书聚府，成东壁。身眉寿，真南极。望瑞云深处，接江山碧。人愿君如天上月，我期君似明朝日。待明朝，长至转添长，弥千亿。

最高楼（寿人七十三）

蟾宫客、未老得清闲。寿算过稀年。利名僵锁非关我，浮云富贵付苍天。且归休，对松菊，乐林泉。

此吕望、数犹欠七。问师旷、恰符绛一。从今遐算更绵延。称觞欣近小春候，月当明夜又团圆。愿长如，天上月，地行仙。

瑞鹤仙（庆某氏八十）

正迎长佳节。宴启华筵，有谁能说。子孙尽环列见瑞香香裹，寿星明彻。丝丝华发。记瑶池、宴班曾接。笑人间、八十春秋，漫浪风花雪月。

奇绝。诗书教子，陶母等伦，曹家风烈。鼎来阴德。孙枝秀，桂枝折。便从今、一轴金花鸾锦，十藏琅函贝叶。是年年、秋月圆时，长生真诀。

壶中天（寿人母八十）

人生七十古称稀，何况寿年八十。试问何时逢载风，恰在阳生七日。鹤发盈簪，朱颜晕酒，瑞家象占南极。玳筵才启。欢声喜气充溢。

好是庭下双珠，经营创置，金玉成堆积。况有孙枝争挺秀，次第飞齐鹏翼。大振家声，荣封寿母，坐看蟠桃实。年年今夕，玉环争劝琼液。

西江月（寿人八十一）

剧饮犹能鲸吸，细书仍作蝇头。人间八十最风流。况又今年九九。

不用蒲轮加璧，不须礪石垂钩。八千春更八千和秋。但愿灵椿长寿。

水调歌（寿周相子·正月初一）

雪霁万山出，和气蔼王正。平园春事竞起，梅柳冻全醒。此际朝无归路，疑有真仙呈瑞，笙鹤九霄声。东阁识风度，南极粲光明。看精神，秋夜月，玉壶冰。淳熙相业隆盛，家自得仪刑。闻道君王神武，捷报胡儿宵遁，玉殿正论兵。行奉紫泥诏，帷幄佐中兴。

沁园春（寿闽帅·正月初二）

意一仙翁，自紫府中，出游戏身。看脊梁铸，担当社稷，精神玉炼，照映乾坤。谏省伏蒲，紫垣直笔，硬语曾惊天上人。福身去，建红牙兼纛，南海之滨。

天公偏福吾闽。遣夜锦开藩为帅臣。记前回散了，几多饭碗，如今积了，千万禾囤。心与天通，阴功无量，直待时来秉化钧。年年宴，在人正次日，寿庆千春。

水调歌（庆史守·正月初四）

一札自天下，五马为民来。潜藩久须重镇，帝命出蓬莱。曾侍九重笔橐，暂剖一州符竹，人谓屈公材。儒术要易爻历，玉业待规恢。

庆三无，才四日，寿筵开。夜深仰视霄汉，南极映星台。休说石家父子，休说窦家昆季，乔木即三槐。归觐玉皇案，余事付盐梅。

鹧鸪天（寿江司马·正月十三）

太华峰头十丈莲。春风种种锦城边。只缘仙驭来人世，要作鳌头看上元。

添宝篆，注金船，曲眉环绕待歌筵。呼童快秣朝天马，后夜端门月正圆。

满江红（正月丁六）

灯火星桥，元宵过、春雪新霁。潇洒处，梅梢雪暖，柳梢风细。嵩岳想储当日秀，麒麟来作人间瑞。快风流、小小住蓬瀛，千秋岁。书万卷，儿孙贵。家万顷，生涯计。问阴功厚德，有谁能继。鬓雪人间膺上寿，椒觞且尽樽前醉。看眼前、龟鹤伴长生，莱衣戏。

庆千秋（正月十七）

点检尧蓂，自元宵过了，两荚初飞。葱葱郁郁佳气，喜溢庭闱。惟知降、月里姮娥，欣对良时。但见婺星腾瑞彩，年年辉映南箕。

好是庭阶兰玉，伴一枝丹桂，戏舞莱衣。椒觞迭将捧献，歌曲吟诗。如王母、款对群仙，同宴瑶池。萱草茂长春不老，百千祝寿无期。

永遇乐（庆李·正月十九）

才过元宵，又经四日，门设弧矢。信道长庚，当年降瑞，缘是诞生李。葱葱佳气，今朝重见，洋溢门庭多喜。这英贤、文章冠世，取青拾芥难比。

那堪绿鬓、朱颜年少，暂试牛刀百里。迤逦黄堂，平章风

月，见说清如水。彩庭兰玉，森然挺特，捧献椒觞归美、顾从今、校园崇福寿，川流山峙。

步蟾宫（庆正月二十一日生又二十一岁第）

垂弧六左当今日。恰过了、元宵六夕。喜妙龄秀发步蟾宫，信富贵、荣华莫敌。

纪年甲子才三七。即翰苑、从容西掖。便从兹、谈笑觅封侯，更管取、寿延千亿。

柳梢青（庆太守·正月廿五）

爆竹声收，烧灯节过，恰又经旬。闻道当年，长庚梦李，嵩岳生申。

江淮草木知名。有多少、阴功在人。只恐称觴，棠阴未从，促覲枫宸。

满江红（寿吴守·二月初一）

春色三分，才过一、韵华方好。庆初度、万家襦袴，满城欢笑。杨柳弄黄风渐软，海棠未放寒犹峭。况年丰、粒米不论钱，人皆饱。

烧绛蜡，斟清醪。歌宛转，红围绕。看风光蓬岛，乐声云杪。白粲连樯先一路，玺书增秩新颁诏。看貂蝉、长在玉皇边，

应难老。

百字谣（二月初四）

中各节后，云翳净、向夕新蟾飞出，月姊传声，明日是、紫府神仙诞节。彩击麒麟，瑞腾嵩岳，喜气交洋溢。魁星头上，光芒仍露消息。

好是一鶚秋风，鞭云驾雾，去作龙门客。看取长安花夹道，人在广寒宫阙。春酒千钟，秋娘一曲，大醉豪无敌。八千椿算，摩挲重见铜狄。

庆清朝（寿章丞·二月初六）

点检尧阶，蓂生六叶，春深桃杏花开。长庚入梦，重新产谪仙才。事业十年灯火，文章笔下若掀雷。果然是，两字功我，唾手拿来。

又况当年强仕，得志青云路，足慰高怀。紫泥凤诏，行须非次招徕。金马玉堂风月，从容九棘面三槐。从今看，会唐九老，它日云台。

最高楼（寿翁簿·二月初十）

中和节过，捻指又经旬。逢盛旦，诞生申。当年昴宿呈佳瑞，今朝南极见箕星。寿而昌，年未老，绿袍新。

宝鸭深因堂上袅，珠翠捧、椒觞满斟。来庆贺，尽佳宾。
彩戏谗斓多桂子，更看兰玉列阶庭。桓壮椿，祝遐算，八千春。

壶中天（寿溪园·二月十三）

潇洒幽居，溪园上、新来卜筑。况自有、一泓流水，万竿
悠竹。屈指花朝才两夜，祥烟瑞气腾芳郁。问辽空、何物堕人
间，长庚宿。

熏宝鸭，烧银烛。歌窈窕，倾醺醑。愿年年常恁，颜红鬓
绿。长厚而为难老本，慈仁便是长生策。看芝兰、玉树早蜚英
青毡复。

青玉案（寿赵宰母·二月十四）

柳阴花底春将半。吹不断、祥烟散。何处绮罗丝竹乱。天
孙星里，老人星畔，昨夜光芒现。

绿衣好把斑衣换。照新渥、金花满。酌斗深深频祝愿。凤
池它日，莺花此景，春酒年年劝。

青玉案（二月十五）

红娇绿软芳菲遍。正荏苒、春方半。帘幕任垂花影乱。年
年此日，月娥仙子，来赴瑶池宴。

绮罗暗帘成行满。尽酌金樽十分劝。愿指椿为寿算。北堂

深处，朱拳绿鬓，赢得此身强健。

汉宫春（庆寡妇·二月十九）

四舞阶蓂，花朝节后，二月阳春。观音降诞，当年对此良辰。谁知好日，固多同、重现前身。已壮门楣全四德，富将偕老卿卿。

天意不发人愿，坚柏舟节义，安富尊荣。徐君两雏，戏彩歌舞莱庭。勤教子、不厌三迁，何异轲亲。福寿麻姑们侣长笑傲武陵春。

西江月（二月廿三）

蓂褪尧阶八叶，桃翻禹浪三层。欢传崧岳挺生申。儿女团栾争庆。

名注长生仙籍，未须仰祝龟龄。芳联子舍早蜚声。富贵荣华鼎盛。

念奴娇（二月廿三）

池塘风暖，算流觞盛集，恰迟旬日。晓听儿童传好语，瑞气华堂充溢。天产英雄，封侯骨相，才气千人敌。暂游尘世，妙名已上仙籍。

争羨金紫盈门，灵椿正茂，荣庆谁能及。展龙韬并豹略，

重把山河开辟。鼻祖汾阳，佐唐勋业，管取今犹昔。名垂彝鼎，寿龄更比箕翼。

鹊桥仙（寿随宜·二月廿六）

玉叶流芳，金枝孕秀。那更婺星临照。果然谪降月宫仙，四叶蓂、锚春半后。

双麟奇妙，传若速肖。彩戏萱庭右。行膺世宠更轩昂，看存锡、金花鸾诰。

满江红（寿留守·二月廿九）

今日明朝，三月旦、又将来。欣岳降、宝香薰夜，玉麟颁晓。一面久劳公镇抚，三年活却人多少。幸借留、重许镇西河，新颁诏。

人共乐，春光好。环翠袖，斟清醪。记题诗宝扇，屡陪天笑。无限金陵怀古意，春寒依旧谁能道。看白头红颊本天人，真难老。

解佩令（寿李宰·二月三十）

曾妙年拾芥功名易。暂栖鸾、何厌小试。迢迢哦松，便整顿、河阳桃李。寿几许、也犹固未。

归来谩、学个陶潜志。遇诞辰、昴宿降瑞。春色三分才过

二。寿觞沈醉。祝寿彭祖八百岁。

齐天乐（寿碧涧·三月初一）

百花香里莺声好，晴日暖风天气。诗境春融，壶天昼永，今日祥开弧矢。疏帘约翠。想歌遏行云，暖薰沈水。羽扇纶巾，寿星因甚降尘世。

那堪流觞节近，一樽相庆处，何用辞醉。管领溪山，平章风月，从此身心无累。明年此际。愿添个孙枝，伴君娱戏。举案齐眉，更同龟鹤。

鹧鸪天（三月初二）

罗袜凌波洛浦仙。谪来潭府话夤缘。应嫌曲水香尘浣。诞降兰亭禊事前。

歌窈窕，舞婵娟。芝兰满室庆团圆。殷勤试问刘郎看，阿母蟠桃种几年。

木兰花（庆女人·三月初五）

莫开五叶。正是瑶池逢诞节。昨夜观星。南极边头婺女明。家邻九曲。寿比群仙何待祝。满劝金钟。但问蟠桃几度红。

满江红（寿尚倅三月初六）

曲水兰亭，陪宴后、又还三日。最好是，风檐月观，堕红堆碧。乔木故家今有数，太平人物年几百。看扶藜、行处乱花飞，神仙宅。

天地外，逍遥客。谈笑里，文章伯。是富贵渊明，洞天彭泽。老鹤蹁跹摩汉翮，灵龟燕息支床力。看一时、长傍寿星边，天南极。

木兰花（寿制干·三月初七）

晓烟生绿树，听叶底、数声莺。正节庙清明，萸开七荚，梦叶长庚。桥门旧时冠带，念短檠、读尽夜深灯。文价乾坤推重，世科父子同登。

莹然玉雪做数神。野鹤见长身。算婉画崇台。活人多少，自合长生。荆襄暂烦佐幕，听秋风、鼓角夜连营。唤起隆中豪杰，共图盖世功名。

满江红（三月十五）

曲水流觞，又过了、良辰十二。好是融融院落，晚春天气。天上麒麟呈瑞彩，人间鸞鷟呈祥瑞。气飘飘、仙种有其人，汾阳裔。

金屋里，歌声沸。琼猷，休辞醉。问风流人物，螺川能几。内翰兰孙衣钵富，外台桂子簪缨贵。愿双亲膝下允斑衣，千秋

岁。

虞美人（寿卫倅·三月十九）

贰车领却生朝客。风月都全得。山城小试已馨香。真个相家风烈、不寻常。

寿春一语和戎了。阴德知多少。年年三月近双旬。把酒祝君恩宠、一番新。

福寿千春（寿黄排岸·三月廿二）

柳暗三眠，萸翻七荚，稟昴萧生时叶。信道凤毛池上种，却胜河东鸞鷟。笃志典坟，经旨素得欧阳学。妙文章，赴飞黄，姓名即登雁塔。要成发轫勋业。便先教济川，整顿舟楫。兆朕于今，须从此超迁，荣膺异渥。它日趣装事，待还乡欢洽。颂椒觞，祝遐算，寿同龟鹤。

千秋岁（寿翁文叔·三月廿三）

园林翠幄。妆点青春色。犹觉萸留七叶。崧神今日降，产此真英杰。蟾宫客，尽推一代文章伯。

富贵何心得。积善多阴德。那管青衫白发。儿孙俱满目，诗礼传衣钵。长不老，蓝桥是个神仙宅。

庆清朝（寿知县·三月廿四）

节过重三，日逢四六，真贤应昴初生。元来鼻祖，降瑞应长庚。今喜重逢旧事，固宜依旧复青毡。果然是、双雕一箭，雁塔书名。

大器也须小试，鸾轻暂栖，荆棘若为荣。从容钜竹双松，足畅吟情。行种河阳桃李，即飞诏、入厕朝绅。从兹看、箕星上应，南极长明。

满江红（寿太守子·三月廿六）

五五芳辰，园林遍、十分春景。见瑞香喷兽，烛摇红影。知道文星初度旦，细腰歌舞娇姿逞。颂椒觞、捧献更殷勤，君拚饮。

英雄威，风凛凛。文章腹，千机锦。看青毡复旧，父风挺。桂子兰孙齐彩戏，祝教寿比天难尽。况深居、潭府胜蓬莱，真仙境。

杏花天（侄寿姑·三月廿七）

婺星呈瑞，对春余几许，日临三九。正属我姑初度旦，悦设当年门右。绿鬓犹新，红颜未改，真月宫仙友。柏舟节义，富而荣贵长守。

况有诰桂青春，潜心黄卷，指日功名就。女郎乘龙全四德，

未老得闲仁寿。天命方知，岁饥常赈，阴德还多有。麻姑王母，年年同宴春酒。

百字歌（寿张簿·四月初三）

清和天气，月方生，报道曲江生日。一点奎星腾瑞彩，降作人间英杰。曾记当时，平分玉果，今已年多历。才华拔萃，早宜仙佳高折。

自是鶚表连登，功收三箭，人羨真无敌。雁塔题名方惬意，暂作鸾栖枳棘。整顿籍书，紫泥封下，即召归西掖。寿膺五福，请君长对箕翼。

步蟾宫（庆友人·四月初四）

莫开四叶祥光发。又还是、清和时节。昴星呈瑞夜来明，庆此日、挺生英杰。

少年玉树神清澈。未说到、龟龄鹤发。愿言鶚荐早蜚声，任丹桂、一枝高折。

行秋岁（四月初九）

麟垂绂秀。天纵今司寇。朱明景，清和候。缙云开帝东，括苍钟神秀。人争羨，昨生一佛今朝又。

璧水声华茂。玉殿天香袖。姑小试，陶甄手。行为黄阁老，

屹立丹墀右。名不朽，斯文名脉从君寿。

归朝欢（寿监丞·四月初十）

才鼓虞弦薰早入。昴日三分今恰一。清和时节天气佳，绿树莺簧巧调律。祥云舒好色。瑞气珑葱满簾室。又争知、长庚叶梦，太白生今夕。

快上星辰听履舄。州县劳人空役役。暂辞朱皂养冲和，绿野堂延蓬岛客。华筵倾玉液。难老细听歌永锡。何其，松椿无数，自可齐箕翼。

沁园春（寿壮寺丞·四月十一）

申伯嵩神，李白长庚，萧何昴精。恰先公三日，金仙氏降，后公三日，吕洞宾生。五百仙班，一千佛号，喜听胪声传集英。君恩重。早陞华监寺，扬厉朝廷。

金瓯已覆香名。正天下苍生须太平。看黄麻一命，难留五马，蟠桃三熟，会庆千龄。一尉凄凉，有官守者，莫到公堂称寿觥。三熏沐，但焚香清夜，遥拜台星。

千秋岁引（寿徐直院·四月十二）

词赋伟人，当代一英杰。信独步儒林蟾宫客。名登雁塔正青春，更不历君县徒劳力。即趋朝，典文衡，居花掖。得侑词

科技第一。便掌丝纶天上尺。见说庆生辰，当此日。翠萸三四叶方新，朱明正属清和节。行作个，黑头公，专调燮。

好事近（寿章宰·四月十六）

记紫极真人，前日是他生日。颍水有北风骨，弥诞当今夕。等闲来现宰官身，任鳧飞双舄。治狱阴功多少，是长生妙术。

满庭芳（寿真玉堂·四月十九）

仙吕已生，真才方产，较迟五日差强。谁知天意，孕秀待储祥。秋水精神玉骨，向妙龄、富妙文章。高轩过，儒林独步，腾踏趁飞黄。玉堂。金马客，蓬莱事业，花掖圭璋。更词科卓冠，时号无双。大展经纶有日，须恬退、待趣曹装。称觞处，西山风月，南极老人昌。

临江仙（寿赵簿·四月廿一）

结夏侵寻逾六日，蓬壶纪瑞生辰。祥烟葱郁蔼门庭。骖鸾双女侍，毓凤二雏新。

暂尔勾稽淹大手，声名已彻枫宸。行膺当路荐章荣。璇源添喜太，椿算祝遐龄。

百字歌（寿徐帅四月廿二）

清和天气，正风入舜弦，七飞萸叶。见说蓝田曾产玉，骨骼环奇卓牵。志气虹霓，丰姿熊又似龙字凤文足倾三峡。皇朝伟器。济川有待舟楫。

要知发轫亲民，栖鸾展骥，五马归台阁。退省谦尊防锐进，谁识终南径捷。笑傲东山，从容南极，兰桂同欢洽。称觴未老，绛人须共年甲。

水仙子（寿贩火运舟人·四月廿三）

浮家泛宅生涯好，聚米堆盐多积宝。烟波得趣乐江湖，宜乘兴，寻安道。不负轩辕当日造。

初度喜逢维夏早。孔释昔曾亲送抱。下弦良日是生朝，称觴献，金樽倒。惟愿寿筵长不老。

念奴娇（寿司户·四月廿六）

绿云雾雨，倚晴空千尺，长江澄霁。十里薰低、绣幕四叶，其余华屋。怪得清都，奔云拥鹤，环佩声相续。朝来无是，有人初降仙篆。

且与小试民曹，梅花岭外，雪片三冬足。眼底承家人物在，楚楚珪璋兰玉。雾阁云窗，翠眉红颊。解唱长生曲。壶中难老，定应两鬓长绿。

贺新郎（庆新婚又生日·四月廿七）

鸾凤初成匹。想桃源、刘郎仙女，新欢稠密。昨夜文星从天降，孕作非凡器质。却正属、梅黄时日。三九良辰佳气蔼，听重重相贺欢声溢。又复见，嘉宾集。

满堂笑语罗筵席。道称觴、宴你疑是尔字之误双庆，有谁能及。好事鼎来惬人意，看看功名在即。况先得、凤楼消息。祈遂与君偕老愿，劝樽前且饮长生液。增福寿，至千。

满庭芳（庆生日又生子·五月初一）

律转蕤宾，星流大火，尧阶蓂莢初开。当年此日，降下谪仙才。见说鸾池荐瑞，蚌珠又、复产渊崖。真堪羨，龙生龙子，双庆甚奇哉。

寄言，汤饼客，好称觴索，玉果倾杯。无新亦无旧，事事俱谐。他日同筵为寿，彩戏处、酬酢樽罍。瞻南极，灵椿丹桂，相继践公台。

水调歌头寿赵阆州五月初五 调名原误作念奴娇。

玉斧折丹桂，锦绣拂银河。蟠胸虹气千丈，捧砚唤宫娥。三度花攒五马，一笑毫挥万字，何处不恩波。试问老仙寿，铜狄几摩挲。舞槐龙，垂艾虎，弄清和。湖山风月，且与吟笑侧金荷。明岁端阳时节，人在薰殿阁，凉意入赓歌。宣劝滟歌昌，叠雪赐香罗。

柳梢青（寿人母·五月初六）

荷绽花繁。萸开六荚，喜溢门阑。好是骖鸾，特离月殿，来驻人间。

儿童歌舞衣班。接踵升堂视笑蒙。祝颂勤拳，将何比况，只个南山。

酹江月（庆母在作生日·五月初七）

仙翁初度，遇端阳佳节，又还两昌。怪得箕星光倍正，凌晓独辉南极。料想当年，储说荐瑞，兆见开先吉。称觞此旦，华堂佳气葱郁。

好看谕戏庭前，芬芳双桂，行作蟾宫客。况有瑶池王母在，重庆举杯欢悵。络物赐觞，孟光举案，姑妇贤相敌。与君品寿，蓬壶长见仙集。

鹧鸪天（五月初十）

饮了蒲觞五日期。彩丝还系玉麟儿。台云荐瑞生香褱，菡萏飘香入寿卮。

占骨相，孕清奇。秋风雁序看齐飞。卿家奕世青毡在，况是双亲未老时。

醉蓬莱（庆女人·五月十一）

后瑞阳六日，梅雨收晴，乍炎天气。阿母当年，罢瑶池佳会。排遣双成，屏除青羽，自降居尘世。为帝生贤，储祥孕秀，作文章瑞。

自古人言，陶孟母贤，文行曹家，衣冠苗裔。谁似夫人，子龙头鼎贵。此去相从，道山蓬岛，镇长生久视。却笑问平反。但不作，汉家严吏。

乳燕飞（庆被书·五月十二）

垛翠云峰远。日乌高、炎宫直午，暑风微扇。二六尧蓂开秀荚，跨海冰轮待满。怪院落、笙箫如剪。太乙燃藜天际下，庆卯金负子生华旦。依日月，近云汉。

经时持橐明光殿。问江乡、年来有几，只君方见。入座夫人难老甚，炯炯金霞照眼。笑指点、琼觞教劝。但得调元勋业就，为江泉石磴轻轩冕。归共作，赤松伴。

踏莎行（庆将赴上生日·五月十四）

花县来迎，瓜期欣至。大贤初度今朝是。蕤宾律应又将中，明宵圆月光腾瑞。

兰玉觞，斑斓舞戏。椒将聊半群行志。看看人已在鹏程，趋朝指日为舟济。

菩萨蛮（寿女人·五月十五）

宫样迎春髻。玉步金莲细。初度是今朝。嫦娥降九霄。
兰玉行荣贵。德备共姜义。夏关月团圆。称觴祝寿筵。

念奴娇（侄庆叔·五月十七）

垂弧纪节，正尧天日永，冀飞双绿。岳渎钟灵来瑞世，孕出精神冰玉。九曲溪山，一船烟雨，物外谁拘束。钓头香饵，只愁牵动周卜。

好是红藕池边，双房毓秀，瑞霭浮昆轴。记得君家流庆远，几见祥开陆续。来岁花时，西湖十里，叶映恩袍绿。竹林小阮，不防傍借余馥。

壶中天（五月十九）

乘鸾驾鹤，问神仙何日，崧高生甫。飞下琼台，因报道，恰是今年夏五。饮了蒲觴，才经半月，昴宿行初度。荣华富贵，一时都由分付。

曾记三月春浓，花风烂熳，吹散鸳鸯侣。虽则烧香遥祝寿，争似物斟香醕。便驾云骈，去登绣阁，说个诚心语。蟠桃熟未，请伊亲问王母。

望远行（寿商人·五月廿一）

青钱流地，更积满籛金玉。斡运营谋，无过是、老郎惯熟。利收万倍，归来喜色津津，家道从兹，十分富足。

好庆生辰，正属蕤宾月余。六飞奠英庭除。举盞祝寿，何如子孙，荣贵须臾。长是赖你，作个陆地仙客，行乐蓬壶。

感皇恩（寿宗室·五月廿二）

天水浴英姿，精神清彻。偏向蕤宾奈热。瑞蕤飘飘，却是生贤吉日。凌云志气，飘飘无敌。

头角轩昂，作霖在即。谁识功名待时立，一朝腾踏，国赖维城力。庆萱堂齐寿，延千亿。

满江红（五月廿三）

万甲胸中，问谁似、延安范老。当家事，出藩入相，黑头俱了。绿野倘徉聊雅志，紫宸寤寐思英表。向悠门、何日袞衣归，天教早。谏吉卜，维熊光。徵瑞梦，长庚耀。正尧蓂仲夏，八飞叶小。千日早从菑疾退，一觴恰趁笙歌绕。算灵椿、何似栢堂春，他犹少。

点绛唇（寿王宰·五月廿四）

五朋如秋，日临四六都无暑。列仙初度。听足商岩雨。

三载都曹，利泽留南浦。崆峒路。种花无数。行对延英主。

谒金门（寿士人·五月廿五）

文章士。秀气岳神钟聚。看雕鹏、秋风高举。上青天平步。
五五日临夏五。堂上称觞笑语。桂子兰孙齐彩舞。祝寿同
彭祖。

朝中措（寿太守·五月廿八）

天休令节庆生申。喜动满民。十万儿童踊跃，祝公寿等壮
椿。

人生最贵，荣登五马，千里蒙恩。只恐促归廊庙，去思有
脚阳春。

喜迁莺（庆陈丞在任·五月三十）

生贤时协。正炎官直午，日周三浹。门左垂弧，眉间喜色，
尽道降神嵩岳。百里葱葱各气，总向蓝田会合。称庆旦，见吏
民鼓无，欢声和洽。

玉叶。斟劝处，一饮流霞，红艳生双颊。钜竹槐松吟哦乐，
指日荣膺异渥。皇上渴思经济，环召为霖作楫。快人望，愿长
生，须与绛人同甲。

庆清朝（寿吴宪·六月初三）

朏月生西，杓星建未，画堂昼景偏长。天生英杰，独向此炎光。超卓凡尘表物，精神秋水自清凉。真奇物，清沟挺秀，敌国传芳。

好是少年折桂，唾手功名就，腾踏飞黄。君王眷厚，皇华绣斧还乡。土贵姜暮盛事，未容专美独夸唐。称觞处，颂闽境，遍戏公堂。

临江仙（寿友人·六月初七）

六月炎天收炎散，南薰洗尽烦蒸。尧蓂七荚又争青。问知陈仲举，元是此时生。

别驾功名清暇日，题兴尚带屏星。黑头非晚到公卿。且倾浮蚁酒，来听祝龟龄。

贺圣朝（寿主簿·六月初九）

阶蓂八叶当炎赫。此际公生日。金炉香爇起祥烟，气佳哉葱郁。

觞兰玉真无敌。尘簪纓世袭。鸾栖枳棘暂淹留，即黄扉召入。

满庭芳（寿丞相出守·六月十三）

喜镇龙藩，厌调金鼎，薄言衣锦为荣。天生申甫，欣对此良辰。自是神清气爽，风姿潇洒却炎蒸。称觞日，双叶翠萸，犹未展尧庭。

帡幪知有赖，国家柱石，须待扶倾。暂留公燕逸，抚及甌闽。君旧人共政，即环召、再秉钧衡。平章了，佑王万岁，齐寿永康宁。

百字歌（庆潭帅兼平寇·六月十四）

庚金入伏，细推来、明日又还三五。见说帅垣佳气蔼，天降崧神生甫。礼乐词章，甲兵韬略，素备文兼武。称觞花旦，颂声交赞台府。

好是比启元戎，剿除逋寇，不许奸偷侮。有此奇功高渤海，足慰湖湘生聚。暂统十连，折冲万里，行即驱残虏。九重环召，万年永佐天子。

水调歌头（六月十六）

律纪林钟月，免魄夜来圆。彩麟入梦，天教英物出人间。志气平生浩荡，欲试经纶大手，赞画向名藩。见说齐瓜熟，鹏路快扶抟。

称寿处，歌齿皓，戏衣斑。辉联甥馆，那堪一笑共团栾。好看蜚声霹雳，使有蒲轮迎召，催入侍龙颜。却待功成后，归

伴幔亭仙。

满庭芳（寿张教·六月十八）

昴宿储祥，奎星荐瑞，元来天产英姿。都缘鼻祖，织女与支机。自是流芳垂庆，仙凤道骨果清奇。称觞旦，任从伏暑，三荚年莫飞。

文章，谁与敌，欲成大器，殊未为迟。况年方强仕，政入官时。暂领广文庠序，即超身入凤凰池。同经济，云龙风虎，千载庆休期。

西江月（寿黄帅幹六月十九）

隆暑正当三伏，明朝又是双旬。崧高孕秀降生申。再捧瑶觞称庆。

督府赞猷英俊，难淹大展经纶。倚需召入秉洪钧。上佐万年明圣。

临江仙（寿何察推·六月廿一）

六月翠荚飞六荚，流空大火将西。当年名世间生时。似光风霁月，神爽更精奇。

三十成名登上第，芙蓉照水真犀。难淹逸步造丹墀。经纶须大手，谈笑入黄扉。

如意令（寿亲恩人·六月廿二）

炎暑尚余八日。火老金柔时节。闻道间生贤，储秀降神崧极。无敌。无敌。当代人伦准的。

射策当为第一。高跃龙门三级。荣著绿袍新，帝渥心加宠锡。良粥。良粥。真个国家柱石。

百字歌（寿张提干·六月廿三）

乾坤孕秀，正人间六月，下弦时节。生此清奇潇洒客，秋水精神玉骨。才吐天芳，毫挥月颖，更彬彬文质。图南得志，抟风有鹏翼。

好是大器难淹，暂陪庾使，赞画光原隰。台省即须登衮衮，黄阁平章有日。崔室称觞，莱庭戏彩，中外欢声溢。祝君延寿，箕星上应南极。

念奴娇（六月廿六）

神钟峻极，节庆诞弥。来天上之麒麟，生人间之麒麟。涂歌蔼蔼，岳颂洋洋。某辄撰芜辞，仰祝椿算。得蒙览掷，尤切欣荣。

先秋四日，正祥开弧矢，生申佳节，天上彩麟曾入梦，钟作人间英杰。袞庆盘坡，流芳星渚，家世绵簪绂。昨宵凝眺，

老人星现天阙。

鼎创庭馆连云，宴仙停棹，咫尺尘凡隔。好把蟠桃庭外种，坐看花开花结。秀长孙枝，辉联子舍，蟾桂行攀折。它年称寿，满堂朱紫罗列。

水晶帘（上定齐·六月廿七）

谁道秋期远，正句浹、双星相见。雨足西帘，正玉井莲开，寿筵初展。尘尾呼风祥暑净，那更著、纶巾羽。殢清歌，不记杯行，任深任浅。

湖边小池苑。渐苔痕竹色，青青如染。辨橘中荷屋，晚芳自占。蜗角虚名身外事，付骰子、纷纷戏选。喜时平、公道开明，话头正转。

满江红（六月廿八）

风露轻清，更十日、却逢七夕。庆初度、槐阴初静，藕花凉湿。太乙真人曾夜伴，青莲居士何年谪。空格据律补双凫、游戏宰花封，恩波溢。

甘雨酿丰年得。和气满，弦歌室。向烛花光里，且斟醺醖。菊水清於天水净，寿山高似东山峙。看诏归天上侍虚皇，骑箕翼。

满庭芳（庆隐士·六月廿九）

诗礼传家，不名则利，谁能袖物安常。惟君宽厚，无较短论长。且自深居简出，清闲处、管甚炎凉。年未老，方逾强仕，家富更平康。

秋声，风欲作，萸留一萸，伏暑将藏。大贤初度日，对此称觞。叹风帟虽冷落，喜御兰、得宠专房。见说宁馨少长，螟雏箕、学更高强。得闲趣，山中宰相，何必事侯王。

鹧鸪天（上女人·六月三十）

此夕薰风息舜弦。明朝早蓐收权。鹊饶喜舌喧华屋，烛富祥光耀绮筵。

宣玉旨，敕炎官。月宫催诞跨鸾仙。福如沧海无军极，寿比灵椿过八千。

壶中天（庆刘孺人·七月初三）

秋才三日，听画檐外，数声乌鹊。元是嫦娥迎巧夕，预驾横空仙鹤。翠鬓生云，朱颜晕酒，难描摸。优游渤海，玉琴重理弦索。

曾记乃祖刘晨，天台归后，留得长生药。兼有蟠桃三五颗，尽会女孙收著。分了仙翁，更分儿息，同作蓬莱约。年年今日，大家欢笑为乐。

满江红（七月初四）

一叶知秋，正玉律、新吹夷则。迟三日、双星齐会，又逢七夕。先迁天孙来乞巧，姓氏已在长生籍。喜华堂、今日庆生辰，排筵席。

歌金缕，斟琼液。听祝寿，环佳客。看寿星明灿，祥烟葱郁。剩种庭萱春不老，年年嘉会如今日。办一词、一岁一称觞，期千百。

蓦山溪（寿友人·七月初七）

填河鹊喜，巧夕来时候。深院瑞烟浓，隐隐听、梨园清奏。兰车玉佩，飞下蕊宫仙，春鬓绿，醉颜红，不减年时旧。

金杯争劝，尽是闺房秀。试问寿何如，与天孙、相为长久。看看子舍，添个捧觞人，从此去，尽欢娱，庆事年年有。

鹊桥仙（寿女人·七月初八）

星桥才罢，嫩凉如水，一夕祥烟萦绕。欢传玉母宴西池，正绿发、斑衣称寿。

儿孙鼎贵，弟兄同相，辉映貂蝉前后。六宫宣劝锡金桃，看盛事、明年重又。

临江仙（寿祝丞·七月初十）

天佑炎图生国瑞，蓝田暂屈英僚。始知昴宿降璇宵。中元前五日，七夕后三朝。

江教风流临此政，少年潇洒奇标。行看峻擢相熙朝。功名前稷契，寿算等松乔。

千秋岁（寿江东帅·七月十一）

金陵秋早。四日中元到。天降诞，真英表。长庚腾瑞气，箕宿增辉耀。膺帝渥，十边镇抚民多少。

莫惜椒觞倒。祝寿称难老。分帅阃，江东小。看看飞诏下，早趣黄扉如。平章了，长生学取神仙道。

水调歌（寿徐枢七月十二）

称彼兕觥后，三日是中无。地官较善，龙章玉佩压仙班。自是德星孕秀，直与寿星争耀，茨福正绵绵。堂已富金玉，屣踪视王官。

趣清闲，心洒落，在花间。桃培万岁，千年仙种又栽运。静对秋香菊耐，长共岁寒松老。生意满西园。待看椿同桂，洗馥迈燕山。

临江仙（寿判府·七月十四）

长记秋来多好处，清凉遍满人间。天教收拾孕真贤。何时初度日，明日是中元。

喜与莱同盛旦，官居鼎鼐相传。未应此地借蕃宣。来年开宴处，人在凤池边。

瑞鹧鸪（七月十八）

中无过后恰三朝，因甚庭闱喜气飘。李谪若非当此夕，申生应是在今宵。满斟绿醕歌檀口，慢拍红牙舞柳腰。富贵荣华谁得似，祝公千岁乐逍遥。

满庭芳（寿枢密孙·七月廿六）

彭郡宗盟，屏山德裔，儒科闻望流传。不贪世禄，雁塔占先登。锦绣文瑞彩。若披云、快睹青天。称觞日，萸留四叶，葵菽下宜烹。

星枢，方上应，推君甲子，好问绂人年。更遐龄多祝，五福兼全。此去沙堤步稳，调金鼎、袞绣貂蝉。人皆仰，一门相业，清白子孙贤。

鹧鸪天（七月廿七）

秋至人间灏气清。萸余三英映阶挺。挺生豪杰为时瑞，来至簪纓亨世荣。

天付与，寿康宁。不须举酒祝椿龄。楼头昨夜瞻南极，偏向梅峰分外明。

折丹桂（七月廿八）

初秋两两留萸荚。算恰是、生申佳节。祝君寿阅八千秋，岁岁对、长空皓月。

威宣比部推刚决。气凛凛、秋霜争烈。滩头双鸂看飞来。便有诏、催归天阙。

水调歌（寿史相·七月廿九）

两只补天手，一片济时心。信道相门再相，现此宰官身。涤洗乾坤都了，填压华戎既定，治世庆升平。中外为冠冕，闻望耸簪缨。

星昴降，蓬矢挂，属芳辰。黄阁一秋来早，明日又三旬。庭戏莱衣双佳，砌列谢兰无数，廊庙会风去。愿衍壮椿算，长沛傅岩霖。

西江月（为妻寿·七月卅日）

伴我鹿车鱼釜，从伊裙布钗荆。年年七月甫三旬，今日生朝资庆。

二女长俱麻绩，三男俱读书声。吾年五十不多争，好事且

宜少等。

蝶恋花（八月初六）

透户凉生初暑退。正是尧蓂，六叶方开砌。昴宿腾辉来瑞世。华堂清晓笙歌沸。

锦幕花茵生舞袂。妙态殊姿，祝寿眉峰翠。从此玉觞拚一醉。功成名遂千秋岁。

瑞鹤仙（庆生日又娶妻·八月初七）

朔朝逾六后。正音凋南吕，迎寒时候。香薰瑞烟袅。见门阑喜色，荣生多少。元来仙子，拥骖鸾、月宫飞到。会人间庆诞，风流俊杰，结成佳偶。

官好。班簪玉笋，名播中都，宠宸诏。金瓯覆黄扉青琐须环召。待平章事了，归来养浩，齐眉相对祝寿。愿长如、庆会双星，千秋偕老。

满庭芳（庆尚书恬退·八月初八）

西掖南宫，黄扉青琐，年来有分终须。从容曳履，衣锦赋归欤。暂乐终南佳处，供笑傲、松菊庭除。行看取，一封诏下，装趣入潭居。

称觞，逢穀旦，千秋节过，三叶蓂舒。且冷眼嗤笑，笼鸟

池鱼。识破林泉朝市，经行处、等是蘧庐。知谁似，一杯寿酒，一卷养生书。

洞仙歌（寿宫教·八月初九）

桂风高处，渐近中秋节。屈指推来先六日。对芳辰、符吉梦，知降神、崧极应诞，主作人间英杰。

文章逾晁董，学擅卿云，高揭声猷缙绅列。上瀛洲册府，师表宗藩，推第一、即黄扉召人。佐君王、经邦整顿坤，愿寿等广成，更延千百。

壶中天（寿太守子·八月十一）

才经四日，是中秋，次第月圆如玉。一点光浮南极上，储作人间五福。长厚慈仁，清高恬澹，爱水清山绿。溪园竹里，日来新就华屋。

好是五马传家，芝兰挺秀，早勉群经读。将相公侯绵衮衮，重见当看符竹。富贵荣华，康宁寿考，聪我殷勤祝。更祈王母，共看桃结桃熟。

水调歌（庆龙图·八月十三）

八月秋欲半，后夜月将圆。天满当日流润，余派落人寰。尘扫长淮千里，威振南蛮八郡，梓里绣衣还。芳毓燕山桂，庆

衍谢庭兰。

小山阴，长松下，白云间。壶中自有天地，闻早挂蓬冠。笑指横空丹坚疑‘壑’字误。闲倚拿云竹杖，佳处日跻攀。山色既无尽，公寿亦如山。

鹧鸪天（八月十九）

宴罢中秋恰四朝。金炉因甚把香烧。若非金母生今日，应是麻姑降此宵。

歌窈窕，舞娇娆。迭将寿酒酌金蕉。椿龄柏算何须祝，名列仙班亦孔昭。

好事近（庆母寿子中举·八月二十）

王母庆生辰，方过中秋五日。子舍文声鏖战，想功名来逼。看看喜德捷音传，果信名登桂籍。行拜君恩爵赏，寿萱堂就锡。

如意令（寿王学老·八月廿一）

久羨庞眉鹤发。闻望孔堂烜赫。信得彭乔仙，秘授长生真诀。奇特。奇特。吕望师周时节。

才过中秋六日。对此称觞欣怿。双凤戏莱衣，金缕轻调莺舌。难得。难得。九九算犹千百。

壶中天（寿朋友·八月廿二）

清凉天气，正中秋过后，恰才七月。岳降生申逢令旦，听得欢声洋溢。戏彩堂前，两行珠翠，酒劝杯浮碧。祝君遐算，寿星长对南极。

仰羨性地宽闲，平生酷爱，占断倾城色。好展少年攀桂手，同作蟾宫客。其人同时免举。料想嫦娥，一枝留待，已得真消息。馨香满袖。凤楼人尽怜惜。

百字歌（寿父子同日·八月廿五）

莫飞十荚，觉九分秋色，六分将极。桂子风高时更好，天产英贤同日。桥梓齐芳，一慈一孝，奋建真奇特。称觞华旦，但将老少分别。

且看戏彩堂前，酒须双献，饮侍严君侧。清赏阿戎防跨灶，大小欧相敌。疏曰贤哉，古去有是，作个家家声烈。无先无后，寿齐延应翼。

水调歌头（寿王枢密，又得子·八月廿六）

穀旦垂弧矢，兰闼梦熊罴。称觞内外相庆，同日又同时。有此重重盛事，未羨石门奋建，韦氏信名齐。珠履赴汤饼，玉果酌琼卮。

斗枢转，金瓯覆，筑沙堤。争推是父是子，相继入黄扉。
方叔歌猷无老，复见少年黄琬，前后拜丹墀。今日寿星现，再
祝寿庞眉。

寿星明（庆黄宰秩满·八月廿七）

玉露迎寒，金风荐冷，正兰桂香。觉秋光过半，日临三九，
葱葱佳气，蔼蔼琴堂。见说当年，申生穀旦，梦叶长庚天降祥。
文章伯，英声早著，腾踏飞黄。

双凫暂驻东阳。已种得春阴千种棠。有无边风月，几多事
业，安排青琐，入与平章。百里民歌，一樽春酒，争劝殷勤称
寿觞。愿此去，龟龄难老，长侍君王。

满庭芳（庆生日入新屋）

北斗将移，西风已半，蓂余一叶阶前。左弧吴瑞，非雾亦
非烟。见说长庚入梦，当年此际产英贤。谁知得，平生高尚，
五福自然全。

肯堂，夸盛事，一新轮奂，适际荣迁。有重重喜庆，贺客
骈阗。从此燕居笑语，称觞处，好展华筵。频祝愿，室家相庆，
富寿百千年。

应天长（庆新恩母·八月三十）

萱堂积庆，桂苑流芳，于门瑞蔼佳气。正属仲秋弥月，称觞对此际。西王母、来人世。拥佩从、尽皆珠翠。彩庭下，争看蓝袍，衬遍斓戏。

富贵有谁同，四德躬全，五福由来备。况善断机迁教，轺亲实无异。看看仕无淹滞。即召入、佐君经济。愿延寿，鸾轴金花，年年加赐。

满庭芳（寿包宰·九月初四）

露白风清，菊黄萸紫，重阳五日先期。煌煌郎宿，南极两交辉。天上飞凫仙伯，当初度、开宴瑶池。民谣里，劝分阴德，百姓饱饥。

画帘，香篆永，城山堂上，红袖蛾眉。任满斟高唱，祝寿新词。况是辟书到也，乘别驾、直上横蜚。青毡在，看看复见，孝肃旧家时。

醉蓬莱（寿邑宰·九月初五）

正香茱试紫，嫩菊敷黄，九秋佳致。峻岳生申，运启千龄瑞。玉宇澄清，金盘沆瀣，融结种冲粹。地位须还，粉垣薇省，木天蓬秘。

锦政慈祥，琴堂安静，万里丰年，一同和气。斗大雷对，难久蒙私惠。半刺平分，剡书交上，逸驾开骅骝。来岁称觞，人归清禁，班联丹陛。

风入松（寿刘倅·九月初九）

晓来凉气满芙蓉。日到竹阴东。称觴歌袖三千指，屏星畔、绕绿围红。茱糝百杯秋色，桂华十里西风。

生朝对饮菊丛。九日一樽同。文章欲向家声旧，便应去、黄阁从容。唤起仙翁为寿，种成千岁椿松。

满江红（寿传府尹·九月初十）

瑞霭长安，京城里、非烟非雾。须信道、岳钟神秀，再生商傅。节过重阳才一日，祥开蓬岛群仙聚。见箕星、昴宿辉文昌，欣初度。五马贵，荣朝著。人品异，多文富。况清廉如水，襦歌督府。伫想君正烦燮理，一封召入为霖雨。指壮椿、祝寿八千春，从今数。

满江红（寿官员·九月十二）

一片秋光，看天宇、悠眉浮绿。都怪问、今朝爽气，十分堪掬。梅岳仙翁来瑞世，年年好景人间足。醉黄花、三日却称觴，钟天禄。

不用把，香为祝。身自有，长生篆。只宽平六考，几多馘穀。袖物珍祠为足计，急流勇退宁随俗。把壮椿、从此计春秋，无穷福。

瑞鹤仙（寿宫观待制·九月十三）

正秋高气肃。过重阳四日，蓝田生玉。钟英自川渚。果文间锦绣，琅玕披腹。从容启沃。侍甘泉、无用推毂。急流勇退，向琳宫养浩，无荣无辱。

享福。欣逢华旦，对此倾觞，满倾醺醖。西园晚菊。尚堪摘、取余馥。有仙风道骨，康强仁寿，长生何待更祝。愿谢公、复起经纶，曹装已促。

满东红（寿妇人三子皆贵·九月十四）

王母当年，瑶池会、曾充坐客。对良辰为寿，复逢侍节。屈指重阳才五，明朝月已圆如璧。这夫人、真与柏舟姜，同年德。

佳气霭，看葱郁。称觞处，多欣色。更萱庭谝谝闲切。谝，彩色不纯戏，桂芳品列。未逊轺新机教力，且如络秀声煊赫。问金花、锡宠自谁加，河东薛。

贺新郎（庆生日子纳妇·九月十六）

喜动神仙屋。正三秋、长空月满，又逾一宿。传道垂弧当此日，缘是蓝田生玉。更子舍、新归婉淑。好事重重欣逢遇，合称觞、宴席倾醺醖。拚一醉，欢娱足。

桃源太媿歌新曲。想蓬莱、仙洞又献，长生真箓。看一点、

老人照耀，牛女莱庭祝福。合长幼、芝兰满目。总各来秋高折桂，麻衣换取蓝袍绿。永遇乐，食天禄。

千秋岁（庆生日女受聘·九月十七）

律调无射。月望才逾日。昴宿呈祥南极。称觴祈五福，膺聘陈双璧。彩堂上，老人婺宿光交集。

龟鹤年相敌。孔雀屏开侧，喜与寿，俱逢吉。门楣他日作，椒觞歌今日。看父子，乘龙跨鹤皆仙匹。

鹊桥仙（寿王驸马又将亲迎·九月二十）

龙山宴罢，又经旬日，还报生辰来也，今年祝寿胜年时，须满劝、十分玉斝。

鱼书已报，凤帟知道，已备鸾骖鹤驾。不须寻药访桃源，且做个、风流驸马。

生查子（九月廿一）

才生申十日，便小春时候。硕果已含生，一缕微阳透。贞固见天机，寿脉滋培厚。菊后早梅前，不尽长生酒。

满江红（寿命妇·九月廿二）

万里无支，天风同、祥光满目。见婺星一点，辉联箕宿。果是月宫仙子降，诞生乐国人如玉。六九飞蓂、正属九秋高，清霜肃。

丹桂盛，蓝袍绿。芝兰秀，森如簇。庆簪纓几代，家毡欣复。萱草长春殊未老，君恩加锡金花轴。款陪王母宴瑶池，蟠桃熟。

蓦山溪（集曲名·九月廿四）

菊花新过，秋蕊香犹媚。三八燕山亭，贺圣朝、申生明世。肃霜天晓，正快活年时，庆新寿，万年欢，人醉蓬莱里。

红衫儿歌，水调夸多丽。仰祝寿星明，指黄河、清年可拟。欢同鱼水，永遇乐倾杯，风流子、洞山歌，曲唱千秋岁。

满朝欢（寿韩尚书出守·九月廿五）

一点箕星，近在边，光彩辉耀南极。竹马儿童，尽道使君生日。元是凤池仙客。曾曳履、持荷簪笔。称觞处，晚节花香，月周待五夕。

谁道久拘禁掖。任双旌五马，暂从游逸。九棘三槐，都是等闲亲植。见说玉皇侧席。但早晚、促归调燮。功成了，笑傲南山，寿如南山松柏。

瑞鹤仙（寿王侍郎·九月廿七）

过重阳三九。正日行析木，方移旦柳。天公爱黔首。念整顿乾坤，须还大手。蚌珠才剖。玉麒麟、世间希有。想当年，玉燕投怀，瑞气应冲牛斗。

非偶。节逢庆会，华渚虹流，北枢电绕。明良须偶。盈月第、分前后。念元鸟生商，嵩神孕甫，两听管弦新奏。愿年年，主圣臣贤天长久。

醉蓬莱（寿张宰·九月廿八）

望秋高梨岭，星下莆阳，庆生贤哲。问瑞萸留两荚。小试宏才，暂劳雕邑，布阳春仁泽。庭有驯禽，村无吠犬，稻黄连陌。

最是邦人，合掌顶戴，萱草年华，蟠桃春色，却笔仙翁，觅丹砂金诀。德满人间，诏来天上，看寿名俱得。岁岁霞觞，凤凰池畔，贺生辰节。

真珠帘（庆游纳齐以梅为寿·九月三十）

隔云一雁衔秋去。苏堤上、听得游人相语。疏影暗香中，谁与花为主。满目有山无限意。跨白鹤、云霄飞舞。飞舞。正断桥流水，苍苔生处。

就羨地暖江南，近小春时节，南枝先吐。人似此花清，人比花尤苦。移向樽前须识取。只许与、松篁为侣。为侣。待金

鼎调羹，百花红紫。

上阳春（寿人夫妻二子同日·十月初二）

两日梅开，先占阳春小。鸾凤偶雁行，飞舞画堂交绕。称觴盛旦，二老同年少。夫劝雪，弟酬兄，四喜人希有。

灵椿萱草，青翠俱长久。棠棣戏谗斓，对立齐上长生酒。有亲有序，慈孝兼恭友。登科日，未老时，共享南山寿。

西江月（十月初三）

才入冬来三日，人都道小春来。生生一脉早胚胎。消息南枝大此句缺一字。

好向腊前冬后，贞元接处滋培。调羹物段桃栋梁材。直待文明嘉会。

西江月（寿刘公子·十月初西）

良月才经四日，彭城庆诞真贤。从来半酒百诗篇。锦绣文章灿烂。

自合宰官身现，谁知富贵由天。但教福寿喜双全。直看子孙荣显。

满庭芳（十月初五）

瑞靄非烟，小春良月，翠开五叶阶蓂。补陀现相，今日庆生辰。江夏芳流秀国，芝兰茂、世袭簪纓。天恩厚，金花屡锡，偕老黄卿卿。

画堂，歌舞处，香浮宝鸭，寿酒频斟。愿朱颜鬓，常似青春。待得蟠桃三熟，与群仙、会宴西清。台星照，婺星箕耀，南极镇长明。

鱼水同欢（庆两子同日·十月初六）

棣萼档前佳气藹。欣遇静觴，正斗杓移亥。三两日来连庆会。贺宾喜色增加倍。

未逊徐雏分小大。好比晋朝，二陆休声在。更祝灵椿颜不改。三苏相继居台宰。

一箩金（甥寿舅公·十月十一）

新冬十叶蓂添一。良辰喜是翁生日。金鸭爇沈香。祥烟绕画堂。

遐龄方五十。厚福犹千百。看取小甥孙。年年捧寿樽。

满江红（十月十二）

好景欣逢，须记取、小阳春暖。算夜来浹日，今朝生旦。对此称觞春酒献，郁葱佳气琴堂满。问使君、记纪绛人年，耆颐半。

天付与，文章灿。牛刀试，风流县。笑陶情松菊，主人懒散。谁识东山真捷径，银章博取新貂袞。愿潭居、槐府展以纶，延椿算。

感皇恩（寿翰林·十月十四）

明夜月团圆，小春霜早。今日由来佳气好。都城传道，翰苑称觞欢笑。知是当年，诞生元老。

新来曾见，金莲送到。一任芳樽频醉倒。判花西掖，独春华词藻。召归紫闼，永为师保。

沁园春（寿冰壑·十月十七）

冰壑平生，如伯伦狂，似希乐豪。喜观书不用、菊茶明眼，登山不倩、藜杖扶腰。豆粥萍虀，簋羹鳞脯，湖海人常折简招。谁去老，有满怀风月，藏在诗瓢。

凌晨向鹄冲霄，道昴宿于今又应萧。记垂弧令节，恰当后日，下元好景，正属前朝。冷胆如天，刚肠如剑，须把千杯寿酒浇。那堪更，是梅花时节，烂漫溪桥。

水调歌头（寿隐士·十月十八）

橘记一年景，梅泄小春英。见说彭成仙隐，对此庆生辰。寿比太公欠一，年并楚丘逾九，益壮异常人。细数称觞日，信宿两弥旬。戏莱衣，桥梓列，桂兰荣，一门盛事难得，一子两层孙。休论若儿渠父，差胜杨椿黄琬。四代眼前亲。积善有余庆，享福百千春。

玉楼春（寿太守·十月十九）

姑苏台上春光泄。菊老寒轻香未歇。人言太守是龚黄，天为吾君生稷契。

明良庆会俱良月。万岁知秋同瑞节。明朝仙领趣持螯，十万人家齐卧辙。

满庭芳（寿幕官·十月廿四）

良月霜晴，小春寒浅，瑞萸九叶朝飞。岭梅香度，初发向南枝。此际高门袭庆，真贤降、金璧争辉。传瀛海，向歆父子，相望姓名垂。

广寒，仙籍在，笔驱造化，文照虹霓。暂徘徊莲幕，名誉英驰。行笏夔龙不武，蓬同静，玉宇春熙。当清夜，神交太乙，相对照青藜。

蓦山溪（寿李学士·十月廿六）

月惟四日。又转黄钟律。好影会生辰，是天降、真儒无敌。称觞设席，香雾腾葱郁。霜天晓，笙歌彻，玉斝倾仙液。

当年桂子，元是蓬莱客。任留宿蓬莱，道山试、玉堂翰墨。一封飞下，趣召入黄扉，台星照，寿星明，相映居南极。

洞仙歌（寿丞相夫人·十月廿八）

潭潭仙隐，婺宿光联地。喜见门阑蔼佳气。对芳辰，诮一似、王母会瑶池，又却是、夫人诞生明世。

普陀见真相，淑德温柔，更比嫦娥又何异。小春吉月，日数推来，成七四好景，杯觞须记。况荣贵，见青紫满门，争戏舞莱衣，祝千秋岁。

水调歌头（寿刘枢甥·十月廿九）

今日小春月，后日是周正。瑞蔼挹仙堂上，崧岳喜生申。文物师垣宅相，诗礼枢庭世胄，冰骨玉精神。浩气凌牛斗，胸次京凡尘。

郭中书，广成子，李长庚。勋业词章福寿，直上等三人。松菊亭前诗酒，梅竹园中翰墨，时复萃嘉宾。人指屏山下，双桂一灵椿。

临江仙（贺人寿有父有兄弟·十一月初三）

三叶翠萸开子月，九天降诞文星。满堂佳藕祥云。称觞椒有颂，介寿酒浮春。

强仕宜为攀折客，须知富贵催人。看看雁塔即联名。一门夸盛事，棠棣对灵椿。

醉蓬莱（寿龙图有父母·十一月初四）

正霜融日暖，两两萸开，阳生时候。喜见文星，上有箕星照。须信岳神，储降，庭作儒林秀。一举登科，蟾宫稳步，桂香满袖。

天赋麒麟，奇骨尽美，德耀宗盟，有谁居右。宠擢珍图，龙序褒勋厚。两郡棠阴，一对芝检，飞来到如结束曹装，入居黄阁，双新未老。

木兰花慢（寿主簿·十一月初五）

腊到冬至后，报春意、动南坡。见葭管浮灰，梅英缀玉，漏泄阳和。阶萸呈瑞五叶，祥开崧岳耸嵯峨。笑拥两行珠翠欢腾一曲竹歌。

试将铜狄细摩挲。问寿富如何。道寿等冈陵，富连阡陌，福禄多多。德门最堪羨处，有乔松丹桂映婆娑。管取脱身簿领，即登奕世儒科。

水调歌头（寿王制置·十一月初六）

宝历契昌运，岳渎启珍符。汾阳忠义勋阅，此际挂蓬弧。正属阳生子月，始见蓂敷六荚，宝剑出昆吾。芒射斗牛分，光彩照坤舆。

备文武，宏器量，足谋谟。世传韬略，出专阃制誓平胡。尽护貔貅百万，仰副九重委注，指日复舆图。祝寿如山阜，进位陟洪枢。

鹧鸪天（寿尊长·十一月初十）

月琯循环届仲冬。蓂生十叶气葱葱。梅花香里开华宴，拍酒樽前拜寿翁。

檀乍爇，烛微笼。儿孙罗列劝金钟。点头更问儿孙看，慈母蟠桃几度红。

临江仙（寿妇人·七十十一月十一）

鲁观书云方在候，颍川家庆非常。望前四日上椒觞。北堂人未老，南极夜增光。

借问遐龄今几许，希年恰喜相当。愿同王母寿延长。蟠桃看屡熟，萱草镇长芳。

百字谣（寿张推官·十一月十二）

一阳来复，正日临三四，梅英露白。玉燕当年曾入梦，瑞应果生人杰。金玉文章，圭璋闻望，早作蟾宫客。来趋莲幕，片言珍重能决。

自知阴德居多，仕途应显，州县何劳力。况有儿孙俱挺特，管取桂枝主折。桥样齐芳，芝章并秀，甚盛家声籍。祝君长寿，一门荣贵无极。

临江仙（十一月十三）

要问南枝消息早，一阳恰喜方回。望前二日验云台。祥光呈五色，瑞彩上三台。

生机一脉何尝息，正看用世真才。调羹手段此胚胎。文明观盛会，真待六阳来。

满庭芳（寿赵判院有父有子·十一月十四）

阳复今朝，月圆明日，渭溪改观风光。金枝孕秀。余庆衍天潢。诞降真英间世，群仙贺、喜萃华堂。那堪见，灵椿未老，丹桂两芬芳。

烛摇，香雾拥，翠娥歌舞，齐上椒觞。且殷勤仰祝，华算等天长。况蕴智谋韬略，维城志、屏翰君王。待收取、平戎功业，军国赖平章。

满江红（寿富者七十·十一月十七）

阳律方回，月圆后、又逾两日。想当年，秀钟峻岳，复气先洋溢。羨璇穹、箕宿动祥光，辉南极。

延遐算，希年及。康宁富，无亏一。论箕畴五福，总全天锡。鹤发未教垂雪彩，凤毛行展冲霄翼。愿彩庭、岁岁捧霞觞，倾仙液。

水调歌头（寿太守傅侍郎，前三日冬至·十一月十八）

关中有萧相，江左见夷吾。中兴帝赉良弼，体运应乾符。百五期过一日，十万声号半夜，南极灿晴虚。崧岳生申甫，河洛出图书。

领破仙，陪橐从，镇潜都。九重昨有梦，问到北岩无。须们建溪桃李。难驻商川舟楫，归去伴都俞。岁件南山寿，日拱北辰居。

万年欢（寿待良·十一月二十）

律应黄钟，蓂飞六荚，今朝是、嵩岳生申。似山堂里，氤氲瑞气先春。笙歌度曲，依然在、紫府黄庭。拥出癯仙冰玉洁，梅花个样精神。堪羨处，行藏信道，出处无心。

莫把闲中日月，替了调元公案，袖手经纶。黄扉虚左，休顾平泉花石盟。好看来年八帙，渭川叟、故事重新。寿星与、三台齐色，政地拜生辰。

鹊桥仙（寿侍郎·十一月廿一）

朱门列戟。华堂鼎食。那更康强八十。渭川遇主恰年同，怎得似、累朝良弼。

冬殷仲律。六蓂飞日。一点星辉南极。祝公经济出调无，偏寰宇、同跻寿域。

瑞鹤仙（寿妇人七十三·十一月廿二）

正迎长时节。细数来、两旬已浹，两朝方越。画堂人笑悦。见瑞烟香袅，寿星明彻。丝丝华发。问瑶池会客，几见桃结。才经八十，春秋不记，绛人年月。

奇绝。诗书教子，陶母等伦，曹家风烈。鼎来德。儿孙尽、蓝袍客。便从今，一轴金花鸾锦，十藏琅函贝叶。愿常如、秋月圆时，长生真诀。

临江仙（庆寿日趋朝·十一月廿三）

律按黄钟余七日，左扉弧矢呈祥。好看一点上眉黄。台星还又照，相映寿星光。

今岁生应迥别，趋朝已趣曹装。姓名稳稳造鸳行。来年三四月，衣锦早还乡。

菩萨蛮（寿侄·十一月廿六）

莫留四叶书云后。此日孙枝秀。爱他风味似吾人。却是笔头能篆、又能文。

青青两鬓年方壮。儿女俱成长。要添富寿共荣华。教取一庭兰玉，共成家。

江神子（寿监镇·十一月廿七）

一阳来复气回新。对芳辰。庆生申。月满惟迟、三日又三旬。入仕致身知是早，年弱冠，正青春。

文章笔下扫千军。擢铨衡。袭簪纓。荣捧宸恩，来镇此邦民。行历花途须烜赫，添寿酒，祝椿龄。

上阳春（寿邹魁侄·十一月廿八）

疏梅点白，漏泄先春信。律欲变黄钟，但两日、一阳月尽。龙头望族，挺挺振家声，窗下业，月中枝，雁塔书名姓。

琴堂拟步，早发梅仙轂。台阁待风生，想咫尺、天颜已近。壮行未老，便作黑头公，还未定，祝千春，看子孙昌盛。

醉蓬莱（寿特奏官·十二月初二）

看梅腮妆腊，柳眼缄春，小寒交候。萸萸双开，庆生贤毓称。早著蜚声，荣登鹗表，正是当年少。大器能藏，待当富贵，功名还就。

暂试鸾栖，需期瓜约，式经伦手。料想黄扉须有。看玺书飞到。州县无劳，沙堤已筑，跃马长安道。岁岁今朝，刘扁烂品戏，举觞称寿。

临江仙（庆梁孺人·十二月初三）

数朵寒梅方破腊，良宵新月初生。晓来闺阁庆生辰。天孙应降诞，德迈孟光贤。

喜配伯鸾真得耦，乘龙产凤齐名。称觞岁岁祝长年。瑶池桃未熟，南极婺星明。

满庭芳（寿胡簿方三十·十一月初四）

梅拆数枝，萸舒四荚，二阳始觉来临。五云呈瑞，渤海复生申。信道当年庆诞，人推天上石麒麟。果然是，名驰雁塔，弱冠绿袍新。

鸾楼，虽小试，仕途发身，现宰官身。信倚需一札，飞下天庭。自是调羹大手，环召也、快展经纶。称觞处，彩堂具庆，芳桂对萱椿。

壶中天（寿伯母·十二月初六）

嘉平时候，算尧阶蓂叶，才方开六。婺女当年曾降瑞，产作仙姿清淑。金玉满堂，儿孙满目，心事今都足，嘻嘻哈哈，一门和气可掬。

何幸诞节称觞，湖山堂上，燕集皆亲族。，犹不能歌盛美，但借湖为祝。福比湖深，寿齐山耸，岁岁颜如玉。好陪王母，共看几度桃熟。

小木兰花（寿亲戚·十二月廿七）

日逢三九。相对梅花倾寿酒。次第回春。甲子从头又一新。敬翻一曲。付与歌儿劝为祝。为问仙翁。今岁蟠桃几度红。

沁园春（寿刘常州·十二月廿九）

淮海知名，今日刘郎，胜如旧时。记当年幕府，从容赞画，云从万骑，电掣千麾。威震新塘，气吞涟楚，涤扫妖氛但指期。论功处，载骖鸾鹤，衣锦赋荣归。

九重诏已封泥。看稳上青云万丈梯。况颁春是日立春。明朝岁，且对椒盘奉寿卮。功名事，不输前辈，行到凤凰池。

千秋岁（十二月三十）

欢盈万屋。声杂当庭竹。腾宝篆，辉银烛。东君将到处，

祇隔邮亭宿。谁知道，此时诞个人如玉。

红叶题宫墨。流入人间曲。天香在，犹芬馥。满斟眉寿醕，共劝千龄福。情未足，来朝更把酴酥祝。

贺新郎（张县尹美任）

父老持杯水。叹世间、公论无情，是非易位。来饯花封贤令尹，籍籍攀辕耳语。留不住、青原抚字。蓦地风波平地起，算十常、八九乖人意。无处著，不平气。

浩然一曲歌归去。问城郭田园，曾荒尤未。亲旧过从同一笑，不羡浮云富贵。任造物、小儿厮戏。失马安知非是福，况庙庭、侑记祀方思魏。天定也，诏书至。

蝶恋花（贺领乡举）

名播乡闾人素许。科诏相催，又趁槐花举。谈笑挥成金玉句。贤书果见登天府。

阔步青霄今得路。脚底生云，拥入蟾宫去。好是来年三月暮。琼林宴处人争睹。

桂枝香（贺及第）

恩袍草色。望满目青青，光动阡陌。拂拂鞭丝散漫，锦鞞玉勒。君王赐举琼林宴，玩丹桂、香浮仙籍。舜韶清雅，尧觞

泛滥，欢意何极。

湛露久、需云未饰。更星使传呼，天上消息。槐幄阴移，上苑淡烟凝碧。归来渐近平康路，骤香尘、倒载连璧。马蹄轻驶，宫花半钥，艳欺斜日。

西江月（赠友）

忆昔钱塘话别，十年社燕秋鸿。今朝忽迈暮云东。对坐旗亭说梦。

破帽手遮西日，练衣袖卷寒风。芦花江上两衰翁。消得几番相送。

少年游（题锦标社疏、）

新竿界断一天游。万弩向云头。彩羽飞星，红心破日，胜集总名流。，好手业中施好，利物敢轻酬。捧杆前多，旗花钱少，快请办头筹。

浣溪沙（题赠飞竿族）

谁识飞竿巧艺全。儿童群戏艳阳天。十分险处却安然。海燕舞空萦弱絮，岭猿连臂下颠。算来真个肉飞仙。

菩萨蛮（题刀镊行族）

宝刀迎面摇寒雪。琼梳掠鬓横新月。红颊驻长春。绿鬟轻绾云。

解飘并括敛。到处题名遍。飞诏待追还。荣居供奉班。

满江红（贺人开酒店药铺）

旧日皆春号皆春，气象、又重收束。做得新丰酒肆，济康堂局。老杜误传人酝酿，许公手种时科目。自两公、一去已经年，君今续。商家醴，须君鞠。怀英笼，须君蓄。且饶人大卖，呼么喝六。佶个家人三两辈，药王菩萨丹青轴。更于中、添得个当炉，十分足。

贺新郎（黄州赤壁）

苏子秋七月。向凉宵、扁舟与客，共游赤壁。清吹徐来波不动，举酒诵诗属客。白露与、水光相接。万顷茫茫浩浩，飘飘乎、遗世而独立。棹兰浆，溯空阔。

正襟危坐而言曰。客知夫、天地之间，久长无物。惟有清风与明月，万古用之不竭。寓耳目、为声为色。客笑欣然重酌酒，忽盘肴既尽杯狼籍。东方白。

贺新郎

十月临皋暮。客从予、黄泥之坂，凜然霜露。相与行歌而言曰，月白风清如许。念无酒、归谋诸妇。妇曰斗酒藏之已久，可携为、赤壁之游否。江水落，出洲渚。

登龙踞虎幽宫俯。啸一声、出鸣谷应，寂寥四顾。有鹤东来西去也，梦道士、揖予而语。赤壁之游乐乎否，问其名、不答予惊悟。开户视，不知处。

满江红（严州钓台）

不作三公，归来钓、桐庐江侧。刘文叔、眼青不改，故人头白。风节偿能关社稷，云台何必图颜色。使阿瞒、临死尚称臣，伊谁力。

登钓石，初相识。鱼竿老，羊裘窄。除江山风月，更谁消得。烟雨一川双桨急，转头不忿青山隔。叹鼻端、不省利名醒，京华客。

踏莎行（寄妹）

孤馆深沈，晓寒天气。解鞍独自阑干倚。暗香浮动月黄昏，落梅风送沾衣袂。

待写红笺，凭谁与寄。先教觅取嬉游地。到家正是晚春时，小桃花下拼沈醉。

青玉案（送别）

征鞍不见邯郸路。莫便匆匆去，秋风萧条何以度。明窗小酌，暗灯清话，最好留连处。

相逢各自伤迟暮，犹把新诗诵奇句。盐絮家风人所许。如今憔悴，但余衰泪，一似黄梅雨。

沁园春（庆云山创屋）

法从西清，雅志山东，超然燕怡。笑洛城卢老，贫来屋破，花溪杜叟，雨里床移。晚乃经营，欢言结架，天矫晴虹朝已跻。开山了，一灯灯相续，第一宗师。

乘闲小隐幽栖。天与人谋应此时。算春霆震响，不教龙蛰，甘霖布润，待倩云飞。宥密思贤，明谟经远，共指神州复归。归来也，更身名烜赫，锦绣光辉。

水调歌头（贺新居）

蹶走半天下，作意赋归欤。燕申经始不日，胸次出规模。千古神峰拥护，万古横江缭绕，佳致足方壶。

一饮一词美，还得似君无。

十步楼、五步阁，恣安居。薰蒸气，袭人盎觉春如。况是庄椿不老，那更徐鸡并秀，父子看名俱。驷马高车盖，不减汉之于。

水调歌头（贺新居）

三径当松竹，五亩足烟霞。个中卜宅，蓬山佳致足君家。前有书江环绕，后有横岗崒嵴，万象总森罗。轮奂翬飞处，此屋岂无华。

绿窗开，朱户敞，绣帘遮。燕闲自适，百篇斗酒是生涯。种善善根未绝，延桂桂枝可待，谁子为君夸。佳嗣夔足，荣耀必多嘉。

金缕衣（贺云溪建楼）

帝遣司花女。炯琼琬瑶佩，新来满空飞舞。飞到水晶宫阙处，还被六丁迎住。唤月娣、天孙说与。道是云溪新洞府，粲玉虹、拥出神仙宇。齐星汉，切云雾。

朝来细把虹梁举。命日兄、催上金鸦，高高胜翥。云母卷帘三万数，不碍风斤月斧。真个是、去天尺五。恰则紫皇香案近，那砖花、院柳宜年少。双鬓绿，朝天去。

江城梅花引（和赵制机赋梅）

逋仙千载独知心。别无人。泪痕深。长是自开自落自成阴。白石后来疏影句，饶绮丽，总输他、清浅吟。

伤情。伤情。角中声。夜沈沈。更捣砧。欲雪未雪、天欲老，云气昏昏。梦绕西湖路渐不堪行。人已骑驴毡笠去，留恨

也，仗梅花，说与君。

踏莎行（和赵制机赋梅）

瘦影横斜，断桥路小。如今梦断孤山了。冷魂趁鹤不归来，荒山没尽深深草。

月下罗浮，一樽自笑。旧枝尚记幽禽抱。王令人梦里说相思，被谁惊破霜天晓。

满江红（梅）

雪后郊原，烟林静、梅花初拆。春初半、犹自探春消息。一眼平芜看不尽，夜来小雨催新碧。笑去年、携酒折花时，君应识。

兰舟漾，城南陌。云影淡，天容窄。绕风漪十顷，遥浮晴色。恰似槎头收钓处，坐中仍有江南客。试与问、何如两桨下苕溪，吞梦泽。

献仙桃

元宵嘉会赏春光。盛事当年忆上阳。尧颡喜瞻天北极，舜衣深拱殿中央。

欢声浩荡连韵曲，和气氤氲带御香。壮观大平何以报，蟠桃一朵献千祥。

献天寿慢

日暖风和春更迟。是太平时。我从蓬岛整容姿。来降贺丹墀。

幸逢灯夕真佳会，喜近天威。神仙寿算远无期。献君寿、万千斯。

献天寿令（催子）

阆苑人间虽隔，遥闻圣德弥高。西离仙境下云霄。来献千岁灵桃。

上祝皇龄齐天久，犹舞蹈、贺贺圣朝。梯航交凑四方遥。端拱永何宗祧。

金盏子慢

丽日舒长，正葱葱瑞气，遍满神京。九重天上，五云开处，丹楼碧阁峥嵘。盛宴初开，锦帐绣幕交横。应上元佳节，君臣际会，共乐升平。

广庭。罗绮纷盈。动一部、笙歌尽新声。蓬莱宫殿神仙景，浩荡春光，迢迢王城。烟收雨歇。天色夜更澄清。又千寻火树，灯山参差，带月鲜明。

金盏子令（催子）

东风报暖，到头嘉气渐融怡。巍峨凤阙，起鳌山万仞，争耸云涯。

梨园弟子，齐奏新曲，半是埙篪。见满筵、簪绅醉饱，颂鹿鸣诗。

瑞鹧鸪慢

海东今日太平天。喜望龙云庆会筵。尾扇初开明铺座，画帘高卷罩祥烟。

梯航交凑端门外，玉帛森罗殿陛前。妾献皇龄千万岁，封人何更祝遐年。

瑞鹧鸪慢（慢催子）

北暴东顽，纳款慕义争来。日新君德更明哉。歌咏载衢街。
清宁海宇无余事，乐与民同燕春台。一年一度上元回。愿醉万年杯。

寿延长

中腔令

彤云映彩色相映，御座中、天簇簪纓。万花铺锦满高庭。
庆敞需宴欢声。

千龄启统乐功成。同意贺、元珪丰擎。宝觞频举侠群英。
万万载、乐升平。

破字令

青春玉殿和风细。奏箫韵络绎。瑞绕行云飘飘曳。泛金尊、
流霞艳溢。

瑞日晖晖临丹宸。广布慈德宸遐迩。愿听歌声舞缀。万万
年、仰瞻宴启。

五羊仙

步虚子令

碧烟笼晓海波闲。江上数峰寒。佩环声里，异香飘落人间。
弭绛节、五云端。

宛然共指嘉禾瑞，开一笑、破朱颜。九重阙，望中三祝高
天。万万戴、对南山。

破字令

缥缈三山岛。十成岁、方分昏晓。春风开遍碧桃花，为东
君一笑。

祥飙暂引香尘到。祝高龄、后天难老。瑞烟散碧，归云弄暖，一声啸。

抛球乐

折花令(三台词)

翠幕华筵，相将正是多欢宴。举舞袖、回旋遍。罗绮簇宫商，共歌清羨。

当琼泛泛满金尊，莫惜沈醉，莫惜沈醉，永日长游衍。愿乐嘉宾，嘉宾式燕。

水龙吟令

洞天景色常春，嫩桠浅白开轻萼。琼筵镇起，金炉烟重，香凝锦幄。窈窕神仙，妙呈歌无，攀花相约彩云月转，朱丝网徐在，语笑抛球乐。

绣袂风翻凤举，转星眸、柳腰柔弱。头筹得胜，欢声近地，光容约。满座佳宾，喜听仙乐，交传觥爵。龙吟欲罢，彩云摇曳，相将归去寥廓。

小抛球乐令

两行花窈占风流。缕金罗带系抛球。玉纤高指红丝网，大家著意胜头筹。

清平令破子

满庭罗绮流粲。清朝画楼开宴。似初发芙蓉正烂熳。金尊莫惜频劝。

近看柳腰似折。更看舞回流雪。是欢乐、宴游时节。且莫催、欢歌声阕。

惜奴娇（曲破）

春早皇都冰泮。宫沼东风布轻暖。梅粉飘香，柳带弄色，瑞霭祥烟凝浅。正值元宵、行乐同民总无闲。肆情怀，何惜相邀，是处里容款。

无算。仗委东君遍。有风光、占五陵闲散。从把千金，五夜继赏，并彻春宵游玩。借问花灯，金琐琼瑰果曾罕。洞天里，一掠蓬瀛，第恐今宵短。

夸帝里。万灵咸集，永卫紫陌青楼，富臻既庶矣。四海升平，文武功勋盖世。赖圣主，兴贤佐，恁致理。

气绪凝和，会景新、方雅致。列群公锡宴在迓。上元循曲，胜古高超荣异。望绛霄、龙香飘飘旖旎。

景云披靡。露浥轻寒若水。尽是游人美。陌尘润、宝沈递。笑指扬鞭。多少高门胜会。况是。只有今夕誓无寐。

盛日凝理。羽巢可窥。阊苑金关启扉。烬连宵、宁防避。暗尘随马，明月逐人无际。调戏。相歌农李未阑已。

骋轮纵勒，翠羽花钿比织。并雅同陪，共越九衢遍，尽邀

逸。料峭云容，香惹风、萦怀袂。遍寓日几处瑶席绣帘。

莫如胜概，景压天街际。彩鳌举、百仞耸倚。凤舞龙骧，
满自红光宝翠。动霁色，余霞映，散成绮。

渐灼兰膏，覆满青烟罩地。簇宫花、撷荡纷委。万姓瞻仰，
苒苒云龙香细。共稽首，同乐与，众方纪。楼起霄宫里。五福
中天纷疑瑞。弦管齐谐，清宛振逸天外。万舞低回纷绕，罗纨
摇曳。顷刻转轮归去，念感激天意。

幸列熙台，洞天遥望圣梓。五夕华胥，鱼钥并开十二。
圣京难逢无此。人间动且经岁。婉婉踟躇，再拜五云迤邐。

万年欢慢

禁籞初晴，见万年枝上，工啭莺声。藻殿连云，萍曦高照
檐楹。好是帘开丽景，袅金炉、香暖烟轻。传呼道、天步来临，
两行拱引簪缨。看看筵敞三清。洞宝玉杯中，满酌犀觥。烂漫
芳葩，斜簪计快春情。更有箫韵九奏，簇鱼龙、百戏俱呈。吾
皇愿、永保洪图，四方长乐升平。

当今圣主，理化感四塞，永减狼烟。太平朝野无征战，国
内晏然。风调雨顺歌声喧。箫韶韵，九奏钧天，愿王永寿，比
南山、更奏延年。

倬妁要肢轻婀娜。学内样、深深梳果。如五凤双鸾相对舞，
随腰带、乍游琐。

莺幕、满头花，见绿杨摸藪。金阶献，一庭细管繁弦里，
谁把 抛过。

舞鸾双翥，香兽低。散瑞景微。投袂翩翩，趁拍迟迟。按
曲度瑶池。

曲遍新声，敛绣衣跪。彩袖高捧琼卮。指月中丹桂。春难老，祝仙寿维祺。

忆吹箫慢

血洒霜罗，泪薄艳锦，伊方教我成行。渐望断、斜桥暮柳，曲水归云。月暗风高露冷，独自才抵孤城。江南远，今夜就中，愁损行人。

愁人。旧香遗粉，空淡淡余暖，隐隐残痕。到这里、思量是我，忒煞无情。水更无情似我，催画航、一日三程。体烦恼，相见定约新春。

月华清慢

雨洗天开，风将去，极目都无纤翳。当遇中秋夜，静月华如水。素光晃、金屋楼台，清气彻、壶天地。此际。此无常三五，婵娟特异。

因念玉人千里。待尽把愁肠，分付沈醉。只恐难当漏尽，又还经岁。最堪恨、独守书帏，空对景、不成欢意。除是。问姮娥觅取，一枝仙桂。

感皇恩令

和袖把金鞭，腰如束素。骑介驴儿过门去。禁街人静，一

陈香风满路。凤鞋宫样小，鸾鸾露。

蓦地被他，回眸一顾。便是令人断肠处。愿随鞭蹬，又被名缰勒住。恨身不做个，间男好。

醉太平

厌厌闷着，厌厌闷着。奴儿近日听人咬，把初心忘却。

教人病深谩摧拙。凭谁与我分说破，仔细思量怎奈何，见了伏些弱。

还宫乐

喜贺我皇，有感蓬莱，尽降神仙。到乘鸾鹤御楼前。来献长寿仙丹。

玉殿阴暗前排筵会，今宵秋日到神仙。笙歌寥亮呈玉庭，为报圣寿万年。

清平乐

真言玉历成康。德睿宁安国中良。时和岁丰稔，民阜乐、何情泚、瑞木呈日五色，月华重有光。更羽鹤来仪凤凰。万邦乡。齐供明皇。祝遐龄、圣寿无疆。

荔子丹

斗巧宫妆扫翠眉。相唤折花枝。晓来深入艳芳里，红香散，露浥在罗衣。

盈盈巧笑咏新词。舞态画娇姿。袅娜文回迎宴处，簇神仙、会赴瑶池。

水龙吟慢

玉皇金阙长春，民仰高天欣载。年年一度定佳期，风情多感慨。绮罗竞交会。争折花枝两相对。舞袖翩翩歌声妙，掩粉面、斜窥翠黛。锦额门开彩架，球儿裳、先秀神仙队。融香拂席裳动，铿锵环佩。宝座巍巍五云密，欢呼争拜退。管弦众作欲归去，愿吾皇、成年恩爱。

太平年慢（中腔唱）

皇州春满群芳丽。散异香旖旎。鳌宫开宴赏佳致。举笙歌鼎沸。

永日迟迟和风媚。柳色烟凝翠。唯恐日西坠。且乐欢醉。

金殿乐慢（踏歌唱）

驾紫鸾骈。乘风缥缈游仙。红霓蘸影，近瑶池、鹤戏芝田。

临蕙圃、饮琼泉。上萧台、遥瞻九天。对真人蕊书亲授，已向
南宫住长年。

安平乐

开琼筵，庆佳辰。彩帘当中月华明。笙歌乐、如梦幻，望
丹山彩凤，飞舞遶庭。

遐艳异、寿杯同斟。拊舞讴歌浹欢声。方今永永太平。更
衍多男，共集锦昌寿恩。

爱月夜眠迟慢

禁鼓初敲，觉六街夜悄，车马人稀。暮天澄淡，支收雾卷，
亭亭皎月如珪。冰轮碾出遥空，无私照临千里。最堪怜、有情
风，送得丹桂微。

唯愿素魄长圆，把流霞对饮，满泛觥卮。醉凭栏处、赏玩
不忍、辜却好景良时。清歌妙舞连宵，踟蹰懒入罗帏。任佳人、
尽嗔我，爱月每夜眠迟。

惜花春起早慢

向春来，睹林园，绣出满槛鲜萼。流莺海棠枝上弄舌，紫
燕飞绕池阁。三眠细柳，垂万条、罗带柔弱。为思量，昨夜去
看花，犹自斑驳。须拌尽日樽前，当媚景良辰，且恁欢谑。更

阑夜深秉烛，对花酌、莫辜轻诺。邻鸡唱晓，惊觉来、连忙梳掠。向西园、惜群葩，恐怕狂风吹落。

千秋岁令

想风流态，种种般般媚。恨别离时大容易。香笺欲写相思意。想思泪滴香笺字。画堂深，银烛暗，重门闭。

似当日、欢娱何日遂。愿早早相逢重设誓。美景良辰莫轻拌，鸳鸯帐里鸳鸯被。鸳鸯枕上鸳鸯睡。似恁地，长恁地，千秋岁。

风中柳令

爱鬓云长，惜眉山，寻乍相见，一时眠起。为伊尚验，未欲将言相戏。早樽前、会人深意。

霎时间阻，眼儿早巴巴地。便也解、封题相寄。怎生是款曲，终成连理。管胜如、旧来识底。

汉宫春慢

春日迟迟，称游人、尽日赏燕芳菲。新荷泛水，渐入夏景云。炎光易息，又早是、零落风西。白露点，黄金菊蕊，朝云雪霏霏。

光阴迅速如飞。邀酒朋共欢，且恁开眉。清歌妙舞，更兼

玉管瑶簫。人生易老，遇太平、且乐嬉嬉。莫待解，朱颜顿觉，年来不似当时。

花心动慢

暑逼芳襟，甚全无因依，便教人恶。赖有枕溪百尺，朱楼映日，数重香箔。驮冰围定犹嫌暖，红日绽、雨收残脚。漫试取，红绡弄雪，碎琼推削。妆罢低云未绉。叶叶地仙衣，剪轻裁薄。汗洒泪珠，急捧金盘。向前颗颗盛却。凤凰双扇相交扇，越攪就、越腰肢弱。待做个、青纱罩儿罩著。

行香子慢

瑞景光融。换中天霁烟、佳气葱葱。皇后崇壮丽，金碧辉空。彤霄外、瑶殿深处，帘卷花影重重。迎步辇、几簇真仙，贺庆寿新宫。

方逢。圣主飞龙。正休盛大宁，朝野欢同。何妨宴赏，奉宸意慈容。韶音按、露觞将进，薰炉飘馥香浓。长愿承颜，千秋万岁，明月清风。

雨中花慢

宴阁倚栏郊外，乍别芳姿，醉登长陌。渐沈联绵离绪，淡薄秋色。宝马频嘶，寒蝉晚、正伤行客。念少年踪迹。风流声

价，泪珠偷滴。

从前与、酒朋花侣，镇赏画楼瑶席。今夜里、清风明月，水村山驿。往事悠悠似梦，新愁冉冉如织。断肠望极。重逢何处，暮云凝碧。

迎春乐令

神州丽景春先到。看看是、韶光早。园林深处东风过，红杏里、莺声好。

漠漠青烟远远道。触目是、绿杨芳草。莫惜醉重游，逡巡又、年华老。

西江月慢

烟笼细柳，映粉墙、垂丝轻袅。正几稍暖律风和，装点后苑台沼。见乍开、桃若燕脂染，便须信、江南春早。又数枝、零乱残花，飘满地、未曾扫。

幸到此、芳菲时渐好。恨间阻、佳期尚杳。听几声、云里悲鸿，动感怨愁多少。谩送目、层阁天涯远，甚无人、音书来到。又只恐、别有深情，盟言忘了。

游月宫令

当今圣主座龙楼，圣寿应天长，实钱喷香烟，玄宗游月宫。

海晏河清，盛朝侍，群臣喜呼万岁，万人民，开乐业，愿吾皇、增福寿。

桂枝香慢

暖风迟日，正韶阳时节，淑景、明媚。一霎雨打红桃，花落满地。 闺独坐帘高卷，因春容懒临香砌。自从檀郎，金门献赋，不绝朱翠。

闻上国、才有书回，应贤良明庭，已擢高第。拆破香笺，离恨却成新喜。早教宴罢琼林苑，愿归来、永同连理。这回良夜，从他桂枝，香惹鸳被。

庆金枝令

莫惜金缕衣。劝君惜、少年时。花开堪折直须折，莫待折空枝。

一朝杜宇才鸣后，便从此、歇芳菲。有花有酒且开眉。莫待满头丝。

百宝妆

一抹弦器，初宴画堂，琵琶人把当头。髻云腰素，仍占绝风流。轻拢慢捻，生情艳态，翠眉黛颦，无愁谩似愁。变新声曲，自成获索，共听一奏梁州。

弹到遍急敲颖，分明似语，争知指面纤柔。坐中无语，惟断续金虬。曲终暗会王孙意，转步莲、徐徐卸凤钩。捧瑶觞，为喜知音，劝佳人、沉醉迟留。

满朝欢令

未央宫阙丹霞住。十二玉楼挥锦绣。云开雉扇卷珠帘，烟粉龙香添瑞兽。

瑶觞一举箫韶奏。环佩千官齐拜首。南山翠应北华高，共献君王千万岁。

天下乐令

寿星明久。寿曲高歌沈醉后。寿烛荧煌。手把金炉，燃一寿香。满斟寿酒。我意殷勤来祝寿。问寿如何。寿比南山福更多。

感恩多令

罗帐半垂门半开。残灯孤月照窗台。北斗渐移天欲曙、漏更催。

携物劝君离别酒，泪和红纷滴金杯。呜咽问君今夜去、几时回。

解佩令

脸儿端正。尽儿峭俊。眉儿长、眼儿入鬓。鼻儿隆隆，口儿小、舌儿香软。耳朵儿、就中红润。项如琼玉，发如去鬓。眉如削、手如春笋。6041 儿甘甜，腰儿细、脚儿去紧。那些儿、更休要问。

沁园春

道过江南，泥墙粉壁，石具在前。述某州某县，某乡某里，住何人地，佃何人田。气象萧条，生灵憔悴，经略从来未必然。惟何甚，为官为已，不把人怜。

思量几许山川。况土地分张又百年。正西蜀 6357 岩，云迷鸟道，两淮清野。日警狼烟。宰相弄权，奸人冈上，谁念干戈未息肩。掌大地，何须经理，万取千焉。

糖多令

天上谪星班。青牛初度关。幻出蓬莱新院宇。花外竹，竹连山。

轩冕傥来闲。人生闲最难。算真闲、不到人间。一半神仙先占取，留一半、与公闲。

长相思

去年秋。今年秋。湖上人家乐复尤。西湖依旧流。
吴循州。贾循州。十五年前一转头。人生放下休。

祝英台近

掩琵琶，临别语，把酒泪如洗。似恁春时，仓卒去何意。
牡丹恰则开园，荼蘼厮句，便下得、一帆千里。

好无谓。复道明日行呵，如何恋得你。一叶船儿，休要更
沈醉。后梅子青时，杨花飞絮，侧耳听听，喜鹊 哩。

汉宫春

横吹声沈，倚危楼红日，江转天斜。黄尘边火瀕洞，何处
吾家。胎禽怨夜，半乘风、玄露丹霞。先生笑，飞空一剑，东
风犹自天涯。

情知道山中好，早翠罽含隐，瑶草新芽。青溪故人信断，
梦逐飙车。乾坤星火，归来兮、煮石煎砂。回首处、幅巾蒲帐，
云边独笑桃花。

忆秦娥

烟漠漠。水天摇荡蓬来阁。蓬莱阁，朱甍碧瓦，半浸寥廓。

三山谩有长生药。茫茫云海风涛恶。同涛恶。仙槎不见，暮沙潮落。

减字木兰花（木芙蓉）

舞台歌院。雨后西风寒翦翦。翠掩屏风。花与残霞一样红。宫茵隐绣。香软巧随莲步绂。不怕露寒。日日拚教醉画栏。

虞美人（极目桃观芙蓉）

秋深犹带秋初热。未放秋香发。爱他楼下木芙蓉。妆罢三千美女、出唐宫。

西湖虽小风光胜。分得钱塘景。这些林木这些山。恰似三贤堂后、凭阑干。

念奴娇（咏剪花词）

晓来雨过，见三点两点，催花开却。满目园林如锦绣，低亚阑干西角。魏紫风流，姚黄妖艳，桃李皆粗俗。金刀翦下，燕莺窥妒惊愕。

雅称似玉人人，淡妆才罢，粉衬胭脂薄。蝉翼轻笼云鬓巧，斜插一枝红萼。睡足杨妃，醉沈西子，娇因铅华落。多情风蝶，晚来犹更随著。

望江南

左右字，从古不会闻。未必书生能点墨，安知荫子不文。尔汝今朝。除去了，多谢圣明恩。既不可高谈阔论，又不敢藐视同群。但请换头巾。昔之任子不敢儒巾。

朝中措（会郡西齐，欢甚，以词示，调朝中措）

与君同是饱齑盐。先达后何淹。任玉东西醉倒，明朝病酒厌厌。一年三月，风池春满，雁塔名添。记取西风桂影，一枝先上银蟾。

忆秦娥

花溪侧。秦楼夜访金钗客。金钗客。江梅风韵，野棠颜色。尊前醉倒君休惜。不成去后空相忆。空相忆。山长水远，几时来得。

倚西楼

禁鼓初传时下打。虚过清风明月夜。眼如鱼目几会乾，心似酒旗终日挂。

银汉低垂星斗斜。院宇空寥烛卸。西楼萧洒有谁知，教我

独自上来、独自下。

捣练子（春恨）

云鬓乱，晚妆残。带恨眉儿远岫攒。斜托香腮春笋懒，为谁和泪倚阑干。

长相思

花满枝。柳满枝。眼底春光似旧时。燕归人未归。
泪沾衣。酒沾衣。烦恼长多欢事稀。此情风月知。

乌夜啼

都无一点残红。夜来风。底事东君归去、太匆匆。
桃花醉。梨花泪。总成空。断送一年春在、绿阴中。

乌夜啼

一弯月挂危楼。似藏钩。醉里不知黄叶、报新秋。
征鸿断。归云乱。远峰愁。愁见绿杨凝恨、在江头。

捣练子

林下路，水边亭。凉吹水面散余醒。小藤床、随意横。
暗记得、旧时经。翠荷闹雨做秋听。恁时节、不怕听。

生查子（闺情）

闲倚曲屏风，试写相思字。不道极多情，却是浑无思。
笑这短墙阴，抛个青梅子。苔上印钩弯，邂逅难忘此。

贺圣朝影（冬）

雪满长安酒价高。度寒宵。身轻不要鹑鹑袍。醉红娇。
花月暗成离别恨，梦无寥。起来春信惹梅梢。又魂消。

莫思归

花满名园酒满觞。且开笑口对农芳。秋千风暖鸾钗钿，绮
陌春深翠袖香。莫惜黄金贵，日日须教赏酒尝。

点绛唇

蹴罢秋千，起来慵整纤纤手。露浓花瘦。薄汗轻衣透。

见客入来，袜划金钗溜。各羞走。倚门回首。却把青梅嗅。

减字木兰花

春融酒困。一寸横波千里恨。著处芳菲。蝶与莺情醉自迷。
欹云妥翠。冷落金屏山十二。低抱琵琶。月向黄昏日又斜。

菩萨蛮（讽词）

昔年曾伴花前醉。今年空洒花前泪。花有现荣时。人无重
见期。

故人情义重。不忍营新宠。日月有盈亏。

妾心无改移。

谒金门

山无数。遮断故人何处。见说阑舟独系住。溪边红叶树。

忆著前时欢遇。惹起今番愁绪。怎得西风吹泪去。阳台为
暮雨。

更漏子

解语花，断肠草。谙尽风流烦恼。欢会少，别离多。此情

无奈何。

帐前灯，窗间月。记得那时节。绣被剩，画屏空。如今在梦中。

镜中人

柳烟浓，梅雨润。芳草绵绵离恨。花坞风来几阵。罗袖沾春粉。

独上小数迷远近。不见浣溪人信。何处笛声飘隐隐。吹断相思引。

眼儿媚

惨云愁雾罩江天。呵手卷帘看。濛茸柳絮，万千蝴蝶，飞过危栏。后庭一树瑶华缀，零乱暗香残。今番桂影，也应寒重，不放新弯。

眼儿媚

忆从溪上得相逢。樽酒两心同。梅缄香雪，竹摇寒月，柳探春风。而今总是消魂处，冷落半床空。梦迷狂蝶，喜占乾鹊，愁望飞鸿。

眼儿媚

平生几度怨长亭。不似这番深。霜收水瘦，风流帆饱，怎忍轻分。栏干倚遍慵归去，独自个黄昏。荷横钗股，柳垂裙带，总是销魂。

乌夜啼（西湖）

水温汀洲新绿，云开崦嶂微青。残红不见成阴后，鶗鴂寂无声。笑傲坡时一梦，风流杜牧三生。西湖依旧人中意，来去竟难凭。

与团圆

绞绡雾縠，没多重数，紧拟偷怜。孜孜觑着，算前生、只结得眼因缘。

眼是心媒，心为情本，里外勾连。天还有意，不违人愿，与个团圆。

花前饮

雨馀天色渐寒渗。海棠绽、胭脂如锦。告你休看书，共我花前饮。皓月穿帘未成寝。篆香透、鸳衾双枕。似恁天色时，你道是、好做甚。

转调贺圣朝

渐觉一日，浓如一日，不比寻常。若知人、为伊瘦损，成病又何妨。

相思到了，不成模样，收泪千行。把从前泪，来做水流，也流到伊行。

西江月（邮亭壁上词）

昨夜轺车宿处，乱山深锁邮亭。烟溪霜叶颤秋声。

不管愁人不听。枕冷安排难稳，衾寒重叠犹轻。凭谁说与那人。报道衾寒枕冷。

望江南（论新及第友人）

这凝螭，休恁泪涟涟。他是霸陵桥畔柳，千人攀了到君攀。刚甚别离难。荷上露，莫把作珠穿。水性本来无定度，这边圆了那边圆。终是不心坚。

鹧鸪天（车中）

紫陌朱轮去似流。丁香初结小银钩。凭阑试问秦楼路，瞥

见纤纤十指柔。

金约腕，玉搔头、尽教人看却佯羞。欲题红叶无流水，别是桃源一段愁。

鹧鸪天（离别）

镇日无心扫黛眉。临行愁见理征衣。樽前只恐伤郎意，阁泪汪汪不敢垂。

停宝马，捧瑶卮。相斟相劝忍分离。不如饮待奴先醉，图得不知郎去时。

遍地花（妓行七·小石调）

元是竹林旧伴侣。去人日、偶相遇。笑卢仝、狂怪尝茶，问子建、时成几步。忆去年、乞巧同欢，把琴弦、细细与说。伤你爱四勾三，生下五男二女。

红窗迥

富春坊，好景致。两岸尽是、歌姬舞妓。引调得、上界神仙，把凡心都起。

内有丙丁并壬癸。这两尊神、为你争些口气，火星道，我待逞些神通，不怕你是水。

小重山

络绎声残织翠丝。金风剪不断、雁来时。梦回织泪寄征衣。寒到早，应怪寄衣迟。

心事有谁知。黄昏常立尽、暗萤飞。秋来无处不生悲。情脉脉，月转辘轳西。

撷芳词

风摇荡，雨濛茸。翠条柔弱花头重。春衫窄。香肌湿。记得年时，共伊会摘。

都如梦。何曾共。可怜孤似钗头凤。关山隔。晚云碧。燕儿来也，又无消息。

拨棹子

烟姿媚，冰容薄。芳蕖嫩、隐映新萍池阁。撷英人去后，清香微绽，透真球帘幕。

似无语含情垂彩佩，戏芳阴，渐许纤鲜相托。西风直须爱惜，看看浓艳，伴秋光零落。

香山会

向神前发愿，烧香做咒。断了去、娼家吃酒。果子钱早是遭他毒手。更一个、瓶儿渗漏。

才斟两盏三盏，早斟不勾。又添和、薄漓半斗。奴哥有我，奴哥道有。有我时、当面烫酒。

品令

急雨惊秋晓。今岁较、秋风早。一觴一咏，更须莫负、晚风残照。可惜连花已谢，莲房尚小。

汀苹岸草。怎称得、人情好。有些言语，也待醉折，荷花向道。道与荷花，人比去年总老。

御街行

霜风渐紧寒侵被。听孤雁、声嘹唳。一声声送一声悲，云淡碧天如水。披衣起。告雁儿略佳，听我些儿事。塔儿南畔城儿里。第三个、桥儿外。濒河西岸小红楼，门外梧桐雕砌。请教且与，低声飞过，那里有、人人无寐。

惜寒梅

看尽千花，爱寒梅暗与、雪期霜约。雅态得肌，迥有天然淡泊。五侯园囿姿游乐。凭阑处、重开绣幕。秦娥妆罢，遥相纵，艳过京洛。

天涯再见素萼。似凝然向人，玉容寂寞。江上飘零，怎把芳心付托。那堪风雨夜来恶。便减动、一分瘦削。直须沈醉，尤香殢云，莫待改落。

古阳关

渭城朝雨，一霎裊轻尘。更洒遍、客舍青青。弄柔凝、千缕柳色新。更洒偏，客舍青青，千缕柳色新。

休烦恼。劝君更尽一杯酒，人生会少。自古富贵功名有定分。莫遣容仪瘦损。休烦恼，劝君更尽一杯酒，只恐怕、西出阳关，旧游如梦，眼前无故人。只恐怕、西出阳关，眼前无故人。

永遇乐（寄所思新第者）

孤衾不暖，静闻银漏，欹枕难稳。细想多情，多才多貌，总是多愁本。而今幽会难成，佳期顿阻，只恁萦方寸。知他莫是，今生共伊，此欢无分。

寻思断肠肠断，珠泪湿了，依前重温。终待临歧，分明说兴，我这厌厌闷。得伊知后，教人成病。万种断也无限。只恐他、恁不分晓，谩劳瘦损。

一萼红

断云漏日，青阳布，渐入融和天气。糝缀天桃，金绽垂杨，妆点亭台佳致。晓露染、风裁雨晕，是牡丹、偏称化工美。向此际会，未教一萼，红开鲜蕊。

迤邐。渐成春意。放秀色妖艳，天真难比。粉惹蝶翅，香上蜂须，忍把芳心萦碎。争似便，移归深院，将绿盖青帋护风日。恁时节，占断兴、偎红倚翠。

霜叶飞

故宫秋晚余芳尽，轻阴闲淡池阁。风泥银暗玳纹花，卷断肠帘幕。渐砌菊、遗金谢却，芙蓉才共清霜约。半弄蕊、冰绡波浅，指胭脂、翠琼连并雕萼。

应是会倚东君，纵艳姿轻盈，映损丹杏红叶。旋成深妒，判与西风，任纵开落。况衰晚、渊民意薄。重阳羞对吟酌。待说与江梅，早傅粉匀香，慰伊萧索。

檐前铁

悄无人，宿雨厌厌，空庭乍歇。听檐前、铁马戛叮当，敲破梦魂残结。丁年事，天涯恨，又早在心头咽。谁怜我、绮帘前，镇日鞋儿双趺。今番也、石人应下千行血。拟展青天，写作断肠文，难尽说。

妖木笪

洒入愁肠，谁信道、都做泪珠儿滴。又怎知道恁他忆。再相逢、瘦了才信得。

林钟商小品

正天气凄凉，鸣幽砌，向枕畔、偏恼愁心，尽夜苦吟。

林钟商小品

戴花殢酒，酒泛金樽，花枝满帽。笑歌醉拍手，戴花殢酒。

鹧鸪天（佳人）

全似丹青搢染成。更将何物斗轻盈。雪因舞态羞频下，云为歌声不忍行。

螺髻小，风鞋轻。天边斗柄又斜横。水晶庭柱琉璃帐，客去同谁看月明。

甘露滴乔松

沙堤露近，喜五年相遇，朱颜依旧。尽道名世半千，公望三九。是今日、富民候。早生聚、考堂户口。谁欵兼致，文章

燕许，歌辞苏柳。

更饶万卷图书，把藤笈芸编，篇题青镂。一经传得，旧事韦平先后。试衮衮、数英游。问好事、如今能否。鞠车正满，自酌太和春酒。

满江红

雪共梅花，念动是、经年离拆。重会面、玉肌真态，一般标格。谁道无情应也妒，暗香埋没教谁识。却随风、偷入傍妆台，萦帘额。

惊醉眼，朱成碧。随冷暖，分青白。叹朱弦冻折，高山音息。怅望关河无驿使，剡溪兴尽成阵迹。见似枝而喜对杨花，须相忆。

念奴娇（温州平阳灵峰摩崖词）

我眷兹石，嵯峨天然。爰赋斯作，与山俱传。

天工谬巧，恁平地、推出峻嶒岩壁。虎跃龙骧飞凤翥，疑道补天余石。洞壑穿云，来今往古，知是谁开辟。千年兰若，林峦隐映金碧。

我兴邱壑尤长，謁来此境，惯蹑登山屐。适意人生随处好，何必岷南阳峰。谢傅东山，裴公绿野，俯仰俱阵迹。何如轻举，廓寥云外横笛。

刘清之

青玉案（子寿父）

江南十月春风早。见枝上、梅英小。爱日初升清雾晓。绣筵中启，星图高挂，膝下斑衣烧。

今年献寿多欢笑。弄玉新将二雏好。此曲尊前何所祷。十分康乐，十分强健，一树壮棒老。

崔 中

沁园春

自己阳生，正是中虚，静极动时。默地雷微震，冲开玉户，天心朗彻，放下帘帟。真火冲融，灵泉复凑，不昧谷神何险危。自然妙，若三川龙跃，九万鹏飞。

中中二土成圭。意眷恋浓如母护儿。这恍惚真容，不空不色，窈冥妙象，无识无知。命住丹圆，全真体道，奋志精修休自迟。收功了，把三才全理，一贯全归。

何鉏翁

满庭芳

二气旋还，三宫升降，往来於是无穷。透关神水，铅汞过三峰，返复周流八脉，戊己炼、阴虎阳龙。凝情处，金光朗朗，身外见形容。

灵光，真造化，天机深远，推测难通。算利名酒色，恰似秋风。大道玄炉进火，三田内养出神功。功成后，金书来诏，平步赴瑶宫。

无名氏

醉落魄

红牙板歇。韶声断、六么初彻。小槽酒滴真珠竭。紫玉瓯圆，浅浪泛春雪。

香芽嫩蕊清心骨。醉中襟量与天阔。夜阑似觉归仙阙。走马章台，踏碎满街月。

满江红

浪蕊浮花，当不住、晚风吹了。微雨过，池塘飞絮，一帘晴画。寂寂山光春似梦，依依草色薰如酒。近新来、拍上小红楼，凭阑眺。

心事阻，诗情少。东皇去，良辰杳。想故园闲趣，水村烟柳。此日鹃声天不管，当年燕子人何有。叹江南、离别酒初醒，频回首。

西江月（赠画士）

三级掀腾波浪，一堂庆会风云。快乘霹雳化龙门。头角人中有分。

谁状个中佳致，须还笔扫千军。是他画手亦通神。同向来春奋迅。

西江月（赠术上）

身禀五行正气。此心如鉴光明。不从龟鹤问年龄。万物有衰有盛。

多谢道人著眼，我於身世常轻。任从性巧与心灵，此事从来分定。

谒金门（赠歌妓）

真个美。水墨观音难比。闻道观音谁不害。见来须顶礼。

徐步金莲满地。那更兰心聪慧。一曲清歌离皓齿。梁尘金莲飞不已。

水龙吟（寿李府尹）

邦人前世条缘，福星遇得长庚李。光芒初照，一声霹雳，重开天地。试问年来，民间安枕，伊准之赐。有青天白日，和风甘雨，公如父、氏如子。

今度虎牌重到，感皇恩、欢声各里。袞归未晚，纱笼人物，御屏名字。碧嶂长春，清江不尽，棠阴堪憩。愿年折把酒，庆公初度，祝公千岁。

永遇乐（四首）

个个修行，人人咽纳，谁悟真道。曲径多岐，旁门小法，误了人多少。容成岂是，神仙究竟，采药谩多炉灶。忽一朝，脱却桶底，性根坏倒。

争如内观，无为清静，学取本来壮老。匹配阴阳，抽添铅汞，八卦为端表。人生如梦，流年似箭，回首也须闻早。贪迷恋，春花秋月，何时了。

永遇乐

万法由心，应观法界，一切心造。老子瞿昙，同归去揆，不离心是道。自从识得，坎离交济，炼药粗知昏晓。云腾雨飞，蟾宫兔走，丹阙更无烦恼。

气中真液。液中真气，和合不多不少。种出黄芽，炼成赤水，龙虎交围绕。七返九还，工夫到后，还我旧时年少。待三千、功圆行满，恁时是了。

永遇乐

学道修心，存神炼性，直要轻举。补脑还精，流水不腐，户枢终不蠹。日魂月魄，搏归炉鼎，真炁自然流聚。把心猿缚住，意马追回，迥无尘虑。

定中明有，阳龙阴火，水炎透时为度。八段奇文，千口活法，向上有一路。吕公高尚，未离人世，有分也须相遇。约十洲三岛，骖鸾跨鹤，大家同去。

永遇乐

养水养精，养神养血，先须养气。日月阴阳，六爻八卦，细看参同契。灵区灵宝，千言万语，不过坎离两字。向昆仑顶上，返本還元，要明终始。

一身虽小，如同天地，八万四千余里。玄牝之门，生生万化，都在冲和内。此真真外，别无真谛，方信道一而已。异时见钟吕，如有未明，请师指示。

渔家傲（四首）

至道不遥只在迩。毫厘差失如千里。道是难来元却易。如相契。一超直入如来地。

水火交时为既济。三尸六贼都回避。只此长生仍久视。身口意。化成一点冲和气。

渔家傲

神是性兮气是命。神不外驰气自定。幸有崔公入药镜。如究竟。全真固蒂归根静。

主客内明方外应。灵台粲发天光莹。两个壶中一片景。急修省。莫待临渴去掘井。

渔家傲

精养灵根神守气。天然子母何曾离。书夜六时长在意。三田内。温温天地中和水。

十二楼前白雪腻。九宫台畔黄芽遂。日月山头朝上帝。神光起。腾身直出烟霄外。

渔家傲

我有光珠无买价。光明常照芝田下。更没之乎并者也。知音寡。世间谁是能行者。

一万精光浑守舍。四百四病都齐罢。透出火龙归造化。回仙驾。更无一点尘随马。

促拍满路花（三首）

抱元能守一，四大自轻安。心中须返照，几曾闲。金乌衔耀，飞入烂银盘。心心心是道，只在心心，更于何处求仙。

又何须衣冕，燕处欲超然。荣华能几日，便凋残，修真甚易，积行累功难。劝君强为善，五浊三途，便为岛云神仙。

促拍满路花

人能常清静，天地悉皆归。一真含众妙，入希夷。昭文不会，气候有成蹊。妄心寂灭尽，困睡饥餐，更无作用施为。

自然，炉鼎就，光彩透帘帏。玉池神水涌，上生肥。如人饮水，冷暖自家知。自家性命事，自家了得，自家性命便宜。

促拍满路花

若论修养事，知有几多门。谛当归宿睡，是灵根。至真至道，简易合乾坤。坎离并水火，止是筌蹄，粹然一点长存。

个中如荐得，悟了五千言。金晶飞肘后，透昆仑。清江九曲，一棹破烟昏。水击三千里，九万鹏程，化成元是冥鲲。

沁园春

一粒金丹，大如黍火，定中降胎。运阴阳根，本东龙西虎，结凝金水，择地深栽。九载无亏，三田功满，卦气周圆炉鼎开。偷元化，用自然宗祖，全在灵台。

真才。休恋尘埃。况颖悟明堂婴未孩。幸准滨相遇，灵丹付了，亲留玄旨，期进仙阶。此去何时，水云高会，更上烟霞

岐路哉。人间世，任王侯贵显，同委蒿莱。

吕 严

失调名

鼎里坎离，壶中天地，满怀风月，一吸虚空。尘寰里，何人识我，开口问鸿蒙。云中。三弄笛，岳阳楼外，天远霞红。笑骑黄鹤，暂过海陵东。拂袖呵呵归去，銮和玉佩，风响乔松。君若要，知吾踪迹，试与问仙翁。

曹休齐

贺新郎（海棠次刘草窗韵）

旧事凭谁诉。记锦宫、初试农妆，前身天女。玉辇行春娇待夜，浴殿温泉轻注。一点点、猩红啼吐。绣幄篝香春睡足，细温存，怕遣惊风雨。春梦散，黯凝伫。

韶华寂寞今何许。想故宫、柳亦凝愁，倚栏停舞。欲趁啼鹃归月下，可奈川回山阻。倩万里、鹄来衔子。工部无诗虽结恨，道无香、更恨痴人语。拌绝艳，付黄土。

李之仪

临江仙（咏藏春玉）

青润奇峰名韞玉，温其质并琼瑶。中分瀑布写云涛。双峦呈翠色，气象两相高。

珍重幽人诚好事，绿窗聊助风骚。寄言俗客莫相嘲。物轻人意重，千里赠鹅毛。

叶梦得

水调歌头

何处难忘酒，朱夏日偏长。湖山地胜潇湘，十里芰荷香。
柳外新蝉惊晚，楼上疏帘重翠，簟枕晚生凉。纨扇摇霜月，曲
水泛流觴。

流年去，今古梦，几千场。虚名浮利，输却几许好时光。
幸有碧云深处，存取朱颜绿鬓，流落又何妨。莫厌人间世，频
入醉中乡。

净 端

苏幕遮

遇荒年，每常见。就中今年，洪水皆淹偏。父母分离无可恋。幸望豪民，救取壮家汉。最堪伤，何忍见。古寺禅林，翻作悲田院。日夜烧香频 ，祷告皇天，救护开方便。

善 珍

浪淘沙（寄剑阁）

相对两衰翁。身似枯蓬。分飞吹聚谢天风。零落交游无一个，五十年中。生客语藏锋。不答阳聋。心期难话与儿童。其结庵招猿鹤侣，烟锁云封。

浪淘沙（九日登钓台怀思溪旧游）

七十二年翁。曾客吴中。清游占断水晶宫。几度藕花归棹晚，月烟钟。追记已陈踪。回首空濛。凭高荒草夕阳同。欲同谢公歌舞地，落叶鸣蛩。

望梅词

寸阴堪惜。趁身强健去，结茅苍壁。错料事，临老方知，国师与高僧，二途俱失。识字吟诗，敌不得、死生何益。看寒山着语，李杜也输，莫道元白，千年过如瞬息。共飞鸿缥缈，

沈没空碧。问懒瓚、因甚遭逢，芋魁亦联翩，著名金石。遗臭流芳，老子勿、许多心力。旋消磨、数百瓮齏，掩关入寂。

李 彭

渔歌

(十首·颂尊宿付杲山人·汾阳)

南院嫡孙唯此个。西河狮子当门坐。绢扇清凉随手簸。君知么。无端吃棒休寻过。

渔歌

掌握千差都照破。石霜这汉难关锁。水出高原酬佛陀。哩6179 逻。须弥作舞虚空和。

渔歌

孤硬云峰无计较。大愚滩上曾垂钓。佛法何曾愁烂了。桶箍爆。通身汗出呵呵笑。

渔歌

万古黄龙真天矫。斩背后勘破台山媪。佛手驴蹄人不晓。无关窍。胡家一曲非凡调。

渔歌

宝觉禅河波浩浩。五湖袖子来求宝。忽竖拳头宜速道。茫然讨。难逃背触君须到。

渔歌

贬剥诸方真净老。顶门眼正形枯槁。一点深藏人莫造。由来妙。光明烜赫机锋峭。

渔歌

积翠十年丹凤穴。当时亲得黄龙钵。制电之机难把撮。真奇绝。分明水底天边月。

渔歌

骂佛骂人新孟八。是非窟里和身拶。不惜眉毛言便发。门

庭滑。红炉大能鞦生杀。

渔歌

绝唱灵源求和寡。先牛寻得西家马。顾陆笔端难拟画。千林谢。吟风摆雪真萧洒。

渔歌

选佛堂中川_{<++磊>}苴。衲僧卑孔头垂下。独秀握业无一把。杖头挂。从教西海禅徒讶。

无际道人

渔家傲

七坐道场三奉诏。空花水月何时了。小玉声中曾悟道。真堪笑。从来漫得儿孙好。辩涌海潮声浩浩。明如皓月当空照。飞锡西归云杳渺。巴猿啸。大家唱起还乡调。

张伯端

解佩令

修行之士，功勤不小。识五行、逆顺颠倒。妙理玄玄。玉炉中、龙蟠虎踞，金鼎内、炼成至宝。阳神离体，杳杳冥冥，刹那间、游偏三岛。出入纯熟，按捺住、别寻玄妙。合真空，太虚是了。

朱涣

白云封断仙岩路，重重洞门深窈。翠竹笼烟，苍崖溅瀑，古木阴森回抱。坛空不老。锁一片莓台、几丛莎草。试把桃源，较量风景是谁好。

乘鸾人去已久，只今惟有，鹤飞猿啸。树拥香幢，泉敲玉佩，疑是群仙重到。尘氛可笑。久志慕丹台，梦思蓬岛。愿把英游，细参梨与枣。

陈 纪

满江红

揽辔埋轮，算不负、苍髯如戟。从争看、横秋一鹗，轩然健翼。只乎天行日月，寸怀与物同苏息。到干今、天定瘴云开，伊谁力。云霄路，金门客。念往事，情何极。把行藏细说，应无惭色。红气上横牛斗剑，梅花不软心肠石。愿此行、珍重不赀躯，无瑕璧。

念奴娇

（钓鳌台用东坡赤壁韵。台在亭头海滨）

凭高眺远，见凄凉海国，高秋云物。岛屿沈洋萍几点，漠漠天垂四壁。粟粒太虚，蜉蝣天地，怀抱皆冰雪。清风明月，坐中看我三杰。为爱暮色苍寒，天光上下，舣棹须明发。一片玻璃秋万顷，天外去帆明灭。招手仙人，拍肩居士，散我骑鲸发。钓鳌台上，叫云断残月。

无名氏

鹧鸪天

抛却功名弃却诗。从教身染气球泥。侵晨打 宣齐云会，
际暮演筹魄归。

园苑裏，粉墙西，佳人偷揭绣帘窥。高侵云汉垂肩久，低
拂花梢下脚迟。

西江月

健体安身可美，喜笑化食堪夸。更言一事实为佳。肥风瘦
癆都罢。

兼且时光似箭，更加景色难赊。名园等处乐奢华。一任佳
人玩耍。

鹧鸪天

不贪名利乐优游。收转心猿踢气球。日享三餐朋友饭，夜

眠一宿玉人楼。

真快活，度春秋。从他鸟兔走无休。或时戏耍名园裏，或把长竿湖上游。

西江月

蹴鞠场中年少，秋千架上佳人。三三两两趁芳辰。玩赏风光美景。

日暖风和明媚，更加花草香馨。红颜移步出闺门，俭揭绣帘相认。

鹧鸪天

虎掌葵花一锭银。全凭巧匠弄精神。裹欣外跨知高下，逼拐挑尖月一轮。

欺强汉，灭村人。其间奥妙岂堪论。不问贵戚并公子，曾与区区并马行。

鹧鸪天

巧匠园缝异样花。身轻体健实堪夸。能令公子精神爽，善诱王孙体义加。

宜富贵，吴奢华。一团和气遍天涯。宋祖昔日皆曾习，占断风流第一家。

西江月

请知诸郡子弟，尽是湖海高朋。今年神首赛齐云。别是一般风韵。

来时向前能参圣，然后疏上挥名。香金留下仿花人。必定气球取胜。

鹧鸪天

轩辕起置号齐云。社祖西川妙道君。亲自裁成就，万古流传作玩珍。

江湖客，听原因。今朝出狱见其真。来到圣前撞案，诚将实艺向前呈。

苏幕遮

水中金，冲牛斗。玉锁金关，护法灵童守。赤水丹台龙虎走。万象森罗，勃勃投珠口。

饮灵源，明火候。太乙护开，丹熟神光透。浮名浮利终不久。下手速修。穷取无中有。